

瑜伽師地論科句披尋記卷第八十一

彌勒菩薩說

唐三藏沙門玄奘奉詔譯

韓清淨科記

攝釋分之上

甲三、攝釋分² 乙一、結前生後

如是已說釋攝決擇。云何攝釋？

乙二、略廣標釋² 丙一、喩柁南標

總喩柁南曰：

體釋文義法 起義難次師 說眾聽讚佛 略廣學勝利

丙二、長行釋³ 丁一、略標列² 戊一、體

云何為體？謂契經體。略有二種。一、文，二、義。文是所依，義是能依。

文是所依等者：如下釋言，文有六種，義有十種。文能顯義，是故說言文

是所依。義待文顯，是故說言義是能依。

如是二種，總名一切所知境界。

戊二、釋

云何為釋？謂略有五。一者、法，二者、等起，三者、義，四者、釋難，五者、次第。

丁二、廣別釋²

戊一、體攝²

己一、文⁴

庚一、徵

云何為文？

庚二、標

謂有六種。

庚三、列

一者、名身，二者、句身，三者、字身，四者、語，五者、行相，六者、機請。

庚四、釋³

辛一、別辨相⁴

壬一、名句文身²

癸一、釋差別³

子一、名身²

丑

一、標體性

名身者，謂共知增語。

謂共知增語者：諸有情眾共所了知，是名共知。簡非聖者自內所證，故作是說。

丑二、辨種類² 寅一、標列

此復略說有十二種。一者、假立名，二者、實事名，三者、同類相應名，四者、異類相應名，五者、隨德名，六者、假說名，七者、同所了名，八者、非同所了名，九者、顯名，十者、不顯名，十一者、略名，十二者、廣名。

寅二、隨釋¹² 卯一、假立名

假立名者，謂於內假立我及有情、命者等名，於外假立瓶、衣等名。

卯二、實事名

實事名者，謂於眼等、色等諸根義中，立眼等名。

卯三、同類相應名

同類相應名者，謂有情、色、受、大種等名。

卯四、異類相應名

異類相應名者，謂佛授、德友、青、黃等名。

卯五、隨德名

隨德名者，謂變礙故名色，領納故名受，發光故名目，如是等名。

卯六、假說名

假說名者，謂呼貧名富，若餘所有不觀待義，安立其名。

卯七、同所了名

同所了名者，謂共所解想。

卯八、非同所了名

與此相違，是非同所了名。

卯九、顯名

顯名者，謂其義易了。

卯十、不顯名

不顯名者，謂其義難了，如達羅弭茶明呪等。

卯十一、略名

略名者，謂一字名。

卯十二、廣名

廣名者，謂多字名。

子二、句身² 丑一、標體性

句身者，謂名字圓滿。

丑二、辨種類² 寅一、標列

此復六種。一者、不圓滿句，二者、圓滿句，三者、所成句，四者、能成句，五者、標句，六者、釋句。

寅二、隨釋³ 卯一、不圓滿句圓滿句² 辰一、標相

不圓滿句者，謂文不究竟，義不究竟。當知復由第二句故，方得圓滿。

辰二、例說

如說：諸惡者莫作，諸善者奉行，善調伏自心，是諸佛聖教。若唯言諸惡，則文不究竟。若言諸惡者，則義不究竟。更加莫作，方得圓滿，即圓滿句。

卯二、所成句能成句² 辰一、標相

所成句者，謂前句由後句方得成立。

辰二、例說

如說：諸行無常，有起盡法，生必滅故，彼寂為樂。此中為成諸行無常，故次說言有起盡法。前是所成，即所成句；後是能成，即能成句。

卯三、標句釋句

標句者，如言善性。釋句者，謂正趣善士。

子三、字身

字身者，謂若究竟、若不究竟，名句所依四十九字。

癸二、總料簡³ 子一、辨寬狹

此中欲為名首，名為句首。句必有名，名必有字。若唯一字，則不成句。又若有字名所不攝，唯字無名。

子二、明施設³ 丑一、出所為

問：何因緣故，施設名等三種身耶？答：為令領受諸增語觸所生受故。

丑二、辨彼義³ 寅一、名義² 卯一、問

問：名是何義？

卯二、答³ 辰一、令共了知

答：能令種種共所了知，故名為名。

辰二、令意作相

又能令意作種種相，故名為名。

辰三、由言呼召

又由語言之所呼召，故名為名。

寅二、句義

攝受諸名，究竟顯了不現見義，故名為句。

寅三、文義

隨顯名句，故名為文。

丑三、釋經說³ 寅一、舉異名

如世尊說：增語、增語路，乃至廣說。

寅二、釋差別³ 卯一、增語增語路

此中增語者，謂一切眾同類相應名。增語路者，謂并眾同類欲，能起彼故。

卯二、詞及彼路

詞者，謂彼相應語。又即此語，各別於彼彼處若標、若釋，彼所依處名為彼路。

卯三、施設及彼路

施設者，謂一一分別施設建立。彼所依處名為彼路。

寅三、隨難釋

欲即是詞，無有別欲。此即增語施設之路。

一切眾同類相應名等者：前說同類相應名者，謂有情、色、受、大種等名。如是一切共所了知，此名增語。於此一切樂欲宣說，是名眾同類欲。

子三、辨依處

又名身等略有六種依處。一者、法，二者、義，三者、補特伽羅，四者、時，五者、數，六者、處所。彼廣分別，當知已如聞所成地。

當知已如聞所成地者：聞所成地說：聲聞處略有六相。一、法施設建立相，二、義施設建立相，三、補特伽羅施設建立相，四、時施設建立相，五、數施設建立相，六、處所根栽施設建立相。如彼別釋應知。（陵本十卷二十頁¹³⁵²）

壬二、語² 癸一、略標列

語者，當知略具八分。謂先首、美妙等。由彼語文句等相應，乃至常委分資糧故，能說正法。

先首美妙等者：義如下釋。又有尋有伺地說：趣涅槃宮，故名先首。文句可味，故名美妙。善釋文句，故名分明。顯然有趣，故名易可解了。攝受正法，故名可施功勞。離愛味心之所發起，故名無所依止。不過度量，故名非可厭逆。相續廣大，故名無邊無盡。（陵本八卷十二頁⁶⁰⁰）文雖有別，其義大同。

癸二、隨別釋²

子一、八支成就攝²

丑一、辨相⁸

寅一、先首語

先首語者，趣涅槃宮為先首故。

寅二、美妙語

美妙語者，其聲清美，如羯羅頻迦音故。

寅三、顯了語

顯了語者，謂詞句文皆善巧故。

寅四、易解語

易解語者，巧辯說故。

寅五、樂聞語

樂聞語者，引法義故。

寅六、無依語

無依語者，不依希望他信己故。

寅七、不違逆語

不違逆語者，知量說故。

寅八、無邊語

無邊語者，廣大善巧故。

丑二、顯德² 寅一、標

如是八種語，當知略具三德。

寅二、配

一者、趣向德，謂初一種。二者、自體德，謂次二種。三者、加行德，謂所餘種。

子二、語具圓滿攝⁸ 丑一、相應

相應者，謂名句文身次第善安立故，又依四種道理相應故。

又依四種道理相應者：謂觀待道理、作用道理、證成道理、法爾道理，是名四種道理。如聲聞地別釋其相應知。（陵本二十五卷九頁²¹⁰⁵）

丑二、助伴

助伴者，能成次第故。

丑三、隨順

隨順者，謂解釋次第故。

丑四、清徹

清徹者，文句顯了故。

丑五、清淨資助

清淨資助者，善入眾心故。

丑六、相稱

相稱者，如眾會故。

丑七、應順

應順者，稱法故、引義故、順時故。

丑八、常委分資糧

常委分資糧者，審悉所作、恆常所作，故名常委；彼分者，謂正見等，此是彼資糧故。

常委分資糧等者：恆常所作、審細所作，精勤修習菩提分法，能引正見，證真解脫，名常委分。善說法語，與為增上，名此是彼資糧。

壬三、行相

行相者，謂諸蘊相應、諸界相應、諸處相應、緣起相應、處非處相應、念住相應。如是等相應語言，或聲聞說、或如來說、或菩薩說，是名行相。

壬四、機請²

癸一、略標相

機請者，謂因機請問而起言說。

癸二、廣差別² 子一、總標

此復根等差別，當知有二十七種補特伽羅。

子二、別列⁷ 丑一、由根差別

此中由根差別，故成二種。一者、鈍根，二者、利根。

丑二、由行差別

由行差別，故成七種。謂貪等行，如聲聞地已說。

如聲聞地已說者：聲聞地說鈍根、利根二種補特伽羅，是名由根差別。又說：貪增上、瞋增上、癡增上、慢增上、尋思增上、得平等、薄塵性七種補特伽羅，是名由行差別。如彼一一別釋應知。（陵本二十六卷二頁²¹⁷¹）

丑三、由眾差別

由眾差別，故成二種。一者、在家眾，二者、出家眾。

由眾差別等者：自下由願差別，由可救、不可救差別，由加行差別，由種類差別，皆如顯揚論一一別釋應知。（三卷十三頁）

丑四、由願差別

由願差別，故成三種。一者、聲聞，二者、獨覺，三者、菩薩。

丑五、由可救不可救差別

由可救、不可救差別，故成二種。謂般涅槃法、不般涅槃法。

丑六、由加行差別

由加行差別，故成九種。一、已入正法，二、未入正法，三、有障礙，四、無障礙，五、已成熟，六、未成熟，七、具縛，八、不具縛，九、無縛。

丑七、由種類差別

由種類差別，故成二種。一者、人，二者、非人。

辛二、總顯義²

壬一、標四相

如是六文，總有四相，說名為文。

壬二、釋差別⁴

癸一、所說相

一、所說相，謂名身等，行相為後。

癸二、所為相

二、所為相，謂機請攝二十七種補特伽羅。

癸三、能說相

三、能說相，謂語。

癸四、說者相

四、說者相，謂聲聞、菩薩及與如來。

辛三、結名文

如是六種皆顯於文，若闕一種，不能顯義。由能顯義，是故名文。

己二、義³ 庚一、徵

云何為義？

庚二、釋² 辛一、長行² 壬一、略標列

當知略有十種。一者、地義，二者、相義，三者、作意等義，四者、依處義，五者、過患義，六者、勝利義，七者、所治義，八者、能治義，九者、

略義，十者、廣義。

壬二、隨別釋⁸ 癸一、地義² 子一、略

地義者，略有五地。一者、資糧地，二者、加行地，三者、見地，四者、修地，五者、究竟地。

子二、廣

又廣分別有十七地，謂五識身地為初，無餘依地為後。

癸二、相義² 子一、略辨³ 丑一、初五相

相義者，當知有五種相。一者、自相，二者、共相，三者、假立相，四者、因相，五者、果相。如是五相，如思所成地已辯。

如思所成地已辯者：思所成地說：所觀有法略有五種。一、自相有法，二、共相有法，三、假相有法，四、因相有法，五、果相有法。如彼一別釋應知。（陵本十六卷二頁¹³⁶⁵）

丑二、次五相

復有五相。一者、異門相，二者、瑜伽相，三者、轉異相，四者、雜染相，五者、清淨相。如是五相，當知如前處處分別。

復有五相等者：謂一切法異門安立，名異門相。諸瑜伽師次第修習，名瑜伽相。此有四種，或有九種。四種瑜伽者，一、信，二、欲，三、精進，四、方便。九種瑜伽者，一、世間道，二、出世道，三、方便道，四、無間道，五、解脫道，六、勝進道，七、軟品道，八、中品道，九、上品道。三界五趣流轉變易，名轉異相。餘二易知。

丑三、後五相² 寅一、標列

復有五相。一者、所詮相，二者、能詮相，三者、此二相應相，四者、執著相，五者、不執著相。

寅二、隨釋⁵ 卯一、所詮相

所詮相者，謂相等五法，如五事中已說。

如五事中已說者：相、名、分別、真如、正智，是名五事。如菩薩地廣說

應知。（陵本七十二卷四頁
5569）

卯二、能詮相² 辰一、出體性

能詮相者，謂即於彼依止名等，為欲隨說自性、差別所有語言，應知此即是遍計所執自性相。

辰二、舉異名

此遍計所執自性有差別名，所謂亦名遍計所執，亦名和合所成，亦名所增益相，亦名虛妄所執，亦名言說所顯，亦名文字加行，亦名唯有音聲，亦名無有體相，如是等類差別應知。

卯三、此二相應相

此二相應相者，謂所詮、能詮更互相應，即是遍計所執自性執所依止。

所詮能詮更互相應等者：攝大乘論頌云：相應自性義，所分別非餘，字展轉相應，是謂相應義。非離彼能詮，智於所詮轉，非詮不同故，一切不可言。（攝論三卷九頁）由是當知此所說義。

卯四、執著相

執著相者，謂諸愚夫，無始時來相續流轉，遍計所執自性執及彼隨眠。

卯五、不執著相

不執著相者，謂已見諦者，如實了知遍計所執相，及彼習氣解脫。

子二、廣指

若正分別，如思所成地，應知其相。

若正分別等者：由三種相名正分別。一、由自性清淨，二、由思擇所知，三、由思擇諸法。如思所成地別釋應知。（陵本十六卷一頁¹³⁶¹）

癸三、作意等義² 子一、別辨觀門⁵ 丑一、七作意

作意等義者，謂七種作意。即了相等，如前聲聞地已說。

如前聲聞地已說者：聲聞地說七種作意，謂了相作意、勝解作意、遠離作意、攝樂作意、觀察作意、加行究竟作意、加行究竟果作意。（陵本三十

三卷二頁²⁶⁷⁴）如彼別釋應知。

丑二、十智

復有十智。一者、苦智，二者、集智，三者、滅智，四者、道智，五者、法智，六者、種類智，七者、他心智，八者、世俗智，九者、盡智，十者、無生智。此亦如前聲聞地辯。

此亦如前聲聞地辯者：如前建立所知諸法差別。謂有五品所知差別，及此五品所知作業。（陵本六十九卷八頁⁵²⁰¹）於中十智，隨應配屬，如彼釋相應知。原文應屬決擇分思所成地，誤列聲聞地中，此亦隨誤。

丑三、六識身

復有六識身，所謂眼識乃至意識。此亦如前五識身地、意地已辯。

此亦如前五識身地意地已辯者：前說眼識自性，謂依眼，了別色。耳識自性，謂依耳，了別聲。鼻識自性，謂依鼻，了別香。舌識自性，謂依舌，了別味。身識自性，謂依身，了別觸。意自性，謂心、意、識。如彼別釋應知。（陵本一卷五頁⁵）

丑四、九遍知

復有九種遍知。一者、欲界繫見苦集所斷斷遍知；二者、色無色界繫見苦集所斷斷遍知；三者、欲界繫見滅所斷斷遍知；四者、色無色界繫見滅所斷斷遍知；五者、欲界繫見道所斷斷遍知；六者、色無色界繫見道所斷斷遍知；七者、順下分結斷遍知；八者、色貪盡遍知；九者、無色貪盡遍知。如三摩呬多地已辯其相。

如三摩呬多地已辯其相者：三摩呬多地中不見此文。五識身地意地決擇中說：當知遍知略由二緣而得建立。一、通達諦斷故；二、永度界斷故。由相同分、界不同分及同分故，立二遍知。相不同分、界不同分及同分故，立四遍知。永度劣界故，立一遍知。永度中界故，立一遍知。永度妙界故，立一遍知。（陵本五十七卷二十三頁⁴⁶⁷³）如彼辯相應知。

丑五、三解脫門

復有三解脫門。謂空、無願、無相。當知亦如三摩呬多地已辯其相。

亦如三摩呬多地已辯其相者：三摩呬多地說有三三摩地，謂空三摩地、無願心三摩地、無相心三摩地。（陵本十二卷八頁⁹⁹⁷）此說三解脫門，謂空解脫門、無願解脫門、無相解脫門。此建立相，如聲聞地別辯應知。（陵本二十八卷三頁²³³³）

子二、總結觀法

此中應當分別諸法，幾種作意之所思惟，幾智所知，幾識所識，幾種遍知之所遍知，幾解脫門之所解脫。以如是等無量觀門，應觀諸法。

癸四、依處義³ 子一、略標列

依處義者，略有三種。一者、事依處，二者、時依處，三者、補特伽羅依處。

子二、隨別釋³ 丑一、事依處⁴ 寅一、標列

事依處者，復有三種。一者、根本事依處，二者、得方便事依處，三者、悲愍他事依處。

寅二、別廣² 卯一、辨種類³ 辰一、根本事依處

根本事依處，復有六種。一者、善趣，二者、惡趣，三者、退墮，四者、昇進，五者、生死，六者、涅槃。

辰二、得方便事依處

得方便事依處，復有十二種。謂十二種行。一者、欲行，二者、離行，三者、善行，四者、不善行，五者、苦行，六者、非苦行，七者、順退分行，八者、順進分行，九者、雜染行，十者、清淨行，十一者、自義行，十二者、他義行。

辰三、悲愍他事依處

悲愍他事依處，復有五種。一者、令離欲，二者、示現，三者、教導，四者、讚勵，五者、慶喜。

卯二、別辨相³ 辰一、根本事依處攝⁶ 巳一、善趣

此中善趣者，謂人天。

巳二、惡趣

惡趣者，謂諸惡趣。

已三、退墮³ 午一、標列

退墮者，復有二種。一者、不方他，二者、方他。

午二、隨釋² 未一、不方他

初謂自然壽命退減。如壽命退減，如是色力、財富、安樂、名稱、辯才等退減，當知亦爾。

未二、方他

方他者，謂族姓退減，自在增上退減，薄少宗葉，言不威肅，智慧弊惡，不能獲得廣大色聲及香味觸，於所受用廣大事中心不喜樂。

午三、總結

如是等類，名為退墮。

已四、昇進

與此相違，隨其所應，名為昇進。

已五、生死

生死者，謂即善趣惡趣退墮昇進。

已六、涅槃

涅槃者，謂有餘依及無餘依二涅槃界。

辰二、得方便事依處攝¹² 已一、欲行

欲行者，謂如十種受用欲中說。

謂如十種受用欲中說者：前意地說：有十種受欲者，如中阿笈摩說。（陵
本二卷十五頁¹⁵⁹）已引文釋，如彼應知。

已二、離行

離行者，謂即於彼所受用事知無常等已，厭而出家，受持禁戒，守根門等。

已三、善行

善行者，謂施、戒、修善有漏行。

已四、不善行

不善行者，謂三種惡行。

已五、苦行

苦行者，謂露形無衣，如是等類乃至廣說。

已六、非苦行

非苦行者，謂不棄捨如法所得所有安樂。遠離二邊，所謂受用欲樂行邊，及與受用自苦行邊；依止中道，如法追求及正受用衣服等事。

已七、順退分行

順退分行者，謂所有行能障壽等諸昇進事。

已八、順進分行

與此相違，當知即是順進分行，如鸚鵡經說。

已九、雜染行² 午一、出三種

雜染行者，略有三種。一者、業雜染，二者、煩惱雜染，三者、流轉雜染。

午二、廣九句² 未一、標列

當知此中，有九根本句。謂業雜染有三句，一、貪欲，二、瞋恚，三、愚癡；煩惱雜染有四句，即四顛倒；

即四顛倒者：有尋有伺地說：薩迦耶見是無我我倒，邊執見一分是無常常倒，見取是不淨淨倒，戒禁取是於苦樂倒。貪通二種，謂不淨淨倒及於苦樂倒。（陵本八卷五頁⁵⁶²）此應準知。

流轉雜染有二句，謂無明及有愛。

未二、釋由³ 申一、顯業因

所以者何？由三不善根，生起種種業雜染故。

申二、顯煩惱因

由四顛倒，能發種種煩惱雜染故。

申三、顯流轉因

煩惱生已，由無明門，諸出家者能生種種流轉雜染；由有愛門，諸在家者能生種種流轉雜染。

已十、清淨行² 午一、略標

清淨行者，略有三學、五地。謂資糧地乃至究竟地，如先已說。

如先已說者：如聲聞地廣辯三學應知。（陵本二十八卷一頁²³²³）

午二、配釋

當知學等，有九根本句。謂增上戒學及增上心學，有無貪、無瞋、無癡，在資糧地及加行地；增上慧學，有四無顛倒明及解脫，在見地、修地及究竟地。

已十一、自義行

自義行者，謂自利行。如聲聞、獨覺，彼雖或時起利他行，然本期願不唯利他，是故所行名自義行。

已十二、他義行

他義行者，謂利他行。如佛菩薩為欲利益無量眾生，為欲安樂無量眾生，乃至廣說。

辰三、悲愍他事依處攝² 巳一、釋漸次⁵ 午一、令離欲

令離欲者，謂訶責六種黑品諸行，示現過患，令離愛欲。

訶責六種黑品諸行者：聲聞地說：於內、於外諸淨色相發起貪欲，便為顛倒，黑品所攝，是有諍法，有苦、有害、有諸災患、有遍燒惱。由是因緣，發起當來生老病死愁歎憂苦種種擾惱。（陵本三十卷十六頁²⁵³³）此說六種，準彼應釋。謂從是有諍法，乃至生老病死等應知。

午二、示現

示現者，謂為令受學白品行故，示現四種真實道理。

午三、教導

教導者，謂示現已，得信解者，安置學處，令正受行。由已於彼得自在故，彼便請言：我於今者當何所作？唯願教誨。因告之曰：汝等今者，於如是如是事應正作、應隨學。

午四、讚勵

讚勵者，謂彼有情若於所知、所行、所得中，心生退屈，爾時稱讚策勵其心，令於彼事堪有勢力。

午五、慶喜

慶喜者，謂彼有情於法隨法勇猛正行，即應如實讚悅，令其歡喜。

巳二、辨作業³ 午一、初二種³ 未一、令離欲不示現

復次，令離欲示現者，或有令離欲而不示現。如教導他令其離欲，而謂彼曰：如某所言不應作者，汝今必定不應復作。或怖彼言：汝若作者，我必當作如是如是。或復求彼：汝若是我親愛善友，必不應作。

未二、示現不令離欲

或有示現，不令離欲。如處中者，示現功德及與過失，而未堪遮令離過失。

未三、令離欲亦示現

或有令離欲，亦示現。如示彼過，令其離欲。

午二、次二種

教導讚勵者，謂初未受學令其受學；既受學已，未上昇進，令其昇進。

午三、後一種² 未一、令他勝利

慶喜者，若可慶喜而慶喜時，有五勝利。一者、令彼於己所證其心決定；二者、令餘於彼所證功德生趣證心；三者、令誹謗者心得清淨；四者、令不清淨者心處中住；五者、令清淨者倍復增長。

未二、自得勝利

若有補特伽羅慶他善事，當知造作增長能感悅意生天之業。若命終已，隨彼彼生，常聞悅意美妙音聲，一切境界無不悅意。

寅三、料簡⁶ 卯一、欲行離行

復次，欲行或有能感善趣，如為欲故造後善業；或有能感惡趣，如以非法攝受諸欲。離行若有毀犯，能感惡趣；若能成辦，能感善趣，及能作涅槃資糧。

卯二、善行不善行

善行能感善趣，及作涅槃資糧；不善行能感惡趣。

卯三、苦行非苦行

苦行能感惡趣，由依邪見自苦身故；非苦行能作涅槃資糧。

卯四、順退分行順進分行

順退分行、順進分行，隨其所應，退墮、昇進。

卯五、雜染清淨行

雜染行能感生死，清淨行能證涅槃。

卯六、自義他義行

自義行唯令自身往善趣，逮昇進，證涅槃；他義行俱令自他往善趣，逮昇進，證涅槃。

寅四、總結

如是三事中，根本事有六種，謂初善趣乃至涅槃為後；得方便事有十二種，謂十二行；悲愍他事有五種，謂由五種悲愍眾生。此中由根本事增上力故，

依十二行，如其所應，令他離欲乃至慶喜。

丑二、時依處

時依處者，謂略有三種言事。一者、過去言事，二者、未來言事，三者、現在言事。如經廣說。

丑三、補特伽羅依處

補特伽羅依處者，謂軟根等二十七種補特伽羅，應知其相。

子三、總結名

即依如是如上所說若事、若時、若補特伽羅故，諸佛世尊流布聖教，是故說彼名為依處。

癸五、過患義

過患義者，以要言之，於應毀厭義而起毀厭，或法、或補特伽羅。

癸六、勝利義

勝利義者，以要言之，於應稱讚義而起稱讚，或法、或補特伽羅。

癸七、所治能治義² 子一、辨義

所治義者，以要言之，一切雜染行。能治義者，以要言之，一切清淨行。

子二、舉例

如貪是所治，不淨為能治；瞋是所治，慈為能治；如是等，盡當知。

癸八、略義廣義³ 子一、約法類辨

略義者，謂宣說諸法同類相應。

宣說諸法同類相應者：總略宣說諸法種類故。

廣義者，謂宣說諸法異類相應。

宣說諸法異類相應者：別廣宣說諸法差別故。

子二、約諸經辨

復次，說不了義經故，說了義經故。

說不了義經等者：此第二義，釋名略義、廣義，如次配屬應知。

子三、約名義辨² 丑一、廣差別² 寅一、舉略

復次，有二種略義。一者、名略，二者、義略。

寅二、例廣

如略義，如是廣義亦有二種。一者、名廣，二者、義廣。

丑二、例經言² 寅一、舉經

如世尊言：舍利子！我所說法或略、或廣，然悟解者甚難可得。廣說如經。

寅二、顯義

當知此中，顯示世尊於契經中文廣義略，於伽陀中義廣文略。

辛二、喩柁南

為攝十義，故說中間喩柁南曰：

諸地相作意 依處德非德 所對治能治 廣略義應知

庚三、結

復次，如是略說佛教體性十種義已，諸說法者，應依聖教尋求十種，若具不具。既自求已，應為他說。

戊二、釋攝² 己一、結前建立

如是建立諸經文義體已。

己二、廣辨釋經² 庚一、由五相³ 辛一、正所說相² 壬一、略標列

諸說法者，應以五相，隨順解釋一切佛經。謂初應略說法要，次應宣說等起，次應宣說其義，次應釋難，後應辯次第。

壬二、隨別釋⁵ 癸一、法² 子一、標十二種

法者，略有十二種，謂契經等十二分教。

子二、別辨一一¹² 丑一、契經

契經者，謂貫穿義長行直說，多分攝受意趣體性。

多分攝受意趣體性者：謂以美妙名句文身，從多分說，攝受能引義利、能引梵行真善妙義，及所安立蘊、界、處等諸法體相故。

丑二、應頌

應頌者，謂長行後宣說伽陀，又略標所說不了義經。

丑三、記別

記別者，謂廣分別略所標義，及記命過弟子生處。

及記命過弟子生處者：謂於是中，記別弟子命過已後，當生等事故。

丑四、諷頌

諷頌者，謂以句說。或以二句，或以三、四、五、六句說。

丑五、自說²

寅一、無請而說

自說者，謂無請而說，為令弟子得勝解故。

寅二、自然而說

為令上品所化有情安住勝理，自然而說。如經言：世尊今者自然宣說。

丑六、緣起³

寅一、有請而說

緣起者，謂有請而說。如經言：世尊一時依黑鹿子，為諸苾芻宣說法要。

寅二、毗奈耶說

又依別解脫因起之道，毗奈耶攝所有言說。

寅三、有所依說

又於是處說如是言：世尊依如是如是因緣，依如是如是事，說如是如是語。
依別解脫因起之道者：謂有緣起，制立一切所學處故。

丑七、譬喻

譬喻者，謂有譬喻經，由譬喻故，隱義明了。

丑八、本事

本事者，謂除本生，宣說前際諸所有事。

丑九、本生

本生者，謂宣說己身，於過去世行菩薩行時，自本生事。

丑十、方廣² 寅一、出體

方廣者，謂說菩薩道。如說七地四菩薩行，及說諸佛百四十種不共佛法。謂四一切種清淨，乃至一切種妙智，如菩薩地已廣說。

寅二、釋名

又復此法，廣故、多故、極高大故、時長遠故，謂極勇猛，經三大劫阿僧企耶方得成滿，故名方廣。

如說七地四菩薩行等者：謂種性地、勝解行地、淨勝意樂地、行正行地、決定地、決定行地、到究竟地，是名七地。如菩薩地地品中說。（陵本四十九卷一頁³⁹⁰⁹）四菩薩行者，謂波羅蜜多行、菩提分法行、神通行、成熟有情行。如菩薩地行品中說。（陵本四十九卷四頁³⁹¹⁸）諸佛世尊有百四十二不共佛法。謂諸如來三十二大丈夫相、八十隨好、四一切種清淨、十力、四無所畏、三念住、三不護、大悲、無忘失法、永害習氣，及一切種妙智。如菩薩地建立品說。（陵本四十九卷七頁³⁹²⁷）

丑十一、未曾有法

未曾有法者，謂諸如來、若諸聲聞、若在家者說希奇法。如諸經中，因希有事起於言說。

未曾有法等者：此亦名為希法。謂於是中，宣說諸佛、諸佛弟子、苾芻、

苾芻尼、式叉摩那、勞策男、勞策女、近事男、近事女，若共不共，勝於其餘、勝諸世間，同意所許，甚奇希有最勝功德。如聲聞地說。（陵本二十五卷七頁²⁰⁹⁸）其相易了，此應準釋。

丑十二、論議²

寅一、出聖說²

卯一、釋名摩怛理迦²

辰一、世尊自說

論議者，謂諸經典循環研覈摩怛理迦，且如一切了義經，皆名摩怛理迦。謂於是處，世尊自廣分別諸法體相。

辰二、聖弟子說

又於是處，諸聖弟子已見諦跡，依自所證，無倒分別諸法體相，此亦名為摩怛理迦。

卯二、釋名阿毗達磨³

辰一、由循環研覈

即此摩怛理迦，亦名阿毗達磨。猶如世間一切書算詩論等，皆有摩怛理迦，當知經中循環研覈諸法體相，亦復如是。

辰二、由正建立

又如諸字，若無摩怛理迦，即不明了。如是契經等十二分聖教，若不建立諸法體相，即不明了；若建立已，即得明了。

辰三、由無雜亂

又無雜亂宣說法相，是故即此摩怛理迦，亦名阿毗達磨。

寅二、顯所餘

又即依此摩怛理迦，所餘解釋諸經義者，亦名論議。

癸二、等起

等起者，謂由三種若事、若時、若補特伽羅依處故，隨應當說。謂如是補特伽羅有如是行，為令離欲乃至慶喜。

如是補特伽羅等者：補特伽羅有二十七，謂軟根等。行有十二，謂欲行等。皆如前說應知。

癸三、義² 子一、結前生後

已說等起。次應說義。

子二、總別辨釋² 丑一、標列二種

義者，略有二種。一者、總義，二者、別義。

丑二、別釋其相² 寅一、總義相² 卯一、略標列

由四種相，當說總義。一者、引了義經故；二者、分別事究竟故；

分別事究竟者：謂分別諸法盡、如所有性事邊際故。

三者、行故；四者、果故。

卯二、隨別廣

行復二種，一者、邪行，二者、正行。果亦二種，一者、正行果，二者、邪行果。

寅二、別義相² 卯一、略標列

由四種相，當說別義。一者、分別差別名；二者、分別自體相；三者、訓釋言詞；四者、義門差別。

卯二、隨別廣² 辰一、訓釋言詞

訓釋言詞，復由五種方便。一、由相故；二、由自性故；三、由業故；四、由法故；五、由因果故。

復由五種方便等者：謂依同類道理有五相似。一、相狀相似，二、自體相似，三、業用相似，四、法門相似，五、因果相似。如聞所成地說。（陵本十五卷七頁¹³⁰⁰）此五分別，如彼釋相應知。

辰二、義門差別³ 巳一、標

義門差別，當知復由五相。

巳二、列

一者、自性差別故；二者、界差別故；三者、時差別故；四者、位差別故；五者、補特伽羅差別故。

巳三、釋⁵ 午一、自性差別

此中自性差別者，謂色自性有十色處差別，受自性有三受差別，想自性有六想差別，行自性有三行差別，

行自性有三行差別者：謂善、不善、無記差別應知。

識自性有六識差別。如是等類，當知諸法自性差別。

午二、界差別

界差別者，謂欲界差別故，色界差別故，無色界差別故。

午三、時差別

時差別者，謂過去時差別故，未來時差別故，現在時差別故。

午四、位差別

位差別者，當知有二十五種分位差別。謂下中上三位差別故，苦、樂、不苦不樂三位差別故，善、不善、無記三位差別故，聞思修三位差別故，增上戒、增上心、增上慧三位差別故，內外二位差別故，所取、能取二位差別故，所治、能治二位差別故，現前、不現前二位差別故，因果二位差別故。

午五、補特伽羅差別

補特伽羅差別者，如前所說二十七種補特伽羅，應知差別。

癸四、釋難² 子一、略標

釋難者，若自設難、若他設難皆應解釋。

子二、別釋² 丑一、出難相³ 寅一、標五相

當知此難略由五相。

寅二、別列釋⁵ 卯一、不了義難

一者、為未了義得顯了故。如言：此文有何義耶？

卯二、語相違難

二者、語相違故。如言：何故世尊先所說異，今所說異？

卯三、道理相違難

三者、道理相違故。如有顯示與四道理相違之義。

卯四、不決定顯示難

四者、不決定顯示故。如言：何故世尊於一種義，於彼彼處，種種異門差別顯示？

卯五、究竟非現見難

五者、究竟非現見故。如言：內我有何體性，有何色相，而言常恆無有變易，如是正住？

究竟非現見者：謂如內我，究竟非有，體性色相非現見故。此內我難，當知自所假設，為欲顯示彼諸外道遍計所執義故。

寅三、結應知

如是等類難相應知。

丑二、釋隨應² 寅一、正釋五難² 卯一、標

於此五難，隨其次第應當解釋。

卯二、釋³ 辰一、於不了義難

謂於不了義難，方便顯示。

辰二、於語相違難等² 巳一、舉語相違難

於語相違難，顯示意趣隨順會通。

巳二、例不決定顯示難等

如於語相違難，顯示意趣隨順會通；如是於不決定顯示難、於究竟非現見難，當知亦爾。

辰三、於道理相違難² 巳一、標方便

於道理相違難，或以異教而決判之，或復示現四種道理，或復示現因果相應。

巳二、隨難釋

所謂此言或為顯果、或為顯因。

寅二、應設四記² 卯一、總標

又於釋難應設四記。

卯二、列釋⁴ 辰一、一向記

一者、一向記。謂為如理來請問者，無倒建立諸法性相。

辰二、分別記

二者、分別記。謂為如理、或不如理來請問者，開示差別諸法性相。

辰三、反問記

三者、反問記。謂為令彼戲論問者，自敘已過。

辰四、默置記² 巳一、約四因緣辨

四者、置記。由四因緣，默置而記，謂無體性故、甚深等故。此廣如前思所成地已說其相。

此廣如前思所成地等者：前說由四種不可說故，名不可說相。一、無故不可說，二、甚深故不可說，三、能引無義故不可說，四、法相法爾之所安立故不可說。如彼釋相應知。（陵本十六卷六頁¹³⁸⁵）

巳二、約二諦理辨² 午一、標名

又如有問如來滅後為有無等，此於世俗及勝義諦所有理趣皆不應記，是故說彼名為置記。

午二、釋義² 未一、明勝義

此中如來約勝義諦，非有性故，不可記別。

約勝義諦非有性故等者：由勝義諦唯內自證，非如言說有其自性，若有若無，亦有亦無，非有非無，一切戲論不能說故，不可記別。

未二、明世俗

約世俗諦，所依、能依道相違故，彼果永斷不成實故，亦不可記如來滅後是有無等。

約世俗諦等者：如來相續，是出世間道生轉所依，是名所依及能依道。如自性不可思議，約世俗諦，故言相違。又為一切煩惱及諸習氣不生轉所依，是名彼果永斷。如自性唯內所證，約世俗諦，名不成實。是故亦不可記。

癸五、次第² 子一、略標列

次第者，略有三種。一者、圓滿次第，二者、解釋次第，三者、能成次第。

子二、隨別釋² 丑一、引教言² 寅一、標

為欲顯示此三次第，略引聖教。

寅二、釋³ 卯一、圓滿次第

如世尊言：我昔出家甚為盛美、第一盛美、最極盛美。此言顯示盛美圓滿次第。

卯二、解釋次第

又復說言：我曾處父淨飯王宮，顏容端正，乃至廣說。此言顯示盛美解釋次第。

卯三、能成次第

又復說言：為何義故，盛美出家？由見老病死等法故。此言顯示能成次第。

丑二、辨說句² 寅一、圓滿次第² 卯一、舉三受

又復經中略說諸法，如言三受，樂受、苦受、不苦不樂受。如是等類，但顯圓滿次第。由所餘句圓滿此受，故名圓滿。

卯二、例四諦

如受，四諦亦爾。謂先說一句，後後隨順次第宣說。

寅二、能成次第等² 卯一、舉能成次第

能成次第復有二種。謂或以前句成立後句，或以後句成立前句。

卯二、例解釋次第

解釋次第，當知亦爾。

或以前句成立後句等者：如以無常及所作性，施設前句、後句差別，而立宗言：聲是所作，因云無常性故。此則以前句成立後句。又立宗言：聲是無常，因云所作性故。此則以後句成立前句。如是等類應知。

辛二、能善說相² 壬一、別釋師等⁴ 癸一、師² 子一、略標

師者，謂成就十法，名說法師眾相圓滿。

子二、列釋¹⁰ 丑一、善於法義

一者、善於法義。謂於六種法、十種義，善能解了故。

謂於六種法十種義者：前說文有六種，謂名身等。義有十種，謂地義等。如彼應釋。

丑二、能廣宣說

二者、能廣宣說。謂多聞、聞持、其聞積集故。

丑三、具足無畏

三者、具足無畏。謂於刹帝利等勝大眾中，宣說正法無所怯懼故。又因此故，聲不嘶掉，腋不流汗，念無忘失故。

丑四、言詞善巧² 寅一、標

四者、言詞善巧。謂語工圓滿、八支成就、言詞具足，處眾說法故。

寅二、釋² 卯一、語工圓滿

語工圓滿者，謂文句相應、助伴等，乃至廣說。

相應助伴等者：此中等言，等取隨順、清徹、清淨資助、相稱、應順、常委分資糧。如前已說應知。

卯二、八支成就

八支成就者，謂此語言先首、美妙等，乃至廣說。

先首美妙等者：此中等言，等取顯了、易解、樂聞、無依、不違逆、無邊。如前已說應知。

丑五、善方便說

五者、善方便說。謂二十種善巧方便宣說正法故，如以時、殷重等。

如以時殷重等者：菩薩地說：菩薩說正法相略有二十。一者、以時，二者、重法，三者、次第，四者、相續，五者、隨順，六者、歡喜，七者、愛樂，八者、悅豫，九者、欣勇，十者、不擯，十一者、應理，十二者、稱順，十三者、無亂，十四者、如法，十五者、順眾，十六者、慈心，十七者、利益心，十八者、哀愍心，十九者、不自讚毀他，二十者、不依利養恭敬讚頌。（陵本三十八卷十七頁³¹⁵⁸）如彼釋相應知。

丑六、具足成就法隨法行

六者、具足成就法隨法行。謂不唯聽聞以為究竟，如其所說，即如是行故。

丑七、威儀具足

七者、威儀具足。謂說法時手足不亂，頭不動搖，面無變易，鼻不改異，進止往來威儀庠序故。

丑八、勇猛精進

八者、勇猛精進。謂常樂聽聞所未聞法，於已聞法轉令明淨，不捨瑜伽，不捨作意，心不捨離內奢摩他故。

丑九、無有厭倦

九者、無有厭倦。謂為四眾廣宣妙法，身心無倦故。

丑十、具足忍力

十者、具足忍力。謂罵弄訶責終不反報，若被輕憊不生忿感，乃至廣說。

乃至廣說者：謂能堪忍寒熱、饑渴、蚊蟲、風日、蛇蝎惡觸，他所干犯、礮毒語言等故。聲聞地中善能堪忍作如是說，此應準知。（陵本二十五卷

二頁²⁰⁷⁶）

癸二、說眾⁴ 子一、標

說眾者，謂處五眾，宣八種言。

子二、徵

何等為八？

子三、列² 丑一、八言

一者、可喜樂言，二者、善開發言，三者、善釋難言，四者、善分析言，五者、善順入言，六者、引餘證言，七者、勝辯才言，八者、隨宗趣言。

丑二、五眾

五眾者，一、在家眾，二、出家眾，三、淨信眾，四、邪惡眾，五、處中眾。

子四、釋² 丑一、宣八言⁸ 寅一、可喜樂言

可喜樂言者，當知有五相。一、有證因，二、有譬喻，三、語具圓滿，四、文句綺靡，五、言詞顯了。

寅二、善開發言

善開發言者，開深隱義令麤顯故，辯麤顯義令深隱故。

寅三、善釋難言

善釋難言者，以要言之，當知離五種難，善成就故。

離五種難者：如前釋難說有五相應知。

寅四、善分析言

善分析言者，於一一法，依增一道理，乃至析為十種，或復過此。如依三法說，或依四念住，乃至廣說。

如依三法說者：集論中說：諸蘊、界、處三法所攝，謂色蘊、法界、意處。（一卷十三頁）此說三法，如彼應釋。

寅五、善順入言

善順入言者，唯善顯現解釋契經、應頌等法，終不引餘外道邪論。

寅六、引餘證言

引餘證言者，謂引餘經成立所說。

寅七、勝辯才言

勝辯才言者，隨自所忍善分別義。

寅八、隨宗趣言

隨宗趣言者，依摩怛理迦分別顯示，或依其餘無倒說者所說言教，如理解釋。

丑二、處五眾³ 寅一、處在家眾

復次，處在家眾，應依毀諸惡行、讚諸善行現說正法，令其止息及進修故。

寅二、處出家眾

處出家眾，應依增上戒等三學現說正法，令速欣樂故。

寅三、處餘三眾

處淨信等眾，應依聖教廣大威德現說正法，如其次第，令倍增長、令處中信、令生淨信故。

瑜伽師地論科句披尋記卷第八十一

瑜伽師地論科句披尋記卷第八十二

彌勒菩薩說

唐三藏沙門玄奘奉詔譯

韓清淨科記

攝釋分之下

癸三、聽³ 子一、標

聽者，謂如是說法者說正法時，應安處他，令住恭敬無倒聽聞。

子二、徵

云何安處？

子三、釋² 丑一、標十種

謂或由一因，或乃至十。

丑二、別列相¹⁰ 寅一、一因² 卯一、總標

一因者，謂恭敬聽法，現前能證利益安樂故。

卯二、料簡

此中或有利益非安樂等四句，如菩薩地法受中已說。

或有利益非安樂等四句者：菩薩地說：或有法受，現在受樂，於當來世受苦異熟；或有法受，現在受苦，於當來世受樂異熟；或有法受，現在受樂，於當來世受樂異熟；或有法受，現在受苦，於當來世受苦異熟。（陵本三十五卷十九頁²⁸⁹⁰）今指彼義，故作是說。

寅二、二因² 卯一、善建立

二因者，謂善建立一切法故。善建立者，離諸過故，具大義故。

卯二、有勝果

又為說者、聽者所設劬勞有勝果故。若不爾者，能說、能聽徒廢己業，虛設功勞，應無有果。

寅三、三因² 卯一、舉三事

三因者，恭敬聽法，能令眾生捨惡趣故，得善趣故，速能引攝涅槃因故。

卯二、結證得

如是一事，要由恭敬聽聞方得。

寅四、四因

四因者，一、恭敬聽法，能善了達契經等法。二、如是正法，能令眾生捨諸不善，攝受諸善；若善聽者，則能精勤若捨、若受。三、由捨受故，捨離惡因所招後苦。四、由此受捨善惡因故，速證涅槃。

寅五、五因² 卯一、第一義² 辰一、列

五因者，謂佛世尊所說正法，有因緣、有出離、有依趣、有勇猛、有神變。

辰二、指

如是諸句，如攝異門分當廣分別。

有因緣有出離等者：攝異門分說：佛世尊法，有因緣者，謂有緣起，制立一切所學處故。有出離者，謂有犯已，制立如法還出離故。言有依者，謂由四依，制立超越一切惡戒諸毀犯故。有超越者，制立遠離受用欲樂、自

苦行邊，隨順士用令成就故。有神變者，謂由三種所現神變，為令獲得速疾神通，無間制立正教授故。（陵本八十三卷七頁⁶²⁹⁵）文別義同，準彼應釋。

卯二、第二義² 辰一、列

復有五因。謂我當聞所未聞，我當聞已研究，我當除斷疑網，我當棄背諸見，我當以慧通達一切甚深句義。

辰二、釋

諸佛世尊說此五種，顯聞思修三所成慧清淨方便。謂初二種顯聞所成慧，次二種顯思所成慧，後一種顯修所成慧。

寅六、六因

六因者，一、為欲敬報大師恩德，謂佛世尊為我等故，行於無量難行苦行，求得此法，云何今者而不聽聞。二、觀自義利，謂佛正法有現義利。三、究竟能離一切熱惱。四、善順正儀。五、易可了見。六、諸聰慧者內證所知。

善順正儀等者：謂婆羅門所有戒法，隨何、隨分、隨其差別，開許害等，故是下劣。沙門戒法與此相違，故是勝妙。又婆羅門所攝受法，攝受障道田事、宅事、財貨事等，又復攝受妻子、奴婢、僮僕等類，故是下劣。沙門所有攝受之法，除離苦法，更無所有，故是勝妙。又婆羅門所受用法，受用障道塗飾、香鬘、莊嚴具等，又現受用歌舞、作倡、戲笑等事，又現受用婬欲等法，故是下劣。沙門所有受用之法，受用無罪正聞思修所成智慧，故是勝妙。由是此說善順正儀。又婆羅門所有聞法，義虛劣故，不示他故，文句隱故，是其下劣。沙門聞法與此相違，故是勝妙。由是此說易可了見。義如聞所成慧地決擇中說。（陵本六十四卷三頁⁵⁰⁸¹）

寅七、七因

七因者，謂我當修集七種正法，我當知法知義，乃至善知補特伽羅尊卑差別。我當修集七種正法等者：聞所成地說：有七種第一義法涅槃品法，能令正法無退久住。一、聞所成慧；二、思所成慧；三、修所成慧；四、不為惡

緣侵損依止；五、正求財法；六、無增上慢；七、於可供養、不可供養補特伽羅，能善揀擇此可供養，此不可供養。（陵本十四卷二十二頁¹²⁶⁵）此說七法，如彼應釋。

寅八、八因

八因者，一、佛法易得，乃至為旃荼羅等而開示故。二、易可修學，行住坐臥皆得修故。三、引發義利，謂能引發增上生果、決定勝果故。四、初善故。五、中善故。六、後善故。七、感現樂果故。八、引後樂果故。

四初善故等者：攝異門分說：初善者，謂聽聞時生歡喜故。中善者，謂修行時無有艱苦，遠離二邊，依中道行故。後善者，謂極究竟離諸垢故，及一切究竟離欲為後邊故。（陵本八十三卷十二頁⁶³¹²）此應準釋。

寅九、九因

九因者，謂能解脫九種世間逼迫事故。一、能出生死大牢獄故。二、永斷貪等堅牢縛故。三、棄捨七財貧，建立七財富故。四、超度善行聞正法儉，建

立善行聞正法豐故。五、滅無明闇，起智慧明故。六、度四暴流，昇涅槃岸故。七、究竟能療煩惱病故。八、解脫一切貪愛羂故。九、能度無始生死曠野稠林行故。諸牢獄中，生死牢獄最為第一，是故先說。

棄捨七財貧等者：此中七財，謂七聖財。一、信，二、戒，三、慚，四、愧，五、聞，六、捨，七、慧。彼所治法多諸過患，望此名貧。此能治法多諸功德，望彼名富。

寅十、十因

十因者，一、恭敬聽法得思擇力，由此能受聞法勝利；如法求財，不以非法，深見過患而受用之。二、善知出離。謂喪失財寶，無憂無感，亦不嗟怨，乃至廣說；眷屬離壞，若遭病苦，不甚悲歎，亦不愁惱，乃至廣說。三、於諸欲中深見過患，及見出離最勝功德，清淨出家，捨離上妙臥具貪著，乃至能證諸妙靜慮。四、恭敬聽法，速順證解廣大甚深、相似甚深諸緣起法，又能引發廣大善根出離歡喜。如世尊說：我聖弟子專心屬耳聽聞正

法，能斷五法，能修七法，速疾圓滿。

能斷五法能修七法者：五所治法，是名五法。一、於無常計常顛倒，二者、於苦計樂顛倒，三、於無我計我顛倒，四、規求利養，五、希望壽命。如聞所成地說。（陵本十四卷十六頁¹²³⁸）又有七法，能於諸諦如實覺了，圓滿解脫。謂毗鉢舍那品有三，一、擇法，二、精進，三、喜。奢摩他品亦有三，一、安，二、三摩地，三、捨。念通二品。亦如聞所成地說。（陵本十四卷二十一頁¹²⁵⁸）

五、諸聖弟子恭敬聽法，所有集法皆成滅法。

所有集法皆成滅法者：煩惱及業，是名集法，集諦攝故。煩惱苦滅，是名滅法，滅諦攝故。

六、解正法已，遠塵離垢，於諸法中生正法眼。

遠塵離垢等者：攝異門分說：遠塵離垢者，塵謂已生未究竟智，能障現觀有間、無間我慢現轉；垢謂彼品及見斷品所有麤重。今永無故，名遠塵離

垢。又復塵者，所謂我慢，及見所斷一切煩惱；垢謂二品所有羸重。於諸法中者，謂於自相、共相所住法中。言法眼者，謂如實現證唯有法慧。

（陵本八十三卷十四頁⁶³¹⁶）此應準知。

七、能引攝證預流果最勝資糧，乃至證得阿羅漢果，及能引攝阿羅漢果最勝資糧。八、能引攝獨覺資糧。九、能善引攝無上正等菩提資糧。十、能引一切世出世間靜慮、解脫、等持、等至。

癸四、讚佛略廣² 子一、標二種

讚佛略廣者，謂說法師將欲開闡，先當讚佛。讚有二種，一、略，二、廣。

子二、別顯相² 丑一、略讚佛² 寅一、由五種相² 卯一、標列

略讚佛者，由五種相應當了知。一者、妙色，二者、寂靜，三者、勝智，四者、正行，五者、威德。

卯二、隨釋⁵ 辰一、妙色

妙色者，謂三十二大丈夫相、八十隨好。

辰二、寂靜

寂靜者，謂善能密護諸根門等，及能永拔煩惱習氣。

辰三、勝智

勝智者，謂於過去、未來、現在世法及非世法無礙無著。

辰四、正行

正行者，謂自他利正行圓滿。

辰五、威德

威德者，謂諸如來神通遊戲。

寅二、由六種相

復有六種略讚如來。謂功德圓滿故、離垢染故、無濁穢故、無與等故、唯利有情以為業故、於此業用有堪能故。此廣分別，如攝決擇分。

此廣分別如攝決擇分者：攝決擇分：大菩提自性，有四種相。一、生轉所依相，即此功德圓滿。二、不生轉所依相，即離垢染。三、善觀察所知果

相。四、法界清淨相，即無濁穢。又說大菩提功能，謂壽自在等，即無與等。又說大菩提方便，即此唯利有情為業，及有堪能。如彼廣分別應知。

（陵本七十四卷九頁⁵⁶⁹⁹）

丑二、廣讚佛¹⁴ 寅一、無邊名稱等

廣讚佛者，謂佛世尊無邊名稱，德無量故；能施光明，發智明故；能除黑闇，永滅一切無智闇故；成就明眼，具三眼故；

具三眼故者：聞所成地說：又由三分照了一切所知境界增上力故，建立三眼。一者、肉眼，能照顯露無有障礙有見諸色；二者、天眼，能照顯露、不顯露、有障、無障有見諸色；三者、慧眼，照一切種若色非色所有諸法。（陵本十四卷五頁¹¹⁹³）此應準知。

見勝義諦，了知無等諸聖諦故；成就禁戒，戒圓滿故、戒耆宿故。

寅二、兩足中尊等

如是兩足中尊、諸調御中最勝最上、沙門眾中最為殊美、是諸世間難得珍寶。

寅三、為哀愍者等

如是為哀愍者、為大悲者、樂為義者、求利益者、常悲愍者。

寅四、為眼為智等

如是為眼、為智、為義、為法，於明了義能善決定，凡有所作皆依於義。

為眼為智等者：此中諸相，如攝異門分釋應知。（陵本八十四卷六頁₆₃₆₈）

寅五、是知中道者等

如是能證一切所未證義，由先證聖八支道故，自然證故；善能制立所未曾立，勝梵行故；是知中道者、是證道者、是示道者、是說道者、是引道者。

寅六、是人中師子等

如是是人中師子，離怖畏故；是人中牛王，御大眾故；是人中持御，眾上首故；是人中龍王，無誤失故；是人中良馬，心善調故；是人中最勝，家族姓等映眾人故；

家族姓等者：此中等言，等取妙色，謂三十二大丈夫相、八十隨好，如前

略讚應知。

是人中最上，戒、正行、勝智、威德等映眾人故；是人中蓮華，世間八法所不染故。

戒正行勝智等者：前略讚中，說有寂靜，此名為戒。餘如前說。等言，等取功德圓滿等，皆如前釋應知。

寅七、是無等者等

如是是無等者，無與等故；無等等者，等去來今無等者故；是最第一，於諸有情為最上故；是大仙王，戒耆宿故，長時積集勝梵行故，證古大仙所證道故；是最勝者，於諸外道煩惱等魔能得勝故；是大牟尼，無有一切掉慢等故，

無有一切掉慢等故者：此中等言，等取無明應知。

與三寂靜具相應故；

三寂靜者：謂身語意三寂靜業。

不可引奪，一切生等及諸異論不引奪故；善沐浴者，永離一切諸惡法故；到彼岸者，超度一切薩迦耶故。

寅八、如來應正等覺等

如是如來應正等覺，乃至廣說是薄伽梵。

如來應正等覺等者：如菩薩地菩提品一一別釋應知。（陵本三十八卷三頁³¹⁰⁵）

寅九、是善調者等

如是白法圓滿，一切智者、一切法主無忘失法，於諸有情堅固最勝一切苦樂不擾其心。是善調者，密護根門善圓滿故；是寂靜者，受持尸羅善圓滿故；是安隱者，已入決定地故；

已入決定地故者：菩薩地說：無加行無功用無相住，名決定地。（陵本四十九卷一頁³⁹¹⁰）於此地中，由於無相得無功用，不為現行煩惱所動，齊此說言是安隱者。

般涅槃者，已證菩提故；拔毒箭者，拔愛箭故；調未調者、靜未靜者，已如前說；安慰一切不安隱者，善能安立諸異生等，令證預流、一來果故；寂滅一切未寂滅者，善能建立住初二果，令證不還及阿羅漢果故；無柁械者、出火坑者、度深塹者、制諸求者、無傾動者、摧慢幢者、大常住者。

寅十、是阿羅漢諸漏永盡等

如是是阿羅漢，諸漏永盡，如前廣說乃至盡諸有結。

如前廣說等者：如前聲聞地說：成阿羅漢，諸漏已盡，所作已辦，無復所作，證得自義，盡諸有結。（陵本三十四卷二十四頁²⁸⁰⁸）是名廣說應知。

寅十一、永斷五支等

如是永斷五支，成就六支，廣說乃至純善積集最上丈夫。

永斷五支成就六支等者：聲聞地說：已斷五支，成就六支。一向守護四所依止。最極遠離，獨一諦實，棄捨希求，無濁思惟，身行猗息。心善解脫，慧善解脫。獨一無侶，正行已立，名已親近無上丈夫。（陵本三十四

卷二十五頁²⁸¹⁰）此中廣說，如彼應知，前文已釋，不復重述。

寅十二、善知法者等

如是善知法者，乃至善知補特伽羅有尊卑者。

寅十三、是大沙門等² 卯一、列差別

如是是大沙門、大婆羅門、離垢、無垢、良醫、商主、是勝觀者、是世間依、是眾生尊。

卯二、隨難釋³ 辰一、離垢

此中離垢者，煩惱障斷故。

辰二、無垢

無垢者，所知障斷故。又永拔習氣，故名無垢。

辰三、勝觀

日夜六反觀察世間，故名勝觀。

寅十四、是一切種善清淨者等² 卯一、列差別

如是是一切種善清淨者，大丈夫相及隨形好莊嚴身者，具足十力為大力者，具四無畏無所畏者，是大悲者，於三念住善住念者，成就三種不護法者，無忘失法、永害一切煩惱習氣、具一切種微妙智者。

卯二、釋大悲²

辰一、長時積集

此中大悲者，長時積集故，謂經三大劫阿僧企耶，方乃證得。

辰二、遍一切轉

又復依緣一切有情故，緣一切種苦為境界故，

緣一切種苦為境界者：菩薩地說：菩薩於有情界觀見一百一十種苦，（陵本四十四卷十頁³⁵⁷⁵）名一切種苦應知。

於諸眾生一切損惱、變異、利養得無轉故，

於諸眾生一切損惱等者：謂諸如來常住大悲，不因眾生一切損惱、變異、利養有退轉故。

於諸有情平等轉故。

壬二、總結略義² 癸一、明漸次

復次，此中諸說法師，應於如是安立釋經法相。先當尋求若文若義，次復為他轉五種釋，如先所說解釋道理宣說正法。又應如是安立自身，於先所說說法者相，謂善法義等十種圓滿。如是自安立已，應起如是品類言說，謂處五大眾，以如前所說可喜樂等八種言詞為眾說法。又安處他，令住恭敬無倒聽聞。又應先讚大師功德。若有具足如是五分說正法者，當知猶如五分音樂，能令自他生大喜樂，又能引發自他利益。

癸二、顯勝利

若能如是善修學已，當知具足五種勝利。一、於佛言義解了不難；二、能善圓滿說諸法相；三、能善起發自他相續廣大歡喜；四、能引善出離，乃至天上、人中稱譽遍滿；五、能生起無量功德。

辛三、例釋契經² 壬一、體攝³ 癸一、標舉經說

復次，如經中說住學勝利，當知此經文義為體。

癸二、隨釋文義² 子一、文² 丑一、舉初句² 寅一、引經言

文者，謂此經言：汝等苾芻應當安住修學勝利。

寅二、明所攝² 卯一、別列⁴ 辰一、攝名等

此中有十二字、四名、一句，如是則攝名句字身。

有十二字四名一句者：謂如經言，苾芻、若住、若學及與勝利，是謂四名。如下釋義應知。餘文易了。

辰二、攝行相

此中言說是學處相，則攝行相。

辰三、攝機請

如來言說本為苾芻請問，則攝機請。

辰四、攝於語

如來所說言音，則攝於語。

卯二、總結

是故此經一句，具攝六文。

丑二、例餘句

如是慧為上首等諸句中，皆隨相應知。

子二、義⁷

丑一、地義攝³

寅一、標說

義者，謂地義中，但說聲聞地，或具五地。

寅二、別配

經言學勝利者，是資糧地。慧為上首者，是加行地。解脫堅固、念為增上者，是見地、修地、究竟地。

寅三、總結

是名地義。

丑二、相義攝²

寅一、配

於相義中，學勝利者，是戒自相。慧為上首者，具二種相；謂於慧自相、所依、助伴等中，唯慧自體是慧自相，慧之所依、助伴、所緣名為共相。解脫

堅固者，謂永離一切煩惱麤重，是解脫自相。念為增上者，是念自相。

寅二、結

是名相義。

丑三、作意等義攝² 寅一、舉作意² 卯一、簡不攝

作意義中，學勝利者，非諸作意，唯顯作意建立處所。

卯二、別配攝

慧為上首者，應知了相、勝解作意。解脫堅固者，顯示遠離、攝樂、方便究竟、方便究竟果作意。念為增上者，當知此顯觀察作意。是名作意義。

寅二、例智等

由此道理，於智等中應隨建立。

於智等中應隨建立者：謂於十智、六識、九種遍知、三解脫門種種差別中，當廣分別，隨應建立故。

丑四、依處義攝² 寅一、辨³ 卯一、事依處攝² 辰一、標清淨行

依處義中，依於涅槃學處所攝清淨行，隨其所應起教導等，所謂教導乃至慶喜。

辰二、通善等行

當知此中，亦通有善等行，隨其最勝，但說清淨行。

亦通有善等行者：此中等言，等取非苦行、順進分行應知。

卯二、補特伽羅依處攝² 辰一、出家補特伽羅

出家補特伽羅，是補特伽羅依處。

辰二、軟根等一切補特伽羅

又依軟根等一切補特伽羅，應當慶喜。

卯三、時依處攝² 辰一、應慶喜

又於過去、現在時應當慶喜，已證得故、正證得故。

辰二、應示現等

於現在時，起於示現；於未來時，起於教導及讚勵。

寅二、結

是名依處義。

丑五、勝利過患義攝² 寅一、勝利

勝利義中，謂修三學速得圓滿，是勝利義。

寅二、過患

過患義中，謂出家者不應行於異行，不應儲餘財物。

丑六、所治能治義攝² 寅一、第一義

所治義中，謂犯尸羅、無智、煩惱及忘失念。當知護尸羅等，即是能治義。

寅二、第二義

又一切雜染行皆是所治，三學等行皆是能治。

丑七、略廣義攝

於略義中，謂住學勝利，乃至念為增上；此略舉宗，名為略義。當知即分別此，名為廣義。是名略廣義。

癸三、結無過增

除此更無若過若增。

壬二、釋攝⁵ 癸一、法

復次，於解釋中，法者，謂於十二分教，當知此是契經所攝。又是記別，由了義故。

癸二、等起² 子一、釋² 丑一、標當說

等起者，謂應當說依止處所。

丑二、釋所為² 寅一、總明悲愍² 卯一、顯自智力

為欲自顯遍行智力故，發起此經。

為欲自顯遍行智力者：謂十力中遍趣行力應知。

卯二、顯利益他

又為顯示精勤修習清淨行者，及為顯示重財利者，令信解彼所化有情，依住學勝利等精進修習，速得圓滿三學勝利。

寅二、別辨其事² 卯一、令離欲等³ 辰一、標苾芻體

又為顯示四種苾芻體故。

辰二、別辨四種³ 巳一、配學勝利

此中經言學勝利者，為令遠離種姓形相苾芻體故，及令遠離詐現軌則密護威儀苾芻體故。

遠離種姓形相苾芻體故者：若生婆羅門家，是名種姓苾芻。剃除鬚髮，捨俗形好，著壞色衣，是名形相苾芻。

巳二、配慧為上首

慧為上首者，為令遠離計著虛妄聲譽稱讚苾芻體故。

巳三、配解脫堅固等

解脫堅固、念為增上者，勸令修習真實正行苾芻體故。

辰三、隨釋後二

所以者何？若有愛樂聲譽等者，雖自勉勵聽受正法，慧不增長。若有遠離前

所說過，便於真實正行攝受正解脫中，堪任勸導。

卯二、讚勵所攝² 辰一、總標

又為於下劣生喜足者，勸令漸漸修學增進。

辰二、別辨

為樂追求隨順世間文章呪術，於戒慢緩者，說學勝利；為守尸羅捨多聞者，說慧為上首；為唯於聞思生喜足者，說解脫堅固；為於戒慧解脫起增上慢者，說念為增上。

子二、結

如是等類，皆名等起。

癸三、義² 子一、總義攝³ 丑一、標經說

義者，謂總義中，當知此經宣說正行及正行果。

丑二、顯彼義² 寅一、正行攝

如是戒等三學，當知是名學之邊際。又言如是住者，此顯正方便，四種瑜伽

所攝。

寅二、正行果攝

又言如是住三學者，此顯正行果。

丑三、隨難釋

此中信欲為先，攝受尸羅、聽受、精進、慧等方便。

此中信欲為先等者：四瑜伽中，初由信故，於應得義深生信解，信應得已，於諸善法生起樂欲，是名信欲為先。由樂欲故，攝受精進及與方便。精進有二，謂於安住尸羅，及於聽受如來正法。方便有二，謂慧及定，此是三摩地及煩惱斷之引因故。

子二、別義攝²

丑一、住學勝利⁴

寅一、學⁴

卯一、分別差別名

於別義中，所言學者，是勤精進如聖教行，若習、若修名之差別。

卯二、分別自體相

清淨身語正命現行，是學自性。

卯三、訓釋言詞² 辰一、釋得名

由此正行，尸羅、忍辱等修顯發，故名為學。

由此正行等者：此說正行，謂即清淨身語正命現行。當知此由尸羅及與忍辱等遍修習之所顯發，是故說彼正行名之為學。

又為寂靜及為清涼進習除滅，故名為學。

進習除滅者：進習，謂於未生、已生一切善法。除滅，謂於未生、已生惡不善法。

辰二、指方便

如是等類訓釋名言，又應如前說相故、自性故、業故、法故，及因果故。

又應如前說相故等者：前說：訓釋言詞，復由五種方便。一、由相故；

二、由自性故；三、由業故；四、由法故；五、由因果故。（陵本八十一

卷十三頁⁶²⁰⁶）今指彼義，故說如前。

卯四、義門差別² 辰一、舉學勝利⁵ 巳一、自性差別

義門差別中，自性差別者，謂學勝利是所顯示七品尸羅，或過二百五十學處。

七品尸羅者：謂即七眾別解脫律儀應知。

已二、界差別

界差別者，謂欲行中有別解脫律儀，色無色行中有靜慮律儀，無漏律儀非界所繫。

已三、時差別

時差別者，謂學勝利過去已學，未來當學，現在正學。此學勝利，當知於去來今平等無異。

已四、位差別² 午一、辨⁵ 未一、約三類辨

位差別者，謂已入正法補特伽羅諸學勝利，未成熟者是下位，正成熟者是中位，已成熟者是上位。

未二、約三受辨

若心不喜樂勉勵修行諸梵行者，此學勝利是苦位；若心喜樂不自勉勵修梵行

者，此學勝利是樂位；若於梵行非喜樂非不喜樂者，此學勝利是不苦不樂位。

未三、約三性辨

又學勝利皆是善位，非不善位、非無記位。

未四、約三慧辨

若聽受者是名聞位，若思惟者是名思位，若修習者是名修位。

未五、約三學辨

若未證得增上心、慧，唯是增上戒位；若證得者，亦是增上心、慧二位。

午二、結

如是等類，是位差別。

已五、補特伽羅差別²

午一、辨⁵ 未一、標出家

補特伽羅差別者，此中意說出家補特伽羅。

未二、辨根行

或是鈍根、或是利根、或貪等行、或等分行、或薄塵行。

未三、簡餘乘² 申一、標

唯是聲聞，非諸獨覺、非諸菩薩。

申二、釋

由彼獨覺別覺悟故，菩薩解脫為堅固故，不說共住修學勝利。

未四、簡無姓等

又復此中，唯說般涅槃為法者、已入正法者、無有障礙者、亦具縛者、不具縛者，非無縛者。

未五、簡天趣

唯人，非天。

午二、結

如是等類，名補特伽羅差別。

辰二、例餘三句

如於學勝利，如是於慧為上首性、於解脫堅固性、於念為增上性，隨其所應，當知皆有五種差別。

當知皆有五種差別者：義門差別中，自性差別、界差別、時差別、位差別、補特伽羅差別，是名五種差別。如於學勝利已廣分別，於餘一切隨應當知。

寅二、勝利⁴ 卯一、分別差別名

此中勝利者，是功德、增進、圓滿名之差別。

卯二、分別自體相

如說當觀十種勝利，是其自性。

卯三、訓釋言詞

此法能有饒益，應可稱讚，故名勝利。又復此法隨生有情定應隨逐，故名勝利。又復此法稱讚所隨，故名勝利。

卯四、義門差別

門差別者，當知十種差別，謂能攝受於僧，令僧精懇，乃至廣說。

謂能攝受於僧等者：如來觀見十種勝利，說能攝受於僧。十句差別，如下釋義應知。

寅三、苾芻⁴ 卯一、分別差別名

此中苾芻者，是沙門、捨離家法趣非家等名之差別。

卯二、分別自體相

具足別解脫律儀眾同分，是其自性。

卯三、訓釋言詞

於其形色勤精進故，怖畏惡趣自防守故，攝無損故，名為苾芻。

攝無損故者：謂能遠離煩惱及業過患，不為自、他、俱害，及生現法、後法、俱法罪故。

卯四、義門差別

門差別者，謂刹帝利等差別故，上族下族差別故，少中老年差別故，當知是

門差別。

寅四、住⁴ 卯一、分別差別名

此中住者，是俯就於時精勤修習名之差別。

卯二、分別自體相

此住自性，離所說學，無有別法。

卯三、訓釋言詞

種種威儀攝受時分，故名為住，此是訓詞。

卯四、義門差別

門差別者，謂威儀差別故，朝中後分差別故，日夜差別故，當知是名住門差別。

丑二、慧解脫等³ 寅一、慧⁴ 卯一、分別差別名

此中慧者，是智、見、明、現觀等名之差別。

智見明現觀等者：若智、若見、若明，及與現觀，皆是慧差別名。慧亦名

忍，故置等言。

卯二、分別自體相

簡擇法相心所有法，為其自性。

卯三、訓釋言詞

訓詞者，簡擇性故，治無智故，名之為慧。又各品別能了知故，名之為慧。又能顯了諸聰慧者是聰慧性，故名為慧。

卯四、義門差別

門差別者，隨其所應，如前安立。

寅二、解脫⁴ 卯一、分別差別名

此中解脫者，是永斷、離繫、清淨、滅盡、離欲等名之差別。

滅盡離欲等者：於滅界中，有餘依滅，是名為滅。於斷界中，一切隨順有漏法上所有貪愛皆遠離故，是名為盡；於無欲界所有欲貪皆遠離故，是名離欲。又有餘依、無餘依涅槃，亦是解脫異名，故置等言。

卯二、分別自體相

自性者，謂麤重永害，煩惱永斷。

卯三、訓釋言詞

訓詞者，謂能脫種種貪等繫縛，故名解脫。又復世尊，為種種牟尼說此以為牟尼體性，故名解脫。

種種牟尼者：三默然業，謂身默然、語默然、意默然，是名種種牟尼應知。

卯四、義門差別² 辰一、列七種

門差別者，謂待時解脫、不動解脫、見所斷解脫、修所斷解脫、欲行解脫、色行解脫、無色行解脫。

辰二、指五相

如是等類義門差別，如前應知。

寅三、念⁴ 卯一、分別差別名

此中念者，是不忘失、心明記憶名之差別。

卯二、分別自體相

自性者，是心所有法。

卯三、訓釋言詞

訓詞者，追憶諸法，故名為念。又隨所經事，隨其作意，由此能令明了記憶，故名為念。

卯四、義門差別² 辰一、舉種種

門差別者，謂佛隨念、法隨念等，乃至廣說六種隨念。如是如念住差別，當知廣說差別。

如是如念住差別等者：謂如四種念住差別，如是廣說於身住念、於受住念、於心住念、於法住念，種種差別當知。

辰二、指五相

又復如前，隨其所應，當知差別。

又復如前等者：謂如前說，義門差別復有五相，如是一一隨應當知。

癸四、釋難⁴ 子一、釋未了義難⁴ 丑一、住學勝利

復次，於釋難中，問：住學勝利者，義何謂耶？答：此增語顯示，於增上戒學見勝功德住。

丑二、慧為上首

問：慧為上首者，義何謂耶？答：此增語顯示，於諸根中慧根第一。

丑三、解脫堅固

問：解脫堅固者，義何謂耶？答：此增語顯示，見、修所斷煩惱永斷。

丑四、念為增上

問：念為增上者，義何謂耶？答：此增語顯示，於少下劣不生喜足。

子二、釋異說相違難² 丑一、次第相違² 寅一、問

問：於餘經中，三學次第世尊異說。何故此中，增上戒後說增上慧，非增上心？

寅二、答² 卯一、略顯義

答：此中顯示住學勝利。由此言說，顯聞等所成慧，攝受無悔等；由此漸次得三摩地，即是顯示增上心學。

卯二、舉說成

如世尊說：於是五根，最能攝受所攝受者，所謂慧根。由諸苾芻成就慧根，乃至能修定根；如是乃至成就定根，當知皆是慧根之力。今此經中，世尊顯示慧根是三摩地引因，及煩惱斷引因，增上心學與增上慧學俱時而說。

丑二、具闕相違

問：餘經中說三學修習，進趣圓滿。何故不說增上心學修習圓滿耶？答：如前所說，當知此中道理亦爾。

餘經中說三學修習等者：此中問意，謂餘經中，說由三學修習，進趣圓滿。今此經中，何故不說增上心學？答：如前說，世尊顯示慧根是三摩地及煩惱斷引因，增上心學與增上慧學俱時而說。此中道理，當知亦爾。

子三、釋道理相違難² 丑一、說住勝利² 寅一、問

問：何故此中但說住學勝利，不說住慧勝利、住解脫勝利等？

寅二、答² 卯一、顯因果相應

答：於下劣中勸取勝利，當知亦令所化有情，於勝妙中攝受勝利。

卯二、顯易可悟入

又攝受於僧、令僧精懇等十種勝利，分明易了，易可悟入，是故但說住學勝利。

丑二、說住上首² 寅一、問

問：夫解脫者，於諸法中最为殊勝。何因緣故，但說住慧上首，不說住解脫上首？

寅二、答² 卯一、顯因果相應

答：於下劣中勸取上首性，當知亦令所化有情，於勝妙中攝受上首性。

卯二、顯不共功德

又於解脫，顯示不共差別功德故。何等名為不共差別功德？謂於無常無上慧邊，解脫常故，最為堅固。

子四、釋不定顯示難² 丑一、明總攝² 寅一、問答初句² 卯一、總問答

問：何等名為住學勝利？答：如所施設諸學處中，觀十勝利，常守尸羅，堅守尸羅，常作常轉，如是名為住學勝利。

卯二、別問答² 辰一、問

問：攝受於僧等諸句有何義耶？

辰二、答² 巳一、十種勝利² 午一、別辨¹⁰ 未一、攝受於僧

答：攝受於僧者，是總句。

未二、令僧精懇

令僧精懇者，令離受用欲樂邊故。

未三、令僧安樂

令僧安樂者，令離受用自苦邊故。

未四、未信令信

未淨信者令生淨信者，未入正法者令入正法故。

未五、已信令增

已淨信者令增長者，已入正法者令成熟故。

未六、難調令調

難調伏者令調伏者，犯尸羅者善驅擯故。

未七、令慚愧者得安樂住

令慚愧者安樂住者，淨持戒者令無悔故。

未八、防現法漏

防現法漏者，隨順摧伏煩惱纏故。

未九、害後法漏

害後法漏者，止息邪願修梵行故，隨順永斷惑隨眠故。

未十、為令多人梵行久住等

為令多人梵行久住，轉得增廣，乃至為諸天人正善開示者，為令聖教長時相續無斷絕故。

午二、略攝³ 未一、標開合

如是十種勝利略攝為三，即此三種廣開為十。

未二、徵三種

何等為三？

未三、別列釋² 申一、列

一者、令僧無染汙住，二者、令僧得安樂住，三者、令佛聖教長時隨轉。

申二、釋² 酉一、初九句² 戌一、標七隨護

此中由七種隨護，顯示無染汙住及安樂住。

戌二、別列七種

七種隨護者，一、敬養隨護，二、自苦行隨護，三、資財乏少隨護，四、展轉相觸隨護，五、心追變隨護，六、煩惱纏隨護，七、邪願隨護。

酉二、後一句

最後一句，顯示聖教長時隨轉。

七種隨護等者：於七種中，敬養隨護，配屬初二句勝利。自苦行隨護，配屬第三句勝利。資財乏少隨護，配屬第四、第五句勝利。展轉相觸隨護，配屬第六句勝利。心追變隨護，配屬第七句勝利。煩惱纏隨護，配屬第八句勝利。邪願隨護，配屬第九句勝利。

巳二、常守尸羅等⁵ 午一、常守尸羅

云何常守尸羅？謂不棄捨學處故。

午二、堅守尸羅

云何堅守尸羅？謂不毀犯學處故。

午三、常作

云何常作？謂於學處無穿穴故。

午四、常轉

云何常轉？謂穿穴已，復還淨故。

午五、受學學處

云何受學學處？謂具隨學諸學處故。

寅二、兼釋餘句³ 卯一、慧為上首句

如是行者常守尸羅、堅守尸羅、聞正法已，獨居靜處，繫念思惟、籌量、觀察，為欲趣求增上心慧。

卯二、解脫堅固句

依聞思修所生妙慧，能證解脫，此解脫性無退法故，說名堅固，是出世間聖智果故。

卯三、念為增上句³ 辰一、明正念

又此行者，由正念力審自觀察：我尸羅纏為圓滿不？我於諸法為有正慧善通達不？我於解脫為善證不？

辰二、顯增上

如是依止正念力持，具學勝利，發上首慧，證堅解脫。

辰三、辨種類

又此正念略有三種，謂或因說法故，或依教授故，或由觀察應作、不應作故。

丑二、明說依⁴ 寅一、戒攝

問：世尊說戒有無量種，謂事善戒、苾芻戒、近住戒、靜慮戒、等持戒、聖所愛戒。如是等戒，今依何說住學勝利？答：依苾芻戒，由最勝故。

寅二、慧攝

問：世尊說慧亦有多種，謂聞所成慧、思所成慧、修所成慧。依何慧說住慧上首？答：具依三慧。

寅三、解脫攝

問：世尊說解脫亦有多種，謂世間解脫、出世間解脫、有學解脫、無學解脫、可動解脫、不可動解脫。如是等類，今依何說住解脫堅固？答：依出世間不動解脫。

寅四、念攝

問：世尊說念亦無量種，謂於身住念，於受住念，於心住念，於法住念，於久所作、所說隨念，於所受誦諸法隨念，教授隨念，應作、不應作隨念，佛隨念等所有諸念。今於此中，依何念說念為增上？答：就勝為言，依應作、不應作觀察隨念。

癸五、次第³ 子一、圓滿次第³ 丑一、標所應

復次，於次第中，先應安住苾芻尸羅，次應聽受如來正法，次應如理作意思惟。

丑二、釋所由

如是行者，由淨持戒，無有憂悔；由無悔等，漸次生定。由正方便所攝智慧，如理作意正思惟故，增上心學速得成滿。

丑三、結得名

如是名為圓滿次第，前前後後漸圓滿故。

子二、能成次第² 丑一、第一義

能成次第者，謂由住學勝利，能成慧為上首；由慧為上首，能成解脫堅固。云何能得住學勝利，乃至能成解脫堅固？謂由念為增上。如是名為能成次第。

丑二、第二義

又如是住修習三學，速得圓滿，此亦名為能成次第。

子三、解釋次第³ 丑一、略釋³ 寅一、能說相³ 卯一、能教誡

解釋次第者，謂能善教誡聲聞弟子，一切應作、不應作事，故名大師。

卯二、能化導

又能化導無量眾生，令苦寂滅，故名大師。

卯三、能摧滅

又為摧滅邪穢外道，出現世間，故名大師。

寅二、所為相² 卯一、標義

從他聽聞正法音聲，又能令他聞正法聲，故曰聲聞。

卯二、釋難

問：何因緣故，唯為聲聞說住學勝利等？答：由聲聞眾是佛世尊隨順修學真實子故。

寅三、所說相² 卯一、法

此中法者，當知宣說名句文身。

卯二、學處

學處者，謂所宣說五毀犯聚。

五毀犯聚者：攝事分說：應知略有五種罪聚攝一切罪。何等為五？一者、他勝罪聚，二者、眾餘罪聚，三者、隕墜罪聚，四者、別悔罪聚，五者、惡作罪聚。（陵本九十九卷二頁⁷⁴⁰⁹）此應準知。

丑二、廣辨² 寅一、約大師辨⁴ 卯一、大悲普覆² 辰一、別釋

具憐愍者，謂於長夜諸有情所，恆住慈等諸無量故。具大悲者，謂能拔濟無

量眾生多苦法故。樂義利者，能與眾生多樂法故。求利益者，能與眾生無量品類妙善法故。恆悲愍者，能拔眾生無量諸惡不善法故。為令多人梵行久住者，依剎帝利等族姓說。轉增廣者，即依如有情種類後後增廣說。乃至為諸天人者，謂即依彼有勢力說。

謂即依彼有勢力說者：攝異門分說：此中唯說天及人者，彼有勢力能了其義修正行故。（陵本八十三卷十八頁⁶³³⁰）此應準釋。

辰二、結顯

此中顯示世尊大悲普覆一切，非唯一分。

卯二、正善說法⁵ 辰一、正善開示

正善開示者，謂如其所有性故，及盡其所有性故。

辰二、宣說正法

宣說正法者，謂十二分教，聽受、研尋、任持、讀誦、處靜思惟如是正法。

辰三、令利益

如是能令汝利益者，依增上戒說。

辰四、令安樂

如是能令汝安樂者，謂不依止弊苦、艱難、不自在行。

辰五、令利益安樂³ 巳一、由心學慧學

如是能令汝利益安樂者，謂離欲者增上心行、增上慧行。此行善故，名為利益；能饒益故，名為安樂。

巳二、由戒學

復次，若於是處，世尊讚美杜多功德，是名利益；若於是處，世尊聽受百味飲食、百千衣服，是名安樂。

巳三、由三學

若處世尊制立三學，如是名為利益安樂。

卯三、慧善觀察² 辰一、標所觀察

又說如來於諸法中，以彼彼慧善觀察者，若為利益、若為安樂、若為利益安

樂，依增上戒學、增上心學、增上慧學說。

辰二、釋善因緣

當知此中，有二因緣，名善觀察。一者、長夜串習遍了知故；二者、無倒正覺悟故。

卯四、善證解脫² 辰一、標證得

於彼彼解脫善證得者，依增上心、增上慧說。

辰二、釋因緣

由二因緣，名善證得。一者、到究竟故；二者、不還法故，無退法故。

寅二、約聲聞辨³ 卯一、不具尸羅蘊

我尸羅蘊不圓滿者，謂或於尸羅修習一分，或不依止如是尸羅圓滿修習諸定地戒。

卯二、不善觀諸法

我於諸法不善觀察者，由二種相，如前應知。

由二種相如前應知者：謂如前說：有二因緣，名善觀察。翻彼應知。

卯三、不善證解脫

我於解脫不善證得者，由二種證，如前應知。

由二種證如前應知者：謂如前說：由二因緣，名善證得。翻彼應知。

丑三、結說

我所應說如是已說者，謂總結前略所標舉及廣分別。

庚二、由六相² 辛一、出種類³ 壬一、標

復次，由六種相，應當解釋一切契經。

壬二、列

一者、遍知事故；二者、捨離惡行，及諸煩惱、隨煩惱故；三者、受學善行故；四者、由如病等行智遍知通達故；五者、由彼果故；六者、由自及他領受彼果故。

壬三、結

由此六相，及由如前所建立相，應善解釋一切經典。

辛二、隨難釋³ 壬一、事

此中事者，謂蘊、界、處、緣起、念住及正斷等。

壬二、彼果

彼果者，謂厭患、離欲、解脫及遍解脫。

厭患離欲等者：當知此說智果漸次。謂由智增上力，於諸行中起厭；由習厭故，得離欲；由習離欲故，得解脫及遍解脫。如攝事分別釋應知。（陵

本八十五卷十一頁⁶⁴⁵¹）

壬三、自他領受彼果

自他領受彼果者，謂我生已盡。

丁三、總結攝

如是等類，名攝釋分。

瑜伽師地論科句披尋記卷第八十二

瑜伽師地論科句披尋記卷第八十三

彌勒菩薩說

唐三藏沙門玄奘奉詔譯

韓清淨科記

攝異門分之上

甲四、攝異門分³ 乙一、結前生後

如是已說攝釋。云何攝異門？

乙二、總別顯示² 丙一、總

總嚧柁南曰：

白品與黑品 異門等宣說 為開悟義覺 略總頌應知

丙二、別² 丁一、白品⁴ 戊一、初頌攝² 己一、嚧柁南標

別嚧柁南曰：

師第一二慧 四種善說等 亦有因緣等 施戒道廣說

己二、長行釋⁸

庚一、師差別²

辛一、所歸依攝²

壬一、補特伽羅差別⁶

癸一、

大師紹師襲師

此中大師，所謂如來。紹師即是第一弟子，如彼尊者舍利子等。

即是第一弟子者：成辦自義，說名第一。如下說言：即此大師亦稱第一，自義行故。

言襲師者，謂軌範師、若親教師、若同法者、能開悟者、令憶念者。

癸二、能說傳說及隨說者

大師即是立聖教者，紹師即是傳聖教者，襲師即是隨聖教者。開許制止一切應作、不應作故，時時教授教誡轉故。當知即是能說、傳說及隨說者。

開許制止一切應作不應作者：此中初句，配釋立聖教者；後句，配釋傳聖教者、隨聖教者。

癸三、能獎勝獎及至獎者

驅擯造作不應作故，名能獎者。慶慰造作應作事故，名勝獎者。於前二事能

開示故，名至獎者。

癸四、能導勝導及至導者² 子一、標得名

隨所生起一切疑惑皆能遣故，名能導者。惡作憂悔皆能遣故，名勝導者。一切煩惱及隨煩惱皆能遣故，名至導者。

惡作憂悔者：心所有法，說名惡作。彼所有相，說名憂悔。

子二、隨難釋

於諸疑惑能斷除者，謂未顯義能顯發故，已顯發義令明淨故，甚深義句以慧通達廣開示故。

癸五、伴及善友知識

誓許為作軌範尊重所依止故，名第二伴。隨轉伴故，名為善友。宿昔同處居家樂故，名為知識。

名第二伴者：修遠離者獨處空閑，與彼為助伴故。

癸六、憐愍及有恩者

父母宗親互相繫屬，名憐愍者。若非眷屬而施恩惠，名有恩者。

壬二、功德差別³ 癸一、名義利等

言義利者，名所求事能引義利。樂為此故，名樂義利。

癸二、名利益等

言利益者，名為善行。樂為此故，名樂利益。

癸三、名安樂等² 子一、標得名

言安樂者，名安隱住益身心義。樂為此故，名樂安樂。

子二、釋安隱

依現法樂，名樂安隱。依後法樂，說名為樂相應安隱。

名所求事等者：謂若涅槃可愛樂故、無有罪故，名所求事。以此為先，能引義利。

辛二、能歸依攝³ 壬一、信漸次⁴ 癸一、信順

於一切事現正隨從，故名信順。

癸二、信

若即於彼補特伽羅處所而起，故名為信。

癸三、淨信

聞彼功德及與威力、殊勝慧已，即於彼法處所而起，隨順理門，故名淨信。即由如是增上力故，身毛為豎、悲泣墮淚，如是等事是淨信相。

癸四、信述

聞彼功德、威力等已，於行住等諸威儀中，恆常信彼實有功德，故名信述。

於一切事現正隨從者：謂於善友，如實顯發作奉教心，隨時往詣恭敬承事故。

壬二、精進漸次¹³ 癸一、欲

所言欲者，若於是處樂作、樂得。

癸二、精進

言精進者，發起加行，其心勇悍。

癸三、策勵

言策勵者，既勇悍已，於彼加行正勤修習。

癸四、剛決

言剛決者，發精進已，終無懈廢，不壞不退。

癸五、超越

言超越者，殷重精進。

癸六、威勢

言威勢者，謂過夜分，或前一更，被服鎧甲，當發精進。

癸七、奮發

言奮發者，如所被服發勤精進，或更昇進，威猛勇悍發勤精進。

癸八、勇銳

深見彼果所有勝利，故名勇銳。

癸九、勇悍

於勤修時，堪能忍受寒等淋瀝，故名勇悍。

癸十、難制伏

由善了知前後差別，於其勝上差別證中，深生信順所有精進，名難制伏。

癸十一、無喜足

於少下劣差別所證進修善中，無怯劣故，名無喜足。

癸十二、勵心

言勵心者，謂於精進所有障處，一切煩惱及隨煩惱諸魔事中，頻頻覺察，令心靜息。

癸十三、常恆

言常恆者，謂即於此正加行中，能常修作，能不捨輒。

壬三、正行漸次¹² 癸一、正信

言正信者，謂於大師說正法時，於此正法既聽聞已，獲得淨信。

癸二、不放逸

不放逸者，謂得信已，於樂出離障礙法中，防護其心，恆常發起善法修習。

癸三、瑜伽

言瑜伽者，受持、讀誦、問論、決擇、正修加行。

癸四、思惟

言思惟者，隨所受持究竟法義，審諦觀察。

癸五、憶念

言憶念者，於所觀察一切法義，能不忘失；於久所作、久所說中，能正隨念。

癸六、尋思

言尋思者，即依如是無倒法義，起出離等所有尋思。

起出離等所有尋思者：此中等言，等取證得。出離，謂於一切染法。證得，謂於一切淨法。

癸七、智

所言智者，謂出世間加行妙慧。

癸八、解

所言解者，謂出世間正體妙慧。

癸九、慧

所言慧者，謂已證得出世間慧，後時所得世間妙慧。

癸十、觀察

言觀察者，謂由無倒觀察作意，審諦觀察已斷、未斷、有餘、無餘。

癸十一、梵行

言梵行者，謂八聖支道，及與遠離非正梵行習婬欲法。

癸十二、安住餘梵行³ 子一、標

又言安住餘梵行者，謂三十七菩提分法，彼由三處之所攝受。

子二、列

謂由奢摩他故，由毗鉢舍那故，由修身念故。

由修身念故者：住循身觀，名修身念。於三十七菩提分法中，此為最初，

為菩提分修之所依處，是故舉說。

如其所應，彼自性故、彼品類故。

子三、釋

此中住念，俱通二品。

如其所應等者：謂三十七菩提分法，如其所應，或為奢摩他自性，或為毗鉢舍那自性，或為彼二品類，名彼自性及彼品類。修身念住，俱通二品。

信字疑是誤文。

庚二、第一差別²

辛一、約訓釋言詞辨³

壬一、第一義⁵

癸一、第一

復次，即此大師亦稱第一，自義行故。

癸二、尊

亦稱為尊，他義行故。

癸三、勝

亦稱為勝，俱義行故。

癸四、上

亦稱為上，映蔽一切諸外道故。

癸五、無上

亦稱無上，映蔽一切聲聞、獨覺下中乘故。

壬二、第二義

復有差別。言第一者，共諸世間善圓滿故。所言尊者，共諸聲聞善圓滿故。所言勝者，共諸獨覺善圓滿故。所言上者，於煩惱障得清淨故。言無上者，於所知障得清淨故。

壬三、第三義

復有差別。言第一者，於欲行善得圓滿故。所言尊者，於色行善得圓滿故。所言勝者，無色行善得圓滿故。所言上者，超過一切三界世間善圓滿故。言無上者，出世間善得圓滿故。

辛二、約品類差別辨²

壬一、別出品類³

癸一、由蠢動

無足有情者，如蛇等。二足有情者，謂人等。四足有情者，如牛等。多足有情者，如百足等。

癸二、由依止

有色有情者，謂從欲界乃至第四靜慮。無色有情者，謂從空無邊處乃至非想非非想處。

癸三、由心

有想有情者，謂從欲界乃至無所有處，除無想天。無想有情者，謂無想天。非有想非無想有情者，謂非想非非想處所有生天。

壬二、結顯第一

如是略說品類差別，顯示如來三種第一，謂由蠢動故、由依止故、由心故。

由蠢動故等者：前說無足有情乃至多足有情，名由蠢動。有色、無色有情，名由依止。有想、無想、非有想非無想有情，說名由心。

庚三、二慧²²

辛一、能得廣大及清淨慧

復次，能得慧者，謂總攝一切能引義利所有善慧生長增益。廣大慧者，謂軟中上品增進差別。清淨慧者，謂宿世串習，經歷多時其慧成熟。

辛二、成辦圓滿及無退慧

成辦慧者，謂於諸煩惱遍知永斷。圓滿慧者，謂即此善慧已到究竟。無退慧者，謂即此善慧成無退法，究竟出離。

辛三、捷速利慧

言捷慧者，速疾了知故。言速慧者，慧無滯礙故。言利慧者，盡其所有、如其所有皆善了知故。

辛四、出慧決擇及甚深慧³ 壬一、出慧

言出慧者，於出離法世間離欲能善了知故。

壬二、決擇慧

決擇慧者，於出世間諸離欲法能了知故。

壬三、甚深慧² 癸一、標義

甚深慧者，於甚深空相應、緣起隨順諸法能了知故，又於一切甚深義句皆能如實善通達故。

癸二、料簡

此中如來慧能制立，聲聞等慧於所制立能隨覺了。

於甚深空相應等者：甚深有二，一、空性甚深，二、緣起甚深。如其次第，名空相應、緣起隨順諸法。

辛五、大慧廣慧

又大慧者，謂即此慧長時串習故。其廣慧者，謂即此慧無量無邊所行境故。

辛六、無等慧及慧寶

無等慧者，其餘諸慧無與等故。言慧寶者，於諸根中，慧最勝故。如末尼珠，顯發輪王毗琉璃寶，令光淨故。與彼相應，故名慧寶皆得成就。

辛七、慧眼慧明

又慧眼者，謂俱生慧。言慧明者，謂他所引，則他所引善加行慧。

辛八、慧光慧曜

言慧光者，謂即加行聞思成慧。言慧曜者，謂即由此修所成慧。

辛九、慧燈慧炬

言慧燈者，謂於如來所說經典，甚深建立等開示故。言慧炬者，謂於法教，隨量隨時能隨轉故。

隨量隨時能隨轉者：謂於如來法教，或緣各別、或緣一切、或緣無量，於一切時能隨轉故。

辛十、慧照慧無闇

言慧照者，謂於彼彼所有諸法，以其妙慧能善了知；雖善了知，猶隨他轉，而未身證。

猶隨他轉而未身證者：從他聽聞，名隨他轉。自未通達，名未身證。

慧無闇者，謂身作證。

辛十一、慧根慧力

其慧根者，謂於他所證，能遍了知增上力故，諸所有慧。言慧力者，謂於自先後差別所證，能遍了知增上力故，由法道理無退屈慧。

由法道理等者：謂於諸法道理，由證淨已，深生歡喜，故無退屈。

辛十二、慧財慧寶

言慧財者，謂能招引一切自在最勝富貴，隨獲自心自在轉故。

隨獲自心自在轉故者：謂如依定自在，隨其所欲，能得眾具自在轉故。

又此慧寶，於一切財最為殊勝，能為一切世間珍財根本因故。

辛十三、慧劍慧刀

如說慧劍及慧刀者，謂能永斷一切結故。

辛十四、慧杖慧轡及慧無墮

言慧杖者，謂能遠防一切煩惱、天惡魔故。言慧轡者，縱意根馬於善行地而馳驟故。慧無墮者，令諸身分不散壞故。

辛十五、慧垣牆慧階陛及慧堂殿²

壬一、第一義

慧垣牆者，遍於一切一門轉故。

遍於一切一門轉故者：謂諸聲聞，唯以涅槃而為上首；或諸菩薩，一切皆為迴向速證大菩提故。

慧階陞者，加行道故。慧堂殿者，到究竟故。

壬二、第二義

為欲顯示垣牆等三，復說三種。所謂界智、種種界智、非一界智。

辛十六、正見及有學無學慧³ 壬一、正見

又正見者，能善通達真實法故。

壬二、有學慧² 癸一、通異生

有學慧者，如理作意，復能引發心善解脫、慧善解脫。

癸二、唯三聖

又於後時諸有學慧，謂預流果及一來果、不還果攝。

壬三、無學慧

諸無學慧，謂阿羅漢菩提所攝，若諸獨覺菩提所攝，若諸如來最勝無上菩提所攝。

又於後時諸有學慧者：前說諸有學慧，謂異生位。此有學慧，謂諸聖者。依位次第，故言後時。

辛十七、界非一界種種界智

云何界智？謂能了知種種界故。若能了知十八界者，名非一界智。了知彼界種種品類，名種種界智，通達了知彼界、趣、地、補特伽羅品類差別故。

辛十八、微細審悉

又微細者，能入真實甚深義故。言審悉者，具能證入一切義故。

辛十九、聰明叡哲² 壬一、第一義

言聰明者，謂與引發慧相應故。言叡哲者，謂與俱生慧相應故。

壬二、第二義

或復翻此。

辛二十、眼智

眼者，能取現見事故。智者，能取不現見事故。

辛二十一、明覺

明者，悟入盡所有事。覺者，悟入如所有事。

辛二十二、義行法行善行調柔行

言義行者，謂思所成善法攝故。言法行者，謂聞所成善法攝故。言善行者，施、戒所成善法攝故。調柔行者，謂修所成善法攝故。

庚四、四種善說²

辛一、別列句⁴

壬一、文義圓滿攝²

癸一、善說

復次，言善說者，謂諸文句善圓滿故。

癸二、善覺

言善覺者，謂能善現等覺義故。

謂能善現等覺義故者：謂於等正覺法，能善覺了其義故。

壬二、果圓滿攝²

癸一、出離

言出離者，謂世間道，斷除眾苦得出離故。

癸二、趣等覺

趣等覺者，謂出世道，為超眾苦而能真實現等覺故。

壬三、行圓滿攝³ 癸一、無差別

無差別者，師與弟子所說文義相滋潤故，不相違故。

癸二、有窅堵波

有窅堵波者，一切外道、天魔及餘世間不能傾動故。

癸三、有依

言有依者，具足四依，無失壞故。

具足四依無失壞故者：世尊說依略有四種。一、法是依，非數取趣；二、義是依，非文；三、了義經是依，非不了義經；四、智是依，非識。由是能超患等諸過失故，名無失壞。義如三摩呬多地。（陵本十一卷十四頁⁹⁰⁶）

壬四、師圓滿攝

大師如來應正等覺者，謂所說教善清淨故。

辛二、顯四種

此中諸句，略顯四種善說法律最極圓滿。謂初二句顯文義圓滿，次二句顯果圓滿，次三句顯行圓滿，後一句顯師圓滿。

庚五、有因緣等⁵ 辛一、有因緣

復次，佛世尊法，有因緣者，謂有緣起，制立一切所學處故。

辛二、有出離

有出離者，謂有犯已，制立如法還出離故。

辛三、有依

言有依者，謂由四依，制立超越一切惡戒諸毀犯故。

謂由四依者：此中四依，所謂衣服、飲食、臥具、病緣醫藥供身什物。由依此故，於善說法毗奈耶中出家受具，成苾芻分。如菩薩地說應知。（陵

本四十二卷九頁³⁴⁴⁰）

辛四、有超越

有超越者，制立遠離受用欲樂、自苦行邊，隨順士用令成就故。

辛五、有神變

有神變者，謂由三種所現神變，為令獲得速疾神通，無間制立正教授故。

庚六、廣說施² 辛一、別列句⁶ 壬一、解脫捨

復次，解脫捨者，迴向涅槃故，於施果中無繫著故。

壬二、常舒手

常舒手者，殷重廣施故。

壬三、樂棄捨

樂棄捨者，施前、正施及與施後意悅清淨，無追悔故。

壬四、祠祀施

祠祀施者，一向如法，不以凶暴積集財物，時時數數周遍捨施所施物故。

壬五、捨圓滿

捨圓滿者，謂於福田而奉獻故。

壬六、樂分布

於惠施中樂分布者，謂於父母、妻子等所，時時平等而分布故。

辛二、總顯義

如是一切總有六施。一、無所依施，二、廣大施，三、歡喜施，四、數數施，五、田器施，六、攝受眷屬施。此中依止品類、時、處布施而說。

依止品類時處布施而說者：前六施中，初之三種，依品類說；第四一種，依時而說；後之二種，依處而說，有情處故。

庚七、廣說戒² 辛一、喞柁南標

復次，廣說戒者，中喞柁南曰：

尸羅法殺生 具戒等廣說

辛二、長行釋⁴ 壬一、尸羅差別⁷ 癸一、尸羅律儀

言尸羅者，謂能寂靜毀犯淨戒罪熱惱故，又與清涼義相應故。言律儀者，謂

是遠離自體相故。

謂是遠離自體相故者：謂於一切惡不善業受遠離故。

癸二、具足清淨

言具足者，謂正攝受無悔等故。言清淨者，攝受現行三摩地故。

言具足者等者：聲聞地說：先於尸羅善清淨故，便無憂悔；無憂悔故，歡喜安樂；由有樂故，心得正定；心得定故，能如實知、能如實見。（陵本

二十八卷二頁²³²⁷）此中具足清淨二義，如應漸次配釋應知。

癸三、善及無罪

又言善者，謂能攝受可愛果故。言無罪者，謂能攝受自他利故。

癸四、無害隨順

言無害者，謂能違拒執持刀杖鬥諍等事。言隨順者，隨順證得諸沙門果，及餘所有勝功德故。

癸五、隱覆顯發

言隱覆者，謂常隱覆自善法故。言顯發者，謂常發露自惡法故。

癸六、端嚴福田

言端嚴者，謂具攝受諸少欲等所有沙門莊嚴具故。言福田者，攝受正見、軌範、淨命圓滿德故。

癸七、無熱無惱無悔

言無熱者，謂正遠離自苦邊故。言無惱者，遠離受用欲樂邊故。言無悔者，謂正遠離染汙、不樂、憂感事故。

壬二、法差別³ 癸一、法毗奈耶

復次，善說法者，道理所攝故，任持勝德故。毗奈耶者，隨順一切煩惱滅故。癸二、聖善

所言聖者，遠離一切雜染汙法，令不生故。又言善者，能與無罪可愛果故。

癸三、應習及善哉

言應習者，應習近故。言善哉者，是諸聖賢稱讚事故。

壬三、殺生差別

復次，言殺生者，謂如有一，乃至廣說黑品、白品。當知廣如有尋有伺地中已說。

乃至廣說黑品白品等者：謂若殺生諸所有相，是名黑品。若離殺生諸所有相，是名白品。有尋有伺地說：云何殺生？謂於他眾生起殺欲樂，起染汙心，若即於彼起殺方便，及於彼殺究竟中所有身業。（陵本八卷十六頁⁶²⁴）又說：云何離殺生？謂於殺生起過患欲解，起勝善心，若於彼起靜息方便，及於彼靜息究竟中所有身業。（陵本八卷十七頁⁶²⁸）其義應知。

壬四、具戒等差別² 癸一、別列事⁴ 子一、戒律儀攝

復次，言具戒等皆廣說者，謂安住具戒，亦能守護別解律儀，乃至廣說。

安住具戒等者：謂若軌則圓滿、所行圓滿、於微小罪見大怖畏、受學學處，是名此中廣說。聲聞地中別釋其相應知。（陵本二十二卷三頁¹⁸⁹⁵）

子二、根律儀攝

密護根門，若守護念，若常委念，乃至廣說。

密護根門等者：謂若念防護意，行平等位，是名此中廣說。聲聞地中別釋其相應知。（陵本二十三卷一頁¹⁹⁴³）

子三、於食知量攝

於食知量，於諸飲食思擇而食，不為充悅，不為憍逸，乃至廣說。

於食知量等者：謂若不為飾好、不為端嚴，唯為令身安住及暫支持，食於所食，是名此中廣說。聲聞地中別釋其相應知。（陵本二十三卷七頁¹⁹⁶³）

子四、正知而住攝

進止往來正知而住，乃至廣說。

進止往來等者：進止往來，謂於應往還處來往經行，是名於行正知而住。

又若於住、於坐、於臥、於其恬寤、於語、於默、於解勞睡正知而住，是名此中廣說。聲聞地中別釋其相應知。（陵本二十四卷九頁²⁰³¹）

癸二、指廣說

如是一切，廣說應知如聲聞地。

庚八、廣說道² 辛一、喞柁南標

復次，廣說道者，中喞柁南曰：

念住正斷 神足根力 覺支道支 無量為後

辛二、長行隨釋⁵ 壬一、念住攝⁴ 癸一、猛利欲及精進策勤

為欲勤修四念住故，發起上品猛利欲者，謂為斷除不正作意諸過失故。言精進者，謂為斷除慢緩策勤諸過失故。言策勤者，謂為斷除惛沈、掉舉二隨煩惱諸過失故。

癸二、勇悍勇銳不可制伏

言勇悍者，不自輕憊故。言勇銳者，能抗外敵故。不可制伏者，於少下劣不生喜足故。

癸三、正念正知及不放逸

言正念者，不忘教授故。言正知者，能不毀犯所毀犯故。不放逸者，不捨善

輒故。

癸四、住熱光等² 子一、別列句⁴ 丑一、住熱光

住熱光者，能修懈怠對治法故。

丑二、正解

言正解者，能修毀犯對治法故。

丑三、念成辦

念成辦者，能修忘念對治法故。

丑四、調伏世間

調伏世間者，能修貪、憂一切世法正對治故。

子二、總顯義

此中顯示，勤修念住諸苾芻等，應當修習四種對治。

壬二、正斷神足攝

復次，於諸正斷、諸神足中所有異名，廣說應知如聲聞地。

於諸正斷諸神足中所有異名等者：四種正斷，亦名正勝。四種神足，依四三摩地，修八斷行而得成就，由是建立彼彼差別，是謂異名。聲聞地中廣說應知。（陵本二十九卷四頁²⁴¹⁷）

壬三、根力攝

復次，於如來所安立正信等，廣說應知如攝決擇分。安住有勢力、有精進、有勇悍等，廣說應知如菩薩地。

有勇悍等者：此中等言，等取堅猛，及於善法不捨其軛。菩薩地中配釋六種精進，如彼釋義應知。（陵本四十二卷十八頁³⁴⁶⁹）

壬四、覺支攝² 癸一、指廣說

復次，簡擇諸法、最極簡擇、周遍尋思、周遍觀察，廣說應知如聲聞地。

廣說應知如聲聞地者：聲聞地說四種毗鉢舍那，如彼釋相應知。（陵本三十卷十一頁²⁵¹⁸）

癸二、別釋義² 子一、標擇法

已得無漏真作意故，緣聖諦境，一切無漏作意相應，名為擇法。

子二、釋彼相² 丑一、第一義³ 寅一、簡擇

言簡擇者，總取一切苦法種類為苦聖諦故。

寅二、最極簡擇

最極簡擇者，各別分別取諸苦故，謂生苦、老苦等。

寅三、極簡擇法

極簡擇法者，依此處所簡擇契經等法故。所以者何？依止此故，先修所作。

丑二、第二義³ 寅一、辨三種

又簡擇者，謂審定解了。最極簡擇者，謂審定等解了。極簡擇法者，謂審定近解了。

寅二、隨料簡

前是尋求道，今是決定道。

寅三、釋差別³ 卯一、解了

復有差別。言解了者，於所知事作意發悟。

卯二、等解了

等解了者，既發悟已，方便尋求。

卯三、近解了

近解了者，求已決定。

壬五、道支攝⁴

癸一、正見差別⁴

子一、點了通達²

丑一、第一義

復次，點了者，了知分別體故。

了知分別體者：心所起相，名分別體，分別作意之所起故。

通達者，通達所知事故。

丑二、第二義

復有差別。點了者，了知自相故。通達者，了知共相故。

子二、審察聰叡

審察者，謂能定取盡其所有、如其所有，先後漸次倍增廣故。聰叡者，先後

漸次於彼義中無忘失故。

子三、覺明

覺者，謂堪能簡擇俱生之慧。明者，謂習所得慧。

子四、慧行毗鉢舍那

慧行者，謂能受持、讀誦、問論、勝決擇等增上了別，即於彼義轉增明了勤修習慧。

勝決擇等者：真實決擇，名勝決擇。等言，等取真實解脫應知。

毗鉢舍那者，謂即於前所了別義審觀察故。

癸二、正思惟差別³ 子一、涉入納受

涉入者，謂先尋思，於所緣境作意思惟心涉入故。納受者，謂即於彼能攝受故。

子二、推尋極推尋最極推尋² 丑一、推尋極推尋² 寅一、第一義

推尋者，謂取彼諸相故。極推尋者，謂取彼隨好故。

寅二、第二義

復有差別。推尋者，謂尋求心。極推尋者，謂伺察心。

丑二、最極推尋

最極推尋者，謂於得失推構尋思極校計故。

子三、尋思思惟分別

聖教為依而起尋求，說名尋思；現量為依，說名思惟；比量為依，說名分別。

癸三、正語正業正命差別⁵

子一、厭離遠離隨離還離

厭離者，增上意樂，於遠離中起決定故。遠離者，謂從他邊受遠離故。隨離者，謂受已後，能隨守護彼尸羅故。還離者，謂誤犯已，即能如法而悔除故。

子二、寂止律儀密護根門²

丑一、出漸次

從此已後，寂止律儀隨護尸羅。

丑二、別釋義

寂止者，由具忍辱柔和事故。律儀者，由具少欲、慈心等故。密護根門者，自然不作故。

子三、不作不行不犯

不作者，由他不作故。

由他不作者：由從他受遠離戒故。

不行者，由正了知不現行故。不犯者，不由失念而現行故。

子四、橋梁船筏

橋梁者，由此為依，渡惡法故。船筏者，謂依對治，誓能運彼癡狂失道，令渡相違障礙法故。

子五、不喜樂不違越不異違越

不喜樂者，謂於遠離增上意樂極滿足故。不違越者，謂於一切所學眾中無毀犯故，不棄捨故。不異違越者，謂於一分無穿穴故，不棄捨故。

謂於一分無穿穴者：謂於所受尸羅圓滿，無有少分虧損故。

癸四、正念差別² 子一、舉念等念

所言念者，謂住其心故。言等念者，謂等住其心故。

子二、指餘差別

如是廣說，應隨九種心住差別，如聲聞地當知其相。

如是廣說等者：念有九種，謂念、等念、隨念、別念、不忘念、心明記、無失、無忘、無失法。如次配屬九種心住差別，謂內住、等住、安住、近住、調順、寂靜、最極寂靜、專注一趣，及以等持。聲聞地中別釋其相應知。（陵本三十卷九頁²⁵¹¹）

戊二、第二頌攝² 己一、喩柁南標

復次，喩柁南曰：

智宣說善欲 熾然獨遠塵 如病等解釋 我斷生盡等

并天世眾生 依等我所等

己二、長行別釋¹⁵

庚一、智差別⁴

辛一、智見覺知

智者，謂聞言說為先慧。見者，謂見言說為先慧。覺者，謂覺言說為先慧。知者，謂知言說為先慧。

辛二、智見

智者，謂知不現見境。見者，謂見現見現在前境。

辛三、明覺智

明者，謂無明相違解。覺者，謂實有義。覺智者，謂不增益非實有智。

辛四、慧明現觀

慧者，謂俱生生得慧。明者，謂由加行習所成慧。現觀者，謂於內現觀法已，於諸法中非不現見、非緣他智。

庚二、宣說差別³ 辛一、宣說施設安立分別

復次，宣說者，謂因他請問而為記別。施設者，謂由語及欲，次第編列名句文身。安立者，謂次第編列已，略為他說。分別者，謂略說已，分別開示，解其義趣。

辛二、開示顯發

開示者，謂他展轉所生疑惑皆能除遣。顯發者，謂自通達甚深義句，為他顯示。

辛三、教遍開示

教者，謂不因他發起請問，由哀愍故，說法開示。遍開示者，謂無間演說，不作師拳，無所隱覆。

庚三、善差別²

辛一、善說攝⁴

壬一、初中後善

復次，初善者，謂聽聞時生歡喜故。中善者，謂修行時無有艱苦，遠離二邊，依中道行故。後善者，謂極究竟離諸垢故，及一切究竟離欲為後邊故。

壬二、義妙文巧

義妙者，謂能引發利益安樂故。文巧者，謂善緝綴名身等故，及語具圓滿故。

壬三、純一圓滿清淨鮮白

純一者，謂不與一切外道共故。圓滿者，謂無限量故，最尊勝故。

無限量故等者：廣大善巧無邊無盡，名無限量。能為他義及為俱義，名最尊勝。

清淨者，謂自性解脫故。鮮白者，謂相續解脫故。

自性解脫等者：攝大乘說：一者、自性清淨，謂真如、空、實際、無相、勝義、法界；二者、離垢清淨，謂即此離一切障垢。（攝論二卷九頁）如次配釋自性解脫、相續解脫應知。

壬四、梵行

梵行者，謂八聖支道。當知此道，由純一等四種妙相之所顯說。

辛二、善聽攝² 壬一、諦聽

諦聽者，謂於如是相法勸令審聽。

壬二、應善懇到

應善懇到者，謂勸令無倒、無間、殷重如理思惟。

庚四、欲差別⁴ 辛一、猛利欲

復次，猛利欲者，謂我何當於彼處所，乃至廣說。

謂我何當於彼處所等者：修所成地說：為趣究竟，於現法中心極思慕。彼由如是心生思慕，出離樂欲數數現行。謂我何當能具足住如是聖處，如阿羅漢所具足住。（陵本二十卷二十三頁¹⁷⁹⁷）其義應知。

辛二、猛利愛

猛利愛者，謂於所修正加行中。

辛三、猛利樂

猛利樂者，謂於說者及與大師尊重處等。

辛四、猛利信

猛利信者，謂於教法教授教誡。

庚五、熾然差別⁴ 辛一、能熾然

復次，能熾然者，謂為證得速疾通慧，終不自暇，推延後期，發勤精進。

辛二、順瑜伽

順瑜伽者，謂隨尊教若等、若勝而修加行，終不減劣。

辛三、能永斷

能永斷者，謂能修習煩惱對治。

辛四、能閑居

能閑居者，謂依所有邊際臥具遠離而居，修三摩地令現在前，依三摩地修習對治。

庚六、獨差別⁵ 辛一、獨

復次，獨者，謂處遠離邊際臥具，無有第二而安住故。

辛二、遠離

言遠離者，謂諸染汙、無記作意不現行故。

辛三、無縱逸

無縱逸者，謂於欲等尋思惡法防護心故，又於善中自安處故。

辛四、熾然

言熾然者，謂如前說。

辛五、發遣

言發遣者，謂除五蓋，內持心故。又由此故，發遣其心，令趣無上安隱處故。

庚七、遠離差別⁷

辛一、遠離離垢² 壬一、第一義

復次，遠離離垢者，塵謂已生未究竟智，能障現觀有間、無間我慢現轉；垢謂彼品及見斷品所有麤重。今永無故，名遠離離垢。

壬二、第二義

又復塵者，所謂我慢，及見所斷一切煩惱；垢謂二品所有麤重。

遠離離垢等者：加行位中諸無漏智，是名已生未究竟智。於煖、頂位，能障現觀麤品我慢隨入作意間無間轉，是名為塵。忍智生已，能斷如是麤品我慢現行，然所依中，見道所斷諸煩惱品一切麤重猶未永斷，是名為垢。入現觀時，此永無故，名遠離離垢。

辛二、於法及法眼

於諸法中者，謂於自相、共相所住法中。言法眼者，謂如實現證唯有法慧。

辛三、見法得法知法至誠法

言見法者，謂於苦等如實見故。言得法者，謂隨證得沙門果故。言知法者，謂證得已，於其所得，能自了知我是預流，我已證得無退墮法故。至誠法者，謂諦現觀增上力故，獲得證淨，於佛法僧及自所得聖所愛戒，以正信行如實至誠故。

辛四、越渡惑疑

越渡惑者，謂於自所證。越渡疑者，謂於他所證。

辛五、非緣於他等

非緣於他者，謂於此法內自所證，非但隨他聽聞等故。非餘所引者，謂於大師所有聖教，不為一切外道異論所引奪故。於諸法中得無所畏者，謂於自所證，若他詰問無悚懼故。

辛六、逆流

言逆流者，謂已登聖道故。

辛七、趣向² 壬一、標無退

言趣向者，謂記神通究竟往趣，無退還故。

壬二、釋差別

復有差別。當知建立世俗、勝義二種法故。

言趣向者等者：此中神通，謂即漏盡智通。由是能正記別所有能得漏盡方便，以此為依，趣證圓滿解脫，不復退還。此說趣向，唯約勝義。又復建立世俗、勝義二法，亦名趣向，謂於方便真實正覺了故。

庚八、如病等差別² 辛一、問

復次，如說如病，乃至廣說。云何顯示彼如病等？

辛二、答² 壬一、總顯義

非但說彼猶如重病，乃至廣說。

如說如病等者：攝事分說：又依自義，有三勝進想。謂於諸行中厭背想、

過患想、實義想。厭背想者，復有四行。謂於諸行思惟如病、如癰、如箭、惱害。（陵本八十六卷四頁⁶⁴⁹⁷）如彼釋相應知。

然修行者，先以如實無常等行，於彼事中如實訶毀，作是思惟：此如病等甚可厭逆。為欲與彼不和合故，是故次說無常行等，如實顯示觀察彼果。

先以如實無常等行至觀察彼果者：此中義顯，修習、宣說次第有異。若修習時，無常等為先，如病等為後，先修其因，後得果故。若宣說時，如病等為先，無常等為後，先顯觀果，後說因故。攝事分說三勝進想，謂於過患想及實義想正修習已，然後方能住厭背想。當知此中，先說其果，後說其因。（陵本八十六卷五頁⁶⁴⁹⁸）此中道理，應準彼釋。

壬二、釋差別⁴ 癸一、無常攝² 子一、標二種

言無常者，顯現生身及與剎那皆展轉故。

子二、隨難釋

剎那展轉者，由彼彼觸起盡故，彼彼受起盡。此相續見，由非不現見、非緣

他智故。

癸二、苦攝³ 子一、標列二種

所言苦者，有二種苦，謂生等諸苦，及諸所有受皆說為苦。

子二、明得悟入

此二種苦如其所應，由見生身展轉有故，而得悟入。謂死無間有生身生，生已復有老等諸苦，是故說言無常故苦。由見生身展轉有故，悟入苦性。

子三、隨釋受苦² 丑一、徵

云何諸所有受皆說為苦？

丑二、釋² 寅一、辨苦相² 卯一、標

謂諸樂受，變壞故苦；一切苦受，生住故苦；非苦樂受，體是無常滅壞法故，說之為苦。

卯二、釋² 辰一、初二受

此中樂受，由無常故必有變壞；一切苦受，由無常故生住相續；皆起於苦。

辰二、後一受² 巳一、已滅壞

非苦樂受，已滅壞者，由無常故說之為苦。

巳二、已生起² 午一、滅壞法

已生起者，滅壞法故亦說為苦。

午二、二所依

此滅壞法彼二所隨逐故，與二相應故，亦名為苦。

彼二所隨逐故等者：苦、樂二受若未解脫，名所隨逐。若正現行，名二相應。

寅二、明觀察³ 卯一、觀樂受

云何當觀樂受為苦？謂由此受貪所隨眠，由隨眠故取當來苦，於現法中能生壞苦，如是當觀樂受為苦。

卯二、觀苦受

云何當觀苦受如箭？謂如毒箭，乃至現前常惱壞故。

卯三、觀非苦樂受² 辰一、出二種

非苦樂受，體是無常滅壞法者，謂已滅者即是無常，其未滅者是滅壞法。

辰二、觀隨應

若無常者，從此復生若樂、若苦。滅壞法者，終不解脫苦樂二種。

癸三、空攝

所言空者，無常、無恆、無不變易真實法故。

癸四、無我攝

言無我者，遠離我故，眾緣生故，不自在故。

庚九、解釋差別⁵ 辛一、解釋開示顯了

復次，解釋者，謂能顯示彼自性故。開示者，謂即顯示此應遍知、此應永斷等差別故。顯了者，謂能顯示若不永斷、不遍知等成過患故。

辛二、了解知

了者，謂了相作意。解者，謂勝解作意。知者，謂遠離等作意。

辛三、等解了近解了

等解了者，謂了自相故。近解了者，謂了共相故。

辛四、點了通達

點了者，謂了盡其所有故。通達者，謂了如其所有故。

辛五、觸及作證

觸者，謂於八聖支道梵行所攝。

謂於八聖支道梵行所攝者：親現領受，是名為觸。八聖支道為其因緣，故說彼攝。

作證者，謂於彼果涅槃。

庚十、我差別⁸ 辛一、我

復次，我者，謂於五取蘊，我、我所見現前行故。

辛二、有情

言有情者，謂諸賢聖如實了知唯有此法，更無餘故；又復於彼有愛著故。

辛三、意生

言意生者，謂此是意種類性故。

辛四、摩納縛迦

摩納縛迦者，謂依止於意，或高、或下故。

辛五、養育者

言養育者者，謂能增長後有業故，能作一切士夫用故。

辛六、補特伽羅

補特伽羅者，謂能數數往取諸趣，無厭足故。

辛七、命者

言命者者，謂壽和合現存活故。

辛八、生者

言生者者，謂具生等所有法故。

謂具生等所有法故者：此中等言，等取老病死等苦法應知。

庚十一、斷差別² 辛一、出斷位

復次，當斷諸愛止息諸結者，謂適於聖諦得現觀時，便能永斷三結，於一切處後有之愛不復現行。彼於後時，數數勤修生滅隨觀，復能無餘永斷慢等。

辛二、明斷果² 壬一、諸愛斷

是故說言：能正修習永斷諸慢。

復能無餘永斷慢等者：此中等言，等取掉及無明，五上分結之所攝故。

真現觀故，彼愛隨眠一切永斷。

壬二、諸結息

由此因緣，當來諸苦諸後有法無復可得，又能究竟作苦邊際。

庚十二、生盡差別² 辛一、略辨相⁴ 壬一、我生已盡

復次，我生已盡者，謂第八有等。

謂第八有等者：此中總顯四沙門果生身差別。謂預流果，極餘七有；若一來果，生無重續；若不還果，唯於天有當可受生；若阿羅漢果，不更受當

有。由是此說第八有等。

壬二、梵行已立

梵行已立者，謂於聖道究竟修故，無復退失。

壬三、所作已辦

所作已辦者，謂一切結永無餘故，一切道果已證得故。

壬四、不受後有

不受後有者，謂於七有亦永盡故。

辛二、顯記別²

壬一、配四果³

癸一、初二果

又我生已盡者，有二種生。一、生身生，此如前說。二、煩惱生，此微薄故，亦說為盡。此則記別初之二果。

癸二、不還果

梵行已立者，謂不還果，非梵行貪此永斷故。

癸三、阿羅漢果

所作已辦，不受後有者，謂阿羅漢。

壬二、結當知

當知此中，記別四種解了行相。

記別四種解了行相者：四沙門果，各別解了自所證斷，依彼行相，故有如是四種記別。

庚十三、并天世眾生差別²

辛一、別辨句³

壬一、辨所為²

癸一、出三類³

子

一、并天世間

復次，并天世間者，是總句。此有二種，一、并魔，二、并梵。

并魔并梵者：魔謂天魔，即生欲界最上天子。梵謂梵天，即於色界中初靜慮地受生諸天。如是二種天世間攝，故并顯說。

子二、并沙門婆羅門眾生

并沙門、婆羅門眾生者，謂諸沙門、若婆羅門，生在人中，希求魔梵而修行者。

子三、并諸天人眾生

并諸天人眾生者，謂於天中，除魔及梵；於其中，除沙門、婆羅門。

癸二、結出離

如是總結解脫三縛，出離欲貪。

如是總結等者：如前一切天人差別，經文總結作如是說：為欲令彼一切解脫貪瞋癡縛，出離欲界貪故。

壬二、辨解脫²

癸一、毗奈耶斷超越

又毗奈耶、斷、超越者，毗奈耶，由了相、勝解作意；斷，由遠離等作意；超越，由方便究竟果作意。

癸二、離繫解脫

言離繫者，離九結故。言解脫者，解脫一切生老等故。

壬三、辨方便²

癸一、舉差別²

子一、明自為³

丑一、離顛倒及多

離顛倒者，由見道故。所言多者，由修道故；由彼修道多修習故，說名為多。

丑二、利益安樂

言利益者，謂諸善行。言安樂者，無損惱行。

丑三、哀愍及義

言哀愍者，謂如有一，由諸善行、無損惱行，哀愍於他。是所求事故、能引義利故，名之為義，可愛樂故、無有罪故。

是所求事者：菩薩地說：於有為中，有無願故，可厭逆故，當知依此建立無願三摩地。於無為中，願涅槃故，正樂攝故，當知依止建立無相三摩地。（陵本四十五卷十八頁³⁶⁶⁴）由是當知，此說涅槃名所求事。

子二、明為他² 丑一、為利益安樂

為利益安樂者，謂於彼起所有善行、無損惱行。

丑二、為剎帝利等

所言人者，謂剎帝利等。

癸二、明總說

若有因佛出現世間、善說正法、僧善修行，能多利益、能多安樂。或但自為利益安樂悲愍世間，或但為他利益安樂，或為二種，是故說言為其義利利益安樂。

辛二、結說義

此中唯說天及人者，彼有勢力能了其義修正行故。

庚十四、依等差別² 辛一、釋五句² 壬一、釋⁵ 癸一、依

復次，依者，謂五取蘊及與七種所攝受事，即是父母及妻子等。

七種所攝受事等者：如意地說應知。（陵本二卷十七頁¹⁶⁵）

癸二、取

所言取者，謂諸欲貪亦名為取。由不安立及安立故，說有四取。

由不安立及安立故說有四取者：欲取、見取、戒禁取、我語取，是名四取。攝事分說：如是四取依於二品，謂受用欲諸在家品，及惡說法毗奈耶中諸出家品。由佛世尊每自稱言：我為諸取遍知、永斷正論大師。故於此

法誓修行者，雖帶煩惱身壞命終，而不於彼建立諸取。所以者何？彼於諸欲無所顧戀而出家故，於見、戒禁及以我語無執受故。（陵本八十九卷十一頁⁶⁷⁵²）由是當知，此說由不安立及安立義。

癸三、心依處

心依處者，謂四識住。

癸四、執著

言執著者，謂諸煩惱能趣於依，即名為纏。

謂諸煩惱能趣於依者：謂諸煩惱貪愛為緣，能趣所執五取蘊事，及與七種所攝受事。

癸五、隨眠

彼品麤重，說名隨眠。

壬二、結

如是名依、取、心依處、執著、隨眠。

辛二、釋餘句

於此有識身及外一切相中者，謂於我、我所、我慢、執著、睡眠因緣境界相中。

庚十五、我所等差別²

辛一、別辨⁴

壬一、我我所行

復次，我、我所行者，謂薩迦耶見。

壬二、我慢

言我慢者，謂即此慢。

壬三、執著

即彼諸纏，名為執著。

壬四、睡眠

即彼麤重，名為睡眠。

辛二、料簡

執著多分是諸外道，睡眠通二。

戊三、第三頌攝² 己一、唵柁南標

復次，唵柁南曰：

如來無常想 底沙怖無為 不有不相續 空無常無餘

己二、長行別釋¹⁰ 庚一、如來差別³ 辛一、舉經說

如來應正等覺等者，如經分別。

辛二、釋名號⁸ 壬一、應

所言應者，應供養故。

壬二、明行圓滿² 癸一、標二圓滿

明行圓滿者，所謂三明、遮行、行行皆悉圓滿。

所謂三明等者：聞所成地說：當知為顯於前後中際，斷常二邊邪執現法涅槃愚癡沙門婆羅門無明性故，建立三明。（陵本十四卷七頁¹¹⁹⁸）此應準知。遮行、行行，如下自釋。

又復四種增上心法現法樂住皆悉圓滿。

癸二、釋二種行³ 子一、總料簡

前是行行，後是住行。

子二、別配釋

此中清淨身語意業現行正命，是行圓滿；密護根門，是遮圓滿。

子三、結顯義

由此二種顯示如來三種不護、無忘失法。

由此二種者：謂行圓滿及遮圓滿，名此二種應知。

由不造過世間靜慮，遮自苦行。

由不造過世間靜慮者：此顯現法樂住圓滿。謂若靜慮，能引現法樂住，及與無量作意世間功德，名不造過世間靜慮。

壬三、善逝

言善逝者，謂於長夜，具一切種自利、利他二功德故。

壬四、世間解²

癸一、約世間辨² 子一、標

世間解者，謂於一切種有情世間及器世間，皆善通達故。

子二、釋² 丑一、於有情世間

由善悟入有情世間，依前後際宿住、死生，依一切時八萬四千行差別故。

依前後際宿住死生等者：謂依前際宿住智通，及依後際死生智通，善能悟入有情八萬四千心行差別故。云何八萬四千心行？佛地經論有釋應知。

（六卷十三頁）

丑二、於器世間

於器世間，謂東方等十方世界，無邊成壞善了知故。

癸二、約諸法辨

又於世間諸法自性、因緣、愛味、過患、出離、能趣行等，皆善知故。

能趣行等者：謂若諸趣入門隨順正行，名能趣行。如貪行者修不淨觀，乃至尋思行者修習阿那波那念，如是一切應知。

壬五、無上丈夫調御士² 癸一、釋無上

無上丈夫調御士者，智無等故，無過上故。

癸二、釋丈夫及調御士

於現法中，是大丈夫，多分調御無量丈夫，最第一故，極尊勝故。

壬六、天人師

天人師者，由彼天人，解甚深義、勤修正行有力能故。

壬七、佛陀

言佛陀者，謂畢竟斷一切煩惱并諸習氣，現等正覺阿耨多羅三藐三菩提故。

壬八、薄伽梵

薄伽梵者，坦然安坐妙菩提座，任運摧滅一切魔軍大勢力故。

辛三、結略義² 壬一、總句

此中如來，是初總序。

壬二、別句² 癸一、釋名應正等覺

應正等覺，謂永解脫一切煩惱障及所知障故。

癸二、顯共不共德² 子一、標列

於其別中略有二種，所謂共德及不共德。

子二、配釋

於共德中，且說解脫諸煩惱障及所知障。自餘明行圓滿等句，是不共德。

所謂共德及不共德者：謂諸如來同住法界，是名共德。各自轉依，名不共德。

庚二、無常想差別² 辛一、舉經說⁴ 壬一、修

復次，於無常想素怛纁中，修，謂若修、若習，乃至廣說。

壬二、修果

修果，謂一切欲貪，乃至廣說。

壬三、修差別

修差別，謂譬喻差別故。

壬四、修方便

修方便，謂或住阿練若，乃至廣說。

辛二、釋彼義⁴

壬一、修所攝⁴

癸一、修習多修習²

子一、第一義

此中若修者，謂由了相作意故。若習者，謂由勝解作意故。多修習者，謂由餘作意故。

子二、第二義

又若修者，謂於所知事而發趣故。若習者，謂無間、殷重修加行故。多修習者，謂於長時熟修習故。

癸二、為處為事

為處者，作所依故。為事者，作所緣故。

癸三、隨順串習

隨順者，由作意思惟故。串習者，得隨所欲無艱難故。

癸四、善攝受善發起³

子一、第一義

善攝受者，聽聞正法故。善發起者，於內如理作意思惟故。

子二、第二義

又善攝受者，殷重作意故。善發起者，無間作意故。

子三、第三義

又善攝受者，到究竟故。善發起者，正加行故。

壬二、修果攝² 癸一、掉慢無明

隨順欲貪，故說於掉。隨順色貪，故說於慢。順無色貪，故說無明。

癸二、拔除根本等

拔除根本者，害睡眠故。摧折枝條者，下地善法由彼斷滅不增長故。

下地善法等者：謂由永害睡眠，彼諸下地有漏善法亦不增長，是故說言摧

折枝條，意顯不受下地生義。

壬三、修差別攝² 癸一、標無常想

以無常想所緣，顯示無常想，自心作意觀無常故。

癸二、舉種種喻⁷ 子一、臺閣

臺閣者，謂解脫俱行無常想。

子二、梁棟

梁棟者，謂彼依因。

子三、象跡

象跡者，謂於不淨等想，為第一故，所緣廣大故。

謂於不淨等想者：此顯淨行所緣，名不淨等想。謂不淨、慈愍、緣性緣起、界差別、阿那波那念等所緣差別應知。

子四、流注

流注者，謂解脫因俱行無常想，能趣涅槃故。

子五、日出

日出者，謂能對治無明闇故。

子六、如輪王

如輪王者，謂無學無常想。

子七、如城王

如城王者，謂所餘想。

謂所餘想者：謂有學無常想應知。

壬四、修方便攝²

癸一、居阿練若等

又或居阿練若、或居樹下、或居空室、或居迴露，由取樹下覆障等故，即攝一切臥具遠離。

癸二、唯有色無常性

唯有色無常性者，謂唯有色，都無有我，如是正修加行。

庚三、底沙差別²

辛一、總標

復次，略有四種往趣道障、二種道等。

略有四種往趣道障等者：如下說言，由疑、由邪尋思、由邪分尋思見、由利養恭敬，是名四種往趣道障。失道、惡道，名二種道。等言，等取有怖、有畏、有刺諸道過失應知。

辛二、別辨⁴ 壬一、由疑

謂由疑故，不能發趣。

壬二、由邪尋思

雖復發趣，由邪尋思，而往餘處。

壬三、由邪見行² 癸一、標不堪任

由邪分尋思見行故，雖無是事，然不堪任教授教誡。

癸二、釋其障法² 子一、忿

所言忿者，謂他諫諍時。

子二、苦惱不樂² 丑一、辨相

言苦惱者，謂出家者不得自在、禁約艱難、麤弊行等。

不得自在等者：隨心雜染而轉，是名不得自在。尸羅艱難，是名禁約艱難。弊趣、惡趣所有過失，是名麤弊行等。

言不樂者，雜瞋事故。

丑二、喻障

此之二種猶如坑澗，又此二種能障行路。

壬四、由利養恭敬² 癸一、標障

雖無是事，而由利養及恭敬故，於入山林能為障礙。

癸二、喻相

言猛利者，處深稠林故。所以者何？雖捨所攝受事，而不能捨此故。

不能捨此者：謂不能捨利養及恭敬故。

庚四、怖差別³ 辛一、道過失² 壬一、辨⁵ 癸一、有怖

復次，言有怖者，謂有盜賊及矯詐故。

癸二、有畏

言有畏者，謂涉稠林故，有諸惡獸及與非人諸恐畏故。

癸三、有刺

言有刺者，謂一切處多毒刺故。

癸四、失道

言失道者，往餘處故。

癸五、惡道

言惡道者，不平正故。

壬二、結

如是五種，顯道過失。

辛二、趣過失

弊趣、惡趣者，顯示趣過失。

辛三、能行補特伽羅過失

失道、惡道而行，及親近不善士者，顯示能行補特伽羅所有過失。諸盜賊等名不善士。

庚五、無為差別⁶

辛一、無動無轉難見

復次，無動者，謂一切相皆遠離故。無轉者，謂貪愛盡故，於諸境界無轉變

故。難見者，謂甚深故。

辛二、甘露安隱清涼

甘露者，謂生老病死皆永盡故。安隱者，謂超過一切人與非人災橫怖畏故。清涼者，謂一切苦皆寂滅故，極清涼故。

辛三、善事趣吉祥

善事者，謂現法樂住所緣境故。趣吉祥者，謂斷一切煩惱所緣境故。

辛四、無愁憂不死歿

無愁憂者，謂超過一切愛非愛故，又證得已無失壞故。不死歿者，謂常住故，不退還故。

辛五、無熾然無熱惱

無熾然者，謂清淨故。無熱惱者，謂所欲匱乏永止息故。

辛六、無病無動亂涅槃

無病者，謂一切病諸癰瘡等永寂靜故。

謂一切病諸癰瘡等者：此說諸行可厭背相。略有四種，謂即如病、如癰、如箭、惱害應知。

無動亂者，謂一切動亂皆滅盡故。涅槃者，謂一切依皆寂滅故。

庚六、不有差別² 辛一、辨相² 壬一、我何當不有等² 癸一、第一義

復次，我何當不有、我所何當不有者，謂約未來世，於我、我所性所攝，內處、外處所攝自內體性及攝受事，希求不生故。

癸二、第二義

又復顯示希求依止不生故，及希求依彼受不生故。

壬二、我當不有等

我當不有、我所當不有者，謂約現在世說。

辛二、料簡

此觀無常滅，前觀於擇滅。又前但有希望故，後於現在因觀無常性故。

庚七、不相續差別⁴ 辛一、不相續

復次，不相續者，謂死歿已後，餘識不生故。

辛二、無取

言無取者，謂無所住識、無有趣入名色事故，自體永不生故。

辛三、無生長

無生長者，謂無有名色更增廣故。

辛四、一切行寂止

言一切行皆寂止者，謂諸五蘊皆止息故。

庚八、空差別³ 辛一、空無所得

復次，所言空者，謂離一切煩惱等故。

離一切煩惱等者：攝事分說：由我、我所、我慢、執著及與隨眠皆遠離故，說名為空。（陵本八十五卷十頁⁶⁴⁴⁷）此應準釋。

無所得者，謂離一切所有相故。

辛二、愛盡離欲

言愛盡者，謂不希求未來事故。言離欲者，謂無現在受用喜樂故。

辛三、滅及涅槃

所言滅者，謂餘煩惱斷故。

餘煩惱斷者：謂有餘依涅槃界中，先所未斷修道煩惱今永斷故。

言涅槃者，謂無餘依故。

庚九、無常差別⁴ 辛一、無常

復次，言無常者，謂性破壞朽敗法故。

辛二、有為造作緣生

言有為者，謂依前際所尋思故。言造作者，謂依後際所希望故。言緣生者，謂依現世眾因緣力所生起故。

辛三、有盡法有沒法² 壬一、第一義

有盡法者，謂一分盡故。有沒法者，謂全分滅故。

壬二、第二義

又有盡法者，謂全分滅故。有沒法者，謂相續變壞故。

辛四、有離欲法有滅法

有離欲法者，謂過患相應故。有滅法者，謂一切有為法皆有出離故。

庚十、無餘差別² 辛一、別釋句⁴ 壬一、無餘斷

復次，無餘斷者，謂是總句。

壬二、永棄捨永變吐

永棄捨者，諸纏斷故。永變吐者，隨眠斷故。

壬三、永盡永離欲永滅

言永盡者，過去解脫故。永離欲者，現在解脫故。言永滅者，未來解脫故。

壬四、永寂靜永滅沒

永寂靜者，由見道故。永滅沒者，由修道故。

辛二、結顯義

當知此中，由二種道斷煩惱事，顯無餘斷。

瑜伽師地論科句披尋記卷第八十三

瑜伽師地論科句披尋記卷第八十三

六三五〇

瑜伽師地論科句披尋記卷第八十四

彌勒菩薩說

唐三藏沙門玄奘奉詔譯

韓清淨科記

攝異門分之下

戊四、第四喞柁南² 己一、喞柁南標

復次，喞柁南曰：

欲三種延請 法僧惠施故 厭梵志無常 聚沫等為後

己二、長行別釋⁹ 庚一、欲三種差別² 辛一、標釋三種³ 壬一、宣說顛倒² 癸

一、出依事

諸欲無常虛偽不實者，謂於諸欲宣說顛倒，以是四種顛倒事故。

以是四種顛倒事故者：謂彼諸欲是四顛倒所依事故。

癸二、釋顛倒

當知此中，虛故無我，偽故不淨，不實故苦，由於是處樂非實故。

壬二、名妄法等²

癸一、說名妄法

然彼諸欲似常等現，說名妄法，顛倒事故。云何諸欲名為妄法？為顯此義，說幻事喻。雖非常等，然似顯現，故同彼法。

癸二、誑惑愚夫

誑惑愚夫者，謂無聞愚夫，於彼諸欲不如實知，故於長夜恆被欺誑，深生染著，為變壞苦之所逼觸；諸聰慧者則不如是，如實知故。

壬三、喻諸過患⁸

癸一、喻枯骨

又彼諸欲，喻枯骨者，令無飽故。

癸二、喻段肉

喻段肉者，多所共故。

多所共故者：謂為眾多所共有故，由是義顯能為他奪。簡非不共，故作是說。

癸三、喻草炬

喻草炬者，是非法行、惡行因故。

癸四、喻一分炭

喻一分炭者，增長欲愛大熱惱故。

癸五、喻大毒蛇

喻大毒蛇者，為諸聖賢所遠離故。

癸六、喻夢所得

喻夢所得者，速散壞故。

癸七、喻所假借莊嚴具

喻所假借莊嚴具者，託眾緣故。

癸八、喻諸樹端爛熟果

喻諸樹端爛熟果者，危亡地故。

辛二、不淨異名² 壬一、總句

又不淨者，是其總句。

壬二、別句

言臭穢者，受用飲食變壞成故。屎尿不淨變壞所成，故名臭處。諸肉血等變壞所成，故名生臭。可厭逆者，受用姪欲變壞所成，可惡逆故。

庚二、延請差別³ 辛一、招延奉請² 壬一、出所應

復次，應招延者，約捨世財。應奉請者，約盡貪愛。

壬二、釋所由

欲求果報，是故招延。欲求解脫，是故奉請。

辛二、應合掌應和敬

應合掌者，即為二事而延請時。應和敬者，應設禮拜問訊等故，應可與彼戒見同故。

辛三、無上福田世應奉施

無上福田世應奉施者，於彼惠施果無量故。

庚三、法差別⁴ 辛一、教法攝² 壬一、善說

復次，善說者，文義巧妙故。

壬二、現見

現見者，於現法中可證得故。

辛二、證法攝² 壬一、滅諦異名⁶ 癸一、無熱

無熱者，離煩惱故。

癸二、無時

無時者，出三世故。

癸三、難引

難引者，老病死等不能引故。

癸四、難見

難見者，天等趣中不可見故。

癸五、內自所證² 子一、簡異生

內自所證者，唯信他等不能證故。

子二、出唯聖

諸有智者者，謂學無學。

癸六、為舍為洲等

為舍、為洲、為救、為歸、為趣者，由後後句釋前前句，顯出離義。

為舍為洲等者：集論中說：何故此滅復名舍宅？無罪喜樂所依事故。何故此滅復名洲渚？三界隔絕故。何故此滅復名弘濟？能遮一切大苦災橫故。何故此滅復名歸依？無有虛妄意樂方便所依處故。何故此滅名勝歸趣？能為歸趣一切最勝聖性所依處故。（集論五卷十四頁）由是當知諸差別義。今說由後後句釋前前句，義顯出離漸次應知。

壬二、道諦漸次² 癸一、標名正見

又得了知四聖諦故，名為正見。

癸二、釋漸次相⁴ 子一、生起等

言生起者，於一切時容可生故。已生起者，於過去世住無學位。今生起者，於現在世或已證得，或修圓滿。當生起者，或未證得，或勤修習。

子二、應修應習等

應修、應習、應多修習者，隨其所應，如前當知。

應修應習等者：前說：若修者，謂由了相作意故。若習者，謂由勝解作意故。多修習者，謂由餘作意故。又若修者，謂於所知事而發趣故。若習者，謂無間、殷重修加行故。多修習者，謂於長時熟修習故。（陵本八十三卷二十頁⁶³³⁸）由是當知彼差別義。或作意攝、或加行攝，所望有別，是故此說隨其所應。

子三、應隨護

應隨護者，遠離隨順退墮法故。

子四、應觸應作證

言應觸者，由身體故。應作證者，或果、或勝智，如說：我已證道故。

辛三、說法攝¹⁰ 壬一、應時而說

應時而說者，若了知彼願樂欲聞及堪聞者，方可為說。坐卑座等，是名為時。

坐卑座等者：菩薩地說：菩薩說正法相，應以其時。謂當安住如法威儀而為他說，非不安住如法威儀。不為無病處高座者而說正法，不為坐者立說正法，不應居後為前行者而說正法，不為覆頭而說正法。（陵本三十八卷十六頁³¹⁵¹）此應準知。

應當序說先時所作。

應當序說先時所作者：聲聞地說：善說正法，謂於時時能善宣說初時所作無倒言論。所謂施論、戒論、生天之論。於諸欲中，能廣開示過患出離清淨品法。（陵本二十五卷四頁²⁰⁸⁵）此應準釋。

壬二、殷重為說

若了知彼是增上已，即便殷重，隨其所能，盡己所有而為說法。為欲開示彼彼差別未曾有義，非直華詞樂說而已。

若了知彼是增上已者：謂了知彼願樂欲聞及堪聽聞，不於下劣而生喜足，名是增上。

壬三、次第隨密隨會

次第者，開示義故。隨密者，設妨難故。隨會者，顯釋彼故。

壬四、令歡喜令愛樂令喜樂

令歡喜者，化受教者故。令愛樂者，化處中者故。令喜樂者，化誹謗者故。

壬五、讚勵訶擯

讚勵者，求彼實德，以稱順心，發自言音揄揚讚美。訶擯者，觀彼實過，以無恚心，發自言音開示訶責。

壬六、道理

道理者，具四道理故，謂觀待道理、作用道理、法爾道理、證成道理。

壬七、有益無雜有法

有益者，於所為處不棄捨故。

於所為處不棄捨者：利益有情，名所為處。如法授與，名不棄捨。

無雜者，無雜亂故，有繫屬故。

無雜亂故等者：不非時說，名無雜亂。前後義趣非不相屬，名有繫屬。

有法者，能引義故，依於苦等有無量種出離遠離所生法故。

依於苦等者：謂依苦等四聖諦法應知。

壬八、如眾會

如眾會者，隨剎帝利等四種會眾所堪能故。

壬九、慈心利益心哀愍心

以慈心者，為欲令彼得樂義故。利益心者，云何當令若有殷重聽聞正法，皆得悟解，獲大利益故。哀愍心者，欲令彼修法隨法行故。

壬十、無所依無輕憊等

無所依者，不為利養恭敬名稱故；謂不依止衣服等事，亦不依止禮敬等事，唯欲令他悟入正法。又不於他有所輕憊，乃至廣說不自高者，不為利養恭敬

事故，作如是言：唯我能知如是法律，非汝等輩；乃至廣說讚己功德，談彼過失。

辛四、聽法攝²

壬一、無雜染心³

癸一、遠離貢高雜染³

子一、應時而聽

於時時間應聽法者，至如是時，應自觀察：我今說法多有所作，他說法時，應正了知，勿我於中當為障礙。

子二、殷重恭敬而聽

即便殷重，以謙下心坐於卑座，具足威儀，隨其所能聽聞正法，起恭敬相。

子三、不為損害等

為欲啟悟先未解義，而興請問。若不悟解，或復沈疑，終不譏誚。於其勝者，恭敬隨順；於等、於劣，恭敬法故，亦不輕慢。

癸二、遠離輕慢雜染³

子一、恭敬說法師

於說法師深生尊重。如說法者，當獲無上大果勝利故。

子二、不輕法

不輕法者，不作是言：此非綺飾文字章句，所有文句悉皆麤淺故。

子三、不輕法師

不輕法師者，不作是言：彼於我所種姓卑劣等故。

癸三、遠離怯弱雜染

不自輕者，不作是言：我於解法無有力能。於其所證無怯劣故。

壬二、無散亂心⁵ 癸一、奉教心

奉教心者，無惱亂心，唯欲求解故。

癸二、心一趣

心一趣者，為欲領解文句差別故。

癸三、屬耳聽

屬耳聽者，為欲了知音韻差別故。

癸四、修治意

修治意者，為欲悟入甚深義故。

癸五、於一切心無不繫念

於一切心無不繫念者，為欲無間領解音韻文句義故，無不了知、無不通達而空過者。

庚四、僧差別⁵ 辛一、正行攝² 壬一、正行異名² 癸一、總句

復次，言正行者，謂是總句。

癸二、別句² 子一、第一義⁴ 丑一、應理行

應理行者，住果有學。

丑二、質直行

質直行者，住於向道。

丑三、和敬行

和敬行者，是其無學。由彼唯於大師、正法及學處等深恭敬故。

丑四、隨法行

隨法行者，於因轉時法隨法行。由聞他音，內正如理而思惟故。

子二、第二義

又應理行者，是其正道及果滅行。質直行者，如其聖教而正修行，無諂無誑，如實顯現。和敬行者，與六堅法而共相應。

與六堅法而共相應者：謂六和敬名六堅法應知。

隨法行者，法隨法行。

壬二、正行果異名

諸阿羅漢諸漏永盡，乃至廣說。

諸漏永盡乃至廣說等者：此中諸阿羅漢種種廣說，如聲聞地別列其相，隨應當知。（陵本三十四卷二十五頁²⁸⁰⁸）

最極究竟，乃至廣說。亦名出離，超出坑塹，越度坑塹，乃至廣說。永斷五支，成就六支，乃至廣說。獲得預流不顛墜法，決定趣向三菩提果，乃至廣說。如是一切，於自處所攝事分中，我當廣說。

又大師子者，是其總句。

壬二、別句² 癸一、諸句差別⁵ 子一、腹所生

腹所生者，簡去異生卑劣子故。

子二、口所生

口所生者，從說法音而誕生故。

子三、法所生

法所生者，如理作意、法隨法行之所生故。

子四、法所化

法所化者，從法身路而得成立，相似法故。

子五、法等分

法等分者，受用無漏法之財寶，相似法故。

癸二、圓滿差別² 子一、標

如是諸句，顯示增上生圓滿，及父相似法生圓滿。

子二、配² 丑一、顯示增上生圓滿

謂初句，於其增上生圓滿中，遮器過失；第二句，遮其精血不淨所生；第三句，遮其欲貪非正法生。如是三句，顯示增上生圓滿。

丑二、顯示父相似法生圓滿

第四句，顯示自體相似之法；第五句，顯示受用相似之法。如是二句，顯示父相似法生圓滿。

辛三、序集攝³ 壬一、標差別

又序者，是緣。集者，是因。

壬二、釋異名

緣增上故，名彼種類。因增上故，名彼所生。

壬三、明建立

雖因所生，藉緣勢力方得生起，為彼依故。又於此中後句釋前。

又於此中後句釋前者：前說集者，是其後句；序者，是其前句。由有因

故，緣可為依，是名後句釋前句義。

辛四、善見攝² 壬一、總句

又善見者，是其總句。

壬二、別句² 癸一、別辨² 子一、善知善思惟

言善知者，知法義故。善思惟者，如其正理而思惟故。

子二、善點慧善通達

善點慧者，全分知故。善通達者，如實知故。

癸二、結顯

由後二句，顯善見性；由前二句，顯彼加行。

辛五、聖攝³ 壬一、聖

又言聖者，是無漏故，及在聖者相續中故。

壬二、出離

言出離者，出離三界一切苦故。

壬三、決達

言決達者，究竟出離無退轉故。

庚五、師德差別⁵ 辛一、為本為眼為依

復次，諸法皆以世尊為本者，由佛世尊是其最初現等覺故。世尊為眼者，現等覺已，為諸天人等開示故。世尊為依者，所說法中，隨所生起一切疑惑皆能遣故。

辛二、能為眼能為智

又佛世尊能為眼者，謂能引發俱生慧故。能為智者，謂能引發加行慧故。

辛三、能為義能為法

能為義者，謂能引發思所成慧故。能為法者，謂能引發聞所成慧故。

辛四、能決了不顯了義

不顯了義能決了者，一切疑惑皆能斷故。

辛五、能為一切義所依

能為一切義所依者，謂能引發一切世間及出世間興盛事故。

庚六、厭差別² 辛一、由位別² 壬一、厭離欲等

復次，厭者，謂於見道。言離欲者，謂於修道離欲究竟。所言滅者，謂於無學一切依滅。

壬二、料簡位次

前之二種，於加行位修習厭行及離欲行；後之一種，在無學位行於滅行。

辛二、由相別² 壬一、厭及離欲

又言厭者，由見諦故，於一切行皆悉厭逆。言離欲者，由於修道永斷貪故。

壬二、解脫遍解脫

言解脫者，由離貪故，一向安隱，於餘煩惱心得解脫。遍解脫者，煩惱斷故，於生等苦普得解脫。

庚七、梵志差別² 辛一、標辨五句⁵ 壬一、是為婆羅門

復次，是為婆羅門者，究竟到彼岸故，蠲除諸惡故，是為其相。

壬二、無猶豫等

無猶豫等者，於自所證離疑惑故。

壬三、斷諸惡作

斷諸惡作者，於應作事無不作故，不應作事無有作故。

壬四、離諸貪愛

離諸貪愛者，無有利養恭敬愛故。

壬五、於有非有著無有隨眠² 癸一、出永斷

於有非有著無有隨眠者，隨眠永斷故。

癸二、釋有非有

當知此中，若現在世、若未來世名之為有，其過去世名為非有。

辛二、料簡其義² 壬一、第一義² 癸一、總標觀察

由此諸句，無倒觀察婆羅門相。

癸二、配釋別相² 子一、前三句

由前三句，顯示多聞及與正知觀見其相。

子二、第四句² 丑一、顯所由

或謂不正修習善品，故復顯示第四一句觀察其相。

丑二、辨所著² 寅一、略標列² 卯一、標八種

此中著者，謂八種著。

卯二、攝二種² 辰一、別辨² 巳一、非有攝

於非有中，作愁憂著。

巳二、有所攝² 午一、於現在世

於現在世所攝有中，有五種著。一、作修治，二、作救護，三、作我所，四、作高勝，五、作下劣。

午二、於未來世

於未來世所攝有中，作行、作動。

辰二、總顯

總於三處，作極厚重、作極甘味。

總於三處者：過去、現在、未來三時差別，說名三處，時依處故。

寅二、隨別釋⁴ 卯一、作愁憂

作愁憂者，所愛變壞故。

卯二、作修治等

作修治者，養育攝藏故。作救護者，於逼惱處求作救護故。作我所者，執為我所故。作高勝者，計我為勝而起憍慢故，如世尊言：世間眾生慢為高幢故。作下劣者，計我為劣而起憍慢故。

卯三、作行作動

言作行者，是其希望未來世愛。言作動者，既希望已，方便追求。

卯四、作極厚重等

作極厚重者，是所愛樂，非可食用，謂金銀等應可貿易。作極甘味者，是可食用。

壬二、第二義³ 癸一、顯義

復有差別。謂此五句，略顯得道、道果作證。

癸二、配句² 子一、配初句

是為婆羅門者，略顯得道。

子二、配餘句² 丑一、標

無猶豫等、斷諸惡作、離諸貪愛、於有非有著無有隨眠者，如是諸句，略顯獲得道果作證。

丑二、釋

於記所解疑惑斷故，於所行中一切忘失法行斷故，於未來世苦因斷故，現在苦因麤重斷故。

癸三、釋名³ 子一、有

所言有者，謂此義中，當知於其三界所攝諸相作意。

子二、非有

言非有者，於無相界作意思惟。

子三、著² 丑一、出體

所言著者，謂此義中是貪瞋癡。

丑二、料簡³ 寅一、辨品類² 卯一、有學無學

如無相定，諸有學者猶有隨眠，非阿羅漢得有尋思、戲論、著、想四種雜染。

卯二、出家在家

前二是出家品，後二是在家品。由有著隨眠，故彼得生起。

寅二、釋雜染² 卯一、出家攝

諸出家者，由追憶念曾所更境，故有尋思；動亂現行，故有戲論。

卯二、在家攝

諸在家者，住現前境，有著、有想；由有染著，取諸相故。

寅三、廣因緣

復有二種雜染因緣，謂不如理作意及順彼處法。由此因緣，彼得生起，是故

說此為彼因緣。

庚八、無常差別²

辛一、苦聖諦攝²

壬一、辨四行²

癸一、無常苦義²

子一、徵

復次，所有無常皆是苦者，義何謂耶？

子二、釋²

丑一、第一義

若有無常眾同分者，有生老等眾苦生起。

丑二、第二義

若依諸觸有諸受者，彼皆變壞，生已尋滅，故說諸受皆悉是苦。

癸二、空無我義

若有生等苦法及有壞等苦法，彼皆無我。自非我故，於是處所亦無有我，由此攝受空、無我行。

自非我故等者：謂諸行中我不可得，名自非我，由此攝受趣入空行。又彼諸行，與其自相及無常相、苦相相應，彼亦一切從緣生故，不得自在；不自在故，皆非是我，是名於是處所亦無有我；由此攝受入無我行。

壬二、明慧忍² 癸一、解了等解了審解了

又解了者，聞所成慧，諸智論者如是說故。等解了者，思所成慧。審解了者，修所成慧。

癸二、喜樂等喜樂遍喜樂

即於如是三慧行中，所有諸忍，名為喜樂、若等喜樂、若遍喜樂。

辛二、隨觀等攝² 壬一、舉差別

又有無常隨觀、斷隨觀、離欲隨觀、滅隨觀者，如聲聞地已廣分別。

如聲聞地已廣分別者：聲聞地說：無常隨觀入息出息，及與斷、離欲、滅入息出息。如彼廣分別義應知。（陵本二十七卷十三頁²²⁸⁶）

又無常力之所損害，乃至廣說。當知此中，增一略文顯無常等差別，障礙差別為後，如其所應。

壬二、明證得² 癸一、得所未得及上作證

為欲獲得所未得者，最初得故，或先下劣有所證故。於上差別而作證者，謂

於其斷而作證故。

癸二、觀察審慮如理觀察² 子一、略說義

言觀察者，此說於慧。言審慮者，說三摩地。如理觀察者，此說二法無顛倒轉。

此說二法無顛倒轉者：慧、三摩地，說名二法止觀雙運。圓滿清淨，名無顛倒轉。

子二、廣無例

雖實無有而顯現者，謂於此中實無樂故。虛者，空無我故。偽者，不淨故。不堅者，無常故。此則顯示無四顛倒。

庚九、聚沫等差別⁵ 辛一、色如聚沫² 壬一、標四因

復次，色如聚沫者，速增減故，水界生故，思飲食味水所生故，不可揉撻故。

壬二、隨難釋² 癸一、不可揉撻

非如泥團可令轉變造作餘物，是故說言不可揉撻。

癸二、非聚似聚

又實非聚，似聚顯現，能發起一有情解故。

速增減故等者：速增減者，喻聚無常。水界生者，喻緣攝受。思飲食味等者，喻喜為因。不可揉接者，喻不隨己欲。由是故說色如聚沫。

辛二、受喻浮泡² 壬一、標義

受喻浮泡者，三和合生，不久堅住相似法故。

壬二、別釋² 癸一、如地如雲如雨

言如地者，所謂諸根，彼生依故。言如雲者，謂諸境界。言如雨者，所謂諸識。

癸二、如雨擊如浮泡

如雨擊者，所謂諸觸。如浮泡者，所謂諸受，速疾起謝，不堅住故。

辛三、想同陽焰

想同陽焰者，飈動性故，無量種相變易生故，令於所緣發顛倒故，令其境界

極顯了故，由此分別男女等相成差別故。

辛四、行類芭蕉² 壬一、徵義

云何行類芭蕉？

壬二、釋句³ 癸一、如明眼人利刀入林

如明眼人者，謂聖弟子。言利刀者，謂妙慧刀。言入林者，謂於五趣舉意攀緣，種種自性眾苦差別同樹法故。

癸二、為取端直芭蕉柱及截根披葉

為取端直芭蕉柱者，謂為作者、受者我見。截其根者，謂斷我見。披折葉者，委細簡擇唯有種種思等諸行差別法故。

癸三、彼於其中都無所獲何況堅實

彼於其中都無所獲者，謂彼經時無堅住故。何況堅實者，何況有餘常恆實我、作者、受者而可得見。

辛五、識如幻事² 壬一、徵

云何識如幻事？

壬二、釋² 癸一、第一義² 子一、引句² 丑一、幻士住四衢道

言幻士者，隨福、非福、不動行識。住四衢道者，住四識住。

丑二、造作四種幻化事

造作四種幻化事者，謂象馬等，如象身等雖現可見，而無真實象身等事。

子二、合法

如是應知隨福、非福、不動行識，住四識住，雖有作者及受者等我相可見，然無真實我性可得。

癸二、第二義

又識於內隱其實性，外現異相，猶如幻像。

丁二、黑品攝² 戊一、結前生後

復次，已說白品異門。黑品異門，我今當說。

戊二、標釋一切² 己一、喩柁南標

唄柁南曰：

生老死藏等 可欣等煩惱 廣說貪瞋癡 少等差別等

己二、長行別釋⁹ 庚一、生差別⁵ 辛一、生等生出

所言生者，謂初結生，即名色位。等生則是胎藏圓滿。出謂出胎。

辛二、現起

現謂嬰孩，乃至少年及中年位。起者，乃至極老年位。

辛三、蘊得界得處得

又蘊得者，謂名色位。界得，即是於此位中，彼種子得。言處得者，名色增長，六處圓滿。

蘊得界得處得者：如有尋有伺地釋應知。（陵本十卷二頁⁷³¹）

辛四、諸蘊現

諸蘊現者，謂從出胎乃至老位。

辛五、命根起

命根起者，捨故眾同分，取新眾同分。

庚二、老差別⁶ 辛一、蹉蹶皓首禰多

復次，言蹉蹶者，年衰邁時，行步去來多僵仆故。言皓首者，髮毛變改白銀色故。言禰多者，皮緩皺故。

辛二、衰熟朽壞

言衰熟者，年衰邁時，即彼黃皺無光澤故。言朽壞者，勢力勇健皆無有故。

辛三、脊偻曲多黑子

脊偻曲者，身形前偻，憑杖行故。多諸黑子莊嚴身者，青黑雜繫遍支體故。

辛四、昏耄羸劣

言昏耄者，於所作事經行住等無多能故。言羸劣者，諸根於境無多能故。

辛五、衰退遍衰退

言衰退者，念智慧等無多能故。遍衰退者，即諸根等，經彼彼念瞬息等位漸損減故。

辛六、諸根熟諸行朽體腐敗

諸根熟者，即彼衰廢無堪能故。諸行朽者，根所依處時經久故。體腐敗者，即彼所說性衰變故。

即彼所說性衰變故者：謂壽量將盡，身形臨壞，於諸事業無復功能。如有尋有伺地說應知。（陵本十卷三頁⁷³⁵）

庚三、死差別⁴ 辛一、殞終

復次，殞者，捨身形故。終者，臨死時故。

辛二、喪歿² 壬一、第一義

喪者，若於是時尸骸猶在。歿者，若於是時尸骸殄滅。

壬二、第二義

又喪者，據色身故。歿者，據名身故。

辛三、壽退煖退命根滅

壽退、煖退者，將欲終時，餘心處在。命根滅者，一切壽量皆窮盡故。

辛四、死殂落

死者，其識棄捨心胸處故。殂落者，從死已後，或一七日，或復經於二三七日。

庚四、藏等差別⁶ 辛一、藏護覆

復次，一切愚夫異生，於其六處，由執我故，名藏；執我所故，名護；由薩迦耶以為根本，各異世間見趣差別我慢增上愛現行故，名覆。

辛二、味結合

於順樂受所有六處有貪欲故，名味。於順苦受所有六處有瞋恚故，名結。於順不苦不樂受所有六處有愚癡故，名合。

辛三、隨眠繫屬執著

於過去世所有六處有顧戀故，名隨眠。於未來世所有六處有希望故，名繫屬。於現在世所有六處有耽染故，名執著。

辛四、執我所及慢

於自攝受他身六處，執為我所。於劣中勝非自攝受他身六處，依慢種類，發起於慢。

辛五、希求厚重

於不定地欲界所繫，發起後後所有希求。於其定地色無色繫，如其所應，由廣大微妙故，發起厚重。

辛六、甘味不捨

依在家品色聲香味觸，由愛味眷屬所隨逐故，發起甘味。依出家品六處，由懈怠放逸煩惱故，遍於一切不能捨離。

庚五、可欣等差別² 辛一、辨四句² 壬一、標顯

復次，可欣、可樂、可愛、可意者，當知此四句略顯可愛事。

壬二、別釋² 癸一、第一義³ 子一、出可愛事

此可愛事略有三種。一、可希求事，二、可尋思事，三、可耽著事。

子二、配屬四句³ 丑一、約未來

未來可愛事可希求故，名為可欣。

丑二、約過去

過去可愛事唯可欲故、唯可樂故，名為可樂。

丑三、約現在² 寅一、列二種

現在可愛事略有二種。一、境界事，二、領受事。

寅二、配差別

若境界事可愛樂故，名為可愛。若領受事可愛樂故，名為可意。

子三、結說一切

如是所說諸可愛事，或過去、或未來、或現在、或境界、或領受，有差別故，或名可希求事、或名可尋思事、或名可耽著事，是故宣說如是一切諸句差別。

癸二、第二義

又可欣者，約未來世，可希求故。可樂者，約現在世，現可欲樂無厭足故。

可意者，約過去世，隨念可意而追憶故。可愛者，約妙色相，貫通三世皆可愛故。

辛二、釋隨應² 壬一、可欲及欲所引

又可欲者，悅意記念故。欲所引者，欲界繫故，或復隨順二種差別受用欲故。

或復隨順二種差別者：聲聞地說欲有二種，一者、煩惱欲，二者、事欲。

（陵本三十三卷九頁²⁶⁹⁹）是名二種差別。

壬二、可染著

可染著者，貪處所故。

庚六、煩惱差別³ 辛一、體性義攝²⁴ 壬一、結⁵ 癸一、標得名

復次，於五種事能和合故，說名為結。

癸二、列五事

五種事者，一、所結事，二、能結事，三、罪過事，四、等流事，五、趣向
事。

癸三、別釋相⁵ 子一、所結事

諸結所緣，名所結事。所以者何？由愛恚等，各於所緣隨相差別而和合故。

子二、能結事

即彼諸結展轉相引而和合故，名能結事。

子三、罪過事

諸結因緣，於現法中能生過罪，乃至領受從彼所生心法憂苦。由此因緣，能和合故，名罪過事。

子四、等流事

為當來世猛利貪等生成之因而和合故，名等流事。

子五、趣向事

能生五趣，於諸趣中能 and 合故，名趣向事。

癸四、廣罪過³ 子一、能自損能損他能俱損

由此因緣，自行惡行，遭他答罰、縛錄、訶罵、驅擯、害等種種眾苦而生起

故，名能自損。若不自遭，令他遭故，名能損他。若由彼故，自他俱遭，名能俱損。

子二、生現罪生後罪生俱罪

能生現法罪者，謂由彼故，遭如所說種種苦事，然不決定往諸惡趣。能生後法罪者，謂由彼故，雖於現法他所不知，然能為因往諸惡趣。能生現法後法罪者，謂具二種。

子三、生現憂苦及當惡趣

於現法中多懷染著，所欲不遂，廣生種種心法憂苦，復於當來往諸惡趣。

癸五、結勝說

結雖無量，就勝而言，略有九結。

壬二、縛² 癸一、出種類

又約不隨所欲義故，說有三縛，謂貪瞋癡，依三受故。

癸二、釋得名

由彼因緣，雖欲脫彼而不能脫，故名為縛。

依三受故者：樂受為依，貪所隨增，生染著故。苦受為依，瞋所隨增，生瞋恚故。不苦不樂受癡所隨增，起顛倒故。謂於諸行自體，無常計常，苦計為樂，不淨計淨，無我計我。義如決擇分說。（陵本六十六卷一頁₄₉₃₉）

壬三、隨眠² 癸一、釋得名

又煩惱品麤重種子之所隨逐，說名隨眠，是隨縛義、是微細義。

癸二、出種類

取其根本，但有七種。

壬四、隨煩惱² 癸一、釋得名

又從煩惱生故，親近煩惱故，隨惱亂心故，名隨煩惱。

癸二、出體性

除七隨眠，所餘一切染汙心法皆隨煩惱。

壬五、纏² 癸一、釋得名

又現起相續無斷絕義，說名為纏。

癸二、出種類

纏有八種，謂無慚等。

壬六、株杌² 癸一、釋得名

又彼能令轉成上品相續起故，能令身心無堪能故，說為株杌。如烏鹵田，不任耕植。

癸二、辨種類² 子一、五種

又處所別故，彼所生疑有差別故，說五心株。

又處所別故等者：疑所依處有五差別。一、於大師所，二、於正法所，三、於所學處，四、於教誡所，五、於諸有智梵行者所。依此五處而生疑惑猶豫，由是故說有五心株。集異門論名五心栽，名別義同。

子二、三種

貪等別故，說有三種。

貪等別故說有三種者：貪瞋癡別，名三株杌。如有尋有伺地說。（陵本八卷七頁⁵⁷³）

壬七、垢

又彼能令不清淨故，說名為垢。

壬八、儻伽² 癸一、常流注

又於諸處門，常流注故，名為儻伽。

癸二、常能害

常能害故，亦名儻伽。

壬九、箭

又彼能令不寂靜故，說名為箭。如被毒箭，若未拔時多不寂靜。

壬十、所有

又能障捨故，有戲論故，名為所有。

壬十一、惡行

又非法行、不平等行現在前故，說名惡行。

又非法行等者：三摩呬多地決擇中說：由非善義，名非法行；非愛果義，名不平等行。（陵本六十二卷四頁⁴⁹⁷⁷）

壬十二、根

又能等起一切煩惱、諸惡行故，說名為根。

壬十三、漏

又能出生當來生故，說名為漏。

壬十四、匱

又既生已，由老死等令匱乏故，說名為匱。

壬十五、燒

又非愛合會、所愛乖離、貪求利養所燒然故，說名為燒。

壬十六、惱

又能令愁歎憂苦惱故，說名為惱。

壬十七、暴流

又能令順流而漂溺故，說名暴流。

壬十八、軛

又依前際，能為現法生死流轉勝方便故，說名為軛。

壬十九、取

又依現在，能為未來勝方便故，說名為取。

壬二十、繫

又難解故，說名為繫。

壬二十一、蓋

又於所知事能障智故，說名為蓋。

壬二十二、五結² 癸一、下分結² 子一、辨差別

又望色無色界，欲界為下分；望其修道，見道為下分。

子二、釋得名

由約此二下分差別，隨其所應，說名五下分障，亦名五下分結。

癸二、上分結

與此相違，當知說有五上分結。

隨其所應說名五下分障等者：五下分結中，貪欲、瞋恚，當知依欲界為下分說；薩迦耶見、戒禁取、疑，當知依見道為下分說。此不分別，故言隨應。

壬二十三、林

又言林者，能生種種苦蘊體性。由親愛故，彼得增長，說名稠林。

壬二十四、諍

又能發起諸鬥訟等種種忿競，故名為諍。

辛二、訶毀義攝⁶ 壬一、黑

明所治故，說名為黑。

壬二、無義

能引苦故，說名無義。

壬三、弊下

無所用故，說名弊下。

壬四、有罪

性染汙故，說名有罪。

壬五、應遠離

不應習近故，說名應遠離。

壬六、突尸羅等² 癸一、第一義⁷ 子一、突尸羅

毀犯所受清淨戒故，名突尸羅。

子二、惡法

又惡法者，謂極猛利無慚無愧，不信佛等，毀謗賢聖，邪見相應故；或復種種惡法現行故；又有貪欲、瞋恚心等，乃至廣說。

又有貪欲瞋恚心等乃至廣說者：等言，等取有愚癡心。能起惡行所有煩

惱，與心相應，是名廣說。

子三、內朽敗

當知此中，內朽敗者，外持沙門相故，內無沙門法故；猶如大木，外皮堅妙，內被蟲食，虛無有實。

子四、下產生

下產生者，廣如下產及非下產法門中說。

下產生者等者：謂是異生諸卑劣子，產門所生、精血不淨所生、欲貪所生，名下產生。若大師子，腹所生、口所生、法所生，名非下產生。如前顯示增上生圓滿中說。

子五、水生蝸螺

水生蝸螺者，謂所聽受與水相似，除渴愛故。若諸苾芻犯禁戒等，如彼蝸螺穢濁淨水，是故猶如有蝸螺水，不堪飲用，應遠離故。

子六、螺音狗行

螺音徇行者，謂諸苾芻習行惡行，於受利養臥具等時，自稱年臘最第一故。

子七、實非沙門稱沙門等² 丑一、非沙門等² 寅一、非沙門

實非沙門稱沙門者，已失苾芻分，稱有苾芻分故。實懷惡欲，而自稱言我是第一真沙門故。

寅二、非梵行

非梵行者，實非遠離婬欲穢法，而自稱言我遠離故。

丑二、妄稱沙門等² 寅一、妄稱梵行

又失苾芻性，而自稱有苾芻性，是故說名妄稱梵行。

寅二、妄稱沙門

實非沙門，而自稱言我是第一真實沙門，是故說名妄稱沙門。

癸二、第二義⁷ 子一、突尸羅

又捨所受故，名突尸羅。

子二、惡法

先捨惡法復還取故，名為惡法。

子三、內朽敗

形相意樂互不相稱，由是因緣，名內朽敗。

子四、下產生

隨其所欲而行住故，名下產生。

子五、水生蝸螺

毀辱所聞故，名水生蝸螺。

子六、螺音狗行

由邪受用諸信施故，名螺音狗行。

子七、妄稱沙門梵行

邪言說故，名為妄稱沙門梵行。

辛三、指廣說² 壬一、貪瞋癡等

又有貪瞋癡忿恨等，乃至廣說諸雜穢事，攝事分中我當廣說。

攝事分中我當廣說者：攝事分說：隨煩惱者，謂貪不善根、瞋不善根、癡不善根，若忿、若恨，如是廣說諸雜穢事。（陵本八十九卷七頁⁶⁷³⁷）如彼廣釋應知。

壬二、無常苦等

又有無常、苦、空、無我、生法、老法乃至燒雞，隨其處所，即於彼中我當廣說。

庚七、廣說貪瞋癡³ 辛一、貪差別²⁴ 壬一、染著

復次，染者，謂樂著受用故。著者，謂即於彼無所顧惜故。

壬二、饕餮吞吸迷悶

饕餮者，謂希望未來所得受用事故。吞吸者，謂彼所餘助伴煩惱所吞吸故。迷悶者，次後當說。

次後當說者：謂如下說，不能觀察功德及過失故。

壬三、耽著貪求

耽著者，謂堅執已得，無所營為故。貪求者，謂追求未得，勤加行故。

壬四、欲貪

欲者，謂於未得、已得，希求獲得及受用故。貪者，謂於受用喜樂堅著故。

壬五、親昵愛樂

親昵及愛樂，如所親昵所愛樂中，應知其相。

壬六、藏護

藏者，謂於內所攝自體中愛故。護者，謂於他相續中愛故。

壬七、執渴

執者，謂於我所中愛故。渴者，謂倍增希求故。

壬八、所染所憍所欲

所染者，謂貪居處故。所憍者，謂七種憍所居處故。

七種憍者：謂無病憍、少年憍、長壽憍、族姓憍、色力憍、富貴憍、多聞憍。如意地說應知。（陵本二卷十九頁¹⁷⁵）

所欲者，謂種種品類受用貪欲所居處故。

壬九、所親昵所愛樂等²

癸一、約依處辨

所親昵者，謂是過去諸顧戀愛所隨處故。所愛樂者，謂是現在諸欣喜愛所隨處故。

癸二、約串習辨

又現法中串所習愛，名為親昵。宿世串習所發生愛，名為愛樂。

壬十、所迷悶

所迷悶者，不能於中觀察功德及過失故。

壬十一、所貪著所縛著

所貪著者，是耽樂心所居處故。所縛著者，是貪瞋癡所居處故。

壬十二、所希求所繫縛

所希求者，能生愛故。所繫縛者，是一切結所居處故。

壬十三、是惡者

是惡者者，謂能和合不善法故。

壬十四、喜樂言說遽務

為令現前而喜樂者，謂希望故。為令現前而言說者，謂以語言而追求故。為令證得而遽務者，謂生貪著身追求故。

壬十五、耽著而住

耽著而住者，謂得已抱持而不捨故。

壬十六、等染等惡等愚

等染者，謂於樂受起貪欲故。等惡者，謂於苦受起貪恚故。等愚者，謂於三受起愚癡故。

壬十七、顧戀繫心劬勞

顧戀者，謂於過去故。繫心者，謂於未來故。劬勞者，謂由彼因緣，正起追求故。

壬十八、熾然燒惱

熾然者，謂所欲果遂，起染汙心故。燒者，謂所欲衰損，起染汙心故。惱者，謂所得變壞故。

壬十九、為祈禱為觸對為希求為欣悅

為祈禱者，顯示取著吉祥愛故。為觸對者，顯示取著摩執愛故。為希求者，顯示取著與利愛故。為欣悅者，顯示取著如意思惟所有愛故。

壬二十、趣清淨等

又於諸欲其心趣入清淨，乃至廣說於五種出離界，應知如前三摩呬多地已說。

又於諸欲其心趣入清淨等者：三摩呬多地說：於諸欲中心不趣入，不美，不住，無有勝解，乃至廣說終不領納緣彼諸受。（陵本十一卷十二頁⁸⁹²）

如是種種諸離欲相，是名其心趣入清淨。言五種出離界者，謂欲、恚、害出離，色出離，薩迦耶滅出離。亦如三摩呬多地說。（陵本十一卷十一

頁⁸⁹⁰）

壬二十一、憍醉極憍醉

言憊醉者，謂與三憊共相應故。

謂與三憊共相應故者：此中三憊，謂無病憊、少年憊、長壽憊。聲聞地說：謂如有一樂受欲者，為受諸欲食於所食。乃至廣說當得勇健，膚體充實，長夜無病，久時少壯，不速衰老，壽命長遠。（陵本二十三卷十三

頁¹⁹⁸²）其義應知。

極憊醉者，謂依止憊，遍於諸惡不善法中，能令其心不防護故。

壬二十二、趣憊醉及生等憊

趣憊醉者，謂於憊醉所有因緣受學轉故。於諸欲中生等憊者，謂不觀過受用欲故。

壬二十三、平安領受趣受

平安者，謂樂受自相故。領受者，謂諸受共相故。趣受者，謂餘受因相故。

壬二十四、欲貪堅著拘礙饕餮等

又欲貪、堅著、拘礙、饕餮等貪，如聞所成地已說。

辛二、瞋差別⁸ 壬一、內垢內忌內敵內怨

復次，言內垢者，謂於怨意樂堅持不捨故。內忌者，謂於所愛障礙住故。內敵者，謂能引發所不愛故。內怨者，謂能引發所不宜故。

壬二、不可喜不可樂不可愛等

又不可喜、不可樂、不可愛等，翻可喜等，如前應知。

翻可喜等如前應知者：前說可欣、可樂、可愛、可意，翻彼應知。

壬三、苦損害違逆不順意

又言苦者，謂彼自性苦，亦隨憶念苦故。損害者，謂現前苦故。違逆者，謂於三世思惟苦故。不順意者，謂現有苦能損害故。

壬四、苦猛利堅硬辛楚不可意等

又苦、猛利、堅硬、辛楚、不可意等，如攝事分我當廣說。

如攝事分我當廣說者：攝事分說不可欣、不可樂、不可愛、不可意。（陵

本九十一卷三頁⁶⁸⁶⁵）如彼廣說當知。

壬五、暴惡等² 癸一、總句

又暴惡者，是其總句。

癸二、別句³ 子一、蜚螫怨字語

蜚螫者，麤言猛切故。怨字語者，謂造文字無有依違麤獷言故。

子二、怨嫌憤發恚害

怨嫌者，謂毀辱所依故。憤發者，謂出言顯發惡意樂故。恚害者，謂以手等而加害故。

子三、顰蹙而住遍生憤恚

顰蹙而住者，謂憤害已後，顰蹙眉面，默然而住故。遍生憤恚者，謂數數追念不饒益相，深懷怨恨惱亂心故。

壬六、苦有苦有匱有災有熱² 癸一、釋五句² 子一、約因緣辨

若生煩惱，惱亂其心，由此因緣，便住於苦。如說：苾芻懈怠雜諸惡，便住於眾苦。有苦者，謂彼攝受未來苦故。有匱者，謂彼遠離諸善品故。有災

者，謂彼能為餘惑因故。有熱者，謂於後時發熱惱故。

子二、約諸受辨

又言苦者，是其總句。有苦者，謂憂苦相應故。有匱者，謂樂受變壞故。有災者，謂在不苦不樂受中，於二不解脫故。

於二不解脫故者：謂不解脫苦、樂二種故。

有熱者，謂於樂等，如其所應，有貪瞋癡火故。

癸二、釋二句

又於過去有苦，於未來有匱。

壬七、害敵怨

又害者，謂顯示攝受上品怨嫌故。敵者、怨者，如前已說。

敵者怨者如前已說者：如前已說內敵、內怨，其相應知。

壬八、摧伏破壞等² 癸一、別辨句

又摧伏者，謂與未生士用生相違故。破壞者，謂與已生士用住相違故。為他

所勝者，謂與未生功能生相違故。落在他後者，謂與已生功能住相違故。

癸二、例相違

又不摧伏、不破壞、非所勝、有所勝者，如是諸句，由前諸句其義應知。

摧伏破壞為他所勝落在他後者：此四句中，初二句謂於善法現行，後二句謂於善法種子，如是差別應知。

辛三、癡差別³

壬一、出種類²

癸一、舉已說⁷

子一、世愚攝²

丑一、別辨句³

寅一、於前際無智

復次，於前際無智者，謂於過去諸行無常法性不了知故。

寅二、於後際無智

於後際無智者，謂於現在諸行盡滅法性不了知故。

寅三、於前後際無智

於前後際無智者，謂於未來諸行當生法性，及當生已當盡法性不了知故。

丑二、釋彼相

彼於如是不了解者，謂依前際等，起不如理思惟：我於過去世為曾有耶？乃至廣說我為是誰？誰當是我？今此有情從何而來？於此沒已當往何所？

子二、事愚攝²

丑一、標無知

如是依前後際不如理作意，故於如是無常法性愚癡不了，於諸行中我見隨逐，於內、於外、俱於二種唯有法性不能了知。

丑二、釋差別

內謂內處，外謂外跡，內外即是根所依處及以法處。由彼諸法於內可得，又是外處之所攝故。

子三、移轉愚攝³

丑一、於業無智

於業無智者，謂於諸業唯有行性不能了知，而妄計度我為作者。

丑二、於異熟無智

於異熟無智者，謂於有情世間及器世間，若餘境界，業因所起，妄計自在、作者、生者。

丑三、於業異熟無智

於業異熟無智者，謂遍愚一切，獲得誹謗業果邪見。此即宣說外道異生，於諸法中所有無智。

獲得誹謗業果邪見者：謂如說言：無有妙行，無有惡行，及無妙行、惡行二業果及異熟。是即謗無因果邪見。

子四、最勝愚攝³ 丑一、於佛無智

於佛無智者，謂不了知如來法身及諸行相。

丑二、於法無智

於法無智者，謂不了知善說等相。

丑三、於僧無智

於僧無智者，謂不了知正行等相。

子五、真實愚攝

於苦等無智者，謂如諸經所分別相，及十六行中不了知故。

子六、染淨愚攝² 丑一、於因無智

於因無智者，謂於無明等諸有支中，能為行等所有因性不了知故。

丑二、於因所生無智² 寅一、約諸支辨

於因所生無智者，謂於行等諸有支中，從無明等因所生性不了知故。

寅二、約諸法辨

又於雜染、清淨品法，謂不善、善、有罪、無罪、過患、功德相應故。隨順黑白，謂無明、明分故。黑黑異熟；白白異熟；及有對分，謂即黑白黑白異熟。如是一切，皆從因緣之所生故，名為緣生。於彼一切不了知故，名為無智。

子七、增上慢愚攝² 丑一、第一義

或於六觸處不能如實遍通達者，謂於六處順樂受等觸所生中，彼滅寂靜不能如實遍了知故。

丑二、第二義

又此加行，不能如實於法通達知見現觀者，謂即於彼法不如實知故。

癸二、指一切

於彼、於此者，於如所說，或所未說。

壬二、辨異名³ 癸一、無知無見等⁶ 子一、無知

無知者，於不現見。

子二、無見

無見者，於現見現前。

子三、無現觀

無現觀者，於如實證不由他緣。

子四、黑闇

黑闇者，於其實事不正了知。

子五、愚癡

愚癡者，於不實事妄生增益。

子六、無明昏闇

無明者，於所知事不能善巧，於彼彼處不正了知。謂於彼彼所說義中，及於名句文身不能解了。

謂於彼彼所說義中等者：此即釋前於彼彼處不正了知。若義、若法，名為處故。

昏闇者，成就誹謗一切邪見。

癸二、障蓋無明等

又障、蓋、無明等，廣說如攝事分。

癸三、覆蔽隱沒等

又覆蔽、隱沒、昏昧、遍昏昧等，廣說如愛契經。

壬三、辨能障⁷

癸一、不恭敬等³

子一、第一義

不恭敬者，不修恭敬故。不尊重者，不信彼德故。不貴尚者，令彼所欲有匱乏故。不供養者，不施利養故。

子二、第二義

又不恭敬乃至不供養者，當知展轉後句釋前。

子三、第三義

又不恭敬、不尊重、不信有而聽聞法等，廣說如攝決擇分。

癸二、不承聽不審聽

又不承聽者，不欲聞故。不審聽者，心散亂故。

癸三、不住奉教心等

不住奉教心者，不欲修行故。不修正行者，於法隨法行，不如意樂正修行故。又不受學轉者，於大師聖教不能證故。

癸四、樂睡眠虛度生命等² 子一、總句

又樂睡眠虛度生命者，是其總句。

子二、別句² 丑一、唐捐無果

唐捐者，不能修往善趣因故。無果者，不能得彼善趣果故。

丑二、無義無利

無義者，不能修得涅槃因故。無利者，不能得彼涅槃果故。

癸五、不慰問同梵行者² 子一、釋問句³ 丑一、少病惱不

又問少病惱不者，界無不平等故。

丑二、少事業不

少事業不者，加行事業無不平等故。

丑三、起居輕利不

起居輕利不者，希須飲食既飲食已，易消化故。

子二、指餘相

又務力樂及無罪等，如聲聞地食知量中，已說其相。

癸六、不簡擇等

又不簡擇、不極簡擇等，廣說如聲聞地。

癸七、不思惟等

又不思惟、不稱量等，廣說亦如聲聞地。

庚八、少等差別

復次，少者，高廣量不相應故。小者，卑狹量相應故。渺者，纔受世間言說量故。

庚九、異門等差別

復次，或異門者，自相差別故。或意趣者，俗相差別故。或殊異者，因相差別故。

乙三、結略指廣

如是名為攝異門分。如是異門，於諸經中，隨其麤顯言多用者，略已采集示差別義。其餘無量諸佛世尊所說異門及義差別，由此方隅、由此所學、由此言教，應當精勤別別思擇異門、異義顯示安立。

瑜伽師地論科句披尋記卷第八十四

瑜伽師地論科句披尋記卷第八十五

彌勒菩薩說

唐三藏沙門玄奘奉詔譯

韓清淨科記

攝事分中契經事行擇攝第一之一

甲五、攝事分² 乙一、結前生後

如是已說攝異門。云何攝事？

乙二、攝釋一切⁴ 丙一、標列三處

謂由三處，應知攝事。一者、素怛纜事，二者、毗奈耶事，三者、摩怛理迦事。

丙二、略攝契經³ 丁一、標列一切

云何素怛纜事？謂由二十四處，略攝一切契經。一者、別解脫契經，二者、事契經，三者、聲聞相應契經，四者、大乘相應契經，五者、未顯了義令顯

了契經，六者、已顯了義更令明淨契經，七者、先時所作契經，

先時所作契經者：謂即施論、戒論、生天之論善說正法，此為先故。攝異門分說：應當序說先時所作。若了知彼是增上已，即便殷重，隨其所能，盡已所有而為說法。（陵本八十四卷二頁⁶³⁵⁸）其義應知。

八者、稱讚契經，九者、顯示黑品契經，十者、顯示白品契經，十一者、不了義契經，十二者、了義契經，十三者、義略文句廣契經，十四者、義廣文句略契經，十五者、義略文句略契經，十六者、義廣文句廣契經，十七者、義深文句淺契經，十八者、義淺文句深契經，十九者、義深文句深契經，二十者、義淺文句淺契經，二十一者、遠離當來過失契經，二十二者、遠離現前過失契經，二十三者、除遣所生疑惑契經，二十四者、為令正法久住契經。

丁二、隨釋四種³ 戊一、別解脫契經

別解脫契經者，謂於是中，依五犯聚及出五犯聚，說過二百五十學處，為令

自愛諸善男子精勤修學。

依五犯聚等者：調伏事中說：有五種罪聚攝一切罪。何等為五？一者、他勝罪聚，二者、眾餘罪聚，三者、隕墜罪聚，四者、別悔罪聚，五者、惡作罪聚。（陵本九十九卷二頁⁷⁴⁰⁹）此五犯聚，如彼應知。又此一百五十學處，當為二百五十學處。聲聞地說：復從親教、軌範師處，得聞所餘別解脫經；總略宣說過於二百五十學處，皆自誓言：一切當學。（陵本二十二卷五頁¹⁹⁰⁴）此說學處，應無有異。

戊二、事契經³ 己一、略標列

事契經者，謂四阿笈摩。一者、雜阿笈摩，二者、中阿笈摩，三者、長阿笈摩，四者、增一阿笈摩。

己二、隨別釋² 庚一、釋四差別⁴ 辛一、雜阿笈摩² 壬一、釋相³ 癸一、辨相應²

子一、事相應

雜阿笈摩者，謂於是中，世尊觀待彼彼所化，宣說如來及諸弟子所說相應，

蘊、界、處相應，緣起、食、諦相應，念住、正斷、神足、根、力、覺支、道支、入出息念、學、證淨等相應。

所說相應等者：所說行相相應，是名所說相應。蘊、界、處相應等，即此釋句。攝釋分說：行相者，謂諸蘊相應、諸界相應、諸處相應、緣起相應、處非處相應、念住相應。又說行相是所說相。（陵本八十一卷四頁⁶¹⁷⁵）由是此言所說相應。

子二、眾相應

又依八眾說眾相應。

又依八眾說眾相應者：意地中說：眾會事者，所謂八眾。一、剎帝利眾，二、婆羅門眾，三、長者眾，四、沙門眾，五、四大天王眾，六、三十三天眾，七、焰摩天眾，八、梵天眾。（陵本三卷十六頁²⁶⁰）此應準知。

癸二、明結集

後結集者，為令聖教久住，結唄陀南頌，隨其所應次第安布。

癸三、略顯義² 子一、標列

當知如是一切相應，略由三相。何等為三？一、是能說，二、是所說，三、是所為說。

子二、配釋³ 丑一、是能說

若如來、若如來弟子，是能說。如弟子所說，佛所說分。

丑二、是所說

若所了知、若能了知，是所說。如五取蘊、六處、因緣相應分及道品分。

丑三、是所為說

若諸苾芻、天魔等眾，是所為說。如結集品。

壬二、結名

如是一切，麤略標舉能說、所說及所為說，即彼一切事相應教間廁鳩集，是故說名雜阿笈摩。

辛二、中阿笈摩

即彼相應教，復以餘相處中而說，是故說名中阿笈摩。

辛三、長阿笈摩

即彼相應教，更以餘相廣長而說，是故說名長阿笈摩。

辛四、增一阿笈摩

即彼相應教，更以一二三等漸增分數道理而說，是故說名增一阿笈摩。

庚二、釋阿笈摩

如是四種，師弟展轉傳來於今。由此道理，是故說名阿笈摩。

己三、總結名

是名事契經。

戊三、聲聞大乘相應契經² 己一、明攝

於十二分教中，除方廣分，餘名聲聞相應契經。即方廣分，名大乘相應契經。

己二、指義

此分別義，如前應知。

丁三、廣指所餘

如是四種契經，由餘未顯了義令顯了等二十種契經，如其所應，當知其相。

丙三、廣辨三事³

丁一、素怛纜事摩怛理迦⁴

戊一、出所為

從是已後，依此所說四種契經，當說契經摩怛理迦，為欲決擇如來所說、如來所稱、所讚、所美先聖契經。

戊二、釋得名

譬如無本母字，義不明了。如是本母所不攝經，其義隱昧，義不明了。與此相違，義即明了，是故說名摩怛理迦。

戊三、明所攝⁴

己一、行擇攝²

庚一、總喩柁南

總喩柁南曰：

界略教想行 速通因斷支 二品智事諍 無厭少欲住

庚二、別喩柁南¹¹

辛一、界攝²

壬一、頌標列

別喩柁南曰：

界說前行觀察果 愚相無常等定界

二種漸次應當知 非斷非常及染淨

壬二、長行釋¹¹

癸一、界²

子一、辨邪界³

丑一、標

有四種所化有情先數習邪解脫見所集成界。

丑二、徵

何等為四？

丑三、釋²

寅一、舉由常見

謂於先有、先世、先身、先所得自體中，聽聞常見增上不正法、不如理作意增上力故，於今由彼為因、由彼為緣，數習邪解脫見所集成界。

寅二、例由斷見等

如說由常見，如是由斷見、由現法涅槃見、由薩迦耶見，廣說亦爾。

子二、明調伏²

丑一、總顯

此中世尊，由種種勝解智力、種種界智力增上力故，尋求彼先勝解及彼後

界，如其所應，為調伏彼邪勝解界故，多分為轉四種法教。

多分為轉四種法教者：謂說無常、苦、空、無我，是名四種法教。如其所應，調伏常見，乃至薩迦耶見邪勝解界。如下自釋，義可了知。

或復為餘智未成熟者，令彼智成熟故；智已成熟者，令彼解脫諸煩惱故。

丑二、別辨⁴ 寅一、為說行盡無常

為初邪界有情，說因滅故行滅，由行盡門說無常性，為調伏彼邪勝解界故。

寅二、為說行起無常

為墮第二邪界有情，說因集故行集，由行起門說無常性，為調伏彼邪勝解界故。

寅三、為說行苦

為墮第三邪界有情，由諸行苦門轉正法教，為調伏彼邪勝解界故。

寅四、為說行空無我

為墮第四邪界有情，若離諸行起薩迦耶見行者，由諸行空門轉正法教；若即

諸行起薩迦耶見行者，由無我門轉正法教；為調伏彼邪勝解界故。

癸二、說² 子一、標列

復次，善說法律，略由三種不共支故，不共外道，墮善說數。一者、宣說真實究竟解脫故；二者、宣說即彼方便故；三者、宣說即彼自內所證故。

子二、隨釋³ 丑一、真實究竟解脫² 寅一、徵

云何真實究竟解脫？

寅二、釋² 卯一、約二種解脫辨² 辰一、標舉

謂畢竟解脫及一切解脫，即是見道果，及此後所得世出世修道果。

辰二、料簡

此中見道果，由畢竟故得名真實，而非究竟，於一切解脫猶有所應作故。

卯二、約三種解脫辨² 辰一、標列

又解脫有三種。一、世間解脫，二、有學解脫，三、無學解脫。

辰二、料簡

世間解脫非是真實，有退轉故。有學解脫雖是真實，而非究竟，猶有所作故。當知所餘，具足二種。

當知所餘具足二種者：謂無學解脫應知。

丑二、方便² 寅一、徵

云何方便？

寅二、釋² 卯一、真實解脫方便

謂於諸行中，依如所有性及盡所有性，修無常想；依無常，修苦想；依苦，修空、無我想；因此得入諦現觀時，由正觀察所知境故，獲得正見。

卯二、究竟解脫方便³ 辰一、住厭逆想

由此正見為依止故，修道位中，遍於諸行住厭逆想。

辰二、滅喜貪纏² 巳一、別辨² 午一、於住時

彼於住時，雖由彼相應受，憶念思惟不現前境明了現前，而不生喜。

午二、於行時

由不生喜增上力故，彼於行時，即於彼受所緣境界不生染著。彼於一切所求境界，得處中故，尚不希求，何況耽著。

得處中故者：謂於無記捨中行平等故。

巳二、總結

彼由如是若住、若行，於喜貪纏速能滅盡，心清淨住。

辰三、永拔隨眠

又即於彼如所得道極多修習為因緣故，永拔彼品麤重隨眠，獲得真實究竟解脫，當知即是心善解脫。

丑三、自內所證³ 寅一、徵

云何自內所證？

寅二、釋² 卯一、標四相

當知有四種相。

卯二、辨二位² 辰一、有學位² 巳一、標

若於有學解脫轉時，由二種相，內慧觸證。

巳二、釋

謂我已盡諸惡趣中所生諸行，又我已盡除其七生、二生、一生所餘後有所生諸行，又我已住能究竟盡無退轉道。

除其七生二生一生者：七生，謂於預流果。二生，謂於一來果。一生，謂於不還果。

辰二、無學位² 巳一、標

若於無學解脫轉時，即由如是二種相故，內慧觸證。

巳二、釋

謂我已作為斷其餘一切煩惱所應學事，我今尚無餘一生在，況二、況七。又隨所樂，亦能為他如實記別。

寅三、結

如是名為自內所證。

癸三、前行² 子一、標列

復次，即彼解脫有二種前行法。一者、見前行法，二者、道果前行法。

子二、隨釋² 丑一、見前行法

見前行法者，謂由解脫及彼方便自內所證增上力故，從他言音，起聞思修所成妙善如理作意，未入正性離生能入正性離生，得如實見出世正見。

謂由解脫等者：此說不共外道善說法律，名增上力。此說解脫及彼方便自內所證，是其三種不共支故，義如前知。

丑二、道果前行法

道果前行法者，謂得如是正見已，復起所餘正思惟等，或同時生、或後時生道前行法，為斷所餘諸煩惱故。

癸四、觀察² 子一、略標列

復次，為欲證得所未得解脫故，應觀察八事。謂於諸行中愛味、過患、出離觀察，及聞、思、思擇力、見道、修道觀察。

應觀察八事等者：一、觀察愛味，二、觀察過患，三、觀察出離，四、觀察聞慧，五、觀察思慧，六、觀察思擇力，七、觀察見道，八、觀察修道，是名觀察八事。如下別釋，義可了知。

子二、隨別釋²

丑一、初三事²

寅一、辨³

卯一、觀察愛味

於諸行中觀察愛味時，能善通達諸行愛味所有自相。

卯二、觀察過患

即於諸行觀察過患時，能善了知三受分位過患共相。謂於是中甚少愛味，多諸過患。

卯三、觀察出離²

辰一、標差別

如是了知愛味染著多諸過患共相應已，於所愛味一切行中，隨所生起欲貪煩惱，即能除遣、制伏、斷捨。

辰二、釋斷捨

於此欲貪不現行故，說名為斷，非永離欲故名為斷。又於彼事心未解脫，若

於隨眠究竟超越，乃永離欲，心得解脫。

寅二、結

是名一門觀察差別。

丑二、後五事³ 寅一、由聞慧

又修行者，於彼諸行正觀察時，先以聞所成慧，如阿笈摩，了知諸行體是無常，無常故苦，苦故空及無我。

寅二、由思慧

彼隨聖教如是勝解、如是通達。既通達已，復以推度相應思惟所成微細作意，即於彼境如實了知。

寅三、由思擇力等² 卯一、別辨³ 辰一、思擇

即由如是通達了知增上力故，於彼相應煩惱現行現法、當來所有過患，如實觀察。由思擇力為依止故，設復生起而不實著，即能捨離。

辰二、見道

彼由如是通達了知及思擇力多修習故，能入正性離生。

辰三、修道

既入正性離生已，由修道力，漸離諸欲。

由修道力漸離諸欲者：此中諸欲，謂三界欲貪應知。

卯二、料簡² 辰一、簡差別

彼由思擇、見道二種力故，隨其所應斷諸煩惱，謂不現行斷故，及一分斷故。由修道力，究竟離欲。

辰二、結略義

如是由前二種，漸離欲貪；由修道力，心得解脫。

癸五、果² 子一、總標

復次，有二種煩惱斷果及苦滅果。

子二、別辨² 丑一、煩惱斷果² 寅一、見所斷果

一者、見所斷果。由證彼故，能自了知：我已永盡捺落迦、傍生、餓鬼，我

今證得預流無退墮法，乃至廣說。

我今證得預流無退墮法等者：謂已安住能究竟盡無退轉道，是名證得預流無退墮法。又自了知：我已永盡除其七生、二生、一生所餘後有所生諸行。是名廣說應知。

寅二、修所斷果

二者、修所斷果。由證彼故，能自了知：我最後身暫時支持，第二有等永不復轉。

第二有等永不復轉者：此中等言，等取生老死等苦法應知。

丑二、苦滅果²

寅一、辨苦滅⁴ 卯一、約因辨

復有二種苦滅。一者、現在為因，未來苦滅；二者、過去為因，現在苦滅。

卯二、約依辨

復有二種苦滅。一者、心苦滅，二者、身苦滅。

卯三、約受辨

復有二種苦滅。一者、壞苦、苦苦滅，二者、行苦苦滅。

卯四、約果辨

復有二種苦滅。一者、非愛業果苦滅，二者、可愛業果苦滅。

寅二、辨彼果

復有少分已見諦跡諸聖弟子，雖已超過諸惡道苦所有怖畏，由未永盡一切結故，其心猶有於當來世共諸異生生老死怖。為斷彼故，而能發起猛利樂欲，乃至正念及無放逸，勤修觀行。

癸六、愚相⁴ 子一、標

復次，有二種愚夫之相。

子二、徵

何等為二？

子三、列

一者、於所應求不如實知，二者、非所應求而反生起。

子四、釋² 丑一、於所應求不如實知² 寅一、是所應求

何等名為是所應求？所謂涅槃諸行永滅。

寅二、不如實知

而諸愚夫，於當來世諸行不生都無樂欲，於諸行生唯有欣樂。由是因緣，於所應求及諸行生所有眾苦不如實知。

丑二、非所應求而反生起³ 寅一、徵

何等名為非所應求而反生起？

寅二、釋² 卯一、非所求

非所求者，諸老、病、死、非愛合會、所愛別離、所欲匱乏、愁、歎、憂、苦種種熱惱。

卯二、反生起

彼於如是諸行生起反生欣樂，於生為本一切行中深起樂著，於生為本所有諸業造作積集。由是因緣，於有生苦及生為本老病死等眾苦差別不得解脫。

寅三、結

如是名為非所應求而反生起。

癸七、無常等定² 子一、標列

復次，於諸行中有四決定。一、無常決定，二、苦決定，三、空決定，四、無我決定。

子二、隨釋³ 丑一、由三相⁴ 寅一、無常決定² 卯一、徵

云何諸行無常決定？

卯二、釋⁵ 辰一、標

由三種相，當知過去、未來諸行尚定無常，何況現在。

辰二、徵

何等為三？

辰三、列

謂先無而有故，先有而無故，起盡相應故。

辰四、釋³ 已一、先無而有² 午一、反顯

若未來行先所未有定非有者，是即應非先無而有，如是應非無常決定。

午二、正成

由彼先時施設非有，非有為先，後時方有，是故未來諸行無常決定。

已二、先有而無² 午一、反顯

若現在行從緣生已決定有者，是即應非先有而無，未來諸行便應非是無常決定，現在諸行亦應不與起盡相應。

午二、正成

由現在行從緣生已，非決定有，以有為先，施設非有，是故過去諸行無常決定。

已三、起盡相應

如是現在諸行，因未來行先無而有，因過去行先有而無，由此施設起盡相應。

辰五、結

是故說言：當知去來諸行無常性尚決定，何況現在。是名諸行無常決定。

寅二、苦性決定² 卯一、徵

云何諸行苦性決定？

卯二、釋⁴ 辰一、標

謂去來諸行尚是生等苦法，何況現在。

辰二、徵

所以者何？

辰三、釋

過去諸行是已度苦，未來諸行是未至苦，現在諸行是現前苦。

辰四、結

是名諸行苦性決定。

寅三、空性決定² 卯一、徵

云何諸行空性決定？

卯二、釋⁴ 辰一、標

謂去來諸行尚定空性，何況現在。

辰二、徵

所以者何？

辰三、釋

未來諸行其性未有，由此故空；過去諸行其性已滅，由此故空；現在諸行雖有未滅，諦義、勝義性所遠離，由此故空。

辰四、結

是名諸行空性決定。

諦義勝義性所遠離者：謂現在行，相雖可得，非性實有。如幻化事雖現可見，非真實故。

寅四、無我決定² 卯一、徵

云何諸行無我決定？

卯二、釋⁴ 辰一、標

謂去來諸行尚定無我，何況現在。

辰二、徵

所以者何？

辰三、釋

未來諸行非我之相，未現前故；過去諸行非我之相，已越度故；現在諸行非我之相，正現前故。

辰四、結

是名諸行無我決定。

現在諸行等者：現在諸行，相雖可得，而非是我，唯彼行相正現前故。由是道理，無我決定。

丑二、由二相⁴ 寅一、無常決定

又由二相，當知諸行決定無常。一、由過去世已滅壞故；二、由未來、現在

世是應滅壞法故。

寅二、苦決定

又由二相，當知諸行決定是苦。一、是生等苦法故；二、是三苦性故。此諸苦相，如前應知。

此諸苦相如前應知者：生等諸苦各由五相，如有尋有伺地決擇中說應知。

（陵本六十一卷十四頁⁴⁹³³）又佛世尊說三苦性，所謂苦苦、壞苦、行苦，

已如前知。（陵本六十六卷一頁⁴⁹³⁷）

寅三、空決定² 卯一、標列

又由二相，當知諸行決定是空。一、畢竟離性空故；二、後方離性空故。

卯二、隨釋² 辰一、畢竟離性空

畢竟離性空者，謂諸行中，我、我所性畢竟空故。

辰二、後方離性空

後方離性空者，謂於已斷一切煩惱心解脫中，一切煩惱皆悉空故。

寅四、無我決定

又由二相，當知諸行決定無我。一、諸行種種外性故；二、諸行從眾緣生，不自在故。

又由二相當知諸行決定無我者：此中義顯，離蘊、即蘊計我都不可得，如次配釋二相應知。

丑三、由十相

復由十相，當知諸行四相決定。謂由敗壞、變易、別離、相應、法性相故，非可樂、不安隱、相應、遠離、異相相故。如是等相，如前聲聞地已廣分別。

復由十相等者：聲聞地說：由十種行觀察苦諦，能隨悟入苦諦四行。何等為十？一、變異行，二、滅壞行，三、別離行，四、法性行，五、合會行，六、結縛行，七、不可愛行，八、不安隱行，九、無所得行，十、不自在行。（陵本三十四卷一頁²⁷³⁴）今依彼義，隨應當知。謂此敗壞即是滅

壞無常，變易即是變異無常，別離即是別離無常，相應即是合會無常，法性即是法性無常，非可樂即是不可愛苦，不安隱即是不安隱苦，相應即是結縛苦，遠離即是無所得空，異相即是不自在無我，由是故說諸行四相決定。

癸八、界³ 子一、辨品類² 丑一、標列

復次，依出世道作意修中，有五離繫品界。一者、斷界，二者、無欲界，三者、滅界，四者、有餘依涅槃界，五者、無餘依涅槃界。

丑二、隨釋² 寅一、初二界

謂見道所斷諸行斷故，名為斷界。修道所斷諸行斷故，名無欲界。

寅二、後三界

即此唯有餘依故，名有餘依涅槃界。此依滅故，名為滅界，亦名無餘依涅槃界。

子二、出異名⁶

丑一、諸行止

即此五界，由一切行永寂靜故，名諸行止。

丑二、空

由我、我所、我慢、執著及與隨眠皆遠離故，說名為空。

由我我所等者：此中我、我所行，謂薩迦耶見。言我慢者，謂即此慢。即彼諸纏，名為執著。即彼麤重，名為隨眠。如攝異門分說應知。（陵本八

十三卷十八頁⁶³³²）

丑三、無所得

由一切相皆遠離故，名無所得。

丑四、愛盡

於斷界中，一切隨順有漏法上所有貪愛皆遠離故，名為愛盡。

丑五、無欲

於無欲界所有欲貪皆遠離故，名為無欲。

丑六、滅及涅槃

於滅界中，及於有餘依、無餘依涅槃界中，如其所應皆永滅故、皆寂靜故，隨其次第，說名為滅，亦名涅槃。

子三、明修習³ 丑一、修厭

又於斷界未得為得勤修習故，名於諸行修厭。

丑二、修離欲

於無欲界未得為得勤修習故，名於諸行修離欲。

丑三、修滅

於滅界未得為得勤修習故，名於諸行修滅。

癸九、二種漸次² 子一、標列

復次，為心解脫勤修習者，有二種漸次。一、智漸次，二、智果漸次。

子二、隨釋² 丑一、智漸次³ 寅一、徵

云何智漸次？

寅二、釋² 卯一、無常故苦

謂於諸行中，先起無常智，由思擇彼生滅道理故；次後於彼生相應行，觀為生法、老法，乃至憂苦熱惱等法；由是因緣，一切皆苦。此即依先無常智，生後苦智。

乃至憂苦熱惱等法者：略無死法，說乃至言。略無愁歎，故置等言。

卯二、苦故無我

又彼諸行，由是生法乃至是熱惱法故，即是死生緣起展轉流轉不得自在行相道理，故無有我。此即依先苦智，生後無我智。

寅三、結

如是觀無常故苦，苦故無我，是名智漸次。

丑二、智果漸次² 寅一、徵

云何智果漸次？

寅二、釋² 卯一、明漸次³ 辰一、列四種

謂厭、離欲、解脫、遍解脫。

辰二、隨別釋²

巳一、厭離欲解脫² 午一、第一差別²

未一、釋³

申一、厭

云何厭？謂有對治現前故，起厭逆想，令諸煩惱不復現行。

申二、離欲

云何離欲？謂由修習厭心故，雖於對治不作意思惟，然於一切染愛事境貪不現行，此由伏斷增上力故。

申三、解脫

云何解脫？謂即於此伏斷對治多修習故，永拔隨眠。

未二、結

如是名厭、離欲、解脫第一差別。

午二、第二差別

復有差別。謂於厭位斷界極成滿，故名厭。即依止厭，除非想非非想處，於餘下地得離欲時，施設離欲位，故名離欲。於非想非非想處得離欲時，施設解脫位，故名解脫。是名厭、離欲、解脫第二差別。

巳二、遍解脫

云何遍解脫？謂由如是煩惱雜染解脫故，生等諸苦雜染亦普解脫，是名遍解脫。

辰三、結得名

如是由智增上力故，於諸行中起厭；由習厭故，得離欲；由習離欲故，得解脫及遍解脫。如是名為智果漸次。

卯二、明所斷² 辰一、出邪執⁴ 巳一、標

此中復有四種邪執。

巳二、徵

何等為四？

巳三、列

一、見邪執，二、慢邪執，三、自內邪執，四、他教邪執。

巳四、釋² 午一、初二種² 未一、辨相² 申一、見邪執

見邪執者，謂於諸行中執我、我所。

申二、慢邪執

慢邪執者，謂於諸行中起我慢執。

未二、料簡

前見邪執，障諦現觀；後我慢邪執，障修所斷煩惱等斷。

午二、後二種²

未一、別辨相² 申一、自內邪執

自內邪執者，謂獨處空閑，不正分別為依止故，執有實我，或見邪執、或慢邪執。

申二、他教邪執

他教邪執者，謂由他教，起邪執著，謂此是我、此是我所，我慢行轉。

謂此是我等者：我及我所，是見行相。依見起慢，是慢行相。此中兼說，二俱起故。

未二、簡自他

又於內起不正分別，執我、我所，名內邪執，亦名非他教邪執。

辰二、明智果

如是一切邪執永斷，當知是名智果。

癸十、非斷非常² 子一、出三相⁴ 丑一、標

復次，由三種相，應知諸行非斷、非常。

丑二、徵

何等為三？

丑三、列

一、以無住行為因故；二、生已無住因故；三、未來諸行因性滅故。

未來諸行因性滅故者：能生未來諸行種子，此名未來諸行。由現在行之所熏習，名彼因性。是即能熏現行名之為因，彼所熏種名之為果。現行雖滅，而種相續，由是義故，下自釋言：能生未來諸行現在因性滅故，當知諸行非斷。

丑四、釋² 寅一、成非常

此中諸行因無常故，生已住因不可得故，當知諸行非常。

寅二、成非斷

能生未來諸行現在因性滅故，當知諸行非斷。

子二、辨四緣⁴ 丑一、標

復有四緣，能令諸行展轉流轉。

丑二、徵

何等為四？

丑三、列

一、因緣，二、等無間緣，三、所緣緣，四、增上緣。

丑四、釋² 寅一、略攝

即此四緣，略有二種。一、因，二、緣。因唯因緣，餘三唯緣。

寅二、別辨⁴ 卯一、因緣

又因緣者，謂諸行種子。

卯二、等無間緣

等無間緣者，謂前六識等及相應法等無間滅，後六識等及相應法等無間生。

卯三、所緣緣

所緣緣者，謂五識身等，以五別境為所緣；第六識身等，以一切法為所緣。

卯四、增上緣³ 辰一、約根望識辨

增上緣者，謂五識等，以眼等各別所依為增上緣，及以能生作意等為增上緣；意識身等，以四大種身，及能生作意等為增上緣。

辰二、約業望果辨

又先所造業，望所生愛非愛果，當知亦是增上緣。

辰三、約資糧望道果辨

如是資糧望道，道望得涅槃，當知亦是增上緣攝。

癸十一、染淨² 子一、明觀察² 丑一、總標

復次，由三種事、二種相，應當觀察雜染、清淨。

應當觀察雜染清淨者：謂當觀察一切雜染及清淨故。

丑二、別釋² 寅一、由三事³ 卯一、徵

云何由三種事，觀察一切雜染、清淨？

卯二、列

一者、於諸行中觀察雜染因緣，謂觀彼愛味為愛味故。二者、於諸行中觀察清淨因緣，謂觀彼過患為過患故。三者、於諸行中觀察清淨，謂觀彼出離為出離故。

卯三、結

如是一切總略為一，名由三事，觀察一切雜染、清淨。

寅二、由二相³ 卯一、徵

云何由二種相，觀察一切雜染、清淨？

卯二、列

一者、由如所有性故；二者、由盡所有性故。

卯三、釋² 辰一、辨二相² 巳一、如所有性

如所有性者，謂於諸行中，若愛味、若過患、若出離。

巳二、盡所有性

盡所有性者，謂於諸行中，盡所有愛味、盡所有過患、盡所有出離。

辰二、辨觀察² 巳一、如所有性攝³ 午一、於愛味

此中觀察諸行為緣，生樂、生喜，是名於彼愛味。又此愛味極為狹小。如是由二種相，觀察如所有性所謂愛味。

午二、於過患

又觀察諸行是無常、苦、變壞之法，是名於彼過患。又此過患極為廣大。如是由二種相，觀察如所有性所謂過患。

午三、於出離

又復觀察於諸行中欲貪滅、欲貪斷、欲貪出，是名於彼出離。又此出離寂靜

無上，畢竟安隱。如是由二種相，觀察如所有性所謂出離。

欲貪滅欲貪斷欲貪出者：此中三相，如次配屬毗奈耶、斷、超越應知。攝異門分說：毗奈耶，由了相、勝解作意；斷，由遠離等作意；超越，由方便究竟果作意。（陵本八十三卷十七頁⁶³²⁸）

已二、盡所有性攝

又即此愛味、即此過患、即此出離，於諸行中，若過去、若未來、若現在、若內、若外、若麤、若細、若劣、若勝、若遠、若近審諦觀察，當知是名於彼觀察盡所有性所謂愛味、過患、出離。

子二、顯體性² 丑一、約三種有情辨

又為了知如是三事體性是有，應知三種有情眾別。一、於諸欲染著眾，二、於諸欲遠離眾，三、於諸欲離繫眾。

丑二、約三種愚癡辨³ 寅一、出種類² 卯一、略標列

於此三處，復有三種世間愚癡。謂若天世間，若沙門、婆羅門，若諸天人。

卯二、明安立

如是三種世間，由三因緣，應知安立。一、由得欲自在及淨自在故，謂若魔、若梵世間。二、由勤修得彼因故，謂若沙門、婆羅門。三、趣種種業因果故，謂若諸天人。

趣種種業因果故者：種種業因，是其能趣。彼果異熟，是其所趣。總此二種，說諸天人名為愚癡。

寅二、顯斷證

又於此三處，隨其所應能斷、作證，有二種道離四倒心。謂已入見地，及於上修道多修習住。

有二種道離四倒心者：見道、修道，名二種道。薩迦耶見、邊執見、見取、戒禁取貪相應於心，令心顛倒，名四倒心。有尋有伺地說：薩迦耶見是無我我倒，邊執見一分是無常常倒，見取是不淨淨倒，戒禁取是於苦樂倒。貪通二種，謂不淨淨倒及於苦樂倒。（陵本八卷五頁⁵⁶²）此應準知。

寅三、辨解脫³ 卯一、辨相² 辰一、標列

又此二種道，有四種相心解脫果。一、貪瞋縛解脫相，二、欲貪滅斷出離相，三、九結離繫相，四、生等諸苦解脫相。

辰二、料簡

此中前三相，顯示因處煩惱解脫；後一相，顯示果處諸苦解脫。

卯二、舉喻² 辰一、出其四縛⁴ 巳一、由種種縛

於此義中，譬如有人處在圜圖，為種種縛之所繫縛，所謂或木、或索、或鐵。

巳二、由善防守

又置餘人令其防守。或設有彼從幽繫處逃至遠所，還執將來；或有尚不令彼轉動，況得逃避。

巳三、由堅牢繫

或有安置廣大、微妙、種種可愛所繫妙欲在幽繫處，令彼自然心生樂著，無欲逃避。

巳四、由怨加害

如是彼人為一切種縛之所縛，為善方便守之所守，為最堅牢繫之所繫，復為怨家隨欲加害，所謂打拍、或復解剖、或加杖捶、或總斷命。

辰二、結名解脫

若有能脫是四縛者，乃得名為從一切縛而得解脫。

卯三、合法² 辰一、顯四縛⁴ 巳一、貪瞋癡縛

如是於彼三處世間愚癡有情，為種種縛所繫縛者，當知即譬貪瞋癡縛。

巳二、善方便縛

其守禁者，譬不正尋思，及未永拔煩惱隨眠。不正尋思故，尚不令動，況得離欲而遠逃避。煩惱隨眠未永拔故，雖世間道方便逃避遠至有頂，復執將還。

巳三、最堅牢縛

可愛妙欲譬之九結，由彼結故，令於生死自然樂著，於自繫縛不欲解脫。

巳四、四魔怨縛

彼既如是為種種縛極所密縛，善方便縛之所密縛，最堅牢縛之所密縛，復四魔怨隨其所欲，以生等苦而加害之。

辰二、結解脫

若能從彼四種繫縛善解脫者，乃可名為從一切縛而得解脫。

辛二、略教攝² 壬一、頌標列

復次，嗢柁南曰：

略教教果終墮數 三遍智斷縛解脫

見慢雜染淨說句，遠離四具三圓滿。

壬二、長行釋¹¹ 癸一、略教³ 子一、標

由三因緣，有諸聲聞往大師所，請略教授。

子二、徵

何等為三？

子三、釋³ 丑一、由生勝解

謂唯多聞為究竟者，於諸餘行而厭背者，生如是解：但略聞法足得自義，何藉多聞以為究竟。要修正行為真實故，又棄捨多聞究竟欲故。

謂唯多聞為究竟者等者：謂如一類，先唯多聞以為究竟，於餘法隨法行而生厭背。今生勝解，欲修正行，不以多聞為其究竟，是故往大師所，請略教授。

丑二、由有怖畏² 寅一、怖多所作

又有怖畏於所入門多所作者，為善方便而得入故。

為善方便而得入故者：為得趣入所應入門，請略教授，以為依止。此無顛倒，名善方便。

寅二、怖心散亂

或有即彼已於多法善聽善思，彼作是念：我於多法已善聽思，若我今者盡已聽思所得諸法以為依止，於住心境及解脫境欲繫心者，將不令我作意散亂。

若爾，住心尚不能得，何況解脫。

丑三、由不決定

又於如所聞、所思一切法中不得決定，當依何者速證通慧？當依何者速得出離？當緣何境而得住心？當緣何境而得解脫？彼既如是不決定，若於大師、或眾所識如來弟子現前見已，便即往詣請略教授。

癸二、教果² 子一、標

復次，當知正教授，有四種自義果得。

子二、釋² 丑一、正教授

謂為此出家及如此出家，即形相具足、事業具足、意樂具足、處捨取具足。

形相具足等者：誓受下劣形相，謂剃除鬚髮，捨俗形好，著壞色衣，是名形相具足。於所作事成就軌則，是名事業具足。唯為涅槃而求出家，是名意樂具足。誓受禁制尸羅，精勤無間修習善法，是名處捨取具足，斷除不善，修集諸善故。此中意樂具足，當知釋前為此出家；所餘具足，當知釋

前如此出家。

丑二、自義果

依此故得無上得、現法得、自然得、內證得。

得無上得等者：得般涅槃，名無上得。即於此生得般涅槃，名現法得。無師自能修三十七菩提分法，而證解脫，名自然得。解脫自性唯內所證，無諸戲論，名內證得。

癸三、終² 子一、出種類² 丑一、標列

復次，有六種死。謂過去死、現在死、不調伏死、調伏死、同分死、不同分死。

丑二、隨釋⁵ 寅一、過去死

過去死者，謂過去諸行沒，乃至命根滅故死。

寅二、現在死

現在死者，謂現在諸行沒，乃至命根滅故死。

過去諸行沒等者：諸行滅已，不相續生，是名為沒。又復將命終時，壽退、煖退，餘心處在，乃至一切壽量皆窮盡故，名命根滅。其識棄捨心胸處故，是名為死。如攝異門分釋應知。（陵本八十四卷十一頁⁶³⁸³）

寅三、不調伏死² 卯一、釋因

不調伏死者，謂於過去世不調不伏，有隨眠行，展轉隨眠世俗言說士夫隨眠而命終已，於現在世結生相續，有隨眠行所攝自體而得生起；於現在世乃至壽盡，亦復如是不調不伏，廣說乃至而命終已，未來自體復得生起，又能攝取有隨眠行。

卯二、顯果

由攝取彼以為因故，便為生等眾苦所縛，亦為貪等大縛所縛。

不調不伏有隨眠行者：謂過去世不清淨、不解脫死，是名不調不伏。由是因緣，諸行相續，為煩惱種之所隨逐，是名有隨眠行。即於是中，我執種子，名為世俗言說士夫隨眠。此復云何？謂如是名、如是種類、如是族

姓、如是飲食、如是領受若苦若樂、如是長壽、如是久住、如是所有壽量邊際，是名世俗言說士夫之相。由是言說熏生我執，是故說名世俗言說士夫隨眠。從無始來展轉隨逐，由是說言展轉隨眠。

寅四、調伏死² 卯一、釋因

調伏死者，謂於現在世已調已伏，無有隨眠而命終已，未來自體不復生起，亦不攝取有隨眠行。

卯二、顯果

不攝取彼以為因故，解脫生等眾苦差別，亦復解脫貪等大縛。

寅五、同分死不同分死² 卯一、約曾捨身命辨² 辰一、同分死

同分死者，謂如過去不調不伏，曾捨身命，於現在世亦復如是而捨身命，當知如此名同分死、名相似死、名隨順死。

辰二、不同分死

若於過去不調不伏，捨身命已，於現在世已調已伏而捨身命，當知此名不同

分死、不相似死、不隨順死。

卯二、約有無隨眠辨² 辰一、同分死

若於現在有隨眠行，展轉隨眠而命終時，如過去死，名同分死及隨順死。

辰二、不同分死

不如過去而命終時，不能攝取當所結生未來相續同分諸行，名不同分死及不隨順死。

子二、略攝相² 丑一、標列

又此六種死，當知有二種相。謂諸行流轉過患相，及諸行還滅勝利相。

丑二、隨釋² 寅一、諸行流轉過患相

若於過去及於現在不調不伏，同分而死，復於未來取生等苦，及為貪等煩惱縛者，名諸行流轉過患相。

寅二、諸行還滅勝利相

若於現在已調已伏，不同分死，又於未來不取眾苦，解脫一切煩惱縛者，名

諸行還滅勝利相。

癸四、墮數² 子一、標列

復次，由八種相，得入於彼諸行生起世俗言說士夫數中。謂如是名、如是種類、如是族姓、如是飲食、如是領受若苦若樂、如是長壽、如是久住、如是所有壽量邊際。

子二、指釋

如是諸相，於菩薩地宿住念中，當知如前已廣分別。

當知如前已廣分別者：謂如菩薩地說：何等名為八言說句？謂如是名、如是生類、如是種姓、如是飲食、如是領受苦樂差別、如是長壽、如是久住、如是所有壽量邊際。又說：隨言說句有六略行。一者、呼召假名，二者、剎帝利等色類差別，三者、父母差別，四者、飲食方軌，五者、興盛衰損，六者、壽量差別。（陵本四十九卷二十頁³⁹⁶⁴）於中一一分別應知。

癸五、三遍智斷² 子一、出三種⁴ 丑一、標

復次，由三種相，於諸行中，應知無我遍智及斷。

丑二、徵

何等為三？

丑三、列

一、於內遍智，二、於外遍智，三、於內外遍智。斷亦如是，隨其所應。

丑四、釋

所謂諸行都無有我，無有所，亦無有餘互相繫屬。當知如是於內、外、俱遍智及斷。

子二、釋得緣²

丑一、標差別

此中由法住智得決定遍智，數習此故，捨彼相應所有隨眠，得畢竟斷。

丑二、明善巧²

寅一、令得遍智

當知此中，為於諸行未得遍智者令得遍智故，如來大師說正法要。

寅二、令得永斷

若於諸行已得遍智，而未永斷者，為令唯於如先所得遍智數習得永斷故，復加勸導。

癸六、縛² 子一、由三種⁴ 丑一、標

復次，於生死中而流轉者，有三種縛，由此縛故，心難解脫。當知此唯善說法律能令解脫，非由惡說。

丑二、徵

何等為三？

丑三、列

一者、除其愛結，餘結所繫諸有漏事；二者、愛結所染諸有漏事；三者、能生當來後有諸行。

餘結所繫諸有漏事者：謂九結中，恚結、慢結、無明結、見結、取結、疑結、嫉結、慳結，是名餘結應知。

丑四、釋

於此三縛，由三因緣，心難解脫。謂初由種種故，第二由堅牢故、可愛樂故，第三由微細故。

子二、由五相² 丑一、標列

復由五相，為後有縛所繫縛者，當知有五我慢現行。謂由所依故、所緣故、助伴故、自性故、因果故。

丑二、隨釋² 寅一、初二相² 卯一、略標舉

當知此中，薩迦耶見以為依止，計我未來或當是有、或當非有，以有非有為所緣境。

卯二、隨難釋

此中非有為所緣境，唯有一種；有為所緣，乃有五種，謂我當有色、我當無色、我當有想、我當無想、我當非有想非無想。如是一切總收為一，合有六種所緣境界。

非有為所緣境等者：謂依自身有我慢者，彼於涅槃唯作是思：我當不有。

不正了知：唯有諸行當來不有。名以非有為所緣境。此無差別，故唯一種，以緣無故。

寅二、後三相³ 卯一、助伴

言助伴者，謂動亂心。

卯二、自性

言自性者，恃舉行相為其自相，戲論自性為其共相，一切煩惱戲論性故。

卯三、因果

因果性者，謂能感生為因性故，造作業行愛隨逐故。

癸七、解脫² 子一、標列三相

復次，由三種相，當知心善解脫。謂於諸行遍了知故；於彼相應諸煩惱斷得作證故；煩惱斷已，於一切處離愛住故。

子二、隨釋遍知² 丑一、於如所有性

又於此中，由四種行，於諸行中能遍了知如所有性。謂無常等。

謂無常等者：等取苦、空、無我應知。

丑二、於盡所有性

由十一行，於諸行中能遍了知盡所有性。謂過去、未來等，如前廣說。

如前廣說者：謂如前說：於諸行中，若過去、若未來、若現在、若內、若外、若麤、若細、若劣、若勝、若遠、若近審諦觀察。是名十一行相。今說能遍了知盡所有性，如彼應知。

癸八、見慢雜染³ 子一、總標列

復次，有二種、五種雜染，并五種因相。如是二種，諸有學者應知應斷，諸無學者已知已斷。

子二、隨別釋² 丑一、出雜染² 寅一、二種自性

何等為二？謂見雜染及慢雜染。

寅二、五種差別⁴ 卯一、標

此二當知五種差別，謂由行故，纏故，隨眠故。

謂由行故等者：於五種中，計我、我所及與我慢，是名由行。第四執著，是名由纏。第五隨眠，名由隨眠。

卯二、徵

何等為五？

卯三、列

一者、計我，二者、計我所，三者、我慢，四者、執著，五者、隨眠。

卯四、釋² 辰一、總顯所由

當知此中，計我、我所、我慢三種為所依止，於所緣事固執取著，唯此諦實，餘皆愚妄。

辰二、別釋後二

當知此中，由纏道理，說名執著；即彼種子隨縛相續，說名隨眠。

丑二、顯因相² 寅一、總標事

又有識身及外事等，當知是彼五種因相。謂計我因相，乃至隨眠因相。

又有識身及外事等者：自內所依，名有情數色，名有識身。非有情色，說名外事。等言，等取諸內外事。聲聞地中廣分別相應知。（陵本二十八卷

二十頁²³⁹⁵）

寅二、廣為因² 卯一、標列

即此因相，復有二種。一者、所緣因相，二者、因緣因相。

卯二、別配

計我、我慢，以有識身為所緣因相。計我所，通以二種為所緣因相。彼執著，以聞不正法、不如理作意，及彼隨眠為因緣因相。彼隨眠，以不如實了知諸行，煩惱諸纏數串習為因緣因相。

子三、辨安立⁴ 丑一、標

復次，有四種有情眾，當知於中安立雜染。

丑二、徵

何等為四？

丑三、列

一者、外道有情眾，二者、此法異生有情眾，三者、有學有情眾，四者、無學有情眾。

丑四、簡² 寅一、簡有無⁴ 卯一、外道有情眾

外道有情眾中，具有一切。

卯二、此法異生有情眾

此法異生有情眾中，四種可得，及彼因相，并執著因相一分，然執著不可得。

四種可得等者：前說五雜染中，唯除執著不可得，所餘計我、我所、我慢、隨眠四種可得，及彼四種所緣因相、因緣因相，并執著、隨眠因緣因相可得。於執著因相中，為簡聞不正法、不如理作意，故言一分。

卯三、有學有情眾

有學有情眾中，計我、我所二種，及彼因相、執著、隨眠皆不可得，及我慢執著并彼因相，然有我慢隨眠可得。

及彼因相執著隨眠等者：我及我所緣因相，名彼因相。彼現行纏，名彼執著。彼種子縛，名彼隨眠。我慢現行，名我慢執著。我慢所緣因相，名彼因相。如是一切，於有學有情眾中皆不可得。

卯四、無學有情眾

無學有情眾中，一切皆不可得。

寅二、簡行斷

⁴

卯一、外道有情眾

又外道有情眾，凡所有行不為斷彼。

卯二、此法異生有情眾

此法異生有情眾，所修諸行正為斷彼，而未能斷，未見如實故。

卯三、有學有情眾

有學有情眾已斷一分，為斷餘分，復修正行；雖見如實，而不自稱我已能見，猶未獲得盡、無生智故。

卯四、無學有情眾

無學有情眾一切已斷，於諸行中而自稱言我如實見。

癸九、清淨說句⁴ 子一、標

復次，有八種清淨說句。

子二、徵

何等為八？

子三、釋² 丑一、初四種

謂由超過見、慢故，名二種超過意清淨說句。

超過見慢等者：超過我、我所見及與我慢，是名超過見、慢。超過此故，一切雜染皆不相應，名意清淨。

由斷彼因相故，名除相清淨說句。

斷彼因相等者：斷彼見、慢所緣因相，是名說名除相清淨。

由斷彼執著故，名寂靜清淨說句。由斷彼隨眠故，名善解脫清淨說句。

丑二、後四種² 寅一、有學

復次，有學有二清淨說句。謂於後有一切行中，由不現行道理，名已割貪愛及轉三結。

寅二、無學

無學有二清淨說句。謂止慢現觀故，及一切苦本貪愛隨眠永拔除故，名已作苦邊。

止慢現觀者：有學有情中，猶有我慢隨眠可得。無學現觀斷彼隨眠，慢永寂靜，說名為止。

子四、結

如是一切總收為一，合有八種清淨說句。

癸十、遠離四具² 子一、總標列

復次，由四支故，具足遠離名善具足。何等為四？一者、無第二而住，二者、處邊際臥具，三者、其身遠離，四者、其心遠離。

子二、隨難釋³ 丑一、遠離相等

謂於居家境界所生諸相尋思、貪欲、瞋恚悉皆遠離，依不放逸防守其心。

丑二、發勤精進² 寅一、略標

又由五相發勤精進，速證通慧。

寅二、列釋⁵ 卯一、有勢力

謂有勢力者，由被甲精進故。

卯二、有精進

有精進者，由加行精進故。

卯三、有勇悍

有勇悍者，由於廣大法中無怯劣精進故。

卯四、有堅猛

有堅猛者，由寒熱、蚊蟲等所不能動精進故。

卯五、有不捨善軌

有不捨善軌者，由於下劣無喜足精進故。

丑三、遠離沈掉

又為斷昏沈睡眠、掉舉惡作，如其次第，奢摩他、毗鉢舍那品隨煩惱故，願正止觀無有失壞。

又為斷昏沈睡眠等者：昏沈睡眠能障奢摩他，名奢摩他品隨煩惱。掉舉惡作能障毗鉢舍那，名毗鉢舍那品隨煩惱。遠離此故，心得平等，由此釋前其心遠離。

癸十一、三圓滿⁴ 子一、標

復次，於善說法毗奈耶中有三圓滿。

子二、徵

何等為三？

子三、列

一、行圓滿，二、果圓滿，三、師圓滿。

子四、釋³ 丑一、行圓滿

行圓滿者，謂為觸證斷、無欲、滅界故，聽聞正法、為他演說、自正修行法隨法行，是名行圓滿。

丑二、果圓滿² 寅一、斷果

果圓滿者，謂即由此法隨法行增上力故，心善解脫。

寅二、智果

又能證得現法涅槃，是名果圓滿。

丑三、師圓滿² 寅一、約大師辨² 卯一、標列

師圓滿者，謂能引發一切梵行之法，皆用世尊為根本故，皆由世尊轉法眼故，皆以世尊為所依故。

引發一切梵行之法者：謂三十七菩提分法，說名一切梵行之法。如攝異門分釋應知。（陵本八十三卷三頁⁶²⁸³）

卯二、隨釋³ 辰一、由為根本

由如來出世，有彼教可知，故說世尊為彼根本。

辰二、由轉法眼

佛出世已，觀待彼彼所化有情，說正法眼，師及弟子展轉傳來，故說世尊轉正法眼。

辰三、由為所依

轉法眼已，若有於中生諸疑惑，唯依世尊乃能決了，故說世尊為所依止。

由如來出世等者：攝異門分說：由佛世尊是其最初現等覺故，諸法皆以世尊為本。（陵本八十四卷六頁⁶³⁶⁸）與此義同。

寅二、約說法師辨

又說法師略有二種，一者、由教，二者、由證。斯由從他聞正法已而宣說故，依證學道、無學道已而宣說故。

瑜伽師地論科句披尋記卷第八十五

瑜伽師地論科句披尋記卷第八十六

彌勒菩薩說

唐三藏沙門玄奘奉詔譯

韓清淨科記

攝事分中契經事行擇攝第一之二

辛三、相行攝² 壬一、頌標列

復次，嘔陀南曰：

想行愚相眼勝利 九智無癡與勝進

我見差別三相行 法總等品三後廣

壬二、長行釋¹⁰ 癸一、想行² 子一、標列

於諸行中，修無常想行有五種。謂由無常性、無恆性、非久住性、不可保性、變壞法性故。

子二、隨釋

此中剎那剎那壞，故無常。自體繫屬有限住壽，故無恆。外事劫後決定無住，故非久住。壽量未滿，容被緣壞，非時而死，故不可保。乃至爾所時住，於其中間不定安樂，故變壞法。

癸二、愚相² 子一、舉愚相³ 丑一、標

復次，愚夫略有三種愚夫之相。

丑二、徵

何等為三？

丑三、釋² 寅一、舉謂己勝

謂諸愚夫，於一切行如上所說五無常性不能思惟；於非真實勝劣性中，分別勝劣，稱量自他，謂己為勝。是名第一愚夫之相。

於非真實勝劣性中者：諸行勝劣，唯是相待假立差別，故非真實。

寅二、例謂等劣

如謂己勝，謂等、謂劣，廣說亦爾。

子二、例相違

與此相違，當知智者亦有三種智者之相。

癸三、眼² 子一、標列

復次，由二種相，當知聖者慧眼清淨。謂由遠塵及離垢故。

子二、隨釋² 丑一、約纏及隨眠辨² 寅一、遠塵

由見所斷諸煩惱纏得離繫故，名為遠塵。

寅二、離垢

由彼隨眠得離繫故，說名離垢。

丑二、約慢及餘煩惱辨² 寅一、遠塵

又現觀時，有麤我慢隨入作意間無間轉，若遍了知所取、能取、所緣平等，彼即斷滅；彼斷滅故，說名遠塵。

寅二、離垢

一切見道所斷煩惱隨眠斷故，說名離垢。

癸四、勝利³ 子一、標

復次，遠塵離垢，於諸法中得法眼時，當知即得十種勝利。

子二、徵

何等為十？

子三、釋⁴ 丑一、見法等⁴ 寅一、見法

一者、於四聖諦已善見故，說名見法。

寅二、得法

二者、隨獲一種沙門果故，說名得法。

寅三、知法

三者、於己所證能自了知：我今已盡所有那落迦、傍生、餓鬼，我證預流，乃至廣說。由如是故，說名知法。

我證預流乃至廣說者：謂證預流無退墮法，及已永盡除其七生、二生、一生所餘後有所生諸行，是名廣說應知。

寅四、遍堅法

四者、得四證淨，於佛法僧如實知故，名遍堅法。

丑二、無惑無疑

五者、於自所證無惑。六者、於他所證無疑。

丑三、不藉他緣等

七者、宣說聖諦相應教時，不藉他緣。八者、不觀他面，不看他口，於此正法毗奈耶中，一切他論所不能轉。九者、記別一切所證解脫，都無所畏。

丑四、隨入聖教

十者、由二因緣，隨入聖教，謂正世俗及第一義故。

癸五、九智³ 子一、標列

復次，有九種智，能於諸行遍知、超越。謂諸行流轉智、諸行還滅智、雜染因緣智、清淨因緣智、清淨智，及苦智、集智、滅智、道智。

子二、隨釋³ 丑一、釋九智³ 寅一、初二智

此中諸行流轉智者，略由三種因緣集故，一切行集所有正智。謂喜集故、觸集故、名色集故，隨其所應，若色集、若受等集、若識集。

謂喜集故等者：如下說言：一切行因，略有二種。一、共，二、不共。共因者，謂喜為先因；由此喜故，於彼彼生處障於厭離，滋潤自體。為欲將生所生之處，雖有一切煩惱為因，而於生處生喜者生，非於彼起厭逆想者。又即此喜唯依色說，宿因生已，不待餘因究竟轉故。不共因者，謂順苦、樂、非苦樂觸，望於受等所有心法；無間滅意及俱生名、十種色等，望六種識。由彼雖從先因所生，剎那剎那別待餘因，方得生起。（陵本八十七卷一頁⁶⁵⁵³）此應準釋。

即此三種因緣滅故，三種行滅，是名諸行還滅智。

寅二、次三智

雜染因緣智、清淨因緣智及清淨智者，謂於愛味、過患、出離，如前應知。謂於愛味過患出離等者：謂如前說：由三種事、二種相，應當觀察雜染、

清淨。云何由三種事，觀察一切雜染、清淨？一者、於諸行中觀察雜染因緣，謂觀彼愛味為愛味故。二者、於諸行中觀察清淨因緣，謂觀彼過患為過患故。三者、於諸行中觀察清淨，謂觀彼出離為出離故。（陵本八十五卷十二頁⁶⁴⁵⁶）

寅三、後四智

四聖諦中苦等四智，如前分別聖諦道理，應知其相。

如前分別聖諦道理者：聲聞地說：由十種行觀察苦諦，能隨悟入苦諦四行。何等為十？一、變異行，二、滅壞行，三、別離行，四、法性行，五、合會行，六、結縛行，七、不可愛行，八、不安隱行，九、無所得行，十、不自在行。如是十行，依證成道理能正觀察。（陵本三十四卷一頁²⁷³⁴）當知此中，初五種行，無常智攝；次三種行，苦智所攝；次一種行，空智所攝；後一種行，無我智攝。如彼廣釋應知。

丑二、釋遍智² 寅一、由諦現觀

於異生位修前五智，能速證後四聖諦智；由證彼故，能於諸行如實了知。

寅二、由諦道理

又若於前諸智有闕，必定不能以諦道理遍知諸行，要當證得方能遍知。

丑三、釋超越

若於諦理遍知行智有所闕者，必定不能於上修道，以對治力斷諸煩惱，超一切行。與此相違，乃能超越。

子三、總結

是故說言有九種智，能於諸行遍知、超越。

癸六、無癡²

子一、顯無癡住⁴

丑一、標

復次，修觀行者由三處故，於諸行中無愚癡住。

丑二、徵

何等為三？

丑三、列

一、於過去諸行，如實了知是無常性；二、於現在諸行，如實了知是滅法性；三、於未來諸行，如實了知生滅法性。

丑四、釋

彼由如是，於三世行無有愚癡，不染汙心安樂而住，墮在明數。

子二、辨有癡住² 丑一、例前相違

與此相違，當知即是有愚癡住，墮無明數。

丑二、廣其差別² 寅一、舉三煩惱² 卯一、標列

復有三種煩惱異名，多分說在煩惱品中。一、貪異名，二、瞋異名，三、癡異名。

卯二、隨釋² 辰一、辨異名³ 巳一、貪異名

貪異名者，亦名為喜，亦名為貪，亦名為顧，亦名為欣，亦名為欲，亦名為昵，亦名為樂，亦名為藏，亦名為護，亦名為著，亦名為希，亦名為耽，亦名為愛，亦名為染，亦名為渴。

巳二、瞋異名

瞋異名者，亦名為恚，亦名為憎，亦名為瞋，亦名為忿，亦名為損，亦名不忍，亦名違戾，亦名暴惡，亦名蜚螫，亦名拒對，亦名慘毒，亦名憤發，亦名怒憾，亦名懷感住，亦名生欸勃。

巳三、癡異名

癡異名者，亦名無智，亦名無見，亦名非現觀，亦名惛昧，亦名愚癡，亦名無明，亦名黑闇。

辰二、指前釋

如是等名，當知如前攝異門分，多分已辨。

如前攝異門分多分已辨者：攝異門分中黑品異門，廣說貪瞋癡應知。（陵本八十四卷十六頁⁶⁴⁰⁰）

寅二、別釋喜貪² 卯一、標當說

喜、貪差別，我今當說。

卯二、辨行相⁶ 辰一、約自體境界受辨

緣依止受所生欣樂，說名為喜；緣生受境所起染著，說名為貪。

緣依止受所生欣樂等者：緣自體受，名依止受。緣境界受，名生受境。如是差別應知。

辰二、約將得已得境辨

又於將得境生名喜，若於已得境生名貪。

辰三、約臨受用正受用時辨

又於已得臨將受用名喜，即於此事正受用時名貪。

辰四、約能得所得境辨

又於能得境界方便名喜，即於境界名貪。

辰五、約後有及現境辨

又於後有名喜，於現境界名貪。

辰六、約自他榮利辨

又於所愛他有情類榮利名喜，於自所得榮利名貪。

癸七、勝進² 子一、依正修辨² 丑一、總標列

復次，於諸行中如理修者，有四勝進。謂勝進想略有三種，一、未得為得，二、未會為會，三、未證為證。若為獲得現法樂住，名第四勝進。

丑二、隨別釋⁴ 寅一、未得為得

最初能得先所未得預流果故，當知是名未得為得。

寅二、未會為會

即此為依，復能契會上學果故，當知是名未會為會。

寅三、未證為證

即此為依，復能證得阿羅漢果，於諸惑斷能作證故，當知是名未證為證。

寅四、為獲現法樂住

若已證得阿羅漢果，更無未得為得乃至未證為證故，正勤修習；但為現法樂住，正勤修習。

子二、依自義辨³ 丑一、標列

又依自義，有三勝進想。謂於諸行中厭背想、過患想、實義想。

丑二、隨釋³ 寅一、厭背想³ 卯一、標列

厭背想者，復有四行。謂於諸行思惟如病、如癰、如箭、惱害。

卯二、隨釋⁴ 辰一、如病

如病者，謂如有一，因界錯亂所生病苦，修厭背想。

辰二、如癰

如癰者，謂如有一，因於先業所生癰苦，修厭背想。

辰三、如箭

如箭者，謂如有一，因他怨箭所中之苦，修厭背想。

辰四、惱害

惱害者，謂於親財等匱乏中，因自邪計所生諸苦，修厭背想。

於親財等匱乏中等者：謂於親屬有所衰亡，或於財寶有所衰失，或於無病

有所衰損，名於親財等匱乏中。起不如理分別，名自邪計。

卯三、總結

如是名為修觀行者，於諸行中修厭背想。

寅二、過患想

過患想者，復有二行。謂於諸行思惟無常及思惟苦。

寅三、實義想

實義想者，亦有二行。謂於諸行思惟空性及無我性。

丑三、結說

此中先於過患想及實義想正修習已，然後方能住厭背想。當知此中，先說其果，後說其因。

癸八、我見差別² 子一、辨種類² 丑一、略標

復次，有四種我見為所依止，能生我慢。

丑二、別釋² 寅一、釋四我見⁴ 卯一、有分別我見

一、有分別我見，謂諸外道所起。

卯二、俱生我見

二、俱生我見，謂下至禽獸等亦能生起。

卯三、緣自依止我見

三、緣自依止我見，謂於各別內身所起。

卯四、緣他依止我見

四、緣他依止我見，謂於他身所起。

寅二、釋生我慢²

卯一、分別我見為依³

辰一、標相

分別我見為所依止生我慢者，謂由此見觀自、他身，計有實我；由此二種我見為依，發生我慢。

由此二種我見為依者：謂緣自、他依止我見，是名二種我見應知。

辰二、舉喻

譬如清淨圓鏡面上，質像為依，發生影像；影像為依，於自依止發生劣中勝

想。

辰三、合法

如是由邪分別故，緣自依止我見為緣，發生緣他依止我見。如依質像，發生影像。又此為緣，發生我慢，方他謂己或勝、或等、或劣。

卯二、俱生我見為緣² 辰一、簡別

俱生我見為緣生我慢者，當知譬喻與前差別。如明眼人，臨淨水器自觀眼、耳。

辰二、例同

所餘如前，應知其相。

當知譬喻與前差別等者：前說譬喻影像為依，發生我慢。今此不爾，自觀眼、耳，故與前別。發生我慢，如前應知。

子二、出能斷² 丑一、唯依善說

此一切種薩迦耶見，唯依善說法毗奈耶方能永斷，非餘邪教。如是如來，及

眾共知同梵行者、或諸弟子同梵行者，有大恩德。

丑二、釋名報恩² 寅一、真實報恩

唯由如是一因緣故，名於大師、或滅度後同梵行者真實報恩。

唯由如是一因緣故等者：謂依善說法毗奈耶，永斷薩迦耶見，唯由如是一因緣故，名於大師等真實報恩。謂佛世尊為我等故，行於無量難行苦行，求得此法。以此為依，證真解脫，是故說名真實報恩。

寅二、隨分報恩

又由第二，謂若有能即依如是差別句義為利益故，勤修正行，如是亦名隨分報恩，彼所希望未滿足故。

又由第二等者：前說永斷薩迦耶見，是為報恩第一因緣。此說勤修正行，是為報恩第二因緣。此名隨分報恩，於如來所梵行未立，彼所希望未滿足故。修所成地說：謂如正修法隨法行大師，為欲建立正法，方便示現成正等覺，云何令彼正修行轉；故彼修習正法行時，即是法爾供養大師。（陵

本二十卷五頁¹⁷¹⁶）其義應知。

癸九、三行相³ 子一、標列

復次，由三種相諸行滅故，說名無餘依涅槃界。一者、先所生起諸行滅故；二者、自性滅壞諸行滅故；三者、一切煩惱永離繫故。

子二、隨釋³ 丑一、先所生起諸行滅

先所生起諸行滅者，謂於先世能感後有諸業煩惱之所造作，及由先願之所思求，今所生起諸行永滅。

丑二、自性滅壞諸行滅

自性滅壞諸行滅者，謂彼生已任性滅壞，非究竟住諸行永滅。

丑三、一切煩惱永離繫

一切煩惱永離繫者，謂諸煩惱無餘斷滅，由今滅故，後不更生。

子三、結名² 丑一、顯正

是故由此三相諸行滅故，說名寂滅。非永無相，其相異故。

丑二、遮非

若永無相，不可施設說名寂滅。

非永無相其相異故者：諸行滅故，證得寂滅，一切白法之所顯發，故非無相，然與諸行相異。思所成慧地決擇中說：由五相故，建立有為諸法差別。何等為五？一、後際未生故；二、前際已滅故；三、中際自相安住故；四、因緣相續故；五、果相續故。又由五相，建立無為諸法差別。何等為五？謂與上相違，應知即是此中五相。（陵本六十五卷十五頁⁵¹⁹⁸）其義應知。

癸十、法唄陀南² 子一、明建立² 丑一、標列

復次，由三解脫門增上力故，當知建立四種法唄陀南。謂空解脫門、無願解脫門、無相解脫門。

丑二、配釋³ 寅一、無願

一切行無常、一切行苦者，依無願解脫門，建立第一、第二法唄陀南。

寅二、空

一切法無我者，依空解脫門，建立第三法嚧柁南。

寅三、無相

涅槃寂靜者，依無相解脫門，建立第四法嚧柁南。

子二、辨樂欲²

丑一、總辨四種²

寅一、標列

復次，當知有二種法嚧柁南增上行欲。一者、勝解俱行欲，二者、意樂俱行欲。

寅二、隨釋²

卯一、勝解俱行欲

勝解俱行欲者，由四種法嚧柁南故，於諸行中而生樂欲。

於諸行中而生樂欲者：謂於諸行無常及苦、無我及淨樂欲觀察故。

卯二、意樂俱行欲²

辰一、舉有退²

巳一、標

又於諸行寂靜生樂欲者，由意樂故，獨處空閑作意思惟。由四種相，於彼寂靜其心退還。

巳二、列

一者、於中由見勝利，不趣入故；

由見勝利不趣入者：謂於涅槃寂靜唯見功德勝利，而不樂修隨順正行故。

二者、不信彼得，不清淨信故；

不信彼得不清淨信者：謂於涅槃不信能得，不於彼理起淨信故。

三者、於彼所緣不生喜樂，不安住故；四者、於彼而起不樂勝解故。

辰二、例俱行

與彼相違，當知即是意樂俱行欲。

丑二、別廣第三² 寅一、出退還² 卯一、標列二緣

又由二緣，依止無我勝解之欲，於彼涅槃由驚恐故，其心退還。一、由於此欲不善串習，未到究竟故；二、於作意時，由彼因緣念忘失故。

由彼因緣念忘失者：謂由無我忍欲不善串習為因緣故，令念忘失。

卯二、廣未串習

又此忍欲未串習故，當爾之時，於諸行中了唯行智其心愚昧，數數思惟：我爾時當何所在？尋求我行微細俱行障礙而轉。由此緣故，彼作是思：我當不有。不作是念：唯有諸行當來不有。彼由如是隨逐身見為依止故，發生變異隨轉之識，由驚恐故，於彼寂滅其心退還。

寅二、明對治² 卯一、標列二法

復次，為斷如是驚恐，有二種法多有所作。一者、於諸有智同梵行所，如實自顯；二者、因善法欲，發解了心及調柔心。

卯二、別廣二心² 辰一、發解了心² 巳一、標列

又發如是解了心者聽聞正法，由三種相發生歡喜。一者、由補特伽羅增上故；二者、由法增上故；三者、由自增上故。

巳二、隨釋³ 午一、補特伽羅增上

補特伽羅增上者，謂由覩見深可讚仰具大威力端嚴大師，及所稱揚善說法者。午二、法增上

法增上者，謂所說法能令出離煩惱業苦，及令信解最上深義。

午三、自增上

自增上者，謂有能力能於所說法能隨覺悟。

辰二、發調柔心² 巳一、標列

又發如是調柔心者，謂有三見。一者、若依彼而轉，二者、若由彼遍知，三者、若應所引發。

巳二、隨釋² 午一、釋三相³ 未一、隨彼而轉

依彼而轉者，謂於諸諦未得現觀，為得現觀，依彼勝解俱行極善串習正見而轉。

未二、由彼遍知² 申一、總標舉

由彼遍知者，謂依隨順現觀正見，於三事執著薩迦耶見，及彼隨眠斷、常兩見所依止性，并所得果能遍了知。

於三事執著薩迦耶見等者：謂於所取、能取及如是取，計我、我所，名於

三事執著薩迦耶見，此為斷、常兩見所依止性。薩迦耶見種子隨縛，名彼隨眠。由是為因，生現行纏，名并彼果。

申二、隨難釋² 酉一、釋其三事² 戌一、標列

言三事者，一、若所取，二、若能取，三、若如是取。

戌二、隨釋³ 亥一、所取

此何所取？謂五取蘊。

亥二、能取

誰能取？謂四取。云何而取？

亥三、如是取

謂四識住，隨其次第，如前應知，為二取心之所依處。

隨其次第等者：如前意地決擇中說：有四依取，以為所緣，令識安住。謂識隨色而住，緣色為境。廣說如經。（陵本五十四卷一頁⁴²⁸²）顯揚釋云：謂識隨色而住、緣色而住、依色而住，如是乃至隨行而住、緣行而住、依

行而住。此中隨色而住者，謂執受所依故。緣色而住者，謂取境界故。依色而住者，謂由麤重故。如是乃至隨行等三。（顯揚論十八卷三頁）由是當知，此說隨其次第，為二取心之所依處。謂執受所依及取境界，為所取心之所依處；麤重，為能取心之所依處。

西二、指我執等

又即於彼所有諸纏，非理所引緣彼境界薩迦耶見生起執著，及彼隨眠，如前應知。

如前應知者：謂如前說：計我因相，乃至隨眠因相。彼彼差別應知。（陵本八十五卷十九頁⁶⁴⁷⁵）

未三、應所引發

云何應所引發？謂住於彼，而能永斷薩迦耶見三事執著，及彼隨眠，於聖諦智不藉他緣。

午二、辨位別²

未一、辨³

申一、依彼應所遍知正見轉時

又若依彼應所遍知正見轉時，於其三處起我執著，及有隨眠。於諸行中，若集、若沒不善知故，於處中行尚不能入，況得出離。

申二、隨順現觀正見住時

若隨順現觀正見住時，於三事中，所有我執皆已離繫，猶被隨眠之所繫縛。於諸行中，若集、若沒能善知故，遠離二邊，入處中行。雖未出離，堪能出離。

申三、已引發聖諦現觀時

若已引發聖諦現觀，由正見故，於三事中無我執著，遠離隨眠。於處中行先趣入已，後由此故，方得出離。

未二、結

當知如三見轉時，有此差別。

辛四、速通攝² 壬一、頌標列

復次，嘍陀南曰：

速通自體智境界 流轉喜足行順流

知斷相想立違糧 師所作等品後廣

壬二、長行釋¹⁰ 癸一、速通² 子一、出能得法³ 丑一、標列

為欲證得未得真實究竟解脫，略有三法，能令獲得速疾通慧。一者、智力，二者、不放逸力，三者、數習力。

能令獲得速疾通慧者：謂能獲得漏盡通慧，速令諸漏永盡故。

丑二、隨釋³ 寅一、智力

智力者，謂若住彼，堪能無間永盡諸漏，當知即是有學智見。

寅二、不放逸力

不放逸力者，謂已獲得如是智見，即依如是所得之道方便勤修，於心防護惡不善法。

寅三、數習力

數習力者，謂即依此方便勤修，常作常轉。終不謂我為於今日得盡諸漏，心

解脫耶？為於來日？為於後日？由此邪思令心厭倦。無厭倦已，便無怯畏；無怯畏已，不捨加行能盡諸漏。

丑三、別廣² 寅一、智見差別² 卯一、問

問：智、見何差別？

卯二、答⁹ 辰一、約三世辨

答：若照過去及以未來非現見境，此慧名智；照現在境，此慧名見。

辰二、約二取辨

又所取為緣，此慧名智；能取為緣，此慧名見。

辰三、約三慧辨

又聞思所成，此慧名智；修所成者，此慧名見。

辰四、約斷證辨

又能斷煩惱，此慧名見；煩惱斷已能證解脫，此慧名智。

辰五、約二相辨

又緣自相境，此慧名智；緣共相境，此慧名見。

辰六、約假實辨

又由假施設，遍於彼彼內外行中，或立為我，或立有情、天、龍、藥叉、健達縛、阿素洛、揭路荼、緊捺洛、牟呼洛伽等，或立軍林及舍山等，以如是等世俗理行緣所知境，此慧名智；若能取於自相、共相，此慧名見。

辰七、約尋伺辨

又尋求諸法，此慧名智；既尋求已，伺察諸法，此慧名見。

辰八、約無分別有分別辨

又緣無分別影像為境，此慧名智；緣有分別影像為境，此慧名見。

辰九、約有色無色辨

又有色爾焰影像為緣，此慧名見；無色爾焰影像為緣，此慧名智。

寅二、方便修事² 卯一、別辨² 辰一、標列

彼由如是若智、若見為所依止方便修時，復更勤修四善巧事。一、觀察事，

二、捨取事，三、出受事，四、方便事。

辰二、隨釋⁴ 巳一、觀察事

觀察事者，謂四念住。為欲對治四顛倒故，如實遍知一切境故。

巳二、捨取事

捨取事者，謂四正斷。為欲斷除不善法故，及為修集諸善法故。

巳三、出受事

出受事者，謂四神足。依四靜慮，次第超出始從憂根乃至樂故。

依四靜慮等者：謂初靜慮出離憂根，第二靜慮出離苦根，第三靜慮出離喜根，第四靜慮出離樂根。如三摩呬多地說。（陵本十一卷十頁⁸⁸⁰）

巳四、方便事

方便事者，謂諸根、力、覺支、道支。當知即是能斷見、修所斷煩惱正方便故。

卯二、略攝²

辰一、標

如是勤修善巧事者，當知有四種所依、能依義。

辰二、釋² 巳一、所依義

所依義者，謂觀行者正勤修習。

巳二、能依義² 午一、略標相

能依義者，謂成就學諸無漏法，而未清淨，餘無明殼所纏裹故。

四種所依能依義者：謂依四善巧事正勤修習，成就學法，義各差別，由是說有四種所依、能依義。

午二、廣應修² 未一、由清淨道

又彼諸法，由清淨道後方清淨。此清淨道，當知復有四種差別。一者、習近正法，正審靜慮；二者、親事善友；三者、以尸羅、根護、少欲等法熏練其心，四者；獨處空閑，用奢摩他、毗鉢舍那勝正安樂以為翼從。

未二、證得清淨

又清淨者，謂即依彼清淨行道多修習故，令有學法破無明殼，趣無學地。

子二、略攝漸次

又為得真實究竟解脫，當知略有五種漸次。一者、先集資糧以為依止。二者、以此為依，修奢摩他、毗鉢舍那。三者、以此為依，具諦現觀涅槃勝解。四者、以此為依，於劣少證不生喜足，亦不安住，於可厭法深生厭患。五者、以此為依，證得最後金剛喻定相應學心。

癸二、自體²

子一、出無常²

丑一、標五因緣

復次，由五因緣，當知一切自體諸行皆悉無常。

丑二、別釋其相⁴

寅一、第一因緣

謂一切自體壽量有限。假使有人，欲自祈驗：我今以手執持泥團、或牛糞團，能經幾時？作是願已，隨取彼團，是人爾時任情所欲，能執不捨，乃至於後欲棄即棄，欲持即持。非如所受必死之身，至壽盡際，尚不能遂己之所欲，延一剎那，況乎久住。

寅二、第二第三因緣

又一切自體因所生故，彼因作故，是無常故。

因所生故等者：自體果相，名因所生。自體因相，名彼因作。有因果法，故是無常。此中總說第二、第三因緣，如次別配應知。

寅三、第四因緣

又有自體廣大興盛終歸磨滅而可得故。謂在色界、欲界，天、人、大梵、帝釋、轉輪王等。

寅四、第五因緣

又由無倒阿笈摩故。謂佛世尊，於諸自體無常法性，現見現證而宣說故。

子二、廣圓滿² 丑一、出差別³ 寅一、標

復有三種諸受欲者圓滿差別，由是因緣，諸受欲者恆常戲論。

寅二、徵

何等為三？

寅三、列

一、資產圓滿，二、自體圓滿，三、廣大殊勝有情供養圓滿。

丑二、釋得緣

當知復有三種因緣，能得如是圓滿差別。謂施、戒、調伏諸根俱行，及欲界慈修所得果。慈為先導，慈為因處，於諸有情損害寂靜行相轉故。

當知復有三種因緣等者：謂施能得資產圓滿，是為第一因緣。戒及調伏諸根俱行，能得自體圓滿，是為第二因緣。欲界慈修，能得廣大殊勝有情供養圓滿，是為第三因緣。言欲界慈修者，謂慈無量定應知。

癸三、智境界² 子一、智差別

復次，當知於所知事，有七種如實通達智行。一、已得智，二、未得智，三、無顛倒智，四、是處非有知非有智，五、是處所餘知不空智，六、苦不淨智，七、速滅壞智。

有七種如實通達智行等者：無漏後得智，名已得智。無漏加行智，名未得智。無漏正智，名無顛倒智。於有知有，名是處所餘知不空智。餘文易

知。

子二、彼境界³ 丑一、標

又由十五種相覺了諸行，能速斷滅一切行愚。

丑二、徵

何等十五？

丑三、釋² 寅一、辨⁵ 卯一、於色蘊

謂水界所生故，無我似我而顯現故，不住隨欲而造作故，覺了諸色猶如聚沫。
不住隨欲而造作者：謂速增減應知。

卯二、於受蘊

三和合生相似法故，如雲地雨和合方便，覺了諸受喻若浮泡。

卯三、於想蘊

於所知境能顯、能燒、能使迷亂相似法故，覺了諸想同於陽焰。

卯四、於行蘊

薩迦耶見根本斷故，多品自體因差別故，剎那量後時無暫停相似法故，覺了諸行譬芭蕉柱。

多品自體因差別故者：義顯作者、受者我等差別應知。

卯五、於識蘊

有取之識，依四識住，發起種種自體隨轉相似法故，覺了諸識方於幻事。

寅二、指

此廣分別，如前攝異門分應知。

如前攝異門分應知者：攝異門分說：色如聚沫，受喻浮泡，想同陽焰，行類芭蕉，識如幻事。（陵本八十四卷九頁⁶³⁷⁷）如彼廣分別義應知。

癸四、流轉² 子一、出二世間³ 丑一、標列

復次，有二世間，攝一切行。一、有情世間，二、器世間。

丑二、釋相

有情世間名種類生死，器世間名器生死。

丑三、料簡² 寅一、標不同分

種類生死不同其餘生死法故，望器生死，當知略有五不同分。

寅二、釋其差別⁵ 卯一、因不同分

謂器生死共因所生，種類生死但由不共，是名第一因不同分。

卯二、時不同分

又器生死，於無始終前後際斷；種類生死，於無始終相續流轉，常無斷絕；是名第二時不同分。

卯三、治不同分

又器生死或火水風之所斷壞，種類生死則不如是，是名第三治不同分。

卯四、斷不同分

又器生死因無永斷，種類生死則不如是，是名第四斷不同分。

卯五、續不同分

又器生死斷而復續，種類生死斷已無續，是名第五續不同分。

子二、廣初世間² 丑一、流轉相² 寅一、標列

又於生死，由五種相，一切愚夫流轉不息。一、由愛因故；二、由愛果故；三、由愛自性故；四、由因展轉故；五、即因展轉依止前際無窮盡故。

寅二、隨釋⁴ 卯一、愛因

此中無明，是名愛因。

卯二、愛果² 辰一、總標

能往善趣、惡趣諸業，是名愛果。

辰二、別辨

由往善趣業故，愛結所繫，愚夫自然樂往。由往惡趣業故，愛鎖所繫，愚夫雖不欲往，彊逼令去。

卯三、愛自性⁴ 辰一、標列三

愛自性者，略有三種。一、後有愛，二、喜貪俱行愛，三、彼彼喜樂愛。

辰二、略攝二

如是三愛，略攝為二。一者、有愛，二者、境愛。

辰三、別釋相³ 巳一、後有愛

後有愛者，是名有愛。

巳二、喜貪俱行愛

喜貪俱行愛者，謂於將得現前境界，及於已得未受用境，並於現前正受用境所有貪愛。

巳三、彼彼喜樂愛

彼彼喜樂愛者，謂於未來所希求境所有貪愛。

辰四、釋異名² 巳一、愛結繫愛鎖繫

當知此中，由喜貪俱行愛故，名愛結繫；由後有愛及彼彼喜樂愛故，名愛鎖繫。

巳二、馳走流轉

若於彼事愛結所繫，名為馳走；若於彼事愛鎖所繫，名為流轉。

卯四、因展轉及無窮盡

又於長世因展轉來諸行相續，前際難知，後無窮盡。

丑二、繫縛相² 寅一、標列

由是五相，流轉愚夫，當知復由五相所縛。一、於彼處縛，二、由彼而縛，三、正是能縛，四、依彼故縛，五、有所領受。

寅二、隨釋⁵ 卯一、於彼處縛² 辰一、由業

於彼處縛者，謂由能往善趣業故，於善趣柱而繫縛之；或由能往惡趣業故，於惡趣櫛而繫縛之。

辰二、由愛

又由喜貪俱行愛故，於自事柱而繫縛之；由彼彼喜樂愛及後有愛故，於自事櫛而繫縛之。

卯二、由彼而縛

由彼而縛者，謂愚夫異生為無明縛。

卯三、正是能縛

正是能縛者，謂自同類於苦無厭相似法故。

謂自同類等者：分別緣起初勝法門經說：謂有一類，愚於現在已得自體，於六觸處為緣生受便起味著；由味著故，希求當來如是類受。由是當知，此說同類，謂於彼受。由是為緣，不於行苦生厭離想，是名於苦無厭。前後相似相續而轉，名相似法。

卯四、依彼故縛

依彼故縛者，謂依後蘊而被縛故。

謂依後蘊而被縛故者：此中後蘊，謂後有蘊。業因所生，故被彼縛。

卯五、有所領受

有所領受者，謂領受彼生等眾苦。

癸五、喜足³ 子一、出差別² 丑一、略標列

復次，愚夫異生於有漏事有四喜足，當知多分是諸外道。何等為四？一、於

人身喜足，二、於欲界天身喜足，三、於生梵世喜足，四、於道邊際有頂喜足。

丑二、配釋相

愚夫於彼，隨其次第，若趨、若住、若坐、若臥。

子二、廣所行²

丑一、五種³ 寅一、標列

復有五種一切愚夫愛所行路。一者、後有，二者、未來所求境界，三者、將得現前境界，四者、已得所有境界，五者、現前受用境界。

寅二、配屬

當知於彼，如其次第，趨等差別。

寅三、明攝

應知此中，趨有二種。一、於後有，二、於未來所求境界。

丑二、四種³

寅一、略標列

復有四種愛所行路。一者、意業希求境界；二者、身語二業；三者、獲得；

四者、於所得中，隨其所欲若轉、若習。

三者獲得等者：此中第三，謂於已得所有境界。第四，謂於現前受用境界。即於此中，喜貪俱行展轉增上，是名若轉、若習。

寅二、隨難釋

此是發業愛所行路。

寅三、配差別² 卯一、舉趨等

若求境界，或復諸有，當知於彼四種行路，如其次第，趨等差別。

卯二、例說餘

如說趨等，於餘所說諸有漏事所有喜足、愛所行路，喜樂、戲論、染著、耽湎四處差別，如其次第，當知亦爾。

子三、辨行果² 丑一、出差別² 寅一、標列

復有二種遊愛行路果相差別。一、心差別，二、身差別。

寅二、隨釋² 卯一、廣種類² 辰一、心差別² 巳一、標列

心差別者，復有二種。一、品類差別，二、雜染差別。

巳二、隨釋² 午一、品類差別

品類差別者，謂由自性故、所依故、所緣故、助伴故。

午二、雜染差別

雜染差別者，謂由貪瞋癡等所有煩惱及隨煩惱。

辰二、身差別

身差別者，亦有二種。一、種種身差別故；二、一種身差別故。

身差別者亦有二種等者：梵世已下，身形異類，名種種身差別。第二靜慮已上一切諸天，身光等照，名一種身差別。義如聞所成地說應知。（陵本

十四卷二十三頁¹²⁶⁷）

卯二、攝應修

當知此中，心之所有雜染差別，能為二種身差別因。為斷彼故，諸修行者，應以無倒數數作意勤修觀行。

丑二、明彼因² 寅一、標列

復由四種因差別故，令果差別。謂若於此差別，若由此差別，若即此差別，若如此差別。

寅二、隨釋⁴ 卯一、於此差別

於此差別者，謂於善趣、惡趣所有差別。

卯二、由此差別

由此差別者，謂由貪瞋癡所染汙心，令彼差別。

卯三、即此差別

即此差別者，謂五種行所攝受身種種差別。

卯四、如此差別

如此差別者，謂於諸行流轉雜染、清淨因緣，及清淨體不如實知，生喜樂等及趨走等種種差別。

癸六、行順流² 子一、正辨順流² 丑一、標列

復次，不能了達諸行無常，薩迦耶見為所依止，順流而行諸愚夫類，由五種相，當知順流而被漂溺。謂若於此漂溺，若由此漂溺，若依此漂溺，若如此漂溺，若漂溺時諸所有相。

丑二、隨釋⁵ 寅一、於此漂溺

於此漂溺者，謂於善趣、惡趣而被漂溺。如從兩岸彼此往來，俱被漂溺。

寅二、由此漂溺² 卯一、標由愛

由此漂溺者，謂由愛河浸淫之性之所漂溺。

卯二、廣愛相

當知此愛有五種相。一、由諸境界趣下分故；二、微細隨行難覺了故；三、於諸境界難迴轉故；四、乃至有頂，一切廣大種種諸行所隨逐故；五、不寂靜相亂身心故。

當知此愛有五種相等者：初約境界愛說，順趣欲界，名趣下分。次約自體愛說，與身俱生，行相難了，故言微細。餘文易知。

寅三、依此漂溺

依此漂溺者，謂依色等五種諸行而被漂溺。即於善趣、惡趣兩岸，有五種行品類差別，數數攀緣，順流漂溺。

寅四、如此漂溺

如此漂溺者，云何漂溺？謂於諸行如前所說流轉等事，隨其次第不如實知，或計為我及我所故。

如前所說流轉等事等者：謂如前說：諸行流轉雜染、清淨因緣，及清淨體不如實知故。又如前說：愛味當知即是雜染因緣，過患即是清淨因緣，出離即清淨體。於諸行中不正觀察，是故不如實知。

寅五、漂溺時相

於漂溺時所有相者，謂彼如是被漂溺時，雖寶愛身欲使長久，由自性滅不能令住。

子二、兼顯逆流²

丑一、例前相違

如為漂溺，與此相違，當知即是逆流行者。

丑二、出聰慧相³ 寅一、標

又聰慧者有十種相，當知具攝諸聰慧相。

寅二、列

謂成就俱生慧故。又成就方便聞思修所成慧故。又成就心無動搖故，善思所思、善說所說、善作所作。

又成就心無動搖故者：由諸定地名無動處，是故此說心無動搖。

又能自依己所有性，未嘗為命依附於他。

未嘗為命依附於他者：此說聖慧命者受用正法，以無上慧命清淨自活。非如外有欲者受用欲塵，而從他所非法希求所有衣服、飲食、臥具、病緣醫藥諸資生具。由是說言未嘗為命依附於他。

又有所求無不安樂。又有所求能依正行，皆悉以法，不以非法。又自所宜資產眾具，能正防守，不令散失。又觀過患而受用之。又於病緣所有醫藥，觀

察思擇，然後服行。又能善避非時死緣。

寅三、結

如是十種聰慧者相，當知具攝諸聰慧相。

癸七、知斷相² 子一、知斷差別² 丑一、標

復次，於諸行中，依無我理知者、斷者，當知略由三相差別。

丑二、釋³ 寅一、第一差別相² 卯一、辨² 辰一、舉未斷

謂於諸行能遍了知，薩迦耶見而未斷者，彼於諸行忘念之行多分現行，少不
忘念。

辰二、例永斷

薩迦耶見已永斷者，當知其相與彼相違。

卯二、結

是名第一差別之相。

寅二、第二差別相² 卯一、辨² 辰一、舉未斷³ 巳一、令心流漏

又於諸行雖遍了知，薩迦耶見而未斷者，於諸廣大可愛事中多生喜樂，於諸下劣不可愛境多生憂苦。

巳二、令失正念

彼二境界現在前時，無縱逸者尚自不能繫守正念，況縱逸者。

巳三、令不正知

彼於爾時，薩迦耶見纏繞其心，由彼令心不能解了。

辰二、例永斷

薩迦耶見已永斷者，當知其相與彼相違。

卯二、結

是名第二差別之相。

寅三、第三差別相² 卯一、辨² 辰一、舉未斷

又於諸行薩迦耶見未永斷者，未能於內一切行中，現前安立離有情想，如於草木葉等外事。

辰二、例永斷

薩迦耶見已永斷者，當知其相與彼相違。

卯二、結

是名第三差別之相。

子二、已斷勝利

如是已斷薩迦耶見，有此三種差別之相，當知復有三種勝利。一者、永斷能感後有一切煩惱。二者、依彼不久獲得速能積集彼對治道。

依彼不久獲得速能積集彼對治道者：謂入諦現觀已，修習如所得道故。

三者、既作自義利已，即依彼道，方便勤修現法樂住，由此獲得極安樂住。

癸八、想⁴ 子一、標

復次，由四差別，當知修習一切種行無常苦想。

子二、徵

何等為四？

子三、列

一、果差別故；二、自性差別故；三、品類差別故；四、方便差別故。

子四、釋⁴

丑一、果差別²

寅一、由惑斷別²

卯一、總標

果差別者，謂修此想能遣一切欲貪、色貪，及無色貪、掉、慢、無明。

卯二、別顯

當知此中，顯示三種本煩惱斷，及顯三種隨煩惱斷。欲貪煩惱，掉為助伴；色貪煩惱，慢為助伴；無色貪惑，無明為伴。

寅二、由結盡別

復有差別。謂於此中，顯示下分上分結盡。

丑二、自性差別³

寅一、親近修習多修習²

卯一、約三慧辨

自性差別者，謂於此中，由正修習聞所成慧，說名親近；由正修習思所成慧，能入修故，說名修習；由正修習修所成慧，名多修習。

卯二、約作意辨

又由修習了相作意，故名親近；唯除加行究竟作意，由正修習諸餘作意，故名修習；修習加行究竟作意，名多修習。是名第二三種差別。

寅二、為乘為事為隨建立

又由所依、所緣、作意，隨其次第，當知是名為乘、為事、為隨建立。

為乘為事者：五識身相應地說：應觀五識所依，如往餘方者所乘。所緣，如所為事。（陵本一卷九頁³³）此應準釋。

寅三、純熟善受及與善發

又由長時串修習故，說名純熟；數數無倒修方便故，說名善受及與善發。

丑三、品類差別² 寅一、約修果辨

品類差別者，謂修如是無常想時，速能永拔一切隨眠，棄捨下地一切善法，攝受上地一切善法。

寅二、約譬喻差別辨⁵ 卯一、象跡喻攝

於餘一切不淨想等最高廣性能善任持，遍行一切。

於餘一切不淨想等最高廣性等者：攝異門分說：象跡者，謂於不淨等想，為第一故，所緣廣大故。（陵本八十三卷二十頁⁶³⁴⁰）由是此說無常能善任持，遍行一切。

卯二、臺閣喻攝

猶如觀察所取之事，即如是觀能取之事，彼相解脫能得無漏無常之想。

卯三、流注喻攝

若有漏想、若無漏想，如是一切，皆於涅槃善能隨順、趣向、臨入。

卯四、日出喻攝

皆能對治無明大闇，一切永斷；永斷彼故，清淨鮮白。

卯五、輪王喻攝

諸無學想，皆由一切無漏學想增上故得。

丑四、方便差別

方便差別者，謂獨處空閑，以無顛倒數數作意，觀察諸行無常之性。由無常

想，住無我想。於見道中，既住無漏無我想已，於上修道，由有學想永害我慢，隨得涅槃二種皆具。

隨得涅槃二種皆具者：聲聞地說：諸阿羅漢，住有餘依般涅槃界，度生死海，已到彼岸，亦名住持最後有身。先業煩惱所引諸蘊自然滅故，餘取無故，不相續故，於無餘依般涅槃界而般涅槃。（陵本三十四卷二十五頁²⁸¹²）此應準釋。

癸九、立違糧²

子一、出違逆²

丑一、五違糧法²

寅一、標

復次，為住涅槃，仍未積集善資糧者，略有五種違資糧法。

寅二、列

一者、憶念往昔笑戲歡娛承奉等事，因發思慕俱行作意，生愁歎等。二者、由彼種種為依，於所領受究竟法中，多生忘念，令於諸法不能顯了。三者、所食或過、或少，由此令身沈重羸劣，於諸梵行不樂修行。四者、喜眠，不串習斷，便為上品睡眠所纏。五者、親近猥雜而住，遠離諦思正法加行。

丑二、五順彼法² 寅一、標

如是五種違資糧法，復有五種隨順彼法。

寅二、列

一者、於二離欲，猶未能離隨一種欲。謂於諸纏遠分離欲勤修善品，及於睡眠永害離欲得正對治。

於二離欲者：由世間道及出世道二差別故，而得離欲，名二離欲。如下自釋，勤修善品、得正對治，如次配釋世出世間二種離欲應知。

二者、不護根門。三者、食不知量。四者、初夜後夜不能勤修勉勵警覺。五者、不能觀察善法究竟。

子二、明隨順² 丑一、例前相違

與上相違，當知是名順資糧法，及能隨順彼隨順法。

丑二、明師制立³ 寅一、標

又諸聲聞，修行如是順資糧法及彼因緣，於其中間求涅槃時，大師為彼制立

五種正道言教。

寅二、釋² 卯一、住時攝² 辰一、別辨³ 巳一、如所觀察得無惑疑

一者、由依觀察如所聞法，遍於一切諸行無常、諸法無我、涅槃寂靜，且以世間作意而得無惑無疑。

巳二、不著三事不正尋思

二者、即於住時，不著三事不正尋思。何等三事？一者、資命眾具；二者、他損害相；三者、或他毀罵，或隨有一非愛現行同梵行者不同分法。

或隨有一非愛現行等者：謂於六種可樂、可愛、可重、無違諍法，隨一違越應知。

巳三、由依聞思生正見等

三者、教授為先，由依他音、如理作意，能生正見，能斷邪見。

辰二、總結

當知此三是名住時正道言教。

卯二、行時攝² 辰一、標

復有二種於彼行時正道言教。

辰二、釋² 巳一、第一言教

謂諸有智同梵行者，為彼宣說處非處時，不生忿怒；又由麤弊資命眾具，若得不得，及由戒等所有災害，心不熱惱；是名第一。

巳二、第二言教

於得所勝利養恭敬，心不悞然，是名第二。

寅三、結

彼由如是住時、行時，能正修行涅槃妙道，由此不久當得涅槃，終無毀失。

癸十、師所作等² 子一、標列五事

復次，大師於諸聲聞，略有五種師所作事。一者、正折伏，二者、正攝受，三者、正訶責，四者、正說雜染，五者、正說清淨。

子二、別廣品類⁵

丑一、正折伏攝² 寅一、由記別

復次，由二因緣，於諸諍事違越聲聞，覆相記別彼所諍事。一、擾亂增廣故；二、與律相應故。

於諸諍事違越聲聞等者：聲聞諍事，略有四種。一者、他舉諍事，二者、互疑諍事，三者、自舉諍事，四者、互舉諍事。如下調伏事說。（陵本九十九卷二十四頁⁷⁴⁶⁷）如是諍事違越學處，由是說言違越聲聞。若除滅已，不應重舉前所犯事。今此不爾，由二因緣，重舉所犯，是名覆相記別彼所諍事。

寅二、由驅擯

復次，由七因緣，大師驅擯諸聲聞眾。一者、見一切種皆行邪行故；二者、見彼多分故；三者、由彼眾首上座阿遮利耶、鄔波柁耶方便故；四者、不堪共住故；五者、被驅擯故；六者、避現前過故；七者、令不生起未來過故。

丑二、正攝受攝⁷

寅一、入於聚落乞食

復次，由十因緣，如來入於聚落乞食。一者、當顯杜多功德故。二者、為欲

引彼一分令入乞食故。三者、為欲以同事行攝彼一分故。四者、為與未來眾生作大照明故，乃至令彼暫起觸證故。

令彼暫起觸證等者：謂令現在眾生現見如來，入於聚落乞食故。

五者、為欲引彼麤弊勝解諸外道故。六者、為彼承聲起謗，故現妙色寂靜威儀，令其驚歎，心生歸向故。七者、為彼處中眾生，以其少功而樹多福故。八者、為令壞信放逸深生恥愧，雖用小功而獲大福故。如為放逸者，懈怠者亦然。九者、為彼盲聾、顛狂、心亂眾生種種災害，皆令靜息故。十者、為令無量無邊廣大威德天、龍、藥叉、健達縛、阿素洛、揭路荼、緊捺洛、牟呼洛伽等，隨從如來至所入家，深生羨仰，勤加寶衛，不為惱害故。

寅二、入於寂靜天住

復次，由八因緣，如來入於寂靜天住。一者、為引樂雜住者令入遠離故。二者、為欲以同事行攝遠離者故。三者、自受現法樂住故。四者、為與大族諸天示同集會故。五者、為以佛眼觀察十方世界，現大神化，隨其所應，作

饒益事故。六者、為令諸聲聞眾，於見如來深生渴仰故。七者、為顯諸大聲聞，於所略說善能悟入故。八者、勸捨樂著戲論，制作言詞故。

寅三、攝受諸聲聞眾

復次，由五種相，大師攝受諸聲聞眾。一、以法故；二、以財故；三、與依止故；四、初攝受故；五、擯攝受故。

寅四、釋梵天等往如來所

復次，由七因緣，釋梵天等往如來所。一、為供養如來故；二、為聽聞正法故；三、為決所生疑故；四、為順他，而為翼從故；五、為愍他，欲為饒益故；六、由愛重如來聖教故；七、知如來起世俗心，欲令赴會故。

寅五、初新者性及起惡作

復次，由五種相，當知一切初新者性。一、由晚出家故；二、由幼出家故；三、由少出家故；四、由勞策出家故；五、由受具出家故。復次，由三種相，生起惡作。一、違越所學增上故；二、誓受法律增上故；三、棄捨居家

增上故。

寅六、為諸聲聞說法現相

復次，如來將欲為諸聲聞宣說正法，現四種相。一者、從極下座安詳而起，昇極高座儼然而坐；二者、安住隨順說法威儀；三者、發警歎音，示將說法；四者、面目顧視，如龍象王。

寅七、犯戒慚羞往大師所

復次，犯戒聲聞當於三處安住慚羞，往大師所。一者、深知己犯為增上處；二者、師事失儀為增上處；三者、由事乖則，當以方便調順威儀，往大師所為增上處。

丑三、正訶責攝

復次，由三種相，應正訶責犯戒聲聞。一曰：汝期鄙劣活命。二曰：汝意樂不清淨。三曰：汝以活命意樂行非法行。

丑四、正說雜染攝³

寅一、由六相²

卯一、標列

復次，於善說法毗奈耶中，略由六相，當知遍攝一切邪行。一者、現行過失故；二者、意樂過失故；三者、加行過失故；四者、智慧過失故；五者、尋思過失故；六者、依止過失故。

卯二、隨釋⁶

辰一、現行過失

現行過失者，謂由貪纏故染，瞋纏故憎；既懷猛利貪瞋等故，遂無羞恥；無羞恥故，住惡不捨。

辰二、意樂過失

意樂過失者，謂於染者邊，此貪意樂最為下劣；如是於憎者邊，此瞋意樂最為下劣。

辰三、加行過失

加行過失者，謂或有不發精進，或有精進慢緩。

辰四、智慧過失

智慧過失者，謂或於聞思所成慧中，忘失正念，多住愚癡；於修所成，心不

寂定。

辰五、尋思過失

尋思過失者，謂於隨順居家所有惡不善覺，多分尋思，於正法律其心錯亂。

辰六、依止過失

依止過失者，謂彼依止於其往昔不修集因；由不修集因故，成就自性微徧小信，成就自性修住小戒，成就自性住守小念，成就自性俱生小慧。

寅二、由四相² 卯一、略標列

復次，由四種相，能令彼人雖入聖教，而行邪行。一、由微劣不淨意樂故；二、由伺求聖教瑕隙，為正法賊故；三、由專為飲食、衣服活命因緣故；四、由怖畏王、賊、債主所加迫切故。

卯二、明過患

若行如是諸邪行者，便於二事有所稽留。一者、失壞在家自義稽留；二者、失壞出家自義稽留。

便於二事有所稽留等者：當知此中，由初二相，失壞在家自義稽留；由後二相，失壞出家自義稽留。可愛無罪，名之為義。依戒律儀能引自義，是故說有在家、出家差別。

寅三、彼因緣³ 卯一、略標列

復次，如是邪行有二因緣。謂於三事不正尋思，及彼前行諸不正想。

卯二、指三事

其三事者，如前應知。

卯三、釋因緣

於彼發起諸不正想，隨取相好，自斯已後，於其隨法多隨尋思、多隨伺察。

如前應知者：前說：何等三事？一者、資命眾具；二者、他損害相；三者、或他毀罵，或隨有一非愛現行同梵行者不同分法。如彼應知。

丑五、正說清淨攝² 寅一、標列對治

復次，為斷如是邪行因緣，當知亦有二種對治。一者、為斷不正尋思，以無

顛倒數數二行，於諸念住善住其心。

以無顛倒數數二行者：此中二行，謂奢摩他、毗鉢舍那應知。

二者、為斷諸不正想，修習無相心三摩地。

寅二、料簡修相² 卯一、總標簡

此修對治，要由於彼修對治中猛利樂欲，方得成辦，非彼樂欲不猛利者。

卯二、廣猛利² 辰一、標列二緣

此猛利欲由二緣生，謂此對治有大果故，不共一切諸外道故。

辰二、別釋其相² 巳一、有大果

有大果者，謂修習時，便能剋證無相心定，及住二界妙甘露門。所謂斷界及無欲界，若有餘依及無餘依。安住此者近二涅槃，未於今時一切皆得。

所謂斷界及無欲界等者：前說：見道所斷諸行斷故，名為斷界。修道所斷諸行斷故，名無欲界。即此唯有餘依故，名有餘依涅槃界。此依滅故，名為滅界，亦名無餘依涅槃界。（陵本八十五卷十頁⁶⁴⁴⁶）此應準釋。謂有餘

依及無餘依，皆無欲界之所攝故，依此建立二界妙甘露門。攝異門分說：甘露者，謂生老病死皆永盡故。（陵本八十三卷二十一頁⁶³⁴⁵）斷界及無欲界為依，能證此果，說之為門。

巳二、不共他³ 午一、標

言不共者，謂無相定唯內法有，諸外道無。

午二、徵

何以故？

午三、釋² 未一、諸外道無

由彼外道，若有所得，即便增益不如量觀；若無所得，即妄分別。由我見故，愚於諸行，或唯於身、或唯無色、或總於二生我執著；以執我故，謂我當無，便於涅槃心不欣樂。尚未能入，況乎安住，唯增驚怖，其心退還。

未二、唯內法有² 申一、總簡

住內法者與彼相違，於般涅槃心無退轉，了唯苦滅，見唯靜德。

申二、別辨² 酉一、有學

若諸有學唯祈內滅，非為生道更從他求教授教誡。

酉二、無學

若諸無學唯欣內滅，終不更求盡諸煩惱，唯有先因所生諸行任運歸滅而般涅槃。

瑜伽師地論科句披尋記卷第八十六

瑜伽師地論科句披尋記卷第八十七

彌勒菩薩說

唐三藏沙門玄奘奉詔譯

韓清淨科記

攝事分中契經事行擇攝第一之三

辛五、因攝² 壬一、頌標列

復次，嗢柁南曰：

因勝利二智 愚夫分位五 二種見差別 於斯聖教等

壬二、長行釋⁶ 癸一、因² 子一、標列

一切行因，略有二種。一、共，二、不共。

子二、隨釋² 丑一、共因³ 寅一、出體

共因者，謂喜為先因；由此喜故，於彼彼生處障於厭離，滋潤自體。

寅二、釋義

為欲將生所生之處，雖有一切煩惱為因，而於生處生喜者生，非於彼起厭逆想者。

寅三、顯說

又即此喜唯依色說，宿因生已，不待餘因究竟轉故。

又即此喜唯依色說等者：謂由先所習業，於當生處，喜樂馳趣，即於生處境色所礙，中有隨滅，生有續起。義如意地中說。（陵本一卷十七頁⁸⁷）此應準釋。

丑二、不共因² 寅一、出體

不共因者，謂順苦、樂、非苦樂觸，望於受等所有心法；無間滅意及俱生名、十種色等，望六種識。

寅二、釋義

由彼雖從先因所生，剎那剎那別待餘因，方得生起。

無間滅意及俱生名等者：若此六識為彼六識等無間緣，是名無間滅意。於

爾所時俱起心所，名俱生名。當知此約等無間緣，望六種識為不共因。眼等五根、色等五境，及與法處，是名十種色等。當知此約所緣緣、或增上緣，望六種識為不共因。由彼六識雖從先因所生，要待餘因差別為緣，方得生起。此差別緣，名不共因，剎那剎那變異轉故。

癸二、勝利²

子一、出四勝利² 丑一、標列體性

復次，有解脫心、有淨智見諸阿羅漢。

有解脫心有淨智見者：謂心解脫、慧解脫應知。

有四勝利，當知不與諸外道共。一、於行時恆常住性；

一於行時恆常住性者：諸阿羅漢，具足成就六恆住法。謂眼見色已，無喜無憂，安住上捨，正念正知。如是耳聞聲已、鼻嗅香已、舌嘗味已、身覺觸已、意了法已，無喜無憂，安住上捨，正念正知。義如聲聞地說應知。

（陵本三十四卷二十五頁²⁸¹²）

二、於住時無相住性；三、往昔因所生諸行任運歸滅；四、後有行今因斷

故，當不復生。

丑二、別釋其相² 寅一、明漸次

為證如是四種勝利，有三漸次。謂學智見為依止故，得厭離者，於諸行中不生喜樂，乃至不生耽湏而住；厭離為先，而得離欲；離欲為先，心善解脫。

寅二、釋勝利³ 卯一、第一勝利

自斯已後，即由如是心善解脫恆常住故，無順無違。

卯二、第二勝利

又於行時、或於住時，於一切相無復作意，於無相界作意思惟，無相而住。能障於此一切見趣先已永斷，況當為礙。

卯三、後二勝利

彼由是二若行、若住，乃至壽盡，便以無學內般涅槃而般涅槃，先所生有於今永盡，當來諸行無復更生。

子二、不共外道² 丑一、舉外道²

寅一、出見趣²

卯一、明建立²

辰一、由三分²

巳一、標列

又由三分，當知建立薩迦耶見以為根本一切見趣。一、由前際俱行故；二、由後際俱行故；三、由前後際俱行故。

巳二、隨釋³ 午一、前際俱行

前際俱行者，謂如有一，作是思惟：我於去世為曾有耶？為曾無耶？曾為是誰？云何曾有？

午二、後際俱行

後際俱行者，謂如有一，作是思惟：我於來世為當有耶？為當無耶？當為是誰？云何當有？

午三、前後際俱行

前後際俱行者，謂如有一，作是思惟：我曾有誰？誰當有我？今此有情來何所從？於此沒已去何所至？

辰二、廣差別² 巳一、總標

又諸外道，薩迦耶見以為根本，有六十二諸惡見趣。

巳二、別辨² 午一、計前際攝

謂四常見論、四一分常見論、二無因論、四有邊無邊想論、四不死矯亂論，如是十八諸惡見趣，是計前際說我論者。

午二、計後際攝² 未一、列數

又有十六有想見論、八無想論、八非有想非無想論、七斷見論、五現法涅槃論，此四十四諸惡見趣，是計後際說我論者。

未二、略攝² 申一、攝為五

如是計度後際論者，略攝有五。一、有想論，二、無想論，三、非有想非無想論，四、斷見論，五、現法涅槃論。

申二、攝為三

如是五種，復略為三。一、常見論，二、斷見論，三、現法涅槃論。

卯二、釋因緣² 辰一、標列

又此一切諸惡見趣，由六因緣而得建立。一、由因緣故；二、由依教故；三、由依靜慮故；四、由依世故；五、由依諸見故；六、由生處故。

辰二、隨釋⁶ 巳一、由因緣

由因緣者，謂彼一切，薩迦耶見以為因緣。

巳二、由依教

由依教者，謂由依彼能顯見趣不正法藏，師弟傳聞展轉相授為方便故。

巳三、由依靜慮² 午一、得邪決定² 未一、標

由依靜慮者，謂以靜慮為依止故，於先所聞、先所信解而得決定。

未二、廣² 申一、標列二種

又此靜慮，復有二種。一、與宿住隨念俱行，二、與所得天眼俱行。

申二、隨釋後一² 酉一、標

宿住隨念俱行者，謂計前際三常論中，由下中上清淨差別，及於四種邊無邊論。

由下中上清淨差別者：有尋有伺地說：或依下中上靜慮起宿住隨念，不善緣起，故於過去諸行，但唯憶念，不如實知，計過去世以為前際，發起常見。（陵本六卷十五頁⁴⁵⁴）此應準知。

由彼憶念諸器世間成壞兩劫出現方便。

酉二、釋² 戌一、憶念成劫

若時憶念成劫分位，爾時便生三種妄想。若有一向憶念上下，下至無間捺落迦下，上至第四靜慮之上，憶念如是分量邊際，便於世間住有邊想。若有一向傍憶無際，便於世間住無邊想。若有憶念二種俱行，便於世間住二俱想。

戌二、憶念壞劫

若時憶念壞劫分位，爾時便住非有邊想非無邊想，諸器世間無所得故。

午二、說邪言論² 未一、標三種

復有依止諸靜慮故，當知或說一分常論，或說無因論，或說不死矯亂論。

未二、廣後一² 申一、簡差別² 酉一、別辨相² 戌一、辨二淨天² 亥一、標列

應知此中，有二淨天。一、不善清淨，二、善清淨。

亥二、隨釋² 天一、不善清淨

若唯能入世俗定者，當知是天不善清淨，於諸諦中不了達故，其心未得善解脫故。

天二、善清淨

若能證入內法定者，當知是天名善清淨，於諸諦中已了達故，其心已得善解脫故。

戌二、辨二無亂² 亥一、標列

當知無亂，亦有二種。一、無相無分別，二、有相有分別。

亥二、配釋

此中第一是善清淨天，第二是不善清淨天。

酉二、總釋名² 戌一、名不死無亂

前清淨天，於自不死無亂而轉，是故說名不死無亂。

戌二、名不死矯亂

後不清淨，若有依於不死無亂有所詰問，便託餘事矯亂避之。

申二、出種類²

酉一、辨⁴

戌一、覺未開悟²

亥一、怖畏妄語

以於諸諦無相心定不善巧故，先興心慮，作是思惟：我等既稱不死無亂，復有所餘不死無亂，於諸聖諦無相心定已得善巧，彼所成德望我為勝。彼若於中詰問於我，我若記別，或為異記、或撥實有、或許非有，彼於記別見如是等諸過失已，作是思惟：我於一切所詰問中皆不應記。

亥二、怖他輕笑

又於是中見有餘過，謂他由此鑒我無知，因則輕笑不死無亂。

戌二、起增上慢

有行諂者作是思惟：我於此中應如是記：非我淨天一切隱密皆許記別，謂自己所證及清淨道。如是思已，故設詭言而相矯亂。彼既如是住邪思惟，遍布其心，於彼最上清淨天所，故稱我是不死無亂。

戌三、覺未決定

由懷恐怖，而無記別，勿我劣昧為他所知。由是因緣，不能解脫，以此為室，而自安處。

戌四、羸劣愚鈍

又有愚戇專修止行，不能以其諂詐方便矯設亂言，但作是思：諸有來問，我當反詰；隨彼所答，我當一切如言無減而印順之。

酉二、結

由是計度有差別故，建立四種。

巳四、由依世² 午一、計前際

由依世者，謂依過去及現在世起分別故，名計前際。

午二、計後際

依未來世起分別故，名計後際。

巳五、由依諸見² 午一、辨² 未一、計命即身等² 申一、標依三見

由依諸見者，謂依三見，如前應知。

謂依三見如前應知者：謂若計命即身；或復計命異身；或復計我俱遍，無二無闕；是名三見。如有尋有伺地說應知。（陵本六卷十六頁⁴⁶¹）

申二、配有色等及有邊等²

酉一、計我有色等³

戌一、計我有色

由依初見，於現法中計我有色。後或有色有想，或無有想，或非有想非無想。

戌二、計我無色

依第二見，於現法中計我無色。於後所計，如前應知。

於後所計如前應知者：謂後計我或有想、或無想、或非有想非無想，如依初見中說應知。

戌三、計我俱非

依第三見，我論有二。一者、說我有色、無色，二者、說我非有色非無色。

餘如前說。

餘如前說者：謂後計我有想、無想、非有想非無想，如依初見中說應知。

酉二、計我有邊等² 戌一、出計因

又即計我是有色者，或言狹小、或言無量；計我無色，當知亦爾。此二我論，依第三見立為二論。一者、計我狹小，二者、計我無量。

戌二、列差別

由是四種我論差別，說我有邊，說我無邊，說我亦有邊亦無邊，說我非有邊非無邊，隨其次第，如前應知。

隨其次第如前應知者：謂若計我有色，說我有邊；計我無色，說我無邊；計我有色無色，說我亦有邊亦無邊；計我非有色非無色，說我非有邊非無邊。如前已說四種我論差別，今此有邊、無邊等，隨其次第應知。

未二、計我清淨解脫

又即依止如是諸見及依我論，復宣說我清淨解脫，於欲、靜慮皆得自在，隨其所欲，多住變化；如其所欲，安住靜慮。以清淨見，遊戲受用方便法樂。

午二、結

如是名為依諸見故，應知安立。

於欲靜慮皆得自在等者：謂於諸天微妙五欲堅著攝受，嬉戲娛樂，隨意受用，是名心得自在。由是說言：隨其所欲，多住變化。若於四種靜慮得具足住，是名觀得自在。由是說言：如其所欲，安住靜慮。妄計清淨論者，起如是見，立如是論。如有尋有伺地說應知。（陵本七卷十三頁⁵²⁶）

已六、由生處² 午一、總標

由生處者，謂我有一想，乃至廣說。

午二、別辨² 未一、約有想辨

有一想者，謂在無色空無邊處、識無邊處。有種種想者，謂在下地。即如所說，隨其次第，應知說我有狹小想、有無量想。

未二、約有樂等辨

一向有樂者，謂在下三靜慮。一向有苦者，謂在捺落迦。有樂有苦者，謂在鬼、傍生、人、欲界天。有不苦不樂者，謂在第四靜慮已上，乃至非想非非

想處。

寅二、明衰損² 卯一、標列

又於如是諸外道處，當知總有三種衰損。一者、見及欲樂展轉相違論衰損，二者、依我無智論問記衰損，三者、依法隨法行證得衰損。

卯二、隨釋³ 辰一、第一衰損² 巳一、標類

此中三種，若計有想、若計無想、若計非有想非無想論者，及斷見論者，或依責他為勝利論，或依免難為勝利論，而起計度，當知是名第一衰損。

巳二、釋由

由彼諸論計度後際，依未來世妄計於我為有無故。

辰二、第二衰損² 巳一、出差別² 午一、明無智

依我無智論問記衰損者，謂於若諸雜染、若雜染處、若能雜染，如是一切世俗、勝義二諦道理不如實知，由此無智有所趣向以為先故，得有差別。

午二、辨所趣⁴ 未一、徵

從此無智何所趣向？

未二、標

謂三四轉。

未三、列

一、常無常等，二、有邊無邊等，三、自作他作等。

謂三四轉者：謂有三種四句分別差別轉故。

未四、釋² 申一、總明問記² 酉一、由趣向差別

所以者何？彼由無智，要先趣向如是差別，後方問記。

酉二、於不可記事

又於聖法毗奈耶中，所有智者不可記事，於二道理不容記故，謂世俗、勝義二諦道理。

又於聖法毗奈耶中等者：顯揚頌云：真如無漏性，成所作義利，靜慮者如來，無譬自在故。（顯揚論十七卷九頁）此說智者不可記事，應準彼知。

申二、別釋四轉³ 酉一、常無常等² 戌一、一向常等

此中四種一向常論計前際者，及計前際無因論者，二種差別，皆先計我，後方緣我一向常等諸論差別。

戌二、一分常等

又即四種一分常論計前際者，彼有差別，謂有一分緣常無常論，或有一分緣非常非無常論。

酉二、邊無邊等

邊無邊等諸論，如前邊無邊等，應知其相。

酉三、自作他作等⁴ 戌一、自作論

若欲一切皆宿因作，名自作論。

戌二、他作論

若欲一切皆自在等變化因作，名他作論。

戌三、俱作論

若欲少分自在天等變化因作，一分不爾，名俱作論。

戌四、俱非作論

若無因作論，名俱非作論。

巳二、結衰損

當知是名第二，依我無智論問記衰損。由彼諸論計度前際，依過現世妄分別故。

辰三、第三衰損³ 巳一、出種別

依法隨法行證得衰損者，謂有沙門、若婆羅門，不觀責他為勝利論，不觀免難為勝利論，亦不依我無智諸論，為求利養恭敬等事，樂欲開闡，於惡說法毗奈耶中而求出家。唯除樂求出離解脫，當知彼是薄塵種類，為性愚戇，專修止行。

巳二、明證得² 午一、舉初靜慮

彼由為得初靜慮定教授教誡，能於後際俱行見趣，及於前際俱行見趣，不然

許故，而得超過；於現法中，又能超過欲界諸結，證遠離喜。自斯已上，無聞無知，即於此中生涅槃想。

午二、例餘等至

如由彼故，證遠離喜；如是或有由別因緣，證得第二、第三靜慮無愛味樂，第四靜慮無苦樂受，從此已上，乃至非想非非想處，當知亦爾，於種種想俱行苦樂受等差別已超過故。

巳三、結衰損

如是彼於趣諸取行不能超越，樂退還法，未般涅槃，起涅槃慢，當知是名第三衰損。

丑二、明不共² 寅一、知衰損

此中如來自然證覺寂靜妙跡，於如所說一切行相三種衰損，由五種相如實了知。謂若彼自性，若彼諸見，若由無智彼得生起，若所緣轉，若彼所緣麤弊過患及上出離。

寅二、常出離

於如是事如實了知，即出離中常自出離。

由五種相如實了知等者：於五相中，初二種相，第一衰損所攝；次一種相，第二衰損所攝；後二種相，第三衰損所攝。如前釋相差別應知。

癸三、二智⁴ 子一、出自性² 丑一、標列

復次，有二智，能令見清淨及見善清淨。謂法住智，及此為先涅槃智。

丑二、隨釋² 寅一、法住智² 卯一、標差別

法住智者，謂能了知諸行自相種類差別，及能了知諸行共相過患差別。

卯二、隨難釋

謂於隨順若苦、若樂、不苦不樂三位諸行，方便了知三苦等性。

了知諸行自相種類差別者：諸行自相，非法住智所能證知，然隨種類亦可分別，是故說言能了諸行自相種類差別。

寅二、涅槃智

涅槃智者，謂於如是一切行中，先起苦想，後如是思：即此一切有苦諸行無餘永斷，廣說乃至名為涅槃。如是了知，名涅槃智。

廣說乃至名為涅槃者：諸行永滅，證無為相，有多差別。謂名無動、無轉，乃至最後名為涅槃。如攝異門分釋應知。（陵本八十三卷二十一頁⁶³⁴⁴）

子二、明修習²

丑一、約補特伽羅辨²

寅一、標列

即此二智，令見清淨及善清淨，要由二門正勤修習，方令彼淨。一、自無力補特伽羅，因他教授能令彼淨；二、自有力補特伽羅，多聞思求能令彼淨。

寅二、隨釋²

卯一、第一補特伽羅

此中第一補特伽羅，不聰利故，信等諸根唯一味故，止觀所緣於少分法諦察忍轉。

卯二、第二補特伽羅

與此相違，當知第二補特伽羅。

唯一味故止觀所緣者：三摩呬多地說：應時時間作意思惟奢摩他等差別之

相，不應一向。為欲對治沈掉等故。若於止、舉未串習者，唯一向修，是沈掉相。如此修者，當知住在方便道位。若時時間思惟捨相，如是在於成滿道位。亦由於此一向修故，於緣起法及聖諦中不思擇故，心不正定，不盡諸漏。於諸諦中，若未現觀，不能現觀；或已現觀，不得漏盡。（陵本十三卷十一頁¹¹¹⁰）此說一味，即彼一向，謂無差別轉故。

丑二、約現觀邊智辨²

寅一、標列

復有三種現觀邊智，修習彼故，見得清淨。一、能順生無漏智，二、無漏智，三、無漏智後相續智。

寅二、隨釋³

卯一、釋自性

初，世間第一法所攝智；第二，若住於彼，能斷見斷一切煩惱；第三，煩惱斷後，解脫相續智。

卯二、釋修次

若住中智，便名已入正性離生，超過異生地，未得預流果。雖未剋證第三解

脫預流果智，於其中間所住剎那，如未剋證，終無中夭，以時少故，從此無間必證第三。

卯三、簡差別² 辰一、見清淨

住此位中，如實現見所知境故，名見清淨；有餘惑故，非善清淨。

辰二、善清淨

若於此智更多修習，成阿羅漢，一切煩惱皆離繫故，名善清淨。

子三、釋斷相⁴ 丑一、無餘斷² 寅一、標列

又無餘斷三相應知。一、由不現行故；二、由界故；三、由事故。

寅二、隨釋³ 卯一、不現行

不現行者，謂雖生起，而不染著；雖未永斷，由數修習諸善法故，令成遠分，諸纏煩惱不復現行。

卯二、界

界者，三界，如前應知。

卯三、事

事謂二事，一、煩惱事，二、是苦事。

界者三界如前應知者：前說斷界、無欲界、滅界，是名三界。如彼釋義應知。（陵本八十五卷十頁⁶⁴⁴⁶）

丑二、離繫界

又於安樂利益隨逐諸離繫品五種界中，有寂靜微妙勝功德等，乃至涅槃為其最後差別應知。

有寂靜微妙勝功德等者：無餘地中，說有寂滅施設安立、寂滅異門安立，如彼廣釋應知。（陵本五十卷二十三頁⁴⁰⁴⁶）

丑三、棄捨

又於此中，一切依持皆棄捨者，當知割捨父母等事。

當知割捨父母等事者：有餘依地說七攝受事，名攝受依。又說：阿羅漢苾芻諸漏永盡，住有餘依地，與六攝受事不共相應。（陵本五十卷二十三

頁⁴⁰⁴⁵）其義應知。

丑四、無相續等

又於中有、生有、後有無復更生，如其次第，當知說名無有相續、無取、無生。

子四、明所依³ 丑一、未發趣等² 寅一、出障礙

又於三品，由三種門為障礙故，當知建立三結差別。謂未發趣故；雖已發趣，邪成立故；於正法中不正行故。

寅二、釋三品

即在家品、處惡說法毗奈耶中而出家品、處善說法毗奈耶品。

又於三品等者：如下自釋，在家等品，是名三品。未發趣等，名三種門。煩惱差別能和合苦，故名為結。由彼品類障礙解脫，其相各異，是故說結有三差別。

丑二、預流等² 寅一、明解脫

又行趣向逆流行者，解脫惡趣，成就二種解脫決定。一者、煩惱解脫決定，二者、後有解脫決定。

寅二、釋得名

由是因緣，故名預流，乃至廣說。

丑三、阿羅漢²

寅一、明解脫

又若證得阿羅漢果，先住學地，於諸行中已不執受我及我所，後於諸漏皆得解脫。

寅二、釋得名

又與四種義相應故，當知是名阿羅漢相。一者、自事已究竟，應作他事義故；二者、應得自義一切遍滿道理義故；三者、未來行因已永斷滅，應證現法樂住義故；四者、超有學地，入無學地相應義故。

癸四、愚位²

子一、標列差別

復次，愚位有五，若於中轉，墮愚夫數。何等為五？一、不獲得俱生慧故；

二、不獲得從聞他音緣生慧故；三、不獲得真聖慧故；四、愚癡纏所纏縛故；五、彼隨眠所隨縛故。

子二、別廣其相² 丑一、由妄計我

復有四種妄計我論。一者、宣說諸行是我，二者、宣說我有諸行，三者、宣說諸行屬我，四者、宣說我在行中。

復有四種妄計我論等者：於四種中，初是我見，餘是我所見，如是差別應知。集論中說：於五取蘊，有二十句薩迦耶見。謂計色是我，我有諸色，色屬於我，我在色中；如是計受、想、行、識是我，我有識等，識等屬我，我在識等中。於此諸見，幾是我見？幾是我所見？謂五是我見，十五是我所見。何因十五是我所見？由相應我所故，隨轉我所故，不離我所故。（集論一卷八頁）今此總說，故有四種。

丑二、由作雜染² 寅一、標列

由二因緣，妄計我論作諸雜染。一、執著故；二、隨眠故。

寅二、隨釋² 卯一、執著

執著故者，謂諸外道雖求解脫，由彼為障，於一切種不能獲得。

卯二、隨眠

隨眠故者，謂諸內法耽著境界，暫時為障，而非究竟。

癸五、二見差別² 子一、略辨

復次，若有我見、若無我見，同緣諸行為境事故，說名同分；而於彼事邪取、正取、染汙、清淨等義別故，名不同分。

而於彼事邪取正取者：謂於諸行不如實取，是名邪取。若如實取，是名正取。義如下說。（陵本八十八卷一頁⁶⁶³⁸）由邪取故，令心染汙；由正取故，令心清淨。由染汙故，能為繫縛；由清淨故，能得離繫。如是等類，名不同分。

子二、廣釋² 丑一、有我見² 寅一、邪取所緣² 卯一、標列

又由四相，於所緣事邪僻執著增上力故，能令我見作諸雜染。一、因緣故；

二、自性故；三、由果故；四、等流故。

卯二、隨釋⁴ 辰一、因緣故² 巳一、標列

因緣故者，謂二愚癡。一、事愚癡，二、見愚癡。

巳二、隨釋² 午一、事愚癡

事愚癡者，由愚事故，先聞邪法，後起我見。

午二、見愚癡

見愚癡者，謂愚見故，於見相應諸無明觸所生起受妄計為我；由此為緣，恆為我愛之所隨逐；復由此故，常於我見不能捨離。

辰二、自性故

自性故者，謂二因緣之所攝受，等隨觀察，於彼隨眠不得遠離。

謂二因緣之所攝受等者：謂事愚癡及見愚癡，名二因緣。我見種子常所隨逐，名彼隨眠不得遠離。

辰三、由果故

由果故者，謂即以彼薩迦耶見為依止故，不能遠離我慢隨眠。是二隨眠增上力故，能引當來諸根令起，由彼領納苦樂二受，因更發起計我、我所不如正理思惟相應意言分別，謂我、我所有其領受。

是二隨眠增上力故者：我見、我慢二種隨眠，名二隨眠應知。

辰四、等流故² 巳一、明意界

等流故者，謂由先因力所持故，即見種子所隨逐意，後有意界由前因緣所熏修力而得成滿。

即見種子所隨逐意者：此句隨釋前未了義。當知此意，謂即異熟所攝阿賴耶識，由是前說先因所持。又為一切種子所隨依止性，由是說見種子之所隨逐。

即於如是後有意中，有無明種及無明界。

巳二、明法界

是二種子所隨逐意所緣法界，

有無明種及無明界者：謂彼無明，住自性界，是名為種；習增長界，是名為界。當知界即種子異名，由義不同，故別建立。

彼由宿世依惡說法及毗奈耶所生分別薩迦耶見以為依止，集成今界。即由此界增上力故，發起俱生薩迦耶見。於善說法毗奈耶中，亦復現行能為障礙。集成今界者：此中界言，意說法界。謂依宿世分別薩迦耶見所熏修力，於現在世所緣法界得成就故。

寅二、邪取行相³ 卯一、標列差別

又即此見，由二種相，六轉現行。一、由世故；二、由慢故。

卯二、隨釋其相² 辰一、由世故

由世故者，謂我於過去為曾有耶？為曾無耶？乃至廣說，如應當知。

乃至廣說如應當知者：謂如前說，薩迦耶見有三分別。一、由前際俱行故；二、由後際俱行故；三、由前後際俱行故。其義應知。

辰二、由慢故

由慢故者，謂我為勝，乃至廣說。

謂我為勝乃至廣說者：謂我為等、為劣，是名廣說應知。

卯三、結成邪觀

彼於如是一切如實不知不見，由此因緣，不如正理起於邪觀。

丑二、無我見² 寅一、明位² 卯一、標

又明位有三。

卯二、釋

謂聞他音、如理作意，是初明位；已能證入正性離生，是第二明位；心善解脫阿羅漢果，是第三明位。

寅二、無明位² 卯一、第一差別

其無明位，復有二種。一、先，二、後。隨眠位是先，諸纏位為後。

卯二、第二差別

又約見、修所斷有異，當知是名第二差別。

癸六、聖教等² 子一、簡善惡說² 丑一、標明所為

復次，是處世尊，依自聖教為欲顯示善說發起，依他邪教為欲顯示惡說失墜，自有所說。後結集者，於法門中，稱為世尊喁訖南說。

丑二、釋其因緣² 寅一、辨得失² 卯一、略標

由二因緣，善說法律名為發起大果大利，惡說法律即為唐捐。

卯二、別釋² 辰一、於善說

一者、於善說法毗奈耶中，一切眾苦永離可得，謂三種苦性。二者、一切諸結永斷可得，謂下上分結。

辰二、於惡說

於惡說法毗奈耶中，如是二事皆不可得。

寅二、廣所由² 卯一、依他邪教² 辰一、約苦苦辨² 巳一、出彼勝解² 午一、初

二相

彼由依止薩迦耶見，於諸行中心厭苦苦欲樂為依，起茲勝解：願於當來無有

苦我，我無有苦。

午二、後二相

或復已斷即彼苦因及彼當果，於未來世，由二種相而生勝解。謂苦未來當離於我，及我未來當無有苦。

或復已斷者：謂於苦苦不現行故，說名為斷。前說於諸行中心厭苦苦，今此復說於彼已斷，由是故有四種行相勝解差別，若厭、若斷分位別故。

巳二、明未永越

雖由如是四種行相樂斷為依，離欲界欲，生初靜慮，次第乃至於彼非想非非想處若定、若生。由是因緣，超越苦苦，而未能斷下分諸結；未斷彼故，當知苦苦未永超越。

辰二、約壞苦行苦辨

彼於壞、行二苦斷中尚不生樂，何況能斷。由彼隨順所未斷故，當知於順上分諸結亦未能斷。

卯二、依自聖教² 辰一、發正勝解² 巳一、厭離三苦

住內法者初修觀時，雖於欲界未得離欲，有情勝故，而於三苦深心厭離。依樂斷欲，於諸行中，用無我見以為依止，發其勝解：願於未來無三苦我，我無三苦。

有情勝故者：謂住內法補特伽羅，望彼外道沙門、婆羅門，說名為勝，由彼希求邪解脫故。

巳二、永斷苦苦

彼初修習如是行已，於欲界欲而得遠離，永斷苦苦，如前復生如是勝解：當無彼我，我當無彼。

辰二、證永解脫

如是行者，於其苦苦究竟解脫，亦永超越順下分結，即於此道次第進修，乃至能得阿羅漢果。

子二、廣明識住² 丑一、流轉攝³ 寅一、出愚相² 卯一、標由怖畏

若諸愚夫，薩迦耶見以為依止，於永超越壞、行二苦，及永斷滅隨順上分一切結中，謂我當無，於不應怖妄生怖畏，尚不起樂，況當能斷。

卯二、釋不應怖

又於是處，由二因緣不應生怖，謂唯有心住四識住，有轉有染；又唯有心斷四識住，無轉無染。

謂唯有心住四識住等者：於五蘊中，識蘊名心，所餘四蘊名四識住。義顯無我，說唯有心住四識住。由是因緣，有生流轉及有染汙。

寅二、明轉染²

卯一、約種種辨²

辰一、釋因緣²

巳一、略標列²

午一、長行⁶

未一、果攝²

申一、列種種⁵

酉一、四依

復有四依。謂色、受、想、行。

酉二、四取

復有四取。謂於欲、見、戒禁、我語所有欲貪。

酉三、二緣

復有二緣。謂若所緣及若能緣。

酉四、六識

復有六識。謂眼識等。

酉五、二識住

復有二識住。謂煩惱纏住及彼隨眠住。

申二、攝略義

此中諸取增上力故，以不如理分別為先，由我、我所邪境界取，由緣自相境界之取，由俱有依，此三因緣令諸識轉，及令染汙。

由我我所邪境界取等者：於四取中，我語取名我、我所取，見取、戒禁取名邪境界取，欲取名緣自相境界之取。前說四依，名俱有依。由此三種因緣、所緣、能緣，眼識等轉，名諸識轉。煩惱纏住及彼隨眠住，說名染汙。如是諸相，略攝前義應知。顯唯有心住四識住，有轉有染。

未二、因攝

復由三種。謂於現法趣集諦故；緣未來苦，我當如是如是愛故；於彼先因所生現苦而安住故。

未三、受攝

復由三種。謂趣樂位故，緣苦位故，安住不苦不樂位故。

未四、世攝

復由三種。謂趣來世故，緣去世故，住現世故。

未五、愛攝

復由三種。謂由後有愛，趣後有故；由彼彼喜樂愛，緣未來境界故；由喜貪俱行愛，住現在已得境界故。

未六、繫攝

復由三種。由貪欲身繫，趣向、隨順貪處事故；由瞋恚身繫，緣彼事故；由戒禁、此實二取身繫，住彼事故。

午二、唄陀南

中唄柁南曰：

果因與受 世愛及繫

果因與受世愛及繫者：前說諸識轉染，因緣有六三種，如次配釋應知。

巳二、隨難釋

喜愛滋潤如前應知，謂如諸行因中宣說。

喜愛滋潤如前應知等者：謂一切行喜為共因；由此為先，於彼彼生處障於厭離，滋潤自體。如前已說應知。

辰二、釋邊際² 巳一、生邊際² 午一、標列

又即彼識如是轉時，於二生處，當知結生相續增廣。一、於有色，二、於無色。

午二、料簡

於有色處，依止中有而有去來；於無色處，唯有從生。

巳二、住邊際² 午一、標於兩處

即於兩處乃至壽盡相續而住，故名為住。

午二、別顯人中

當知此住，欲界人中有三分位。謂初入胎識所滋潤、胎分圓滿、自胎而出。

卯二、約三界辨

當知此三復有差別，欲、色、無色，如其次第。

當知此三復有差別等者：前依若趣、若緣、若住，望義差別，說多三種。

今此更說復有差別。謂趣諸欲故，緣諸色故，住無色故。由是說言如其次

第。

寅三、斥餘說³ 卯一、由義無別

若有棄捨如來所說識流轉道，而作是言：我當更作別異施設。當知是人所施設者，其文有異，其義無別，但有言事。

卯二、由不知答

或餘智者，於其異文先示道理，後方詰問：汝所施設別異者何？彼於爾時茫

然不了。

卯三、由後覺非

或於後時自得達鑒，於前所立如理諦觀，反生愚昧；由愚昧故，自覺無知，我本受持為惡非善。

丑二、寂止攝²

寅一、出因緣³

卯一、廣依緣

又十色界名為色界，當知復有六種受界、想界、行界。

卯二、明斷位²

辰一、略標列

又於三位，當知諸識解脫煩惱。謂於諸行深見過患，能令諸纏遠分離故；於見地中，一切外道諸繫隨眠永斷滅故；依止修道得究竟故。

辰二、釋身繫²

巳一、辨相³

午一、貪瞋身繫²

未一、顯差別

又諸外道，於所妄計一切生處，謂大自在、那羅衍拏，及眾主等無量品類。樂生彼故，名貪身繫；於他諸見異分法中深憎嫉故，名瞋身繫。

未二、結雜染

依於邪願修梵行故，於同梵行可樂法中起憎背故，由此二緣，於增上戒學能為雜染。

依於邪願修梵行等者：如次配釋前說貪、瞋二種身繫應知。

午二、戒禁取身繫

當知即彼由戒禁取，於增上心學能為雜染。

午三、此實執取身繫

由此實執取身繫故，於增上慧學能為雜染。

巳二、釋名² 午一、名身繫

如是四法，能於色身、名身、趣向、所緣安立事中，令心繫縛，故名身繫。

能於色身名身趣向所緣安住事中者：前說：由貪欲身繫，趣向、隨順貪處事故；由瞋恚身繫，緣彼事故；由戒禁、此實二取身繫，住彼事故。此應準知。

午二、名意所成

又彼在意地故，意分別故，意相應故，意隨眠故，染汙意故，名意所成。

卯三、釋彼斷

又彼斷者，謂緣彼境諸煩惱斷，非彼所緣，即於彼境無倒解故。

寅二、明邊際² 卯一、滅因緣

又由後有諸業煩惱之所攝持後有種識，當知於此依止建立。彼無有故，當來三種如前所說差別理趣生長廣大，當知一切悉皆盡滅。

當來三種等者：此說三種，謂趣、緣、住。如前已廣分別應知。

卯二、得對治² 辰一、總標

又即由彼無所住識，因分、果分不復生長，諸道所攝而得生長。

辰二、別釋⁴ 巳一、解脫所依

又彼空解脫門為依止故，名無所為；無願解脫門為依止故，名為喜足；無相解脫門為依止故，說名為住。於彼愛樂數修習故，得善解脫。

巳二、解脫究竟³ 午一、逮得恆住

一切隨眠永滅盡故，心善解脫。從是已後逮得恆住，雖住諸行，而無所畏。

午二、滅不更生

已得諸蘊任運而滅，餘因斷故，無復更生。

午三、遍無所趣

彼有漏識由永滅已，遍於十方皆無所趣，唯除如影諸受，與彼識蘊、識樹，當知如燈皆歸寂滅。

唯除如影諸受等者：謂所有受是識樹影，說名如影諸受，當知此謂果已成滿受。於無餘依涅槃界中般涅槃時，此亦永滅。義如菩薩地決擇中說。

（陵本七十七卷十九頁⁵⁹²⁴）由是故言如燈皆歸寂滅。

巳三、解脫異名

即於有餘涅槃界中，依初纏斷，說名寂靜；依第二斷，說名清涼；依第三斷，說名宴默。

依第二斷等者：隨眠永斷，名第二斷。餘依永滅，名第三斷。

巳四、解脫因緣

又由三緣，識趣、識住皆無所有。一、由自然非染汙故；二、由所餘不染汙故；三、由餘識助伴無故。

一由自然非染汙故等者：心性本淨，名自非染。不為餘染，名餘不染。

辛六、斷支攝² 壬一、頌標列

復次，嗢柁南曰：

斷支實顯了 行緣無等教 四種有情眾 道四究竟五

壬二、長行釋⁷ 癸一、斷支

諸修斷者，略由五支攝受於斷，能於諸行如實顯了。一、由身遠離故；二、由心遠離故；三、由奢摩他品三摩地故；四、由毗鉢舍那品三摩地故；五、由常委所作故。

癸二、實顯了

復次，當知有十二種如實顯了行相，如攝異門分說。謂聽聞、各別善取、惡

取故，正教、現量、比量境界故，自相、共相故，如所有性、盡所有性故，入見、究竟地故。

有十二種如實顯了行相等者：攝異門分說有解釋、開示、顯了、了、解、知、等解了、近解了、點了、通達、觸、作證種種差別，是名十二種如實顯了行相。如彼一一別釋應知。（陵本八十三卷十六頁⁶³²²）今此聽聞、各別善取、惡取，當知十二種中，謂初三種。正教、現量、比量境界，謂彼第四、第五、第六。自相、共相，謂彼第七、第八。如所有性、盡所有性，謂彼第九、第十。入見、究竟地，謂後二種。如是於法正聞思修，如實顯了，故名行相。

癸三、行緣³ 子一、標

復次，略有四種如實顯了行相道理智所緣事。

子二、釋² 丑一、別辨染淨⁴ 寅一、約內法異生辨

謂住內法異生，於率爾墮境所起受中，不如實知增上力故，能令諸行流轉雜

染；如實知故，能令清淨。

寅二、約在家異生辨

復有在家異生，於欣後有所依中，不如實知增上力故，能令諸行流轉雜染；與彼相違，能令清淨。

於欣後有所依中等者：此中等言，等取受用諸欲應知。

寅三、約諸外道辨

復有諸外道，於所愛樂虛妄分別定生喜愛所依行中，不如實知增上力故，能令諸行流轉雜染；與彼相違，能令清淨。

寅四、約內法有學辨

復有住於內法有學，依諸根境所有忘念，於餘殘行不如實知增上力故，流轉雜染；斷餘殘故，使得清淨。

丑二、料簡清淨

當知於此一切品中，諸清淨品皆住內法。

子三、結

如是名為四所緣事。

癸四、無等教² 子一、出因緣² 丑一、標列

復次，由三因緣，如來所說教無與等。一者、宣說不共法故；二者、宣說無倒法故；三者、宣說自覺法故。

丑二、隨釋³ 寅一、由不共

此中宣說：若趣薩迦耶集行，即是趣苦集行；若趣薩迦耶滅行，即是趣苦滅行。是名宣說不共法教。

寅二、由無倒

若復說言：此真實有。是名宣說無倒法教。

若復說言此真實有者：謂諸行中，無我性有，名真實有應知。

寅三、由自覺

若復說言：我如實知。是名宣說自覺法教。

子二、廣流轉

復有三種諸行流轉差別。一者、薩迦耶，是諸有情染著安足處所義故。二者、世間，是染著處敗壞義故。三者、有，是染著者更生義故。

癸五、四有情眾⁴ 子一、總標

復次，彼有情眾略有四種。

子二、徵起

何等為四？

子三、列釋⁴ 丑一、一向住可愛果

一者、一向安住可愛業果，即於此果耽著受用。謂生天處專行放逸。

丑二、一向因轉

二者、一向因轉。謂希求彼所有沙門、若婆羅門。

丑三、樂般涅槃

三者、樂般涅槃諸有情眾。

丑四、諸雜種類

四者、諸雜種類。謂住於此、或住於果耽著受用；或樂攝受當來愛果；或時時修涅槃資糧，離諸放逸。

子四、料簡

於前三種有情眾中，隨其所應，當知世間彼集、滅邊，及薩迦耶彼集、滅邊。

於前三種有情眾中等者：初有情眾，一向安住可愛業果；次有情眾，一向因轉；此是世間彼集、滅邊。後有情眾，樂般涅槃，是薩迦耶彼集、滅邊。如是隨其所應當知。

於後第四有情眾中，當知薩迦耶彼集、彼滅趣道差別。

於後第四有情眾中等者：若住於此、或住於果耽著受用，或樂攝受當來愛果，是薩迦耶彼集趣道；若時時修涅槃資糧，離諸放逸，是薩迦耶彼滅趣道。如是差別應知。

復次，依二種道，當知施設四種行相。

子二、釋² 丑一、依二種道

云何依二種道？謂依見道及依修道。

丑二、施設四種行相⁴ 寅一、徵

云何施設四種行相？

寅二、列

一、應遍知行相，二、應永斷行相，三、應作證行相，四、應修習行相。

寅三、配

如是四種，三依見道，一依修道。

寅四、釋² 卯一、依見道

入見道時諦現觀俱，能遍知苦，斷一分集，證一分滅。

卯二、依修道

於彼一分能斷證者，於修道中，為求無餘斷及證故，如所得道應勤修習。因

修如是諸思擇道及修道故，永斷餘集，證得餘滅。

癸七、究竟五⁴ 子一、標

復次，證得如是極究竟者，由五種相，應知究竟。

子二、徵

何等為五？

子三、列

謂已證得苦及苦因無餘盡故；堪作他義，一切自義皆圓滿故；證得畢竟斷及智故；能入究竟涅槃城故；既得入已，於其聖位能安住故。

子四、釋⁵ 丑一、第一相

於第一相，有割愛等四種差別，如前應知。

有割愛等四種差別等者：前說：有學有二清淨說句。謂於後有一切行中，由不現行道理，名已割貪愛及轉三結。無學有二清淨說句。謂止慢現觀故，及一切苦本貪愛隨眠永拔除故，名已作苦邊。（陵本八十五卷二十

頁⁶⁴⁸⁰）如是四種差別應知。

丑二、第二相

於第二相，有阿羅漢盡諸漏等所有差別，如前應知。

於第二相至如前應知者：謂阿羅漢，諸漏已盡，所作已辦，無復所作，證得自義，盡諸有結。已正奉行如來聖教，心善解脫。已具成就十無學法。

如是等類所有差別，如前聲聞地說應知。（陵本三十四卷二十四頁²⁸⁰⁸）

丑三、第三相³ 寅一、畢竟究竟

於第三相，有畢竟究竟，一切行事皆悉斷故。

一切行事皆悉斷故者：謂於當來後有眾苦，已得寂靜，不復現前故。

寅二、畢竟無垢

有畢竟無垢，一切煩惱畢竟斷故。

寅三、畢竟梵行以為後邊

有畢竟梵行以為後邊，謂已獲得彼對治故。

丑四、第四相² 寅一、舉喻³ 卯一、標

於第四相，譬如世間具五種相，名入宮城；隨闕一種，不名為入。如是要具與彼相似五種相故，當知名入涅槃宮城。

卯二、徵

何等名具世間五相？

卯三、列

一者、闢宮城門；二者、超踰隍塹而不墮落；三者、深起果決而越度之；深起果決而越度之者：謂於宮闕深心愛樂，策勤精進，越度隍塹故。

四者、越隍塹已，逼臨宮闕；五者、非自非餘之所希望，勝幢既仆，徐入中宮。

寅二、合法³ 卯一、標

如是入宮無諸罣礙。

非自非餘之所希望等者：謂若自勝於他，心生高舉，是名勝幢。當於爾

時，不名究竟。既勝他已，不計自他，無增上慢，名仆勝幢。齊爾所時，乃名究竟。

入涅槃宮亦復如是。

卯二、配⁵ 辰一、如彼闢門

先斷能順五下分結，如彼闢門。

辰二、如超隍塹

次於涅槃起深坑想，無明怖畏斷無餘故，如超隍塹而不墮落。

辰三、如彼越度

能到薩迦耶彼岸故，能持最後身故，如彼果決而越度之。

辰四、如逼宮闕

將入無餘依涅槃界，如逼宮闕。

辰五、如仆勝幢徐入中宮

已斷有愛，於諸境界無復愛生，遍於一切憍慢不起，而入涅槃，如非自他之

所希望，勝幢既仆，徐入中宮。

卯三、結

如前所說五種因緣，入涅槃宮，當知亦爾。

丑五、第五相² 寅一、標列

又既入已，由二種相安住聖住。一、由行故；二、由住故。

寅二、隨釋² 卯一、由行故² 辰一、標列

行由三相，應正了知。一、不共故；二、無染故；三、正依止所依止故。

辰二、隨釋³ 巳一、不共

永斷順五下分結故，於諸欲中畢竟離欲，即於是處而遊行故，說名不共。

巳二、無染

於六恆住常攝受故，名為無染。

巳三、正依止所依

於一分法思擇遠離，謂惡象馬等；

謂惡象馬等者：聲聞地說：不與暴亂惡象俱行，不與暴亂眾車、惡馬、惡牛、惡狗而共同行，乃至廣說。（陵本二十四卷十五頁²⁰⁵¹）此應準知。

於一分法思擇習近，謂衣服、飲食等；是名為正依止所依。

謂衣服飲食等者：此中等言，等取臥具、病緣醫藥供身什物，是謂四依。由依此故，於善說法毗奈耶中出家受具，成苾芻分。如菩薩地說應知。

（陵本四十二卷九頁³⁴⁴⁰）

卯二、由住故³ 辰一、標列

如是於行善清淨已，復由五相應了知住。謂若由此而住，若此為依，若由此離繫，若此為依，若由此相應。

辰二、隨釋⁵ 巳一、由此而住

當知此中，由不動心解脫而住。

巳二、若此為依

於一分法思擇除遣，謂遊行散亂劬勞因緣，身心疲怠；於一分法思擇忍受，

謂寒熱等；是名為依。

已三、由此離繫³ 午一、標

由於三種雜染離繫，謂見雜染及愛雜染、尋思雜染。

午二、釋

由見雜染得離繫故，於後有中心無動搖；由愛雜染得離繫故，於諸境界不被漂淪；尋思雜染得離繫故，尋思唯善，無有不善。

午三、結

如是名為由此離繫。

已四、由此為依

此依四種靜慮無動三摩地，安住第一現法樂住，是名為依。

已五、由此相應² 午一、標二解脫

由與無學心善解脫、慧善解脫而共相應。

午二、別廣離愛

又離愛者，於第二身不復生故，於涅槃舍無退轉故，剋證無上圓滿德故。

辰三、總結

由此五相，應知圓滿住第一住。

辛七、二品攝² 壬一、頌標列

復次，溫柁南曰：

二品總略三有異 勝解斷流轉有性

不善清淨善清淨 善說惡說師等別

壬二、長行釋⁸ 癸一、二品總略² 子一、總攝一切² 丑一、標列

略由三處，總攝一切黑品、白品。一、由所遍知法故；二、由遍知故；三、由成遍知故。

丑二、隨釋³ 寅一、所遍知法

所遍知法者，謂苦諦、集諦，當知總攝一切黑品。

寅二、遍知

遍知者，謂滅諦，當知此攝白品一分。

當知此攝白品一分者：謂餘道諦亦白品攝，故言一分。當知此中，滅諦名遍知者，謂是遍知果故。

寅三、成遍知

成遍知者，謂補特伽羅及道諦。補特伽羅雖是假有，當知亦是白品所攝，此即如來。

子二、別廣滅諦² 丑一、標不可記² 寅一、依理

諸聖弟子，於世俗諦及勝義諦皆悉善巧，依二道理如實隨觀，俱不可記。

寅二、舉事

謂如來滅後若有、若無、亦有亦無、非有非無皆不可取，亦不可記。

丑二、徵釋其義² 寅一、徵

所以者何？

寅二、釋² 卯一、依勝義

具依勝義，彼不可得，況其滅後或有、或無。

具依勝義彼不可得者：謂依勝義，如來境界不可思議，名不可得，非如言說可取相故。

卯二、依世俗² 辰一、雙徵

若依世俗，為於諸行假立如來？為於涅槃？

辰二、別詰² 巳一、於諸行

若於諸行，如來滅後無有一行流轉可得，爾時何處假立如來？既無如來，何有無等？

巳二、於涅槃² 午一、詰有非有² 未一、有

若於涅槃，涅槃唯是無行所顯，絕諸戲論，自內所證。絕戲論故，施設為有不應道理。

未二、非有

亦復不應施設非有，勿當損毀施設妙有寂靜涅槃。

午二、顯其實相³ 未一、名甚深

又此涅槃極難知故，最微細故，說名甚深。

未二、名廣大

種種非一諸行煩惱斷所顯故，說名廣大。

未三、名無量

現量、比量及正教量所不量故，說名無量。

癸二、三有異³ 子一、內外荷擔重苦差別³ 丑一、標列

復次，由三因緣，內荷擔苦與外荷擔苦有其差別。一、所荷擔，二、能荷擔，三、荷擔時。

丑二、別辨³ 寅一、所荷擔

謂外荷擔，色一分攝，或稗、或薪、或餘種類，是所荷擔。愚夫乃以一切諸行為所荷擔。

寅二、能荷擔

又外荷擔，屬在身肩是能荷擔。愚夫乃以一切愛蘊為能荷擔。

一切愛蘊者：謂五有取蘊應知。由愛最勝，故名愛蘊。

寅三、荷擔時² 卯一、標辨二種

又外荷擔，唯以現肩荷擔所擔。愚夫乃以一切愛蘊荷擔所擔。

卯二、隨廣內擔

欲捨所擔，要并除蘊，無別方便而能棄捨。乃至未能捨所擔來，恆常荷擔大重擔故，執持尪劣、微弱、細軟、不靜肩故，長時無間荷所擔故。

丑三、總結

內有三德，領受如是荷擔眾苦，外則不然。

內有三德者：前說愚夫內所荷擔，與能荷擔，及荷擔時諸差別相，名有三德。外無如是勝功能故。

是名二種荷擔差別。

子二、內外縛別² 丑一、總標

復次，由五種相，愚夫內縛與彼外縛而有差別。

丑二、別辨⁵ 寅一、約色一分及諸行辨

謂彼外縛，為色一分之所繫縛，或木、或鐵、或索所繫。愚夫乃為諸行所縛。

寅二、約他縛自縛辨

又彼外縛，他縛所縛。愚夫乃為自縛所縛。

寅三、約易知難知辨

又彼外縛，易可了知縛、縛因緣、脫、脫方便。愚夫內縛，一切難知。

寅四、約死後即無及不捨辨

又彼外縛，死後即無。愚夫內縛，死後諸行隨逐往來，循環不捨。

寅五、約能解脫未能解脫辨² 卯一、標辨二種

又彼外縛，所有出家能捨諸欲便得解脫，一切怨讎不能拘礙。愚夫內縛，雖得離欲乃至有頂，尚未能脫，況唯出家。

卯二、別廣內縛³ 辰一、離欲未離欲別

當知此中，在離欲位，魔羅於彼不得自在；未離欲位，便得自在。

辰二、出家在家別

其出家位未脫魔手，若在家位隨欲所作。

辰三、未離欲及生有頂別

未離欲位，魔縛所縛；由世間道雖生有頂，未脫魔羅。

子三、如來聲聞同分異分² 丑一、總標

復次，略由四相，當知如來與慧解脫阿羅漢等，同分、異分。

與慧解脫阿羅漢等者：此中等言，等取心解脫、俱解脫阿羅漢應知。

丑二、別辨² 寅一、同分

由一種相，說名同分。謂解脫等故。

寅二、異分² 卯一、標列

由三種相，說名異分。謂現等覺故，能說法故，行正行故。

卯二、隨釋³ 辰一、由現等覺² 巳一、了達四相

此中如來，無師自然修三十七菩提分法，現等正覺；等正覺已，遍依勝義，若於現法有能、無能、若現見法、不現見法，於一切種皆悉了達，是名自然等覺菩提。

遍依勝義等者：謂於補特伽羅，若已成熟，即於現法得般涅槃，是名有能；或證現觀，名現見法。若未成熟，即於現法不般涅槃，是名無能；或不證現觀，名不現見法。於此一切皆悉了達，當知此由等覺為依，故能如是遍行一切，是名遍依勝義。

已二、不共聲聞² 午一、明解脫

如是了達勝義法已，於其二障善得解脫，謂并習氣諸煩惱障及所知障。與諸天眾及餘世間為解脫師，獨一無二。

午二、結不共

當知了達如是四相，是名自然等覺菩提。由此不與諸聲聞共。

當知了達如是四相者：此中四相，謂即前說有能、無能、若現見法、不現

見法應知。

辰二、由能說法⁴ 巳一、標

又依他義作所作等，能說正法。由五種相，當知不共。

又依他義作所作等者：作所應作，名作所作。等言，等取不應作、非所作應知。

巳二、徵

何等為五？

巳三、列

一者、如來如實了知一切種道為道，一切種非道為非道。二者、知己，如實宣說是道非道，為令趣道，不趣非道。三者、若有如所說道樂欲勤行，為令彼行攝受方便如理所引作意正道，以教授門而為宣說。四者、彼如聖教行時，若有障礙止觀過失，皆令除遣。五者、若有隨順彼法，皆令攝受。

巳四、結

是名能說不同分法。

辰三、由行正行³ 巳一、約有依無依辨

此中正行不同分者，謂彼聲聞先依如來，後行正行。夫如來者，無少所依。

巳二、約自他種姓辨

又彼成就聲聞種姓，行於正行。而佛如來成自種姓。

巳三、約成熟二行辨² 午一、標簡

又彼聲聞或已成熟、或當成熟。非最後有菩薩身中二行可得。

非最後有菩薩身中二行可得者：前說聲聞或已成熟、或當成熟，唯約證般涅槃為論，是故說隨道行，及於現法成大師教，是名二行。菩薩不爾，一般涅槃，非有二行可得，故作是說。

午二、別釋² 未一、釋二行

若未熟者，彼隨道行，能熟當來成熟相續；若已熟者，彼於現法成大師教。如此二種，如其聖教，即如是行。

未二、明果利² 申一、標辨

若隨道行，彼於來世當證涅槃；若於現法成大師教，彼依此身便證聖道、道果涅槃。

申二、隨廣

即此聖道及聖道果，無損樂故，名如實法；饒益性故，又說為善。

無損樂故者：無漏界中，一切麤重諸苦永斷，住無損惱勝義樂故，名無損樂。

癸三、勝解² 子一、略標列

復次，於諸行中，略有二種無我勝解。一者、聞思增上勝解，二者、修證增上勝解。

子二、明漸次² 丑一、標

此中間思增上勝解，能與修證增上勝解作生依止。

丑二、釋² 寅一、由聞思

諸善男子淨信出家，雖復在此極善殷到，且於其中不應喜足。

雖復在此極善殷到者：謂於無我無倒、無間、殷重如理思惟，是名極善殷到。義如攝異門分說。（陵本八十三卷十三頁⁶³¹³）

寅二、由修證

要此為依，於諸行中漸次修習無常等想，證得無我增上勝解。為令彼證轉增勝故，勤修觀解。

癸四、斷² 子一、總標

復次，由四種相，應知諸行有二種斷。

子二、別釋² 丑一、四種相

何等為四？一、諸纏斷故；二、隨眠斷故；三、後有諸行因性斷故；四、現在諸行染行斷故。

丑二、二種斷² 寅一、標列

如是四種，當知總說為二種斷，謂煩惱斷及以事斷。

寅二、配屬

前之三相，名煩惱斷；後之一相，說為事斷。

癸五、流轉² 子一、標列三苦

復次，於欲界中，諸行流轉初中後位，當知略有三種密苦。一者、生時為其胎藏所覆障故，有覆障苦；二者、生已處嬰稚位，多疾病苦；三者、衰老諸根成熟，有老死苦。

子二、兼顯苦滅

又彼諸行流轉生起初中後滅，當知即是三種苦滅。

初中後滅者：謂如前說，於欲界中初中後位，諸行流轉諸苦滅故。

癸六、有性² 子一、總標

復次，有三有性，為斷彼故，諸聖弟子當勤修學。

子二、別釋² 丑一、辨有性

一、依過去為因有性。由是因緣，淨信捨家，趣於非家，深見過患，厭棄諸

欲。

依過去為因有性者：謂於過去諸欲顧戀為因，有體性故。

二、依未來所生諸行為因有性。

依未來所生諸行為因有性者：謂於未來諸行欣樂為因，有體性故。

三、依現在未斷意樂雜染有性。

依現在未斷意樂雜染有性者：謂於現在雜染，未為修涅槃道之所對治，有體性故。

丑二、辨斷相

為斷如是三種有性，故有三斷。謂無顧戀故，不欣樂故，斷、離欲、滅界集成故。

癸七、不善清淨等⁴ 子一、標

復次，於諸行中，略有二種離增上慢觀無我見。

子二、徵

何等為二？

子三、列

一、不善清淨，二、善清淨。

子四、釋²

丑一、不善清淨²

寅一、徵

云何名為不善清淨？

寅二、釋³

卯一、明觀相³

辰一、空

謂如有一，遠離而住，依觀諸行無常性忍，由世間智，於無我性發生勝解。

辰二、無相

因此勝解，於眼所識色乃至意所識法等隨觀察，我、我所相不現行故，說名為斷。

由世間智者：此世間智，謂順決擇分攝下中上忍應知。

辰三、無所有³

巳一、標能制伏

又能制伏四外繫所攝貪瞋癡三種所有。

巳二、列三所有

謂貪欲身繫攝貪所有，瞋恚身繫攝瞋所有，餘二身繫攝癡所有。

巳三、釋所有義

當知此中，極鄙穢義是所有義。

卯二、出智體

離增上慢無我智者，如理作意共相應故，定地攝故。

卯三、廣因緣² 辰一、總標

當知此智，由二因緣不善清淨。

辰二、別釋² 巳一、第一因緣² 午一、舉於空觀

一者、即於此時，謂於趣入順決擇分善根位時，有麤我慢隨入微細現行作意間無間轉，由是因緣，作如是念：我今於空能修能證，空是我有。由是空故，計我為勝。

午二、例無相等

如空，無相及無所有，當知亦爾。

如空無相及無所有等者：此中無相，謂無我、我所相。無所有者，謂無貪瞋癡三種所有。如前已說應知。

已二、第二因緣² 午一、標體性

二者、能令彼法現行因緣，謂於諸欲、或薩迦耶有染愛識。

午二、明過患

由於如是有染愛識不遍了知增上力故，便為諸欲、薩迦耶愛之所漂溺。由此意樂，於彼涅槃不能趣入，其心退還，如前已說。

由此意樂等者：謂於長夜，其心愛樂世間色聲香味觸等，為諸色聲香味觸等滋長積集。由是因緣，雖於涅槃深心願樂，而復於彼不能趣入、不能證淨、不能安住、不能勝解，其心退轉。於寂靜界未能深心生希仰故，有疑慮故，其心數數厭離、驚怖。如前聲聞地說應知。（陵本三十四卷十八

頁
2785
）

丑二、善清淨³ 寅一、總標

又由八相，能遍了知；遍了知故，除諸過患。當知是名極善清淨離增上慢無我真智。

寅二、別釋³ 卯一、八能遍知⁸ 辰一、無常

又於此中已滅壞故，滅壞法故，說名無常。

辰二、有為

諸業、煩惱所集成故，說名有為。

辰三、思所造

由昔願力所集成故，名思所造。

辰四、緣生

從自種子、現在外緣所集成故，說名緣生。

辰五、盡法

於未來世衰老法故，說名盡法。

辰六、歿法

死歿法故，說名歿法。

辰七、破壞法

未老死來，為疾病等種種災橫所逼惱故，名破壞法。

辰八、離欲法及滅法

由依現量能離欲故，能斷滅故，名於現法得離欲法及以滅法。

卯二、配釋觀相

當知此中，除離欲法及以滅法，由所餘相，略觀三世所有過患；由所除相，觀彼出離。若由如是過患、出離遍知彼識，名善遍知。

卯三、法無我性² 辰一、名諸法印

一切法中無有我性，名諸法印。

辰二、名聖法印

即此法印隨論道理法王所造，於諸聖身不為惱害，隨喜能得一切聖財，由此

自然吉安超度生死廣大險難長道，是故亦名眾聖法印。

寅三、結簡

當知此中，由前名通達智，由後名善清淨見。

由前名通達智等者：眾聖位中，有學名前，無學名後，如其次第，名通達智、善清淨見。

癸八、善說惡說師等別²

子一、內外師弟高下差別²

丑一、標列

復次，應知由五種相，於內外法師及弟子高下差別。一、由住故；二、由御眾故；三、由論決擇故；四、由建立開顯道故；五、由行故。

丑二、隨釋⁵

寅一、由住故

謂諸外道師及弟子，恆常住於憒鬧之住；內法師、弟子，時時住於極寂靜住。是名第一高下差別。

寅二、由御眾故²

卯一、外道師

又外道師，由自有量出家弟子諸外道僧，說名有僧；由自有量在家弟子諸外

道眾，說名有眾。希彼一切共許為師，故名眾師。愚類眾生咸謂有德，是故說名共推善色。

是故說名共推善色者：謂彼如是色類補特伽羅，愚類眾生咸共推許名為善故。

卯二、內法師

當知如來，與彼相違。雖為一切天及世間無上大師，於彼同尊，而無所冀。

寅三、由論決擇故² 卯一、外道

又外道師與自弟子，共興議論決擇之時，凡有所說展轉意解，各各差別，不相扶順，轉增愚昧，非淨其智。

卯二、內法

當知內法，與彼相違。

寅四、由建立開顯道故² 卯一、外道師² 辰一、總顯所依

又外道師為諸弟子，依止無因、不平等因，施設、建立、開顯其道。聽聞如

是不正法故，為大羅剎嬈亂其心；又由不正尋思相應非理作意，其心散動。

辰二、別釋其相⁵ 巳一、名雜染

以於他所懷勝負心，咎責於他。若他反詰，便興卒暴。不審思擇，輕出言詞。自為無因、不平等因所覆藏故，名為雜染。

巳二、名愚昧

由此愚夫於染因緣，若自、若他不如實知，故名愚昧。

巳三、名不明了

離清淨故，名不明了。

巳四、名不善

於清淨因不善巧故，說名不善。

巳五、名不知量等

又乃至於應所說語、如所說語、是處說語，如是一切不如實知，是故說彼為不知量、為不知田。

卯二、內法師

當知內法，與彼相違。

寅五、由行故² 卯一、辨² 辰一、外道² 巳一、舉說因

又諸外道師及弟子，雖無異說，所說無減無顛倒故；雖不流漫，所說無增無加益故；雖等所說，義相似故；雖是法說，文平等故；雖復記別法及隨法，然於同法樂為朋黨。

巳二、顯無義

當知彼於法隨法行自義證得，不放逸者尚不能得，況縱逸者。彼由如是不得自義，便為他論制伏輕毀，并彼所受諸惡邪法。

并彼所受諸惡邪法者：謂彼所受諸惡邪法，亦為他論制伏輕毀故。

辰二、內法

當知內法，與彼相違。

卯二、結

是名五種高下差別。

子二、說苦樂等善惡差別² 丑一、遮非

復次，由四種相，當知諸行非定苦染。又由四相，非定樂淨。

丑二、顯正² 寅一、標列三事

如是四相，總依三事。何等為三？一、依生處故；二、依受故；三、依世故。

寅二、辨釋四相³ 卯一、依生處辨² 辰一、樂等

此中樂者，謂在第三靜慮。樂所隨者，謂在人中容有二種。

謂在人中容有二種者：於人趣中，多分引苦，少分引樂，名樂所隨。

喜樂遍者，謂在初二靜慮。未永離樂者，謂在第四靜慮已上。

未永離樂等者：謂在第四靜慮已上，現雖無樂，然有隨眠，猶為當樂所隨故。

辰二、苦等

此中苦者，謂在餓鬼及以傍生。苦所隨者，謂在人中。憂苦遍者，謂在那落

迦。未永離苦者，謂在上天眾中，當苦所隨故。

卯二、依受辨² 辰一、舉樂等

又言樂者，謂不苦不樂受現在前位。樂所隨者，謂苦受現在前位。喜樂遍者，謂樂受現在前位。未永離樂者，謂於一切位，樂因所隨故。

辰二、例苦等

若與此相違，當知苦差別。

卯三、依世辨² 辰一、舉樂等

又言樂者，謂順樂行及樂已滅。樂所隨者，謂有樂因，於未來世當生起樂。喜樂遍者，謂於現在隨順樂處。未永離樂者，謂餘二世。

辰二、例苦等

與此相違，苦差別四，如應當知。

瑜伽師地論科句披尋記卷第八十七

瑜伽師地論科句披尋記卷第八十八

彌勒菩薩說

唐三藏沙門玄奘奉詔譯

韓清淨科記

攝事分中契經事行擇攝第一之四

辛八、智事攝² 壬一、頌標列

復次，嗢柁南曰：

二智并其事 樂等行轉變 請無請說經 涅槃有二種

壬二、長行釋⁴ 癸一、二智并事³ 子一、標列二智

智有二種。一者、正智，二者、邪智。

子二、釋其差別² 丑一、依同

此中正智依有事生，邪智亦爾。

丑二、取別² 寅一、釋行相

雖此二智俱依有事，然正智如實取事，邪智、邪分別不如實取事。

寅二、出前行

由有正教、如理作意為前行故，於所知境正智得生；由有邪教、非理作意為前行故，於所知境邪智得生。

子三、廣正智義² 丑一、標相

非正智生壞所知境，但於此境捨於邪執，而起正智。

丑二、喻合

如闇中色，明燈生時不壞此色，但能照了。當知此義亦復如是。

癸二、行轉變² 子一、約諸位辨² 丑一、於樂受等位² 寅一、辨差別

復次，隨順樂受諸行，與無常相共相應故，若至苦位，爾時說名損惱迫迕；若至不苦不樂位，爾時方於行苦名苦迫迕。

寅二、遮無轉

若不至彼位，便應畢竟唯順樂受，勿至餘位。

丑二、於生老等位² 寅一、辨差別

又生老等法所隨諸行，皆悉是苦。彼若至疾病位，說名損惱迫迍；若至生等苦位，名苦迫迍。

寅二、遮無轉

若不至彼位，於諸行中，生等苦因之所隨逐，勿至果位。

子二、約眾緣辨² 丑一、釋道理

又本性諸行眾緣生故，不得自在，亦無宰主。

丑二、遮無轉

若有宰主，彼一切行雖性無常，應隨所樂流轉不絕；或不令生，廣說乃至於死。

癸三、請無請說經² 子一、標列

復次，有二種契經。一、因請而說，二、不因請說。

子二、隨釋² 丑一、因請說

因請說者，謂若有補特伽羅，由此諸行相教而調伏者，因彼請故，為轉如是諸行相教。

為轉如是諸行相教者：謂若法教，諸蘊相應、諸界相應、諸處相應、緣起相應、處非處相應、念住相應，是名諸行相教。義如攝釋分說應知。（陵

本八十一卷四頁⁶¹⁷⁵）

丑二、不因請說

不因請說者，謂若於彼多百眾中，以無量門作美妙說，或為大師近住弟子阿難陀等作如是說，為令正法得久住故。

癸四、二種涅槃² 子一、圓滿涅槃² 丑一、明攝受² 寅一、標列

復次，當知由三分故，攝受圓滿涅槃。一、由隨順教授故；二、由正觀察一切行故；三、由永斷一切煩惱故。

寅二、隨釋³ 卯一、隨順教授² 辰一、標所攝

隨順教授者，謂記說、教誡、神變所攝。

辰二、別釋相² 巳一、記說神變² 午一、記差別

如來隨欲記說彼心，由自定意，以三行相遍照他心，若展轉久遠滅心、若無間滅心、若於現在所緣轉心。從定起已，隨念分別，思惟定內所受他心。如其所受，即如是記：汝有如是心，謂久遠滅者；如是意，謂無間滅者；如是識，謂現在者。

午二、釋說相

此據種類，不據剎那。

此據種類不據剎那者：前說久遠滅心，名之為心。無間滅心，名之為意。現在轉因，名之為識。唯據種類差別為論，不據剎那說此異名。

巳二、教誡神變² 午一、略標列

即以如是記說神變為依止故，於其三處而為教誡。一、於行處現前境界，開許如理作意，遮止不如理作意。二、於住處，遮止不正尋思，開許正尋思。三、於止觀勤修行處，開許令斷未斷諸行，及令煩惱永得離繫，而證涅槃。

午二、明說意

如是宣說，令從三處諸隨煩惱心得清淨。謂從行處、住處、依處。

卯二、觀察一切諸行

又正觀察過去、未來、現在諸行，名正觀察一切諸行。

卯三、永斷一切煩惱²

辰一、出煩惱

又有三漏；三漏為先，而有欲害；欲害為先，而有尋思熱惱；尋思熱惱為先，而有追求憂惱。

又有三漏者：謂欲漏、有漏、無明漏應知。

辰二、明永斷

如是一切皆永斷故，說名永斷一切煩惱。如是安住心善解脫，無相樂住無恐怖時，於現法中，名入圓滿般涅槃數。

丑二、顯所依²

寅一、標列三法

又依三法，依止自義，名住歸依；依止他義，名住洲渚。何者為三？一、依

內如理作意為先法隨法行；二、依佛聽聞所說正法；三、依親近正法內善士，不依親近餘正法外一切外道諸不善士。

寅二、結顯說因

如是三法，當知顯示人中四種多所作法，謂親近善士、聽聞正法、如理作意、法隨法行。

子二、彼分涅槃²

丑一、明能證³

寅一、總標

復由三緣及五種相，當知證得彼分涅槃。

寅二、別辨²

卯一、三緣

何等三緣？一、遍知苦故；二、深見一切隨順苦行諸過患故；三、超過愁等一切苦故。

卯二、五相

云何五相？一、知苦種類相交涉時，發生愁等，是名於彼遍知自性。

知苦種類相交涉時者：謂若生苦，乃至求不得苦，名苦種類應知。

二、知有種子彼法得生，是名於彼遍知因性。三、知自所行所知境界，是名於彼遍知緣性。四、隨觀執著我所及我，皆是能順眾苦諸行，是名於彼遍知行性。五、隨觀三世欲界所繫諸行過患，能斷一切愁等諸苦。

寅三、總結

當知由此三緣五相，獲得如是彼分涅槃。

丑二、釋愁等²

寅一、約行相辨

由可愛事無常轉變，悲傷心感，故名為愁。由彼發言咨嗟歔歔，故名為歎。因此拊膺，故名為苦。內懷冤結，故名為憂。因茲迷亂，故名為惱。

寅二、約分位辨

又以喪失財寶、無病、親戚等事隨一現前，創生憂惱，說名為愁。由依此故，次乃發言哀吟悲冤，舉身煩熱，名歎苦位。過此愁歎身煩熱已，內燒外靜，心猶未平，說名憂位。過初日已，或二三五日夜月，由彼因緣，意尚未寧，說名為惱。

辛九、諍攝² 壬一、頌標列

復次，喴柁南曰：

諍芽見大染 一趣學四怖 善說惡說中 宿住念差別

壬二、長行釋⁷ 癸一、諍² 子一、如來無諍⁶ 丑一、標

由四因緣，如來不與世間迷執共為怨諍，然彼世間起邪分別，謂為怨諍。

丑二、徵

何等為四？

丑三、列

一者、宣說道理義故；二者、宣說真實義故；三者、宣說利益義故；四者、有時隨世轉故。

丑四、釋⁴ 寅一、由道理義² 卯一、辨² 辰一、依四道理

此中如來依四道理，宣說正法。如前所謂觀待道理、作用道理、因成道理、法爾道理。

如前所謂觀待道理等者：如前聲聞地說應知。（陵本二十五卷九頁₂₁₀₅）

由此如來名法語者。

辰二、明無諍事₃ 巳一、標

如來終不故往他所，求興諍事。

巳二、徵

所以者何？

巳三、釋₂ 午一、出無所諍

由諸世間違返他義謂為自義，故興諍論。如來乃以一切他義即為自義，故無所諍。

午二、釋往他所

唯除哀愍令其得義，故往他所為說正法。而諸邪執愚癡世間，顛倒妄謂自義、我義，而有差別，故興我諍。

卯二、結

由此因緣，當知如來名道理語者。

寅二、由真實義² 卯一、標

又復如來名真實語者。

卯二、釋² 辰一、於有說有

謂若世間諸聰敏者共許為有，如來於彼亦說為有。謂一切行皆是無常。

辰二、於無說無

若於世間諸聰敏者共許為無，如來於彼亦說為無。謂一切行皆是常住。

寅三、由利益義² 卯一、標

又復如來名利益語者。

卯二、釋

謂諸世間有盲冥者，自於世法不能了知，如來於彼自現等覺而為開闡。

自於世法不能了知者：所謂雖有生老及死，數數死生，而諸有情於老死等
上昇、出離不如實知。如菩薩地說應知。（陵本四十四卷十八頁³⁵⁹⁹）

寅四、由隨世轉義² 卯一、標

又復如來，或時隨順世間而轉。

卯二、釋² 辰一、於假說名

謂阿死羅摩登祇等，依少事業以自存活；然諸世人，為彼假立大富、大財、大食名想。如彼世人假立名想，如來隨彼亦如是說。

辰二、於實事名

又如一事，於一國土假立名想；於餘國土，即於此事立餘名想。如來隨彼亦如是說。

丑五、簡

若懷怨諍而興怨諍，則不得名道理語者、真實語者、利益語者、隨世轉者。

丑六、結

由具如是四種因緣，是故當知如來無諍。

子二、世尊自說

又佛世尊自然觀察所應作義，雖無請問，而自宣揚現等覺法，能以稱當名句文身，施設、建立諸法差別，廣說如前攝異門分，如是當知，乃至說名平等開示。

廣說如前攝異門分等者：攝異門分說有施設、安立、分別、開示、顯發、教、遍開示諸差別名，如彼一一別釋應知。（陵本八十三卷十二頁⁶³¹¹）

癸二、芽² 子一、出因緣² 丑一、標

復次，一因、二緣，令後有芽當得生長。

丑二、釋² 寅一、因

謂五品行中，煩惱種子所隨逐識，說名為因。

寅二、緣² 卯一、由識住

與因相似四種識住，說名為緣。

卯二、由喜貪

又由喜貪滋潤其識，令於彼彼當受生處結生相續，威薩迦耶，亦名為緣。

子二、辨種類² 丑一、舉不生³ 寅一、因緣皆具

此中有一，由四識住，攝受所依；

由四識住攝受所依者：謂如經說：有四依取，以為所緣，令識安住。由是說言攝受所依。

由喜貪故，於現法中，新新造集及以增長。彼於後時成阿羅漢，令識種子悉皆腐敗，一切有芽永不得生。

寅二、緣闕喜貪

又復有一，具一切縛，勤修正行，欣樂涅槃，遍於一切諸受生處起厭逆想。彼具縛故，種子不壞，識住和合；然於諸有起厭逆想，故無喜貪。彼由如是修正行故，於現法中堪般涅槃，其後有芽亦不得生。

寅三、緣餘上貪

又復有一，住於學地，得不還果，唯有非想非非想處諸行為餘，於有頂定具足安住。

唯有非想非非想處諸行為餘者：謂已離下地乃至無所有處欲，未離非想非非想處欲，名為餘故。

彼識種子猶未一切悉皆滅盡，然於識住能遍了知、能遍通達。彼由忘念增上力故，上地貪愛猶殘少分。是不還者，當來下地一切有芽不復更生。

丑二、例生長

與此相違，當知一切諸後有芽皆得生長。

癸三、見大染²

子一、出二雜染²

丑一、標列

復次，雜染有二。一、見雜染，二、餘煩惱雜染。

丑二、隨釋²

寅一、見雜染

見雜染者，謂於諸行計我、我所邪執而轉薩迦耶見。由此見故，或執諸行為實我，或執諸行為實我所，復有所餘此為根本諸外見趣。

復有所餘等者：外道，薩迦耶見以為根本，有六十二諸惡見趣。如前已廣分別應知。（陵本八十七卷二頁⁶⁵⁵⁸）此望根本薩迦耶見，故名為餘。

寅二、餘煩惱雜染

其餘貪等所有煩惱，當知是名第二雜染。

子二、校量勝劣⁴ 丑一、標

又見雜染得解脫時，亦能於餘畢竟解脫；非餘雜染得解脫時，即能解脫諸見雜染。

丑二、徵

所以者何？

丑三、釋² 寅一、由有退還² 卯一、無餘雜染

由生此者，依世間道，乃至能離無所有處所有貪欲，於諸下地其餘煩惱心得解脫，而未能脫薩迦耶見。

由生此者者：謂生此世間補特伽羅應知。

卯二、有見雜染

由此見故，於下上地所有諸行和雜自體不觀差別，總計為我，或計我所。由

此因緣，雖昇有頂，而復退還。

寅二、由無退還

若於如是一切自體遍知為苦，由出世道，先斷一切薩迦耶見，後能永斷所餘煩惱。由此因緣，無復退轉。

丑四、結

是故當知，唯見雜染是大雜染。

癸四、一趣³ 子一、標

復次，應知由三種相，道名一趣。

子二、釋

謂於異生地，以五行相，觀察諸行五處差別。即此觀察，於二時中修治令淨，謂於行向學地及無學地。

子三、廣

云何名為五種行相，觀察諸行？一者、觀察諸行自性；二者、觀察諸行因

緣；三者、觀察雜染因緣；四者、觀察清淨因緣；五者、觀察清淨。

由三種相道名一趣等者：謂於異生地、行向學地及無學地觀察諸行，有未清淨、清淨、善清淨別，名由三相。依世間道及出世道觀察諸行，無二無別，說名一趣。

癸五、學³ 子一、標

復次，應知於異生位，先於五處得善巧已，後於學位，即於如是五種處所，更以五種差別行相審諦觀察，能令獲得速疾通慧。

子二、徵

何等名為五種行相？

子三、列

謂觀察諸行，諸行因緣、雜染因緣、清淨因緣，滅寂靜故；趣向清淨道出離故；諸行種種眾多性故；各自種子所生起故；各待餘緣所生起故。

癸六、四怖²

子一、出怖因緣⁴

丑一、標

復次，應知由四因緣，於二處所發生恐怖，能為障礙。

於二處所發生恐怖者：此二處所，謂滅、道諦。成唯識說：滅道是彼怖畏處故。（成唯識論六卷十四頁）

丑二、徵

何等為四？

丑三、列

一者、若於此位生起，二者、若依此法生起，三者、若彼如是生起，四者、若彼行相生起。

丑四、釋⁴ 寅一、位生起

位生起者，謂於非聖位中生起，於諸聖諦未得善巧。又此非聖，於五處所亦未善巧。

於五處所亦未善巧者：此五處所，謂如前說觀察諸行五處差別應知。

寅二、依生起

依生起者，謂於諸行起邪行相，計我、我所薩迦耶見為依生起。

寅三、如是生起

如是生起者，謂由二種諸行變壞差別生起。一、由異緣所變壞故；二、由自心起邪分別而變壞故。

寅四、行相生起² 卯一、辨依處² 辰一、於諸行

行相生起者，謂於所愛，慮恐未來當變壞故，生恐怖行相；於正變壞，生損惱行相；即於所愛已變壞中，欣彼重生，起顧戀行相。

辰二、於涅槃

又於涅槃，分別自體永變壞故，起怖畏行相。

卯二、結能障

如是行相差別轉時，於愛樂聖教及愛樂涅槃，能為障礙。

子二、廣邪執轉

又由二種門，於所緣境自所行處，我、我所執差別而轉。謂推求故，及領受

故，即見及受。

癸七、宿住念別³ 子一、標

復次，由三種相，善說法者、惡說法者，於等事中宿住隨念，當知染淨有其差別。

子二、徵

何等為三？

子三、釋³ 丑一、第一差別² 寅一、辨² 卯一、惡說法者

謂惡說法者宿住隨念，於彼諸行自相、共相不如實知，便於諸行或全計常、或一分常、或計非常、或計無因。

卯二、善說法者

善說法者宿住隨念，如實知故，無邪分別。

寅二、結

是名第一二念差別。

丑二、第二差別² 寅一、辨² 卯一、舉惡說法

又惡說法者，隨依何定發宿住念，不能如實了知是苦，便生愛味；由愛味故，於過去行深生顧戀，於未來行深生欣樂，於現在行不能修行厭離欲滅。

卯二、例善說法

善說法者，當知一切與彼相違。

寅二、結

是名第二二念差別。

丑三、第三差別² 寅一、辨差別² 卯一、辨² 辰一、惡說法者² 巳一、出四雜染⁴

午一、標

又惡說法者，如是邪行，四種雜染所雜染故，能感後有。

午二、徵

何等名為四種雜染？

午三、列

一、業雜染，二、見、我慢纏雜染，三、愛纏雜染，四、彼隨眠雜染。

午四、釋⁴ 未一、業雜染

若諸新業造作增長，若諸故業數數觸已而不變吐，是名業雜染。

未二、見我慢纏雜染

若於諸行邪分別起薩迦耶見，於他有情，以諸沙門、婆羅門等與己校量，謂自為勝、或等、或劣，是名見我慢纏雜染。

未三、愛纏雜染

於內、於外所起貪欲，於愛行中應知其相，是名愛纏雜染。

未四、彼隨眠雜染

於相續中，見、我慢、愛三品麤重常所隨逐，是名彼隨眠雜染。

於愛行中應知其相者：攝異門分說：藏者，謂於內所攝自體中愛故。護者，謂於他相續中愛故。執者，謂於我所中愛故。（陵本八十四卷十六頁⁶⁴⁰¹）如是行相，是名於內、於外所起貪欲。

巳二、總攝二類² 午一、略標二

如是四種總攝為二，謂業、煩惱。

午二、廣隨一³ 未一、辨體性

煩惱復二，纏及隨眠。

未二、顯增上

於諸行中先起邪執，後生貪著。由此二種增上力故，雖復有餘煩惱雜染，而但取此爾所煩惱。

未三、辨品類² 申一、明所攝² 酉一、無明品

於諸行中，不校量他，自起邪執，說名為見；校量於他，說名我慢。如是邪執是無明品。

酉二、愛品

由此為先，發起貪著，名為愛品。

申二、結流轉

由此二種根本煩惱，於生死中流轉不絕。

辰二、善說法者² 巳一、能斷雜染

若善說法毗奈耶中正修行者，能斷如是四種雜染，於現法中能般涅槃。

巳二、能住涅槃

又由此故，能住究竟圓滿涅槃。若不爾者，尚不能住彼分涅槃，何況究竟。

卯二、結

是名第三二念差別。

寅二、廣染名³ 卯一、標

又於此中，見及我慢說名高視，愛說名煙。

卯二、徵

何以故？

卯三、釋² 辰一、名高視

於諸行中，為見、我慢所覆障者，不如實知其性弊劣諸行體相，於人天身及

彼眾具謂為高勝，是故彼二說名高視。

辰二、名煙

愛猶如煙，令心擾亂，不得安隱，是故名煙。

辛十、無厭攝² 壬一、頌標列

復次，嘔柁南曰：

無厭患無欲 無亂問記相 障希奇無因 毀純染俱後

壬二、長行釋⁸ 癸一、無厭無欲² 子一、出彼二類³ 丑一、標

有二信者，而非稱當信者所作。

丑二、徵

何等為二？

丑三、釋² 寅一、在家

一、在家信者，信有涅槃，及一切行是無常性，然於諸行不觀過患，不厭離住，不知出離而受用之。

寅二、出家

二、捨離家法趣於非家有淨信者，彼於涅槃不能安住猛利樂欲，不用此欲為所依止，常勤修習所有善法，於現法中不般涅槃。

子二、例此相違

與此相違，應知稱當信者所作。

癸二、無亂問記² 子一、總標二種

復次，於內法中，略有二種具聰明者。

略有二種具聰明者：謂於諸行生滅，及於修習梵行，能正記別，不增不減，是名二種具聰明者。如下釋義，易可了知。

若有淨信、或諸外道來請問時，能無亂記。

子二、別釋其相² 丑一、於有淨信來請問時³ 寅一、標安立相

謂依中道，於諸行中問生滅時，不增有情，不減實事，唯於諸行安立生滅，不亂而記。

寅二、釋離二邊² 卯一、出邊執

若立有情有生有滅，是名一邊，謂增益邊。若立生滅都無所有，是第二邊，謂損減邊。

卯二、明遠離

唯於諸行安立生滅，是名中道，遠離二邊。

寅三、結善記別

是故若能如是記別，為善記別，如來所讚。

丑二、於諸外道來請問時³ 寅一、標記別相

或復有言：何因緣故，乃於沙門喬答摩所修習梵行？若得此問，應如前說，遠離增益、損減二邊，依中道記，名不亂記。

寅二、釋離二邊² 卯一、出邊執

若謂有情修習染淨，是名一邊，謂增益邊。若謂一切都無修習，是第二邊，謂損減邊。

卯二、明遠離

若為諸行厭離欲滅而修習者，是名中道，遠離二邊。

寅三、結名善記

是故此記名不亂記，名為善記，當知此記諸佛所讚。

癸三、相² 子一、總標二法

復次，法有二種。一者、有為，二者、無為。

子二、別釋其相² 丑一、舉有為² 寅一、明施設

此中有為，是無常性，三有為相施設可得。一、生，二、滅，三、住異性。

寅二、辨安立² 卯一、標列

如是三相，依二種行流轉安立。一、依生身展轉流轉，二、依剎那展轉流轉。

卯二、隨釋² 辰一、依初流轉

依初流轉者，謂於彼彼有情眾同分中，初生名生，終沒名滅，於二中間嬰孩等位立住異性，乃至壽住說名為住，諸位後後轉變差別名住異性。

辰二、依後流轉² 巳一、出三相

依後流轉者，謂彼諸行，剎那剎那新新而生說名為生，生剎那後不住名滅，唯生剎那住故名住。

巳二、釋異性² 午一、顯差別² 未一、標列

異性有二。一、異性異性，二、轉變異性。

未二、隨釋² 申一、異性異性

異性異性者，謂諸行相似相續而轉。

申二、轉變異性

轉變異性者，謂不相似相續而轉。

午二、結施設

非此異性離住相外別體可得，是故二種總攝為一，施設一相。

丑二、例無為

與此相違，應知常住無為三相。

癸四、障² 子一、有障² 丑一、標

復次，應知修集涅槃資糧，略有三障。

丑二、列

一者、依廣事業財寶具足，多行放逸；二者、無善知識方便曉喻；三者、未聞正法、未得正法，忽遇死緣，非時夭沒。

子二、無障² 丑一、例前相違

與此相違，當知無障亦有三種。

丑二、廣其差別³ 寅一、無死緣障² 卯一、標列二相

又諸聖者將欲終時，略有二種聖者之相。謂臨終時，諸根澄淨，蒙佛所記。

諸根澄淨者：此中諸根，謂五善根，信為最初，慧為其後。得四證淨，能正攝受澄淨性故，是名澄淨。

卯二、釋蒙佛記

由三種相，佛為過世一切聖者記別聖性。

由三種相等者：顯揚論說：又三種果由三因故，如來記別。一、證淨記別；謂預流果，由得見道，四證淨故。二、喜處記別；謂一來果，將得根本定，已受少喜故。三、隨念記別；謂不還果，已得根本定，現見諸天眾，與梵眾等共興言論，隨念所求自乘功德未圓滿故。（顯揚論二十卷二頁）此應準釋。

種性滿故，但記物類。

種性滿故但記物類者：謂阿羅漢修果滿故，名種性滿。住有餘依涅槃界中，有能發趣阿耨多羅三藐三菩提者，要增壽行，方能成辦。世尊多分依此，密意說言：物類善男子，若有善修四神足已，能住一劫，或餘一劫。餘如有餘依及無餘依地決擇中說應知。（陵本八十卷二十三頁⁶¹⁵⁴）

寅二、無方便障

我已了知法及隨法者，法謂正見前行聖道；言隨法者，謂依彼法聽聞他音、如理作意。

寅三、無依處障

又我未曾惱亂正法所依處者，謂為此義如來告命，及為此義有所宣說，乃至為令諸漏永盡。彼由此故，已得盡漏。

癸五、希奇² 子一、總標

復次，諸佛如來略有二種甚希奇法，謂未信者令信，已信者令增長，速於聖教令得悟入。

子二、別釋² 丑一、辨二種² 寅一、未信令信

謂大師相，或法教相，或已證得第一得相，普於十方美妙聲稱、廣大讚頌無不遍滿。

寅二、信令增長² 卯一、標說差別

又能除遣說無因論及惡因論，攝受一切說正因論。

卯二、釋其所以² 辰一、明彼失

所以者何？說無因論及惡因論，尚非欲往人天善趣及樂解脫諸聰慧者勝解依

處，況是其餘當所趣入。

辰二、翻相違

說正因論，當知其相與彼相違。

丑二、釋法句³ 寅一、大師相

大師相者，謂薄伽梵，是真如來應正等覺，乃至世尊。廣釋如前攝異門分。

廣釋如前攝異門分者：攝異門分廣釋如來諸差別名應知。（陵本八十三卷

十八頁⁶³³³）

寅二、法教相

法教相者，謂說正法初中後善，乃至廣說。當知亦如攝異門分。

當知亦如攝異門分者：攝異門分廣釋善說差別應知。（陵本八十三卷十二

頁⁶³¹²）

寅三、證得第一得相² 卯一、標指

證得第一得相者，謂於一切此世、他世自然通達，現等正覺，乃至廣說。

卯二、釋名⁵ 辰一、此世他世² 巳一、第一義

此中欲界說名此世，色無色界名為他世。

巳二、第二義

現在、過去二世別故，當知是名第二差別。

辰二、自然

不由師故，說名自然。

辰三、作證

六種通慧現所得故，名為作證。

六種通慧等者：菩薩地說：諸佛六種神通威力。一者、神境智作證通，二者、隨念宿住智作證通，三者、天耳智作證通，四者、見死生智作證通，五者、知心差別智作證通，六者、漏盡智作證通。（陵本三十七卷一頁³⁰¹⁹）如彼別釋應知。

辰四、圓滿

於諸有情最第一故，說名圓滿。

辰五、開示

此第一性自然知故，顯示他故，說名開示。

癸六、無因² 子一、出彼執² 丑一、總標

復次，由二種相，無因論者，於諸行中執無因轉。

丑二、別辨² 寅一、由不證得諸行生滅

謂於諸行生起因緣、滅盡因緣不了知故。由此生故，彼諸行生；由此滅故，彼諸行滅；於此二事不能證得。

寅二、由不證得諸行性相

又不證得諸行性相，起如是見，立如是論：有者定有，無者定無；無不可生，有不可滅。

子二、顯彼失² 丑一、出違現量

即此論者，於三位中現可證得諸行生滅，一切世間共所了達麤淺現量，毀謗

違逆。

於三位中者：謂受生位、生已位及受俱位，是名三位。如下釋義，易可了知。

丑二、釋其所以³ 寅一、於受生位

何以故？現見彼彼若刹帝利、或婆羅門、吠舍等家，所有男女和合因緣，或過八月、或九月已，便生男女。

寅二、於生已位

如是生已，或有一類，當於爾時壽盡中天；復有一類，乃至住壽存活支持。

寅三、於受俱位

或苦、或樂、或非苦樂受位差別心諸心法，皆是新新，而非古古。

癸七、毀² 子一、標列二種

復次，略有二種自讚毀他。謂唯語言及說法正行。

說法正行者：十法行中，開演法行，是名說法正行。為悲愍他，令獲義利

故。

子二、別釋其相² 丑一、由唯語言

若唯語言，而自稱讚毀訾他者，彼但由於非善士法纏擾其心，是名自毀，非勝賢善。

丑二、由說正法² 寅一、標

若由說法行正行者，雖無讚毀，而是真實自讚毀他。

寅二、廣² 卯一、標能壞滅

又諸如來宣說正法，速能壞滅二種無智。

卯二、釋二無智² 辰一、約加行辨

謂聞不正法，生勝解等長時積習堅固無智，及非久習近生無智。

辰二、約俱生辨

復由俱生不能了知往善趣道，亦不了知能往現法涅槃道故。

癸八、純染俱² 子一、總標蘊義

復次，當知十一種相總攝諸行，立為行聚。應知聚義是其蘊義。

十一種相總攝諸行者：謂若過去、若未來、若現在、若內、若外、若麤、若細、若劣、若妙、若遠、若近，此十一義總攝諸行。如前五識身相應地意地決擇中，已廣分別應知。（陵本五十六卷四頁⁴⁴⁹²）

子二、釋蘊差別³ 丑一、純雜染

又由一向雜染因緣增上力故，建立取蘊。當知取蘊唯是有漏。

丑二、通染淨

又由雜染清淨因緣二增上力，建立總蘊。當知此蘊通漏無漏。

丑三、能起惑

又由三相，於諸行中煩惱生起。謂所依故、所緣故、助伴故。

辛十一、少欲住攝² 壬一、頌標列

復次，唵陀南曰：

少欲自性等記三 似正法疑癡處所

不記變壞大師記 三見滿外愚相等

壬二、長行釋¹⁰

癸一、少欲² 子一、出由三相

由三種相，如來心入少欲住中。一、由爾時化事究竟，為欲安住現法樂住；二、由弟子於正行門深可厭薄；三、為化導常樂營為、多事多業所化有情。子二、指說因緣

又如前說如來入於寂靜天住一切因緣，當知此中亦復如是。

又如前說如來入於寂靜天住等者：前說：由八因緣，如來入於寂靜天住。如彼別釋應知。（陵本八十六卷二十一頁⁶⁵⁴⁴）

癸二、自性等⁴ 子一、三所化性

復次，諸所化者，略有三種所調伏性。一、愚癡放逸性，二、極下劣心性，三、能修正行性。

子二、四敬依處

復次，由四種相，於四處所生恭敬住，速證無上。一、於所應得生猛利樂欲

故；二、於得方便法隨法行生猛利愛樂故；三、於大師所生猛利愛敬故；四、於所說法生猛利淨信故。

子三、三種無上³ 丑一、標列

復次，有三種無上。謂妙智無上、正行無上、解脫無上。

丑二、隨釋³ 寅一、妙智無上

妙智無上者，謂盡智、無生智、無學正見智。

寅二、正行無上

正行無上者，謂樂速通行。

寅三、解脫無上

解脫無上者，謂不動心解脫。當知此中，總說智斷現法樂住。

丑三、料簡² 寅一、簡有學三種

有學妙智、正行、解脫，不名無上，猶有上故。

寅二、釋樂速通行

當知一切阿羅漢行，皆得名為樂速通行，一切麤重永滅故，一切所作已辦故。

子四、二時遍知及證漏盡² 丑一、由四相² 寅一、標

復次，依菩提分擇諸行故，於二時中，由四種相，如實遍知薩迦耶見；即於二時，無間證得諸漏永盡。

寅二、釋² 卯一、二時

云何二時？一、在異生地，二、在見地。

卯二、四相³ 辰一、徵

云何由四種相？

辰二、列

一、由自性故；二、由處所故；三、由等起故；四、由果故。

辰三、釋⁴ 巳一、自性故

自性故者，謂諸行自性薩迦耶見，及五種行，彼計為我、或為我所。

及五種行者：色等五蘊名五種行應知。

已二、處所故

處所故者，謂所緣境。

已三、等起故³ 午一、出體性

等起故者，謂見取所攝，無明觸生受為緣愛。

午二、廣緣起

此復有五緣起次第。謂界種種性為緣，生觸種種性；觸種種性為緣，生受種種性；受種種性為緣，生愛種種性；愛種種性為緣，生取種種性。

午三、顯無常

夫緣生者，體必無常。

已四、由果故³ 午一、標列

由果故者，謂於三時，薩迦耶見能為障礙。一、依無我諦察法忍時，二、現觀時，三、得阿羅漢時。

午二、隨釋³ 未一、依無我諦察法忍時² 申一、有惑有疑

此中一時，由彼隨眠薩迦耶見增上力故，有惑有疑。由多修習諦察法忍為因緣故，雖於疑惑少能除遣，然於修習諦現觀時，由意樂故，恐於涅槃我當無有。

申二、起邪分別

由此隨眠薩迦耶見增上力故，於諸行中起邪分別，謂我當斷、當壞、當無，便於涅槃發生斷見及無有見。由此因緣，於般涅槃其心退還，不樂趣入。

未二、現觀時

彼於異時，雖從此過淨修其心，又於聖諦已得現觀，然謂我能證諦現觀。彼於此慢，由隨眠故，仍未能離。

未三、得阿羅漢時

又時時間由忘念故，觀我起慢，因此慢纏差別而轉，謂我為勝、或等、或劣。

午三、料簡

前兩位中，由隨眠力能作障礙；於第三位，由習氣力能作障礙。

丑二、由三緣² 寅一、略標列

又由三緣，諸行生長。一、由宿世業、煩惱力，二、由願力，三、由現在眾因緣力。

寅二、顯知斷

於異生地能遍知故，於見地中，無間能得見道所斷諸漏永盡；於見地中能遍知故，次斷餘結，得阿羅漢，無間證得諸漏永盡。

癸三、記三³ 子一、記諸行² 丑一、如理記⁴ 寅一、標

復次，由五種相，於諸行中如理問記。

寅二、徵

何等為五？

寅三、列

一、自性故；二、流轉、還滅根本故；三、還滅故；四、流轉故；五、流轉、還滅方便故。

寅四、釋⁵ 卯一、自性故

自性故者，當知色等五種自性。

卯二、流轉還滅根本故² 辰一、出體性

流轉、還滅根本故者，謂欲。

辰二、別釋相² 巳一、還滅根本

由善法欲，乃至能得諸漏永盡，是故此欲名還滅根本。

巳二、流轉根本

若由是欲，願我當得人中下類，乃至當生梵眾天等眾同分中。由於此心親近、修習、多修習故，得生於彼，是故此欲名流轉根本。

卯三、還滅故³ 辰一、出體性

還滅故者，於諸行中，唯欲貪取得斷滅故。

辰二、遮異說² 巳一、遮即諸行

若即諸行是取性者，應不可滅，以阿羅漢猶有諸行現可得故。

已二、遮異諸行

若異諸行有取性者，應是無為；無為故常，亦不可滅。

辰三、結行攝

是故取性，但是諸行一分所攝。即此一分已得斷滅，畢竟不行，故可還滅。

卯四、流轉故² 辰一、標列

流轉故者，復有三種。一、後有因故；二、品類別故；三、現在因故。

辰二、隨釋³ 巳一、後有因

後有因者，謂如有一願樂當來，造作諸業。彼作是念：願我來世當成此行。由是因緣，能引後有諸行生因，不引現在；彼於現在不能引故，施設諸行唯有二種。

施設諸行唯有二種者：前說：又由三緣，諸行生長。一、由宿世業、煩惱力，二、由願力，三、由現在眾因緣力。今簡現在，故說唯二，謂業及願應知。

已二、品類別

品類別者，謂十一種諸行品類。如前應知。

十一種諸行品類等者：謂過去等十一義，是名諸行品類。如前決擇分中，已廣分別應知。（陵本五十六卷四頁⁴⁴⁹²）

已三、現在因

現在因者，謂所造色因四大種，受等心法以觸為緣，所有諸識名色為緣。

卯五、流轉還滅方便² 辰一、約雜染清淨辨² 巳一、流轉方便

流轉方便者，謂薩迦耶見為所依故，於諸行中，發生我慢及諸愛味我、我所見。

巳二、還滅方便

還滅方便者，謂於諸行遠離我慢，及見過患并彼出離，無我、我所。

辰二、約所治能治辨² 巳一、流轉方便

又流轉方便者，謂無明愛品。隨其所應，當知其相。

已二、還滅方便

還滅方便者，謂彼對治。

丑二、不如理記² 寅一、標由二緣

又由二緣，諸不聰慧聲聞弟子越大師教，墮惡見中，或起言說。

寅二、釋其差別

何等二緣？一、愚世俗諦，二、愚勝義諦。由此愚故，違越一向世俗諦理，及違越一向勝義諦理，於行流轉不正思惟。

子二、記三處³ 丑一、總標

復次，於三種處，唯諸聖者隨其所樂能如實記，非諸異生，除從他聞。

於三種處者：謂諸行中我、我所見及二種慢，名三種處。如下釋義可知。

丑二、別釋² 寅一、記差別

謂諸行中我、我所見，我非如實，若彼為依有我慢轉。

若彼為依有我慢轉者：此說執著現行我慢。此以我、我所見為依而得轉

故。

彼雖已斷，而此我慢一切未斷。若無起依，我慢不斷，如故現行。

彼雖已斷等者：此說率爾現行我慢。我、我所見雖已永斷，而此我慢隨眠與纏一切未斷。如諸聖者，薩迦耶見已永斷故，不與執著現行我慢作所依止，然有習氣常所隨逐，於失念時率爾現行，我慢如故現行。如下釋義，此可了知。

寅二、廣我慢² 卯一、標列二種

當知此中二種我慢。一、於諸行執著現行，二、由失念率爾現行。

卯二、隨釋差別² 辰一、執著現行我慢

此中執著現行我慢，聖者已斷，不復現行。

辰二、失念現行我慢² 巳一、標

第二我慢由隨眠故，薩迦耶見雖復永斷，以於聖道未善修故，猶起現行。

巳二、釋

薩迦耶見唯有習氣常所隨逐，於失念時，能與我慢作所依止，令暫現行。是故此慢亦名未斷，亦得現行。

丑三、料簡²

寅一、我慢現不現行²

卯一、聖者²

辰一、思惟諸行

又諸聖者，若於諸行思惟自相，尚令我慢不復現行，況觀共相。

辰二、思惟假法²

巳一、不現行

若於假法作意思惟，住正念者，亦令我慢不得現行。

巳二、暫現行

若於假法作意思惟，不住正念，爾時我慢暫得現行。

卯二、異生

若諸異生，雖於諸行思惟共相，尚為我慢亂心相續，況住餘位。

況住餘位者：此說餘位，謂於諸行思惟自相應知。

寅二、見慢斷及未斷²

卯一、見

又薩迦耶見，聖相續中，隨眠與纏皆已斷盡；於學位中，習氣隨逐，未能永

斷。

卯二、慢³ 辰一、總標未斷

若諸我慢，隨眠與纏皆未能斷。

辰二、別顯纏攝

又計我欲者，當知即是我慢纏攝。何以故？由失念故，於欲、於定為諸愛味所漂淪者，依此欲門，諸我慢纏數數現起。

又計我欲等者：此顯於學位中，由薩迦耶見習氣隨逐，計我為勝、或等、或劣，名計我欲，如前已說。又時時間，由忘念故，觀我起慢，因此慢纏差別而轉，其義應知。

辰三、未斷異名⁴ 巳一、未斷

言未斷者，由隨眠故。

巳二、未遍知

未遍知者，由彼纏故，彼於爾時有忘念故。

巳三、未滅

言未滅者，雖於此纏暫得遠離，尋復現行。

巳四、未吐

言未吐者，由彼隨眠未永拔故。

子三、記慰問² 丑一、辨二種² 寅一、標列

復次，同梵行者，於餘同梵行所，略有二種慰問。一、問病苦，二、問安樂。

寅二、隨釋² 卯一、問病苦攝² 辰一、寧可忍不

問病苦者，如問彼言所受疹疾寧可忍不者，謂問：氣息無擁滯乎？

辰二、得支持不

得支持不者，謂問：苦受不至增乎？非無間乎？非不愛觸之所觸乎？非違慮乎？非窄身乎？或被窄者得除釋乎？

非窄身乎者：前問心苦，此問身苦。苦受逼切迫迕於身，是名窄身。

卯二、問安樂攝⁴ 辰一、少病不

問安樂者，謂如有一，隨所問言少病不者，此問：不為嬰疹惱耶？

辰二、少惱不

少惱不者，此問：不為外諸災橫所侵逼耶？

辰三、起居輕利不

起居輕利不者，此問：夜寐得安善耶？所進飲食易消化耶？

辰四、有歡樂不² 巳一、釋

有歡樂不者，此問：得住無罪觸耶？

巳二、指

如是等類差別言詞，如聲聞地於所飲食知量中釋。

如是等類差別言詞等者：聲聞地說：若受飲食，為除饑渴、為攝梵行、為斷故受、為令新受當不更生、為當存養力樂無罪安隱而住，如是習近無罪無染所有存養，而自存活。（陵本二十三卷十五頁¹⁹⁸⁹）決擇分中，釋此義云：舊受者，饑所起。苦受者，食所起。撫育者，增梵行故。力者，能害

所治故。樂者，現法樂住故。無罪者，淨福田故。安隱住者，煩惱苦斷能作證故。（陵本七十卷五頁⁵⁴⁶⁴）由是此說：如是等類差別言詞。

丑二、攝四位

當知此問，在四位中。一、內逼惱分，二、外逼惱分，三、住於夜分，四、住於晝分。

癸四、似正法⁴

子一、出彼見²

丑一、標說非

復次，若有說言：諸阿羅漢於現法中，於食、物務、蘊、界、處等，若順不順不如實知，言阿羅漢不順。不順是不如理虛妄分別，非阿羅漢現法不順。於食物務等者：食謂飲食。餘所作事，說名物務。諸佛言教，或蘊相應、或界相應、或處相應、或緣起相應，如是等類，是名蘊、界、處等。於彼彼事，理無相違，說名為順；理有相違，說名不順。

丑二、顯自義

所以者何？彼於食、物務、蘊、界、處等現可見故。由此因緣，諸阿羅漢於

其滅後不順諸行，不了執著。是故世尊言阿羅漢是不順者，定是密語。

於其滅後不順諸行等者：謂於滅後，不能如理分別諸行，是故於彼不如實知，而生執著。由是世尊言阿羅漢不順。此不順言非謂現法，故是密語。

子二、斥四法

當知此是似正法見。

子三、明彼斷³

丑一、斷所為²

寅一、為哀愍他

由二種義勢力為緣，諸同梵行、或大聲聞，為欲斷滅如是所生似正法見，極作功用，勿令彼人或自陳說、或示於他，由是因緣，墮極下趣。

寅二、為護聖教

或由愛敬如來聖教，勿因如是似正法見，令佛聖教速疾隱滅。

由二種義者：謂如下說，勿墮惡趣、勿壞聖教，名由二義應知。

丑二、斷所因²

寅一、出二因緣

復有二因，能生如是似正法見。一者、於內薩迦耶見未能永斷；二者、依此

妄計流轉、還滅士夫。

寅二、明二對治² 卯一、略標列

為斷如是二種因故，說二正法以為對治。謂於諸行，次第宣說無常、無我；於四轉中，推求流轉、還滅士夫都不可得。

於四轉中者：謂如下說，若有為、若無為、若非有為非無為、若非無為非有為，是名四轉應知。

卯二、隨難釋

謂依有為、或依無為，聲聞、獨覺、佛世尊我說名如來。當知此我二種假立，有餘依中假立有為，無餘依中假立無為。若依勝義，非有為非無為，亦非無為非有為。

丑三、斷勝利³ 寅一、標永斷

由說如是正法教故，於六種相覺悟生時，當知永斷似正法見。

寅二、別釋相

謂阿羅漢，於依所攝滅壞法故，覺悟無常；於現法中，為老病等眾苦器故，覺悟是苦；於任運滅斷界、離界及與滅界，覺悟為滅、寂靜、清涼及與永沒。

覺悟為滅寂靜清涼及與永沒者：諸有漏識，於現法中畢竟滅盡，是名為滅。諸無漏識，隨其次第，有學解脫，名為寂靜；無學解脫，名為清涼。餘依永滅，是名永沒。如是四相及無常、苦，總有六相應知。

寅三、釋前非

若具如是正覺悟者，是阿羅漢，邪增上慢俱行妄想尚不得有，況可如是於其滅後，若順不順戲論執著。

子四、斥未斷² 丑一、標二過患

當知未斷薩迦耶見，有二過患。一、於能害有苦諸行，執我、我所，由此因緣，能感流轉生死大苦。二、於現法能礙無上聖慧命根。

丑二、喻釋後一³ 寅一、舉喻

譬如有人，自知無力能害怨家，恐彼為害，先相親附，以如意事現承奉之。時彼怨家如親附已，便害其命。

寅二、合法

愚夫異生亦復如是，恐似怨家薩迦耶見當為苦害，便起愛縛，以可意行而現承奉。

寅三、結名

如是愚癡異生之類，於能為害薩迦耶見，唯見功德，不見過失，殷勤親附；既親附已，由未得退，說名損害聖慧命根。

癸五、疑癡處所² 子一、出二種³ 丑一、標

復次，諸外道輩，於內法律二種處所疑惑愚癡。

丑二、徵

何等為二？

丑三、列² 寅一、於有無見

謂佛世尊誹毀有見及無有見，而於弟子終歿之後，記一有生、記一無生。

寅二、於常住我

又說勝義常住之我，現法、當來都不可得，世有三師而現可得。一、常論者，二、斷論者，三者、如來。

謂佛世尊誹毀有見等者：如下處擇攝說：薩迦耶見為所依止，於諸行中發起常見，名為有見。發起斷見，名無有見。（陵本八十九卷九頁⁶⁷⁴⁴）此中

義顯，若佛世尊誹毀有見，便不應記弟子有生；誹毀無見，便不應記弟子無生。是故諸外道輩，於此處所疑惑愚癡。又復世有三師而現可得，唯如來說勝義常住之我，現法、當來都不可得。是故諸外道輩，於此處所亦起疑惑愚癡。

子二、顯因斷² 丑一、指如前說

此疑癡者有二種因，當知如前似正法見。二種法教能斷此因，亦如前說。

此疑癡者有二種因等者：謂如前說：一者、於內薩迦耶見未能永斷；二

者、依此妄計流轉、還滅士夫。為斷如是二種因故，說二正法以為對治。謂於諸行，次第宣說無常、無我。此應準知。

丑二、廣無我教² 寅一、難入難了² 卯一、標列因緣

由二因緣，即此所說無我法性，彼諸外道難入難了，謂此自性難了知故。

由二因緣等者：無我法性難可悟入，體甚深故，是名第一因緣。又彼外道難可了知，由非微妙審諦聰明智者不能證故，是名第二因緣。前約法性建立，後約補特伽羅建立。如下釋義，應可了知。

雖此相貌易可了知，然其相貌不相似故。

雖此相貌易可了知等者：如言取義，說名相貌，此易可知。然不稱實，名不相似。

卯二、別釋其相² 辰一、釋難入² 巳一、總標

當知此中，無虛誑義、自所證義是不共義，故彼自性難可悟入。

巳二、別辨³ 午一、無虛誑義

即此自性，體是甚深，似甚深現，是故說名無虛誑義。

午二、自所證義

又此自性，於內難見，從他言音亦難覺了，是故說名自所證義。

午三、是不共義

又此自性，非尋思者之所尋思，非度量者所行境界，是故說名是不共義。

辰二、釋難了² 巳一、顯內證

又即此法，微妙審諦聰明智者內所證故，說名難了。

巳二、指差別

此等差別，當知如前攝異門分。

此等差別等者：攝異門分說：微細者，能入真實甚深義故。言審悉者，具能證入一切義故。言聰明智者，謂與引發慧相應故。言叡哲者，謂與俱生慧相應故。或復翻此。乃至廣說。（陵本八十三卷六頁⁶²⁹²）今此中說微妙審諦聰明智者，文別義同，故指彼釋。

寅二、智相差別³ 卯一、標列

由二種相，一切如來所說義智皆應了知。何等為二？一者、教智，二者、證智。

卯二、隨釋² 辰一、教智

教智者，謂諸異生聞思修所成慧。

辰二、證智

證智者，謂學無學慧及後所得諸世間慧。

卯三、料簡³ 辰一、異生

此中異生，非於一切佛所說義皆能了知，亦非於慢覺察是慢，又未能斷。

辰二、有學

若諸有學，非於我見一切義中皆不了知，又能於慢覺察是慢，而未能斷。

辰三、無學

若諸無學，能作一切。

癸六、不記² 子一、明不應記² 丑一、標於二種

復次，諸佛如來，於世俗諦及勝義諦皆如實知，正觀於彼二種道理，不應記別。

丑二、為遮無義

若記別者，能引無義，故不記別，亦不執著。謂於滅後若有、若無、亦有亦無、非有非無。

子二、斥餘有記

若於如來如是智見為先不記謂無知者，當知自顯妄見俱行無智之性。

癸七、變壞³ 子一、標二種

復次，應知略有二種變壞。

子二、釋彼相² 丑一、諸行衰老變壞

一者、諸行衰老變壞。謂如有一，年百二十，其形衰邁。由是因緣，名身老病。

丑二、心憂變壞

二者、心憂變壞。由是因緣，名心老病。

子三、簡差別² 丑一、辨² 寅一、約所欲辨

第一變壞，若愚、若智，皆於其中不隨所欲。第二變壞，智者於中能隨所欲，非諸愚者。

寅二、約所隨辨

又諸愚夫若身老病，當知其心定隨老病；其有智者身雖老病，而心自在，不隨老病。

丑二、結

是名此中愚智差別。

癸八、大師記² 子一、標於諸取斷遍知論² 丑一、辨行相³ 寅一、善取法善思惟

復次，善取法者，由聞思故。善思惟者，由修慧故。

寅二、善顯了善通達

善顯了者，如所有性故。善通達者，盡所有性故。

寅三、正請問善記

由二種相，諸聖弟子能正請問，大師善記。

丑二、出依處

謂於諸取斷遍知論。

子二、列釋二種善問記相³

丑一、徵

何等為二？

丑二、列

一者、於此諸取斷遍知論，二者、為此諸取斷遍知論。

丑三、釋² 寅一、明不共

當知此中，於一切取斷遍知論，所謂如來。

所謂如來者：謂唯如來能受施設諸取斷遍知論，簡非外道，故作是說。謂外道師，於一切取雖同宣說斷遍知論，而於諸取不能施設正斷遍知。由彼

本契出家捨欲，故於欲取立斷遍知，非於自見、自戒、我語。若有與他諸餘沙門、婆羅門等，見不同分，戒禁同分，彼於見取亦能隨分立斷遍知，非於戒禁、我語二取。若有戒禁亦不同分，於戒禁取亦能隨分立斷遍知。其我語取，於一切時，一切外道悉皆共有，是故外道於自、於他我語取中，皆不施設斷遍知論。又彼雖能分捨諸取，而於當來還復能取，未永斷故。如是外道，於諸取中未全斷故、未永斷故，不得究竟。內法大師，當知一切與上相違。如菩提分法擇攝中說應知。（陵本九十七卷三頁⁷²⁵⁹）

寅二、顯隨觀² 卯一、總標

又此諸取若未斷滅，隨觀彼有三種過患；若已斷滅，隨觀彼有三種功德。

卯二、別釋² 辰一、舉過患³ 巳一、第一過患

一者、於諸行中所生諸取，行若變壞，便生愁等。應知是名第一過患，已得諸行變壞所作。

巳二、第二過患² 午一、辨² 未一、起追求

二者、於諸行中所生諸取，為得未得可意諸行，於追求時，廣行非一種種眾多差別不善。

未二、住四苦

由此追求行不善故，住四種苦。一、將現前，鄰近所起；二、正現前，現在所起；三、他逼迫增上所起；四、自雜染增上所起。

午二、結

應知是名第二過患。

巳三、第三過患

三者、即由如是惡不善法愛習為因，身壞死後往諸惡趣。應知是名第三過患。

辰二、例功德

與此相違，於諸取斷隨觀三種功德勝利，如應當知。

癸九、三見滿³

子一、總標

復次，當知略有三種聖者、三見圓滿，能超三苦。

子二、別釋³ 丑一、三種聖者

云何名為三種聖者？一、正見具足，謂於無倒法無我忍，住異生位者。二、已見聖諦，已能趣入正性離生，已入現觀，已得至果，住有學位者。三、已得最後究竟第一阿羅漢果，住無學位者。

丑二、三見圓滿³ 寅一、徵

云何名為三見圓滿？

寅二、列

一、初聖者隨順無漏、有漏見圓滿；二、未善淨無漏見圓滿；三、善清淨無漏見圓滿。

寅三、配

此三圓滿，依說三種補特伽羅，隨其次第，如前應知。

隨其次第如前應知者：謂如前說異生、有學、無學次第應知。

丑三、超三種苦³ 寅一、徵

云何名為超三種苦？

寅二、列

謂初見圓滿，能超外道我見違諍所生眾苦；第二見圓滿，能超一切惡趣眾苦；第三見圓滿，能超一切後有眾苦。

寅三、釋³ 卯一、超違諍苦² 辰一、出彼苦² 巳一、徵

此中云何名諸外道我見違諍所生眾苦？

巳二、釋² 午一、由我見³ 未一、總顯

謂此正法毗奈耶外，所有世間種種異道，薩迦耶見以為根本，所生一切顛倒見趣，如是一切總稱我見。

未二、別列⁵ 申一、我論者見趣

謂我論者，我論相應一切見趣。

申二、一切常等論者見趣

或一切常論者、或一分常論者、或無因論者、或邊無邊論者、或斷滅論者、

或現法涅槃論者，彼論相應一切見趣。

申三、有情論者見趣

或有情論者，彼論相應一切見趣。謂諸邪見撥無一切化生有情，誹謗他世。

申四、命論者見趣

或命論者，彼論相應一切見趣。謂命論者計命即身，或異身等。

申五、吉祥論者見趣

或吉祥論者，彼論相應一切見趣。謂觀參羅、曆算、卜筮種種邪論，妄計誦呪、祠祀火等得所愛境，能生吉祥、能斷無義；又計覩相為祥不祥。

未三、略攝

彼復云何？謂二十句薩迦耶見為所依止，發起妄計前際、後際六十二種諸惡見趣，及起總謗一切邪見。

午二、顯眾苦⁴ 未一、徵

云何違諍所生眾苦？

未二、列

謂彼展轉見、欲相違，互興諍論，發起種種心憂惱苦、深愛藏苦、互勝劣苦、堅執著苦。

展轉見欲相違等者：聞所成地說：諍論者，謂或依諸欲所起，或依諸見所起。此說展轉見、欲相違，如彼釋相應知。（陵本十五卷四頁1289）

未三、釋⁴ 申一、心憂惱苦

當知此中，若他所勝，便生愁惱。是名初苦。

申二、深愛藏苦

若勝於他，遂作方便，令自見品轉復增盛，令他見品漸更隱昧。唯我見淨，非餘所見，執著邪見，深起愛藏。由此因緣，發生種種不正尋思，及起種種不寂靜意，損害其心。名第二苦。

申三、互勝劣苦

愛藏邪見增上力故，以他量己，謂己為勝、或等、或劣；因自高舉，陵懣於

他。是名第三互勝劣苦。

申四、堅執著苦

彼依此故，追求利養，即為追求苦之所觸。凡有所作，皆為惱亂詰責他論，及為自論免脫他難。是名第四堅執著苦。

未四、結

如是四種，名見違諍所生眾苦。

辰二、明超越³ 巳一、標

內法異生安住上品無我勝解，當知己斷如是眾苦。

巳二、徵

所以者何？

巳三、釋

彼於當來，由意樂故，於如是等諸惡見趣堪能除遣。是故若住初見圓滿，能超初苦。

卯二、超惡趣苦² 辰一、明現觀

又即依此初見圓滿，親近、修習、極多修習，於內諸行發生法智，於不現見發生類智。總攝為一聚，以不緣他智而入現觀。

總攝為一聚等者：謂不分別欲、色、無色諸行，或是現見、或非現見，是名總攝一聚。五識身相應地意地決擇中說：修觀行者，以阿賴耶識是一切戲論所攝諸行界故，略彼諸行，於阿賴耶識中，總為一團、一積、一聚。

為一聚已，由緣真如境智修習、多修習故，而得轉依。轉依無間，當言已斷阿賴耶識。（陵本五十一卷十頁⁴⁰⁹⁵）其義應知。

謂以無常行，或隨餘一行。

辰二、結超苦

彼於爾時，能隨證得第二見圓滿，及能超第二苦。

或隨餘一行者：苦行、空行、無我行，名隨餘一行應知。

卯三、超後有苦

彼住此已，如先所得七覺分法，親近、修習、極多修習，能斷如前所說四種業等雜染，能隨證得後見圓滿，超後有苦。

能斷如前所說四種業等雜染者：前說業雜染、見我慢纏雜染、愛纏雜染、彼隨眠雜染，是名四種雜染。如彼別釋應知。

子三、料簡² 丑一、眾苦差別

此中第一補特伽羅，猶殘二苦，及殘現在所依身苦。

猶殘二苦者：此中二苦，謂彼一切惡趣眾苦，及與一切後有眾苦應知。

第二補特伽羅，唯殘一苦，及依身苦。第三補特伽羅，一切苦斷，但依身苦暫時餘在，譬如幻化。

丑二、我見差別² 寅一、唯依分別

又依分別薩迦耶見立二十句，不依俱生。

寅二、簡內法無

又內法者無如是行，依遍處定，謂地為我，我即是地，乃至廣說一切應知。

依遍處定等者：十遍處三摩鉢底，名遍處定。賢聖於此無我、我所二差別故，名為無二義。如三摩呬多地說。（陵本十二卷七頁⁹⁹⁴）由是此言，又內法者無如是行，謂地為我，我即是地，乃至廣說一切應知。

癸十、外愚相等⁴

子一、外愚夫相²

丑一、略標五種

復次，諸外道輩，略有五種愚夫之相，由彼相故，墮愚夫數。

丑二、別釋其相⁵

寅一、第一愚相

謂諸外道，性聰慧者，猶尚不免懷聰慧慢，況非聰慧。是名第一愚夫之相。

寅二、第二愚相

又諸外道，多為貪求利養恭敬，自讚毀他。是名第二愚夫之相。

寅三、第三愚相

又諸外道，若諸聖者為說正法正教正誠，即便違逆、呵罵、毀訾。是名第三愚夫之相。

寅四、第四愚相

又諸外道，喜自陳說似正法論，或開示他。是名第四愚夫之相。

寅五、第五愚相

又諸外道，雖為如來、如來弟子之所降伏，亦知如來所說法律是真善說，知自法律是妄惡說，然由我慢增上力故，都不信受，乃至不集觀察因緣。是名第五愚夫之相。

乃至不集觀察因緣者：謂不修集聖道資糧，觀察一切雜染、清淨因緣故。

子二、論師子王³ 丑一、標

復次，如來成就六分，得名無間論師子王。

丑二、徵

何等為六？

丑三、釋⁶ 寅一、成就初分

所謂最初往詣外道敵論者所，乃至恣其問一切義，凡所興論非為諍論，唯除哀愍諸有情故。其未信者令彼生信，若已信者令倍增長。

寅二、成就第二分

又興論時，諸根寂靜，形色無變，亦無怖畏習氣隨逐。

寅三、成就第三分

又終不為諸天世間之所勝伏，一切世間無敵論者，能越一翻唯說一翻，皆能摧伏。

能越一翻唯說一翻者：如次配屬一切世間無敵論者，及與如來應知。

寅四、成就第四分

又諸世間極聰慧者、極無畏者，若與如來共興論時，所有辯才皆悉誓訥，增上怖畏逼切身心，一切矯術虛詐言論皆不能設。

寅五、成就第五分

又復一切同一會坐處中大眾，皆於佛所起勝他心，於彼外道敵論者所起他勝心。

寅六、成就第六分

又佛世尊言詞威肅，其敵論者所出言詞無有威肅。

子三、二論差別³ 丑一、標列二種

復次，有二種論。何等為二？一、有我論，二、無我論。

丑二、校量勝劣

無我論有力，有我論無力。有我論者，常為無我論者所伏，唯除論者其力羸劣。

丑三、廣釋建立² 寅一、有我論者³ 卯一、徵

云何名為有我論者？

卯二、釋² 辰一、標義

謂如有一，起如是見，立如是論：於色等行建立為我。謂我有行，行是我所，我在行中不流不散，遍隨支節無所不至。是故色等諸行性我，依諸行田生福非福，因茲領受愛不愛果。

辰二、喻成

譬如農夫依止良田，營事農業，及與種植藥草叢林。

卯三、結

是名我論。

寅二、無我論者² 卯一、徵

云何名為無我論者？

卯二、釋² 辰一、標列二種

謂有二種。一、破我論，二、立無我。

辰二、別釋其相² 巳一、破我論² 午一、破³ 未一、唯應生福不生非福難

破我論者，若計實我能有作用，於愛非愛諸果業中得自在者，此我恆時欣樂厭苦，是故此我唯應生福，不生非福。

未二、不應發生愁憂等難

又我作用常現在前，內外諸行若變異時，不應發生愁憂悲歎。

未三、常應隨轉無有變易難

又我是常，以覺為先，凡所生起常應隨轉，無有變易。然不可得。

午二、結

如是名為破有我論。

巳二、立無我² 午一、辨² 未一、出緣生

立無我者，以一切行從眾緣生，若遇福緣，福便生起；與此相違，生起非福。由此為緣，能招一切愛非愛果。

未二、明假立

依眾緣故，皆是無常，唯於如是因果所攝諸行流轉假立我等。若依勝義，一切諸法皆無我等。

午二、結

如是名為立無我論。

假立我等者：此中等言，等取有情、意生、摩納縛迦、養育、補特伽羅、命者、生者。如攝異門分釋應知。（陵本八十三卷十六頁⁶³²³）

子四、有學無學差別³ 丑一、標

復次，由五種相，有學、無學二種差別。

丑二、釋³ 寅一、約成就三種辨² 卯一、舉智無上等

謂諸無學所成就智，說名無上；一切有學所成就智，說名有上。

卯二、例正行解脫

如智無上，當知正行及與解脫無上亦爾。

寅二、約觀佛法身辨

又諸無學，以善清淨諸聖慧眼觀佛法身，有學不爾。

寅三、約奉事如來辨

又諸無學，以善圓滿無顛倒行奉事如來，有學不爾。

丑三、結

是名五相。

瑜伽師地論科句披尋記卷第八十八

瑜伽師地論科句披尋記卷第八十九

彌勒菩薩說

唐三藏沙門玄奘奉詔譯

韓清淨科記

攝事分中契經事處擇攝第二之一

己二、處擇攝² 庚一、結前生後

如是已說行擇攝。處擇攝，我今當說。

庚二、總別標釋² 辛一、第一總別² 壬一、總唄陀南

總唄陀南曰：

初安立等智同等 最後當知離欲等

壬二、別唄陀南⁴ 癸一、安立攝² 子一、頌標列

別唄陀南曰：

安立與差別 愚不愚教授 解脫煩惱業 皆廣說應知

子二、長行釋⁸ 丑一、安立² 寅一、標列

由五種相，當知安立諸受差別。一、自性故；二、所依故；三、所緣故；四、助伴故；五、隨轉故。

寅二、隨釋⁵ 卯一、自性

自性故者，謂有三受。一、苦，二、樂，三、不苦不樂。

卯二、所依

所依故者，謂有六種，即眼、耳、鼻、舌、身與意。

卯三、所緣

所緣故者，謂色等六所緣境界。

卯四、助伴

助伴故者，謂想思，或餘善、不善、無記心法與此相應。

卯五、隨轉

隨轉故者，謂此相應心，由依彼故，三受隨轉，彼為諸受同生同滅所依止處。

丑二、差別² 寅一、略標列

復次，如是五相安立諸受，當知復有八種差別。一、內處差別，二、外處差別，三、六識身差別，四、六觸身差別，五、六受身差別，六、六想身差別，七、六思身差別，八、六愛身差別。

寅二、明建立⁵ 卯一、由三和合義

當知此中，由三和合義，立前三差別。

卯二、由受因緣義

由受因緣義，立第四差別。

卯三、由三和合觸果義

由三和合觸果義，立第五差別。

卯四、由分別受隨言說義³ 辰一、標

由分別受隨言說義，立第六差別。

辰二、徵

所以者何？

辰三、釋

受諸受時，作如是想：我今領受此苦、此樂、此非苦樂。亦復為他隨起言說。

卯五、由業煩惱二雜染義³ 辰一、標

由業、煩惱二雜染義，當知建立第七、第八兩種差別。

辰二、徵

所以者何？

辰三、釋

由於彼受若合、若離，起思造作；如如發起思所造作，如是如是生愛求願。

丑三、愚² 寅一、泛明一切² 卯一、標列

復次，當知略有二種一切。一、少分一切，二、一切一切。

卯二、隨釋² 辰一、少分一切

如說一切皆無常者，當知此依少分一切；唯一切行，非無為故。

辰二、一切一切

言一切法皆無我者，當知此依一切一切。

寅二、釋其愚相² 卯一、標列

又由三相，應知是愚。一、由自性故；二、由因緣故；三、由果故。

卯二、隨釋³ 辰一、愚自性

愚自性故者，謂由纏故，即是忘失於現在世；由隨眠故，即是當來忘失之法。

辰二、愚因緣² 巳一、總標舉

愚因緣故者，謂於五相受安立中，不能覺了是無常等；及遍自體初中後位，所有惱亂皆不了故。

巳二、隨難釋² 午一、標

當知即是於生老病及死法性不能覺了。

謂於五相受安立中等者：五相安立，如前已說。謂自性故、所依故、所緣故、助伴故、隨轉故。無常、苦、空、無我，名無常等。

午二、配

初惱亂者，謂由生故。中惱亂者，謂由病故。後惱亂者，謂由老、死二種法故。

辰三、愚果

愚果故者，謂愁等苦、愛等雜染。

丑四、不愚² 寅一、標列

復次，由三種相，當知不愚。一、自性故；二、由礙故；三、由障故。

寅二、隨釋³ 卯一、不愚自性

不愚自性者，謂於五相受安立中，善能覺了自相、共相，由此能斷一切煩惱、能覺聖諦、能證涅槃。

卯二、不愚礙² 辰一、總標

不愚礙者，由四種魔。

辰二、配釋

謂由蘊魔，遍一切處隨逐義故；由彼天魔，於時時間能數任持障礙義故；死、煩惱魔，能與死生所生眾苦作器義故。

卯三、不愚障

不愚障者，謂緣不現見境煩惱，及緣非不現見境纏，或彼隨眠。

丑五、教授²

寅一、標列

復次，諸佛世尊、佛聖弟子，由三種相，能正教授諸弟子眾。何等為三？一、引導教授；二、隨其所應，於所緣境安處教授；三、令所化得自義教授。

寅二、配屬

如是教授，如其次第，當知即是三種神變。

當知即是三種神變者：聲聞地說：三神變者，一、神境神變，二、記說神變，三、教誡神變。由神境神變，能現種種神通境界，令他於己生極尊重；由彼於己生尊重故，於屬耳聽瑜伽作意，極生恭敬。由記說神變，能

尋求他心行差別。由教誡神變，如根、如行、如所悟入為說正法，於所修行能正教誡。（陵本二十七卷二十二頁²³²¹）如次配釋三種教授應知。

丑六、解脫⁴ 寅一、能解脫慧

復次，由二種相，應求能成就解脫妙慧。一者、如理聞思久遠相續慧，能成就有學解脫；二者、有學久遠相續慧，能成就無學解脫。

寅二、解脫成就² 卯一、標列

復次，略有二種解脫成就。一者、有學，二者、無學。

卯二、隨釋

有學者，謂金剛喻三摩地俱。

謂金剛喻三摩地俱者：此是最後學位攝故。齊此能證有學圓滿解脫，故作是說。

無學者，謂彼已上。

謂彼已上者：一切煩惱皆永離繫，名彼已上。齊此證得無學圓滿解脫，謂

從金剛喻三摩地，無間永害一切煩惱品麤重種子故。

寅三、多所作法⁵ 卯一、標

復次，心清淨行苾芻，有五種法多有所作。

卯二、徵

何等為五？

卯三、列

一、正教授，二、奢摩他支，三、毗鉢舍那支，四、無間、殷重加行，五、出世間慧。

卯四、釋⁵ 辰一、正教授² 巳一、出三正友

正教授者，謂有三種正友所顯。一者、大師；二者、軌範尊重；三者、同梵行者，及住內法在家英叡。如是名為三種正友。

巳二、勸應從求

諸有智者，從彼應求積集善門真正教授。

辰二、奢摩他支

奢摩他支者，謂如有一，具尸羅住，廣說應知如聲聞地。如是尸羅具足住已，便無有悔；無悔故歡；廣說乃至樂故心定。

廣說應知如聲聞地者：聲聞地說：護養定資糧，謂成就戒律儀、根律儀等。如彼廣說應知。（陵本三十卷五頁²⁴⁹⁹）

辰三、毗鉢舍那支² 巳一、舉三言教³ 午一、標列

毗鉢舍那支者，謂得三種隨欲言教。一、聖正言教，二、厭離言教，三、令心離蓋趣愛言教。

午二、隨釋³ 未一、聖正言教

云何聖正言教？謂依眾聖五無學蘊所有言教。即是宣說諸聖成就如是戒、如是定、如是慧、如是解脫、如是解脫知見。

未二、厭離言教

云何厭離言教？謂依三種令增少欲喜足言教，及依樂斷、樂修令離憤鬧言教。

未三、令心離蓋趣愛言教² 申一、徵

云何令心離蓋趣愛言教？

申二、釋² 酉一、標列

當知此教復有三門。一者、一切煩惱蓋離蓋趣愛言教，二者、五蓋離蓋趣愛言教，三者、無明蓋離蓋趣愛言教。

酉二、隨釋³ 戌一、初言教

當知此中，依為證得斷、離、滅界所有言說，是初言教。

戌二、第二言教

依即於彼見勝功德，及於所治蓋處諸行深見過患所有言說，當知是名第二言教。

戌三、第三言教

隨順如是緣性緣起所有言說，當知是名第三言教。

午三、總結

如是三種言教，總名毗鉢舍那支。

已二、略攝要義³ 午一、略標列

又此言教，以略言之，復有三種。一、能生樂欲言教，二、能正安處資糧言教，三、能正安處作意言教。

午二、別配屬

謂聖正言教，名能生樂欲言教；厭離言教，名正安處資糧言教；令心離蓋趣愛言教，名正安處作意言教。

午三、釋得名

依此言教，勝奢摩他所攝受慧，名毗鉢舍那，是故說此言教名毗鉢舍那支。

辰四、無間殷重加行² 巳一、徵

云何無間、殷重加行？

巳二、釋² 午一、略標

謂常所作、委悉所作、勤精進住，當知即依止觀加行。

午二、別廣² 未一、標列五種

又勤精進應知五種。一、被甲精進，二、加行精進，三、不下精進，四、無動精進，五、無喜足精進。

未二、釋其漸次

此中最初，當知發起猛利樂欲；次隨所欲，發起堅固勇悍方便；次為證得所受諸法，不自輕憊，亦無怯懼；次能堪忍寒熱等苦；後於下劣不生喜足，欣求後後轉勝轉妙諸功德住。

辰五、出世間慧² 巳一、標證得

彼由如是勤精進住，入諦現觀，證得諸聖出世間慧。

巳二、釋為依² 午一、能除隨惑² 未一、總標

於修道中，依止此慧若行、若住，能正除遣所依身中諸隨煩惱，令心清淨。

未二、別釋² 申一、於行位² 酉一、釋² 戌一、思惟不淨

謂住聚落、或聚落邊，若見少壯、端嚴、美妙形色母邑，即便作意思惟不

淨，為欲損害緣彼貪故。

戌二、思惟慈相

若遇他人逼迫惱亂，即便作意思惟慈相，為欲損害緣彼瞋故。

酉二、結

如是行時，能正除遣諸隨煩惱，令心清淨。

申二、於住位

若遠離處，修習入出二種息念，除遣欲等諸惡尋思。如是住時，能正除遣諸隨煩惱，令心清淨。

午二、能除我慢

彼依如是已所證得出世間慧，於一切行修無常想，能正蠲除所餘我慢。

卯五、結

如是善士為所依止，復得無倒教授前行，由此漸次能證有學圓滿解脫，得金剛喻三摩地故；亦證無學圓滿解脫，一切煩惱皆離繫故。

寅四、成解脫義² 卯一、徵

云何解脫？

卯二、釋² 辰一、釋得名

謂起畢竟斷對治故，一切煩惱品類麤重永息滅故，證得轉依，令諸煩惱決定究竟成不生法，是名解脫。

辰二、辨差別² 巳一、無所有處已離欲位

若聖弟子，無所有處已得離欲，唯餘非想非非想處所有諸行，復能安住勝有頂定，爾時無間能隨證得諸漏永盡。

巳二、無所有處未離欲位

若所餘位，雖能漸斷彼彼諸漏，然非無間能隨證得諸漏永盡，如是乃至無所有處未得離欲。

丑七、廣說煩惱¹⁶ 寅一、三漏³ 卯一、欲漏

復次，諸欲界繫一切煩惱，唯除無明，說名欲漏。

卯二、有漏

諸色無色二界所繫一切煩惱，唯除無明，說名有漏。

卯三、無明漏

若諸有情，或未離欲、或已離欲，除諸外道所有邪僻，分別愚癡所生惡見蔽覆其心；依此惡見，於彼諸欲一分尋求、一分離欲，乃至非想非非想處。於彼三界所有無智，總攝為一，立無明漏。

或未離欲或已離欲等者：前約欲界欲貪，說名欲漏。諸色無色二界有貪，說名有漏。今此總約三界無智，立無明漏。於三界中諸有情類，或未離欲、或已離欲，若為外道惡見所覆，依此惡見，於彼諸欲一分尋求、一分離欲，乃至非想非非想處，應知此非無明漏攝。如其次第，建立欲漏、有漏。前已說故，為簡別彼，是故除之。

寅二、九結² 卯一、總標

復次，有九種事能和合故，當知建立九結差別。

當知建立九結差別者：此中九結，謂愛結、恚結、慢結、無明結、見結、取結、疑結、嫉結、慳結。如有尋有伺地說應知。（陵本八卷二頁⁵⁴⁴）

卯二、別釋² 辰一、出九事

云何九事？一、依在家品，可愛有情、非有情數，一切境界貪愛纏事。二、即依此品，可惡有情、非有情數，一切境界瞋恚纏事。三、依有情數憍慢纏事。若四、五、六，依惡說法諸出家品，三種邪僻勝解纏事。謂依聽聞不正法故，依不如理邪思惟故，依非方便所攝修故，如是差別即為三種。七、於善說法律無勝解纏事。八、依出家品，智貧窮事。九、依在家品，財貧窮事。

辰二、配九結³ 巳一、標如應

由此九事，如其所應，當知配屬愛等九結。

巳二、釋嫉結

此中由嫉變壞心故，於正法內發起法慳，由此當來智慧貧乏。

已三、指所餘

餘隨所應，配屬應知。

寅三、三縛²

卯一、辨因緣²

辰一、舉貪纏

復次，由為貪縛所纏縛故，於能隨順樂受境界，心不能捨。

辰二、例瞋癡

如是瞋縛所纏縛故，於能隨順苦受境界，心不能捨；由愚癡縛所纏縛故，於能隨順非苦樂受中庸境界，心不能捨。

卯二、結立縛

由此因緣，故立三縛。

寅四、七隨眠³

卯一、釋得名

復次，煩惱品所有麤重隨附依身，說名隨眠。能為種子，生起一切煩惱纏故。

卯二、明建立²

辰一、總標

當知此復建立七種。由未離欲品差別故，由已離欲品差別故，由二俱品差別

故。

辰二、別配

由未離欲品差別故，建立欲貪、瞋恚隨眠；由已離欲品差別故，建立有貪隨眠；由二俱品差別故，建立慢、無明、見、疑隨眠。

卯三、結總攝

如是總攝一切煩惱。

寅五、隨煩惱³ 卯一、總標

復次，隨煩惱者，謂貪不善根、瞋不善根、癡不善根，若忿、若恨，如是廣說諸雜穢事。

如是廣說諸雜穢事者：如下別釋隨煩惱相，是名廣說應知。

卯二、別釋⁴⁸ 辰一、三不善根² 巳一、舉貪

當知此中，能起一切不善法貪，名貪不善根。

巳二、例餘

瞋、癡亦爾。

辰二、忿

若瞋恚纏，能令面貌慘裂奮發，說名為忿。

辰三、恨

內懷怨結，故名為恨。

辰四、覆

隱藏眾惡，故名為覆。

辰五、熱惱

染汙驚惶，故名熱惱。

辰六、嫉

心懷染汙，不喜他榮，故名為嫉。

辰七、慳

於資生具深懷鄙吝，故名為慳。

辰八、誑

為欺罔彼，內懷異謀，外現別相，故名為誑。

辰九、諂

心不正直、不明、不顯，解行邪曲，故名為諂。

辰十、無慚

於所作罪，望己不差，故名無慚。

辰十一、無愧

於所作罪，望他不恥，故名無愧。

辰十二、七慢⁷ 已一、慢

於他下劣謂己為勝，或復於等謂己為等，令心高舉，故名為慢。

已二、過慢

於等謂勝，於勝謂等，令心高舉，故名過慢。

已三、慢過慢

於勝謂勝，令心高舉，名慢過慢。

已四、我慢

妄觀諸行為我、我所，令心高舉，故名我慢。

已五、增上慢

於其殊勝所證法中，未得謂得，令心高舉，名增上慢。

已六、下劣慢

於多勝中，謂己少劣，令心高舉，名下劣慢。

已七、邪慢

實無其德，謂己有德，令心高舉，故名邪慢。

辰十三、憍

心懷染汙，隨恃榮譽形相疏誕，故名為憍。

辰十四、放逸

於諸善品不樂勤修，於諸惡法心無防護，故名放逸。

辰十五、傲

於諸尊重及以福田，心不謙敬，說名為傲。

辰十六、憤發

若煩惱纏，能令發起執持刀杖、鬥訟違諍，故名憤發。

辰十七、矯

心懷染汙，為顯己德，假現威儀，故名為矯。

辰十八、詐

心懷染汙，為顯己德，或現親事、或行軟語，故名為詐。

辰十九、現相

心懷染汙，欲有所求，矯示形儀，故名現相。

欲有所求矯示形儀者：聲聞地說：又為貪求種種衣服、飲食、臥具、病緣醫藥資具因緣，方便顯己有勝功德，矯詐構集非常威儀。為誑他故，恆常詐現諸根無掉、諸根無動、諸根寂靜，由是令他謂其有德，當有所施、當

有所作。所謂承事，供給衣服、飲食、臥具、病緣醫藥及諸資具。（陵本二十二卷十頁¹⁹¹⁹）其義應知。

辰二十、研求

現行遮逼，有所乞丐，故名研求。

辰二十一、以利求利

於所得利不生喜足，悅獲他利更求勝利，是故說名以利求利。

辰二十二、不敬

自現己德，遠離謙恭，於可尊重而不尊重，故名不敬。

辰二十三、惡說

於不順言性不堪忍，故名惡說。

於不順言性不堪忍者：謂不堪忍，發言麤獷故。

辰二十四、惡友

諸有朋疇，引導令作非利益事，名為惡友。

辰二十五、惡欲

耽著財利，顯不實德欲令他知，故名惡欲。

辰二十六、大欲

於大人所欲求廣大利養恭敬，故名大欲。

辰二十七、自希欲

懷染汙心，顯不實德欲令他知，名自希欲。

辰二十八、不忍² 巳一、舉於罵

於罵反罵，名為不忍。

巳二、例於瞋等

於瞋反瞋、於打反打、於弄反弄，當知亦爾。

辰二十九、耽嗜遍耽嗜² 巳一、舉於自他

於自諸欲深生貪愛，名為耽嗜。於他諸欲深生貪著，名遍耽嗜。

巳二、例於勝劣

於勝於劣，隨其所應，當知亦爾。

辰三十、貪

於諸境界深起耽著，說名為貪。

辰三十一、非法貪

於諸惡行深生耽著，名非法貪。

辰三十二、執著

於自父母等諸財寶不正受用，名為執著。

辰三十三、惡貪

於他委寄所有財物規欲抵拒，故名惡貪。

辰三十四、見有見無有見

妄觀諸行為我、我所，或分別起、或是俱生，說名為見。薩迦耶見為所依止，於諸行中發起常見，名為有見。發起斷見，名無有見。

辰三十五、五蓋

當知五蓋，如前定地已說其相。

如前定地已說其相者：謂如三摩呬多地說應知。（陵本十一卷三頁₈₄₅）

辰三十六、瞿瞿

不如所欲，非時睡纏之所隨縛，故名瞿瞿。

辰三十七、不樂

非處思慕，說名不樂。

辰三十八、頻申

麤重剛彊，心不調柔，舉身舒布，故曰頻申。

辰三十九、食不知量

於所飲食不善通達若過、若減，是故名為食不知量。

辰四十、不作意

於所應作而便不作，非所應作而更反作，如所聞思修習法中，放逸為先，不起功用，名不作意。

辰四十一、不應理轉

於所緣境深生繫縛，猶如美睡隱翳其心，是故說名不應理轉。

辰四十二、心下劣

自輕憊故，名心下劣。

辰四十三、抵突

為性惱他，故名抵突。

辰四十四、諱訾

性好譏嫌，故名諱訾。

辰四十五、不純直

欺誑師長、尊重福田及同法者，名不純直。

辰四十六、不和軟

身語二業皆悉高疏，其心剛勁，又不清潔，名不和軟。

辰四十七、不隨順同分而轉

於諸戒、見、軌則、正命皆不同分，名不隨順同分而轉。

辰四十八、八尋思⁸ 巳一、欲尋思

心懷愛染，攀緣諸欲，起發意言，隨順隨轉，名欲尋思。

隨順隨轉者：引發令生，是名隨順。生已相續，是名隨轉。

巳二、恚尋思

心懷憎惡，於他攀緣不饒益相，起發意言，隨順隨轉，名恚尋思。

巳三、害尋思

心懷損惱，於他攀緣惱亂之相，起發意言，餘如前說，名害尋思。

巳四、親里尋思

心懷染汙，攀緣親戚，起發意言，餘如前說，是故說名親里尋思。

巳五、國土尋思

心懷染汙，攀緣國土，起發意言，餘如前說，是故說名國土尋思。

巳六、不死尋思

心懷染汙，攀緣自義，推託遷延，後時望得，起發意言，餘如前說，是故說名不死尋思。

已七、輕憊相應尋思

心懷染汙，攀緣自他若劣若勝，起發意言，餘如前說，是名輕憊相應尋思。

已八、家勢相應尋思

心懷染汙，攀緣施主往還家勢，起發意言，隨順隨轉，是名家勢相應尋思。

卯三、指餘

愁、歎等事，如前應知。

愁歎等事如前應知者：謂如前說愁、歎、苦、憂、惱諸相差別應知。（陵

本八十八卷三頁⁶⁶⁴⁴）

寅六、纏² 卯一、標一切

復次，一切煩惱皆有其纏，由現行者悉名纏故。

卯二、釋建立² 辰一、標唯八種

然有八種諸隨煩惱，於四時中數數現行，是故唯立八種為纏。

辰二、釋於四時⁴ 巳一、於修學戒時

謂於修學增上戒時，無慚、無愧數數現行，能為障礙。

巳二、於修學心時

若於修學增上心時，惛沈、睡眠數數現行，能為障礙。

巳三、於修學慧時

若於修學增上慧時，簡擇法故，掉舉、惡作數數現行，能為障礙。

巳四、於受用財法時

若同法者展轉受用財及法時，嫉妒、慳吝數數現行，能為障礙。

寅七、四暴流² 卯一、約界繫辨² 辰一、舉欲暴流

復次，欲貪瞋等欲界所繫煩惱行者，欲界所繫上品煩惱未斷、未知，名欲暴流。

辰二、例餘隨應

有、見、無明三種暴流，如其所應，當知亦爾。

卯二、約補特伽羅辨² 辰一、除外道攝

謂於欲界未得離欲，除諸外道，名欲暴流。已得離欲，名有暴流。

辰二、諸外道攝

若諸外道，從多論門，當知有餘二種暴流。謂諸惡見略攝為一，名見暴流；惡見因緣略攝為一，說名第四無明暴流。

寅八、軌

復次，若諸煩惱等分行者，非增非減，即上所說一切煩惱，說名為軌。

寅九、四取² 卯一、略顯

復次，當知依於二品建立四取。一、在家品，二、外道法中諸出家品。當知此中，若所取、若能取、若所為取，如是一切總說為取。

卯二、廣釋² 辰一、取行相³ 巳一、所取

問：何所取？答：欲、見、戒禁、我語是所取。

已二、能取

問：何能取？答：四種欲貪是能取。

已三、所為取² 午一、問

問：何所為取？

午二、答⁴ 未一、為得欲等

答：為得諸欲及為受用故，起初取。

未二、為詰他等

由貪利養及以恭敬增上力故，或為詰責他所立論，或為免脫他所徵難，起第二取。

未三、為趣離欲

奢摩他支為所依止、為所建立，為欲往趣世間離欲乃至非想非非想處三摩鉢底，起第三取。

未四、為欲隨說

為欲隨說分別所計作業受果所有士夫，及為隨說流轉還滅士夫之相，起我語取。

辰二、取建立² 巳一、約二品辨⁴ 午一、標為依

如是四取依於二品，謂受用欲諸在家品，及惡說法毗奈耶中諸出家品。

午二、簡此法³ 未一、標

由佛世尊每自稱言：我為諸取遍知、永斷正論大師。故於此法誓修行者，雖帶煩惱身壞命終，而不於彼建立諸取。

未二、徵

所以者何？

未三、釋

彼於諸欲無所顧戀而出家故，於見、戒禁及以我語無執受故。

午三、釋建立² 未一、依惡說品² 申一、標列差別

惡說法者有二差別。一、於見愛展轉發起怨諍論者，二、能證入世間定者。

申二、配立二取

依於見愛展轉發起怨諍論者，建立見取；依能證入世間定者，立戒禁取。

未二、依通二品

二品為依，執著我語，故依俱品立我語取。

午四、釋名相³ 未一、見

此中見者，謂六十二，如前應知。

謂六十二如前應知者：前說：外道，薩迦耶見以為根本，有六十二諸惡見趣。謂四常見論、四一分常見論、二無因論、四有邊無邊想論、四不死矯亂論，如是十八諸惡見趣，是計前際說我論者。又有十六有想見論、八無想論、八非有想非無想論、七斷見論、五現法涅槃論，此四十四諸惡見趣，是計後際說我論者。（陵本八十七卷二頁⁶⁵⁵⁸）此應準知。

未二、戒禁

邪分別見之所受持身護、語護，說名為戒；隨此所受形服、飲食、威儀行

相，說名為禁。

未三、我語² 申一、標

諦故、住故，論說有我，名為我語。

申二、釋

執有實物，說名諦故；執可安立，說名住故。

已二、約愛緣辨

又於此中，欲愛為緣，建立欲取；依止智論，利養恭敬等愛為緣，建立見取；定愛為緣，立戒禁取；有無有愛為緣，立我語取。

寅十、四繫

復次，當知四繫，唯依外道差別建立，如前應知。

當知四繫等者：謂貪身繫、瞋身繫、戒禁取身繫、此實執取身繫，是名四繫。唯依外道差別建立。能於色身、名身、趣向、所緣安住事中，令心繫縛，故名身繫。如前別釋應知。（陵本八十七卷十四頁⁶⁵⁹³）

寅十一、五蓋建立² 卯一、標

復次，違背五處，當知建立五蓋差別。

卯二、列⁵ 辰一、立貪欲蓋

一、為在家諸欲境界所漂淪故，違背聖教，立貪欲蓋。

辰二、立瞋恚蓋

二、不堪忍諸同法者訶諫、驅擯、教誡等故，違背所有可愛樂法，立瞋恚蓋。

辰三、立昏沈睡眠蓋

三、由違背奢摩他故，立昏沈睡眠蓋。

辰四、立掉舉惡作蓋

四、由違背毗鉢舍那故，立掉舉惡作蓋。

辰五、立疑蓋

五、由違背於法論議無倒決擇、審察諸法大師聖教涅槃勝解故，建立疑蓋。

寅十二、株杌

復次，若貪瞋癡纏所纏故，或彼隨眠所隨眠故，心不調柔，心極愚昧，於得自義能作衰損，故名株杌。

寅十三、三垢³ 卯一、貪垢

復次，於弊下境所起貪欲，名為貪垢。

卯二、瞋垢

於不應瞋所緣境事所起瞋恚，名為瞋垢。

卯三、癡垢

於極顯現、愚癡眾生尚能了事所起愚癡，名為癡垢。

寅十四、燒害

復次，若貪瞋癡數數現行，恆常流溢，燒惱身心，極為衰損，說名燒害。

寅十五、箭

復次，若貪瞋癡遠離慚愧，無慚愧故，一向無間，不可制伏，定為傷損，說名為箭。

寅十六、所有

復次，若貪瞋癡慚愧間雜，由相續故非剎那故，有可制伏，說名所有，是繫所攝極下穢義。

是繫所攝極下穢義者：前說：貪欲身繫攝貪所有，瞋恚身繫攝瞋所有，餘二身繫攝癡所有。當知此中，極鄙穢義是所有義。（陵本八十七卷二十四頁⁶⁶²⁶）此應準釋。

丑八、廣說業² 寅一、業雜染² 卯一、唯惡行攝² 辰一、釋體義³ 巳一、出體²

午一、舉不善身業

復次，一切不善身業名為惡行。

午二、例語意二業

如說身業，語業、意業，當知亦爾。

巳二、釋名

由此惡業數現行故，於諸惡趣或已隨得、或當隨得、或現隨得，是故說彼名

為惡行。

或已隨得等者：隨謂隨逐，麤重所攝。得謂證得，彼果所攝。

巳三、顯義

由此示現業雜染義。煩惱雜染前已顯了。

辰二、辨安立² 巳一、標列二論

復次，有二安立業雜染論。一者、邪論，二者、正論。

巳二、別釋其相² 午一、邪論³ 未一、舉論說

言邪論者，謂如是說：若有故思，凡所造作諸不善業，一切決定當受惡趣。

未二、斥彼非³ 申一、標

此論便謗修行梵行能證涅槃。

申二、徵

何以故？

申三、釋

諸有情類不易可得，於現法中無有故思造不善業，況在餘生。若彼決定感惡趣者，便應無有解脫可得。

未三、結當知

是故當知此為邪論。

午二、正論²

未一、舉論說²

申一、亦作亦增長業

若如是說：諸有故思造不善業，此業亦作亦增長者，定於當來受不可愛惡趣異熟。

申二、雖作不增長業²

酉一、明順受

若有雖作不增長者，彼彼法受為依止故，諸所造作或樂、或苦，當於造時，於現法中，此業決定或順樂受、或順苦受。

彼彼法受為依止故等者：此中義顯順所受業。或順樂受、或順苦受，然以法受為依，或樂、或苦，而非一向由樂俱行、或苦俱行。業各有順樂、順苦差別，不決定故。集論中說：樂俱行業，順樂受者，還受樂異熟；順苦

受者，還受苦異熟；順不苦不樂受者，還受不苦不樂異熟。苦俱行業，順樂受者，還受樂異熟；順苦受者，還受苦異熟；順不苦不樂受者，還受不苦不樂異熟。（集論五卷七頁）由是此說，諸所造作或樂、或苦。

酉二、辨追悔² 戌一、無追悔

諸有造作如是業已，若無追悔、不修對治補特伽羅，彼於此業若更增長、若不增長，此業雖定順現法受，亦轉令成順惡趣受，於現法中能障解脫。

戌二、有追悔

諸有造作如是業已，若生追悔、修習對治補特伽羅，彼於此業若不增長、若更增長，此業雖是順惡趣受，亦轉令成順現法受，不障解脫。

未二、結當知

是故此論，不名誹謗修習梵行能證涅槃。當知此論是為正論。

此業雖定順現法受等者：順生現苦，名順現法受。順生當苦，名順惡趣受。此中義顯業有轉變，應受現法輕苦，轉成當來惡趣重苦故。下說追

悔、修習對治補特伽羅，與此相違，應知其相。

卯二、通諸業攝³ 辰一、明對治³ 巳一、標具闕

復次，若有闕於十種對治，為業雜染之所染汙；若有會遇如是十種，使得清淨。

巳二、列種類

一者、若由如是對治，雖有作業，而無增長，彼望當來成不定受。二者、若由如是對治，雖未永斷而更不受。三者、若由如是對治，永斷離繫。四者、守護諸根門故，善修其身，為欲修習增上戒學。五者、修習增上戒已，為欲修習增上心學。六者、修習增上心已，為欲修習增上慧學。七者、修習增上慧已，為斷諸漏。八者、猛利意樂修習。九者、長時修習。十者、無量門對治修習。

巳三、結染淨

若有不會如是十種業對治者，為業雜染之所染汙；與此相違，當知清淨。

辰二、辨安住³ 巳一、總標

復次，於現法中，不善防護身語意業而住者，彼先造作惡不善業亦令增長，於當來世令其雜染。若善防護身語意業而住者，彼不雜染。

巳二、雙徵

云何於現法中，不善防護身語意業而住？云何善防護身語意業而住？

巳三、別釋² 午一、不善防護² 未一、出種類

不善防護身語意業而住者，謂如有一，於諸不善身語意業纏所發起，能誓遠離；然於能起不正作意相應無明，猶故發起。又於諸善身語意業受學隨轉。

又於諸善身語意業受學隨轉者：福、不動行，總名諸善身語意業。彼於因果不知出離，唯依教法，或依誨法，亦於能起不正作意相應無明，猶故發起，是名受學隨轉。

由此因緣，於現法中，於諸煩惱、邪欲尋求、所作眾苦無有差別。

未二、明雜染

彼唯即於此誓受遠離，便生喜足，於現法中不起聖道，不證涅槃。彼雖如是防護而住，於現法中暫時不作惡不善業，然為煩惱隨眠纏縛。既終歿已，後有續生；隨所受身，依先業緣廣起雜染。

於諸煩惱邪欲尋求所作眾苦者：謂生等苦，隨業所作，業復以諸煩惱邪欲尋求為其因緣。此中義顯煩惱、業、生三種雜染，如次配釋應知。

午二、善防護² 未一、標列差別

若善防護身語意業而住者，有此差別。謂此依彼誓受遠離，不造新業，故業雖熟，暫觸異熟尋能變吐。

未二、成善護住² 申一、由無雜染³ 酉一、標堪能

彼唯於此誓受遠離不生喜足，於現法中能起聖道，亦能證得彼果涅槃。

酉二、釋證得² 戌一、有餘依涅槃

彼於爾時，乃至有識身相續住，恆受先業所感諸受。於現法中，彼有識身，乃至壽量未滅盡位，常相續住。

戌二、無餘依涅槃

壽量若盡，捨有識身，於後命根更不成就。由是因緣，識與一切諸受俱滅，後不相續，彼如影受與其識樹皆滅盡故，遍於一切不可施設。

酉三、攝略義

彼於爾時，由二因緣，先所作業於當來世不能為染。一、由煩惱為其助伴令雜染者無餘斷故；二、由依此諸行相續成熟雜染無餘滅故。

申二、由證恆住² 酉一、釋多差別

彼於爾時，諸有情所善友意樂相續轉故，名無怨心；於彼所緣瞋恚斷故，名無恚心；於業異熟深見過患增上緣力誓遠離故，名無染心；已具獲得能對治彼諸聖道故，名無顛倒善解脫心。彼由如是，能具證得六種恆住。

酉二、結異先住

若有於彼多所住者，於現法中，雖有種種諸惡不善業緣間雜，由此遠離，一向成善。由是因緣，當知此與先防護住有其差別。

若有於彼多所住者等者：謂如前說，於善防護身語意業而住多修習故。

辰三、辨施設³ 巳一、施設領受業異熟論² 午一、總標

復次，當知施設領受業異熟論，由五種相成其雜染，由五種相成不雜染。

午二、別辨² 未一、成雜染³ 申一、徵

云何名為由五種相成其雜染？

申二、列

謂由施設惡因論故，亦由施設無因論故，及由施設惡因、無因有三過故。

申三、釋³ 酉一、施設惡因論

此中施設惡因論者，謂如有一，起如是見，立如是論：若有士夫補特伽羅，諸所領受，一切皆是宿因所作。如是或謂自在、變化等因所作。

酉二、施設無因論

施設無因論者，謂如有一，起如是見，立如是論：若有士夫補特伽羅，諸所領受，當知一切無因無緣。

酉三、施設惡因無因有三種過² 戌一、徵

云何施設惡因、無因有三種過？

戌二、釋² 亥一、別辨相³ 天一、諸不善受因不成過³ 地一、標

謂現法中，不善俱行不善諸受，宿世業為因亦有過失，現法業為因亦有過失。

地二、釋² 玄一、宿業為因² 黃一、標過

若言此受宿世惡業以為因者，是則有一，依於不善諸樂法受，而有其樂不善受生，此用宿世諸不善業以為因生，不應道理。

依於不善諸樂法受等者：謂依過去不善諸樂法受，應感苦異熟果。而於現法感樂異熟不善受生，謂是宿業為因，不應道理。

黃二、釋非

何以故？非彼宿世諸不善業於現法中感樂異熟，應正道理。

玄二、現業為因

若言此受用現法中惡業為因，是則退失自意所立諸惡因論及無因論，謂諸所

受皆宿因作，乃至廣說。

地三、結

是名初過。

乃至廣說者：謂如前說，自在變化等因所作，或復一切無因無緣，是名廣說應知。

天二、謗精進過

又若說言：諸不善法皆用宿世惡業為因。是則決定所有善法，亦用宿世善法為因。如是所有不善對治，諸善加行俱生精進，皆成無用。如是名為第二過失。

天三、謗正智過² 地一、辨² 玄一、舉難² 黃一、無觀察智難

又若現在無有土用，是則應無依善不善審正觀察是所應作、所不應作。

黃二、無如實智難

又如實智應成無用。謂了知己，此我應轉、此我應成。

此我應轉等者：轉謂轉捨，了知染已，此應轉故。成謂成就，了知淨已，此應成故。

彼非有故，此亦非有，故如實智理不成就。

玄二、出過

智不成故，念不安住；念不住故，無三摩地；無有定故，不正尋思，令心迷亂；心迷亂故，便應欣慕愚夫同意所樂諸根；由彼獲得愚夫同意所樂法故，是則退失并沙門法及沙門論。

地二、結

如是名為第三過失。

彼非有故等者：謂彼現在士用若許非有，此如實智亦應非有故。

亥二、攝略說

若略說此，有三種過。謂現在世諸不善受因不成過、謗精進過、謗正智過。

未二、成不雜染³ 申一、徵

云何施設領受一切業異熟論，由五種相成不雜染？

申二、列

謂若能領受者，若由此領受，若如是領受，若領受時如是雜染、如是清淨。

申三、釋⁴ 酉一、能領受者

當知此中，依五取蘊，施設假名補特伽羅為領受者。

酉二、由此領受

即此假者，由六觸處故能領受。

酉三、如是領受

於母胎中四種差別，謂依精血大種所造，諸業、煩惱之所攝受，結生相續有取之識，及母腹中所有孔穴。

於母胎中四種差別等者：謂如下說：次有名色，次有六處，次觸，次受。是名於母胎中四種差別。於入胎時，父母精血為所依止，名依精血大種所造。中有趣生，業、煩惱力為其增上，由是此說諸業、煩惱之所攝受。餘

文易知。

由如是故，得入母胎；次有名色，次有六處，次觸，次受。如是次第而有領受。

酉四、領受時雜染清淨² 戌一、總標二因

又即此受，亦用現在觸為其因，亦用宿世業等為因。

戌二、別顯染淨² 亥一、雜染攝² 天一、出因緣

彼若聽聞諸不正法、非理作意以為因緣，便觸無明觸所生受；受為緣故，復生於愛；愛為緣故，復生於取；乃至當來生老死等眾苦差別。

天二、明所攝

如是領受諸無明觸所生受時，便有雜染所攝二諦。

便有雜染所攝二諦者：此說二諦，謂苦、集諦應知。

亥二、清淨攝² 天一、出因緣

與此相違，聽聞正法、如理作意為因緣故，便能領受明觸所生諸受差別。

天二、明所攝

受此受時，便有清淨所攝二諦。

便有清淨所攝二諦者：此說二諦，謂滅、道諦應知。

巳二、施設業行過患勝利² 午一、過患攝² 未一、標列

復次，當知施設邪業清淨及邪行中，有二過患。何等為二？一、內證稽留過患，二、他所譏毀過患。

未二、隨釋³ 申一、施設邪業清淨² 酉一、徵

云何施設邪業清淨？

酉二、釋² 戌一、出彼論

謂如有一，實非大師，妄分別已，自稱大師。宣說如是邪施設論，謂現法中諸所受苦，一切皆是宿因所作。

戌二、明彼見³ 亥一、舉二因

彼見宿世諸不善業為二種因，謂現法中諸不善業，皆是宿業串習所引；諸所

受苦，亦是彼業之所造作。

亥二、成方便² 天一、由修苦行

由是因緣，修自苦行，令故惡業所招苦果皆悉變吐，更不造作當不善業。

天二、由能防護

於現法中，又能防護身語意住，後當勤修一向善業，令不善法轉成非漏。

亥三、顯究竟

由此因緣，不善業盡；由彼盡故，眾苦亦盡，證苦邊際。

申二、邪行³ 酉一、徵

云何邪行？

酉二、釋² 戌一、信非真實

謂如有一，不能了知自業雜染，不能了知彼業對治，又於前後所證差別不如實知。彼成如是愚癡法故，於其師所得無根信，於非信處妄生真實聖教勝解。

戌二、疑不決了² 亥一、由不請問

彼由墜墮非實非理，邪論朋黨他迴動時，於可疑處而不生疑，不尋求師躬往請問：為能正記，為不能記？為能淨疑，為不能淨？為一切智、非一切智？

亥二、由畢竟轉³ 天一、標

大師去世，於所疑慮畢竟隨轉。

天二、徵

何以故？

天三、釋

大師住世，能為決了此一切智、非一切智。大師滅後，何所請問？云何決了？

酉三、結

是名邪行。

能為決了此一切智等者：謂能決了所可疑處，此邪論師為一切智、非一切智故。

申三、二種過患² 酉一、內證稽留過患³ 戌一、徵

何緣應知，如是施設令業清淨，不應道理？

戌二、釋² 亥一、出不應理² 天一、標列二緣

由二緣故，謂彼苦行宿因所作不應理故，由此能盡宿不善業不應理故。

天二、釋其所以² 地一、苦非宿作

所以者何？軟中上品自苦行緣所逼切時，軟中上品苦受生故；即此三品逼緣遠離，由所逼切三品苦受不得生故；宿因所作不應道理。

地二、不盡宿業

又此苦行，無有功能令宿所作能感苦受諸不善業成順樂受，是故彼起如是定見，由自苦行，令宿所作惡業變吐，不應道理。

亥二、別廣徵詰² 天一、詰宿所作² 地一、總徵

若有是事，彼宿所作能順苦受諸不善業，為能感得於現法中自苦逼切苦受果不？

地二、別詰²

玄一、詰能感得²

黃一、自然變吐難

若言感得此苦受果，修自苦行即為唐捐。受彼果已，自然變吐。若如是者，宿世所作諸不善業，非自苦行所能變吐。

黃二、後果非吐難

又即此業一分可吐。謂現法中受彼果者，若餘能順後所受業，彼於後世當受其果，非自苦行可令其果悉皆變吐。

玄二、詰非感得

若言現在逼切苦受非宿因作，如是所說諸所領受，一切皆是宿因所作，不應道理。

天二、詰盡宿業³

地一、出業決定²

玄一、別辨相

如能隨順苦受惡業，不可令其成順樂受；如是宿世所作能順樂受善業，不可令其成順不苦不樂受業。或彼二種順現法受，不可令其成順後受；若順後受，不可令其成無所受。若未成熟，不可令熟；若已成熟，不可彼彼方便令

轉。

或彼二種順現法受者：此說二種，即善、惡業應知。

玄二、攝要義

此中所說要略義者，所謂一切善不善業，自性決定、時分決定、品類決定。

地二、詰無堪能²

玄一、隨業決定難

若如是者，隨業決定，必能攝受如是類果。於中更自受逼切苦，復何所用。

玄二、隨自所許難

又若此受宿業因感，彼自所許令業一分滅盡可得少分勝利。由是因緣，如此所計少分勝利亦無所有。

地三、結終無脫

如是則為極自稽留業所縛故，終無解脫。

戌三、結

由此道理，是名於此邪論邪行第一過患，謂於內證自義稽留。

酉二、他所譏毀過患² 戌一、徵

云何他所譏毀過患？

戌二、釋² 亥一、出彼論行² 天一、標

謂彼依止二種邪論，發起三種自苦惱行。

天二、釋² 地一、二種邪論² 玄一、第一邪論

若作是說：所有士夫補特伽羅，諸所領受，一切皆是宿因所作。是名第一邪論，謂惡因論。

玄二、第二邪論

復有說言：如彼最初自在變化，從是已後，諸所領受，一切皆是宿業所作。是名第二邪論，謂惡因論。

地二、三自苦行² 玄一、標

三種自苦行者，謂身語意護。

玄二、釋³ 黃一、身護

身護者，謂不以身與餘有情共相雜住，唯往山林、阿練若處，獨居閑靜，都無所見而修苦行。

黃二、語護

語護者，謂彼受持默無言禁。

黃三、意護

意護者，謂心忍受自逼切苦。

亥二、顯他譏毀² 天一、出其因緣² 地一、標

彼起如是欲樂言說，為他顯示，由此二種所見圓滿，及由三種苦行圓滿，能越眾苦。然其自苦不能越度，是故為他之所譏毀。

地二、釋

若諸所受一切皆是宿因所作，亦是自在變化因作，亦是三種苦行能越因之所作，是則三種修苦行俱所受眾苦，定是宿世黑業所感，亦是暴惡自在所化，三種苦行皆不能越，是故於今受斯苦受。

天二、結名過患

若彼雖復內證稽留，而有為他所稱讚者，猶尚不可，況此為他稱讚勝利亦無所有，是故名為第二過患。由此分故，唯可譏毀。

午二、勝利攝² 未一、標列

復次，與上相違，當知施設正業染淨及正行中，有二勝利。一者、內證無滯勝利，二者、他所稱讚勝利。

未二、隨釋³ 申一、施設正業染淨² 酉一、辨² 戌一、施設業雜染論³ 亥一、徵云何施設業雜染論？

亥二、釋

謂有二業。一者、善業，二、不善業。於過去世已曾造作善不善業，今現法中受愛非愛異熟果等。受愛非愛果差別時，更復造作善不善業，由此當來受愛非愛異熟果等。

亥三、結

如是名為業雜染論。

受愛非愛異熟果等者：此中等言，等取餘等流果及增上果應知。

戌二、施設業清淨論³ 亥一、徵

云何施設業清淨論？

亥二、釋

謂如有一，不造新業，故業觸已，尋復變吐，由對治力永斷無餘，故得清淨。

亥三、結

如是名為令雜染業得清淨論。

酉二、結

如是施設正業染淨，名無上論。

申二、正行³ 酉一、徵

云何正行？

酉二、釋² 戌一、由聞思

謂如有一，於正法中成就多聞，於業雜染及以清淨，正知雜染、清淨相已，捨不善業，修習善業。

戌二、由修治³ 亥一、修習止觀² 天一、總標

彼於聞思如理作意勤方便已，為證修故，住空閑處，淨修治心，令離諸蓋及眾苦法。

天二、別釋² 地一、令離諸蓋² 玄一、止所對治

為欲斷除貪欲、瞋恚、掉舉惡作，以九種行安住其心，令心棄捨止所對治。

以九種行安住其心者：聲聞地說九種心住，其相應知。（陵本三十卷九

頁²⁵¹¹）

玄二、觀所對治

為欲斷除惛沈睡眠及以疑蓋，分析六事如理作意，修飾其心，令心棄捨觀所對治。

分析六事者：聲聞地說六事差別所緣毗鉢舍那，其相應知。（陵本三十卷

十二頁
2520)

地二、令離眾苦

從彼止觀所治出已，能正修學，消伏眾苦。

亥二、思擇受用² 天一、總標

彼既如是淨修其心，令離諸蓋眾苦法已，復於衣服、飲食、臥具受用儀則，淨修其心。

天二、別辨² 地一、受用麤弊

若由習近如是衣服乃至臥具，不善法增，善法退減，即便遠離。寧可受用麤弊衣等，憊爾自存，忍受眾苦，進修正行。

地二、受用勝妙³ 玄一、顯過患² 黃一、標流漏

又由二緣，受用勝妙衣服等因，能令生長惡不善法，謂諸妄想不正尋思。

黃二、釋二緣

何等二緣？一、於諸善未能長時串修習故，心不調柔；二、於衣服、飲食等

事欲貪堅著。

玄二、明思擇

由是因緣，修正行者調柔其心，令堪所作；於衣服等欲貪堅著，及諸無常眾緣生法，恆常繫念，深見過患。

玄三、結無染

爾時雖復受用勝妙衣服等事，而於其中無有雜染。如是行者亦受安樂，亦無有罪。

亥三、通達隨眠³ 天一、出為染

由奢摩他、毗鉢舍那修習力故，淨修其心離諸蓋已，由思擇力，於衣服等邪受用故，雖於爾時暫少成就心一境性，欲貪隨眠仍未斷故，於當來世復為雜染。

於衣服等邪受用故等者：前說於衣服等欲貪堅著，名邪受用。恆常繫念，深見過患，名於爾時暫少成就心一境性。

天二、明修斷

彼以妙慧通達是已，便修加行。為畢竟斷，受用如法邊際臥具，離諸貪著，先善修治正定資糧，漸次乃至能入清淨第四靜慮。

天三、顯解脫

以此為依，證諦現觀，隨得漏盡心善解脫。於一切苦得離繫故，究竟寂靜所攝受故，微妙清淨一切身心無間滿故，一切煩惱永離繫故，普能領納諸無漏受。

酉三、結

是名正行。

申三、二勝利

如是應知內證無滯，及彼相違五種差別他所稱讚。

及彼相違五種差別等者：前說他所譏毀過患，謂彼依止二種邪論，發起三種自苦惱行，是名五種差別。今說他所稱讚，與彼相違，應知其相。

彼於爾時，從諸蓋纏及一切苦心善解脫，於現法中彼諸隨眠無餘永斷，前際、後際業及異熟所有雜染皆善解脫，由於現法獲得聖道及道果故。

已三、施設補特伽羅差別³ 午一、標

復次，略有三種補特伽羅。

午二、列

一者、未入聖教異生，二者、已入聖教有學，三者、已入聖教異生。

午三、釋² 未一、標由三相

由三種相，應知最初補特伽羅。第二、第三，當知亦爾。

未二、釋其差別³ 申一、未入聖教異生² 酉一、徵

云何三相，應知最初補特伽羅？

酉二、釋³ 戌一、有斷非生² 亥一、標類

謂初有一補特伽羅，已得成就世間正見，了知有施，乃至廣說。

了知有施乃至廣說者：謂有施與、有愛養、有祠祀，與彼一切誹謗邪見相

違，故名正見。有尋有伺地廣說諸邪見相應知。（陵本八卷十四頁⁶¹¹）

亥二、辨相² 天一、出隨轉

彼於異時，聞不正法為因緣故，而便發起非理作意。世間正見臨將欲滅，雖未一切悉皆已滅，而堪能滅；又彼所治誹謗邪見臨將欲生，雖未已生，而堪能生。

天二、明斷生

彼於中間，聽聞正法為因緣故，遂還發生如理作意。彼臨欲生誹謗邪見不現行故，說名為斷；然其正見先成就故，不名為生。

戌二、有生非斷

第二，有一補特伽羅，不成正見及以邪見，聽聞正法、如理作意為因緣故，爾乃發生世間正見。彼於邪見不名為斷，先不成故。

戌三、亦斷亦生

第三，有一補特伽羅，成就邪見，聽聞正法、如理作意為因緣故，斷滅邪

見，生起正見。

申二、已入聖教有學² 酉一、徵

云何三相，應知第二補特伽羅？

酉二、釋² 戌一、標類

謂於佛等已得證淨。

戌二、辨相³ 亥一、有生非斷

彼於佛等先所現起一切無智，當於諸諦得現觀時先已斷盡，是故於今不名為斷；而於佛等證淨俱行明現前故，說名為生。

亥二、有斷非生

即以學道斷修所斷餘品無明，而於其明不名生起，此道與先種類同故。

亥三、亦斷亦生

彼無學道將現在前，修斷無明皆悉滅盡，又能生起諸無學明。

申三、已入聖教異生² 酉一、徵

云何三相，應知第三補特伽羅？

酉二、釋² 戌一、標類

謂聞無我相應正法。

戌二、辨相³ 亥一、有斷非生

初但由聞發生信解，而未悟入。彼於無我生信解故，能斷我見；未悟入故，不得名為生無我見。

亥二、有生非斷

如所聞法，復能如理正思惟時，於無我理能悟入故，乃得名為生無我見，於彼隨眠而未能斷。

亥三、亦斷亦生

從此已後，由修道力，證諦現觀，方斷隨眠，發生無漏。

瑜伽師地論科句披尋記卷第八十九

瑜伽師地論科句披尋記卷第九十

彌勒菩薩說

唐三藏沙門玄奘奉詔譯

韓清淨科記

攝事分中契經事處擇攝第二之二

寅二、業種類² 卯一、嗢柁南

復次，嗢柁南曰：

五二與十三 四業為最後

卯二、長行² 辰一、標列

有二種業，一者、重業，二者、輕業。復有二業，一者、增進業，二者、不增進業。復有二業，一者、故思所造業，二者、非故思所造業。復有二業，一者、定所受業，二者、不定所受業。復有二業，一者、異熟已熟業，二者、異熟未熟業。有三種業，謂善業、不善業、無記業。復有二業，謂順樂

受業、順苦受業、順不苦不樂受業。復有三業，謂順現法受業、順生受業、順後受業。復有三業，謂學業、無學業、非學非無學業。復有三業，謂見所斷業、修所斷業、無斷業。復有三業，謂三曲業，即身曲等。復有三業，謂三穢業，即身穢等。復有三業，謂三濁業，即身濁等。復有三業，謂三淨業，即身淨等。復有三業，謂三默然業，即身默然等。有四種業，一、黑黑異熟業；二、白白異熟業；三、黑白黑白異熟業；四、不黑不白無異熟業，能盡諸業。

辰二、隨釋³

巳一、五種二業⁵

午一、重業輕業²

未一、舉重因緣²

申一、標列

當知此中，由三因緣令業成重。一、由意樂故；二、由加行故；三、由田故。

申二、隨釋³

酉一、由意樂

由意樂者，謂由猛利纏等所作，於同法者見已歡喜，於彼隨法多隨尋思、多隨伺察。如是名為由意樂故，令業成重。

謂由猛利纏等所作者：貪瞋癡三猛利現行，名猛利纏。等言，等取猛利欲

樂應知。

酉二、由加行

由加行者，謂於彼業無間所作、殷重所作、長時積集，又於其中勸他令作，又即於彼稱揚讚歎。如是名為由加行故，令業成重。

酉三、由田

由田故者，謂諸有情，於己有恩，若住正行及正行果。於彼發起善作、惡作，當知此業說名為重。

未二、例輕相違

與彼相違，說名為輕。

午二、增進業不增進業² 未一、舉不增進

若業非是明了所作，或夢中作，或由無覆無記所作，

若業非是明了所作者：謂無識別幼稚所作應知。

或不善作，尋復追悔對治攝受，

尋復追悔對治攝受者：有尋有伺等地決擇中說：或有暫作，續即還起猛利悔心及厭患心，懇責遠離，正受律儀，令彼微薄，未與果報，便起世間離欲之道，損彼種子；次起出世永斷之道，害彼種子令無有餘。（陵本六十卷四頁⁴⁸⁵⁸）此應準釋。

又於一切清淨相續所有諸業，

一切清淨相續所有諸業者：謂阿羅漢相續身中諸漏已盡，是名清淨相續。如是皆名不增進業。

未二、翻例增進

當知異此，名增進業。

午三、故思造業非故思造業² 未一、舉故思造² 申一、標二種

此中故思所造業者，謂先思量已，隨尋思已，隨伺察已，而有所作。彼或錯亂，或不錯亂。

申二、別釋相² 酉一、舉其錯亂² 戌一、標相

其錯亂者，謂於餘處思欲殺害，或欲劫盜，或欲別離，或欲妄語及欺誑等。如是思已，即以此想別處成辦。

戌二、料簡

當知此中，由意樂故說名為重，不由事故說名為重。

不由事故說名為重者：事謂一一業道各別決定所依處事，或有情數、或非有情數。如有尋有伺地決擇中說應知。（陵本五十九卷十二頁⁴⁸²⁷）

酉二、例不錯亂

不錯亂者，當知其相與此相違。

未二、例非故思

若異此業，是即名為非故思造。

午四、定受業不定受業

定受業者，謂故思所造重業。不定受業者，謂故思所造輕業。

午五、異熟已熟業異熟未熟業² 未一、標體性

異熟已熟業者，謂已與果業。異熟未熟業者，與此相違。

未二、辨為障³ 申一、標

若欲證得阿羅漢時，先所造作決定受業，由異熟果現在前故，能為障礙，不由隨逐身相續故。

申二、徵

所以者何？

申三、釋² 酉一、能為障礙

但由彼業生不平等所依身故，能為障礙，令不能得阿羅漢果。

酉二、不能為障² 戌一、標定受

若無生受，而有後受，於所證得阿羅漢果不能為障，然彼非不是定受業。

戌二、釋所以

何以故？由即依彼煩惱助伴，及即依彼諸行相續，施設此業為定受故。

由即依彼煩惱助伴等者：此中義顯，彼後受業，若有煩惱助伴，及彼諸行

相續，當知非不定受。諸阿羅漢由對治力，雖有彼業，轉令不受，由是施設不能為障，以彼煩惱助伴已永盡故，諸行相續已清淨故。

已二、十種三業¹⁰ 午一、善不善無記業³ 未一、善業

復次，由二因緣建立善業。一、取愛果故；二、於所緣境如實遍知，及彼果故。

於所緣境如實遍知等者：諸所知事及所知義，名所緣境。於此一切能正了知，是名如實遍知。由遍知故，證煩惱斷及功德法，說名彼果。

未二、不善業

由二因緣立不善業。一、取非愛果故；二、於所緣境邪執著故。

未三、無記業

於善不善二種行相不可記故，立無記業。

午二、順樂受等業² 未一、約總報辨³ 申一、順樂受業

順樂受業者，謂初、二、三靜慮地繫及欲界繫所有善業。

申二、順苦受業

順苦受業者，謂能招感惡趣生業。

申三、順不苦不樂受業

順不苦不樂受業者，謂第四靜慮及上地等諸所有業。

未二、約別報辨

生於餓鬼及傍生中，先業為因感得樂受，當知此業亦得名為順樂受業。唯除那落迦，於所餘處，當知皆得苦樂雜受，即由彼業增上力故，令此依身苦樂雜住不相妨礙。

午三、順現受等業³

未一、順現法受業

順現法受業者，謂由如是相狀意樂所作諸業；若由如是相狀加行，謂事加行、或身加行、或語加行所作諸業；若由如是相狀良田所作諸業；於現法中異熟成熟，如是名為順現法受業。

未二、順生受業

若所作業，於現法中異熟未熟，於次生中當生異熟，如是名為順生受業。

未三、順後受業

若所作業，現法、次生異熟未熟，從此已後異熟方熟，當知是名順後受業。

午四、有學等業³ 未一、有學業

有學業者，謂聖弟子，於時時間依增上戒、依增上心、依增上慧修學無漏，及此後得善有漏業，名有學業。

未二、無學業

無學業者，謂於一切阿羅漢等身相續中隨應諸業。

未三、非學非無學業

此餘諸業，是名非學非無學業。

午五、見所斷等業² 未一、出體性³ 申一、見所斷

若見所斷煩惱相應，若此所發思等諸業，一切能往諸惡趣業，此等皆名見所斷業。

若此所發思等諸業者：此中等言，等取思已業。集論中說：何等思業？謂福業、非福業、不動業。何等思已業？謂身業、語業、意業。（集論五卷三頁）此應準知。

申二、修所斷

若修所斷煩惱相應，及此所發思等諸業，如是皆名修所斷業。

申三、無斷

無斷業者，所謂一切有學、無學出世間業。

未二、廣除斷⁴ 申一、標

當知此中，由三種相，故思所造諸不善業，即於現法作增長已，還復除斷。

申二、徵

何等為三？

申三、列

一、現法斷故；二、生斷故；三、後斷故。

申四、釋³ 酉一、現法斷² 戌一、標類

現法斷者，謂如有一，於現法中故思造業，作增長已尋復厭離，於其所作受厭離故。此是異生未得離欲。

戌二、釋相

住此命終，而未能令於次生位不造彼業、不受異熟，亦未能令於其後位無有是事。於現法中，亦未一向能令不造。

酉二、生斷² 戌一、標類

生斷故者，謂復有一，受厭離已，雖是異生，而於欲界已得離欲。

戌二、釋相

住此命終，彼於現法更不造作，尚於次生不受異熟，況復生已當有所作。然未解脫後位作業及受異熟。

酉三、後斷³ 戌一、標類

後斷故者，謂復有一，雖是有學，而於欲界未得離欲，受厭離已，獲得最

初、或復第二沙門果證。

戌二、釋由² 亥一、由發正願

彼作是念：凡我所有由多麤重、由多熱惱、唯應棄捨可厭賤身所作惡業，願於現法一切皆受；或我所有現法受業，若苦、若樂，皆願與彼俱時而受；勿復令我當於生位、或於後位受彼異熟。

亥二、由修無量² 天一、總標

如是正心發誓願已，為斷彼故，復修無量，以奢摩他品定所攝正起加行，為令能起彼業因緣究竟盡故，及為進趣離欲愛故。

天二、別釋² 地一、為盡惡業因緣² 玄一、由正對治² 黃一、舉所治

當知此中，或瞋意樂、或害意樂、或嫉妒性、或可愛事深生染著，由此為因，於諸有情發起邪行，謂身語意所發惡業種種惡事。

黃二、明能治

若有為欲對治如是能起四種惡業因緣，修四無量勝三摩地，彼乃至於少男、

少女，無處無容暫更發起作惡業思，是故彼修如是加行，能盡所有惡業因緣。

玄二、由遍摧伏³ 黃一、標

當知如是正修加行，由二因緣，於其所作及所增長一切惡業皆能摧伏。謂由修習無量定故。

黃二、徵

所以者何？

黃三、釋³ 字一、有量無量別

所作惡業，但於有量有情境界欲不饒益意樂所起；所修無量，乃於無量有情境界欲作饒益意樂所起。

字二、所治能治別

又能發起不善業心，下劣界攝，是所對治；所修無量俱行之心，勝妙界攝，是能對治。

字三、繫屬依轉別

又心是勝，諸所造業皆屬於心，故說世間并是心胤，繫屬心故、依心轉故。

地二、為盡趣離欲愛

如是行者，先發正願為所依止，後善修習無量心定，當於進趣離欲愛時，便能獲得住不還果。

戌三、顯相

若但於此暫生喜足，於現法中不求上進，彼現法中尚不造業，況於生位、或於後位。又定不能當受生位、後位異熟。

午六、三曲業

又正法外墮邪見者、行邪道者，所有一切善不善業，邪見所起。邪見增上力所生故，皆名曲業。

午七、三穢業

猛利貪瞋所起諸業，皆名穢業。

午八、三濁業

猛利癡者、上品鈍根忘失念者、極闇鈍者、癡所起業，皆是濁業。

午九、三淨業

一切能往善趣妙行，皆名淨業。

午十、三默然業

一切能往涅槃妙行，名默然業。

巳三、一種四業⁴ 午一、出體性⁴ 未一、黑黑異熟業

復次，能感各別處所那落迦惡業，名黑黑異熟業。

未二、白白異熟業

能感各別處所天趣善業，名白白異熟業。

未三、黑白黑白異熟業² 申一、標名

能感餘處所有諸業，名黑白黑白異熟業。

申二、釋說

於是處所有二業果現前可得，是故總說以為一業。

未四、不黑不白無異熟業能盡諸業² 申一、標名

若出世間諸無漏業，皆名不黑不白無異熟業，能盡諸業。

申二、釋義² 酉一、能盡諸業

若已盡業、若當盡業，二種總名能盡諸業，令未生者當不生故，令已生者得離繫故。

酉二、簡說不白

由約可愛因果異熟，故說不白。

由約可愛因果異熟等者：此中義顯，諸無漏業非可愛因，不感異熟，故說不白。

午二、隨難釋² 未一、出各別處所類² 申一、天趣類² 酉一、標總說

當知各別處所天趣一向白者，謂過他化自在天處，有欲界中魔王所都眾魔宮殿，及上梵世乃至非想非非想處所有善業，總說為一。

酉二、釋所由

由彼處所，眼所見色乃至意所知法，一向可愛，相續殊勝增上義故，意門引發意成義故。

相續殊勝增上義故等者：此中二義，如次配釋欲界最上天子，及上梵天乃至非想非非想處天應知。言意成者，謂彼色無色天從意生故。

申二、那落迦趣類

各別處所那落迦有四。一、大那落迦，二、別那落迦，三、寒那落迦，四、邊那落迦。

未二、釋各別處所名

於此處所，各別純受順樂受業諸果異熟，各別純受順苦受業諸果異熟，是故說名各別處所。

午三、別料簡² 未一、標差別

又於魔宮、初二靜慮純受悅樂，若於第三靜慮已上純受喜樂。

未二、釋喜樂

言喜樂者，令心調柔、令心安適，與喜相似，故名為喜，非是喜受；與樂相似，說名為樂，非是樂受。

午四、引經言

六觸處門恆所領受者，當知即彼名六觸處及各別處所，因果相屬道理義故。

六觸處門恆所領受等者：眼所生觸乃至意所生觸，是名六觸。如是六觸依根、境生，由能生義，故名為處。純受順樂受業、順苦受業諸果異熟，依六處門，恆時領受若樂、若苦，是名恆所領受。即此純受順樂受業、順苦受業諸果異熟，生所依處有多差別，是名各別處所。當知此六觸處，是現果相；先業所作，是其因相。因能感果，果酬於因，是名因果相屬道理。顯揚論說：今六觸處，即前世思所造故業。（顯揚論一卷四頁）此應準知。

癸二、智攝²

子一、頌標列

復次，溫柁南曰：

無智智與定 殊勝障學等 著無我聖道 二海不同分

子二、長行釋¹⁰ 丑一、無智² 寅一、標失德

若諸邪見、若諸我見、若即無明，依前所說三有情眾無智為根，故得生起。

依前所說三有情眾者：謂如前說，曲業、穢業、濁業三有情眾應知。

若能斷此無義根本一切眾中，能起一切雜染一法，當知彼能正記所解。

能起一切雜染一法者：此中一法，謂即無明。此為無義根本，能起一切雜染故。

寅二、釋行相

此中第一所起雜染，損減實事；第二雜染，增益虛事；第三雜染，於其如實顯了方便能作愚癡。

如實顯了方便者：謂佛世尊宣說真實無量法教應知。

於彼二因有愚癡故，或起增益、或起損減。

於彼二因有愚癡故等者：說有說無，名彼二因。於有愚癡，故起增益；於無愚癡，故起損減。

丑二、智² 寅一、出種類² 卯一、標列

復次，有二種如實智。一者、如理作意所發，二者、三摩地所發。

卯二、隨釋² 辰一、如理作意所發² 巳一、總標

當知此中，由正聞思所成作意，聽聞正法增上力故，於五種受分位轉變所起過患如實了知，又即於此分位轉變如理思惟，名不定地如實正智。此為依止，能隨入修。

巳二、別釋³ 午一、釋過患

云何名為分位轉變所起過患？謂苦樂位諸無常性，苦分位中有自性苦性，樂分位中有變壞法性。

午二、釋轉變

云何名為分位轉變？謂樂分位與苦分位有別異性，若苦分位與樂分位有別異

性，如是當知一切分位展轉別異。

午三、釋如實智

於此別異如實觀見，於此分位住無常想，如實觀見別異過患，知所有受皆是苦已，住於苦想。有如是想、有如是見，能證清淨，是故亦得名如實智。

辰二、三摩地所發

依定所發如實智者，謂即依彼行相轉時，輕安所攝清淨無擾寂靜而轉。當知此行與前差別。

當知此行與前差別者：謂定所發如實智相，雖亦如前，依彼無常及苦行相而轉，然有差別，聞思修慧行相異故。

寅二、顯勝能

又無常性是一切行共相，苦性是一切有漏法共相。二如實智為依止故，當知如實能正顯了彼法二相。

丑三、定² 寅一、標內外別

復次，住內法者未得定心，尚與外道定心差別，由智勝故，何況定心。

寅二、釋其所以² 卯一、外道攝² 辰一、出彼失

何以故？彼諸外道雖得定心，乃至極遠證得非想非非想定，然猶未能於六觸處，以其五轉如實了知，心正離欲，證得解脫。

以其五轉如實了知者：謂如前說：於五種受分位轉變所起過患如實了知故。

辰二、顯差別

是故彼與此正法律，猶如地空，相去極遠。

卯二、內法攝² 辰一、標由勝解

住內法者雖未得定，但由信聞無我勝解，便能證得三摩地心，於六觸處能斷、能知，心得離欲及證解脫。是故當知，於正法律彼有失壞，此無失壞。

辰二、釋其妙行² 巳一、標五種

唯正勝解相續轉時，於六境界，依止六根，略有五種寂靜妙行。

巳二、釋彼相⁵ 午一、善調

謂深於彼見過患故，名為善調。

午二、善覆

於不應役諸境界中而不役故，名為善覆。

午三、善守

於所應役諸境界中，或於率爾現前境上，善住念故，名為善守。

午四、善護

一切煩惱皆能斷故，名為善護。

午五、善修

已善修習圓滿道故，名為善修。

丑四、殊勝² 寅一、顯勝安立² 卯一、標

復次，於二處所，如來證得勝安立智，能正顯說超諸苦樂，非不證得勝安立智。

卯二、釋² 辰一、斥邪解

於中若有作如是解：此大沙門喬答摩種無知無解，於諸世間一向安樂，為令弟子謂此安樂間雜眾苦深怖畏故，為超苦樂間雜依附諸世間故，為欲超過諸苦樂故，宣說法要。當知此解是為邪想，是邪分別，是大邪見。

辰二、顯正說

然其如來善知世間或一向樂、或一向苦、或雜苦樂，然彼一切皆是無常，是故為令諸弟子眾，超過一切無常世間，超過苦樂，說正法要。

寅二、廣應正知² 卯一、舉境事² 辰一、總標

由三種相，應正了知諸可愛事。

辰二、別釋⁴ 巳一、所追求

謂未來世諸可愛事，名所追求。

巳二、所尋思

若過去世諸可愛事，名所尋思。

巳三、所受用

若現在世可愛外境，名所受用。

巳四、所耽著

若現在世可愛內受，名所耽著。

卯二、釋行相² 辰一、標

當知此中，墮於三世，有四行相。

辰二、釋² 巳一、於三世

一、於未來，二、於過去，三、於現在。

巳二、四行相

於此行相能隨悟入是悅意相、意所樂相、可愛色相、平安色相，如其所應，當知即是可欣、可樂、可愛、可意四種行相。

由三種相應正了知諸可愛事等者：攝異門分說：此可愛事略有三種。一、可希求事，二、可尋思事，三、可耽著事。未來可愛事可希求故，名為可

欣。過去可愛事唯可欲故、唯可樂故，名為可樂。現在可愛事略有二種。一、境界事，二、領受事。若境界事可愛樂故，名為可愛。若領受事可愛樂故，名為可意。如是所說諸可愛事，或過去、或未來、或現在、或境界、或領受，有差別故，或名可希求事、或名可尋思事、或名可耽著事。（陵本八十四卷十二頁⁶³⁸⁵）此中諸義，準彼應知。

丑五、障³ 寅一、標障治

復次，勤修定者，略由二門、二時、二地所有諸欲，於所引發三種等持能為障礙。為欲斷除如是障礙，正勤修習五種對治。

寅二、隨別釋² 卯一、障礙攝² 辰一、辨能障³ 巳一、由二門

當知此中，先所受用過去諸欲，於遠離處，由尋思門令心飄蕩；

先所受用過去諸欲等者：此顯出家補特伽羅應知。

復有現在居家所有利養恭敬俱行諸欲，由尋思門令心散亂。

巳二、於二時

此中利養恭敬俱行所有諸欲，於其行時令心飄蕩；先所受用居家諸欲，於其住時令心散亂。

巳三、於二地

即此諸欲，於異生地能為障礙，於有學地亦為障礙。

辰二、顯所障⁵ 巳一、標三等持

又於異生所修無量俱行等持，能為障礙；亦於有學能善通達一切智事廣大等持，能為障礙；亦於無學極善修習究竟等持，能為障礙。

巳二、釋三喜俱² 午一、總標

當知如是諸所生起一切等持，皆與喜俱。

午二、別辨

此中第一，於諸有情利益安樂意樂門中，與喜俱行；第二，領受有學解脫喜故，與喜俱行；第三，領受無學解脫喜故，與喜俱行。

巳三、辨六所緣

彼由眼等所識色等所緣別故，復有六種。

彼由眼等所識等者：此顯前三等持，依六境事所有差別應知。

巳四、釋名圓滿

又此等持具諸相故，名為圓滿。

又此等持具諸相故等者：入、住、出相隨意自在，名具諸相。齊此名為修習圓滿。

巳五、顯其究竟

又此等持究竟邊際，謂能往趣世間離欲，或能往趣出世離欲，過此更無能趣清淨等持可得，是故說此無有闕減。

卯二、對治攝² 辰一、出五法³ 巳一、正念正知

若欲速證沙門果者，於身命等無所顧戀，恆常無間、殷重加行，熾然精進。於諸欲中，了知自相，堅守正念；了知過患，無希望等正知現前。

巳二、無放逸

正念、正知為所依故，方便勤修四無放逸，謂於晝分若行、若坐，於諸障法淨修其心，乃至廣說。

方便勤修四無放逸等者：行住坐臥正知而住，是名四無放逸。聲聞地說：常勤修習惺寤瑜伽，其相應知。（陵本二十四卷一頁²⁰⁰³）

已三、修習止觀² 午一、辨別修² 未一、奢摩他分

如是發起勇猛精進，於其所證無所怯劣。由九種相安住其心，一向修習奢摩他定，身得輕安，無愛味等，故無染汙。

無愛味等故無染汙者：愛、見、慢、疑，名愛味等。無此隨惑，故無染汙。

不為昏沈及以睡眠二隨煩惱之所擾亂。

未二、毗鉢舍那分

一向念住為所依止，精勤修習毗鉢舍那，堅守正念，遠離掉舉隨煩惱故，無有愚癡。

午二、明雙運

已入止觀雙運轉道，其心正定，即此二分一境隨行。

即此二分一境隨行者：謂奢摩他、毗鉢舍那二種和合平等俱轉，是名一境隨行。此即釋前止觀雙運轉道應知。

辰二、顯能治

為斷彼障，修習如是五種對治為依止故，能於彼障遍知、永斷。於三等持，依六境事所有差別，喜俱行定圓滿能引。

寅三、出解因

由二因緣，諸佛世尊為諸弟子宣說自己能引導法。一、於黑品所有過失令生解故；二、於白品所有功德令生解故。

丑六、學等² 寅一、略標列

復次，於此正法毗奈耶中，略有二種補特伽羅。一、已得意，二、未得意。

寅二、別釋相² 卯一、補特伽羅相² 辰一、已得意

已得意者，復有二種。一、已見諦，已得有學心解脫意；二、阿羅漢，已得無學心解脫意。

辰二、未得意² 巳一、標類

未得意者，謂於三學創修事業有學異生。

巳二、釋相

彼全未得一切二種心解脫意，是故希求異生體後有餘依滅，及自體後無餘依滅涅槃界時，於三學中多修學住。

異生體後有餘依滅等者：謂彼異生，最初希得有餘依滅，後復希得無餘依滅，是故此中作次第說。依二涅槃界，名異生體後及自體後。

卯二、修不放逸相³ 辰一、無學² 巳一、明有退

若諸無學，雖已證得心解脫意，而或失念行縱逸時，便有退失現法樂住。

巳二、辨應修² 午一、非為證得解脫

彼雖於此現法樂住或退不退，然無堪能退失解脫。若有修行不放逸者，一切

皆為證得解脫。然已證得解脫無退，修不放逸復何所用？

午二、為證現法樂住

若為證得現法樂住，勤作功用。如造工業，非不放逸。

如造工業非不放逸者：此中義顯，成就軟根諸無學果，於其現法樂住，若心放逸，即可退失；不放逸故，能不退失。是故應勤功用，修不放逸。如造工業，隨彼勤劬為建立，方能成辦。於彼非不有放逸事，是故應修無放逸行。為證現法樂住，道理亦爾。

辰二、有學

若諸有學，先已證得心解脫意，彼亦決定趣三菩提，於所修道不由他緣，自然能修無放逸行，於現法中猶未畢竟息放逸故。

辰三、異生³ 巳一、標應修

若有一切未得意者，彼應決定修不放逸。

巳二、辨應作

又由三相，辦所應作。一、由諸根所集成故，資糧圓滿；二、由習近隨順如法諸臥具故，心得安住；三、由依止親近善士、聞他法音、如理作意眾因緣故，乃至獲得二心解脫。

巳三、顯應知² 午一、總標

又即於此應不放逸所作轉時，由二種相，應知於彼六處寂滅有增上慢、無增上慢。

午二、別釋² 未一、舉有慢² 申一、釋² 酉一、除邪分別² 戌一、標因

謂於未滅起邪分別，妄執為滅，由所緣故；及於未得起邪分別，妄執為得。

戌二、顯過

彼雖如是起邪分別，謂滅解脫，而未能令身壞已後壽命永盡、六處永滅，亦不能離諸境界想。

由二種相等者：於彼六處寂滅若緣、若證起邪分別，名二種相。如下自釋，謂於未滅起邪分別，妄執為滅，由所緣故，是為初相。及於未得起邪

分別，妄執為得，是第二相。如次配釋若緣、若證應知。

酉二、釋由領受

又彼由於六處寂滅若緣、若證邪領受故，有如是事。

邪領受故有如是事者：由邪領受，起邪分別。未滅執滅，未得執得，名有如是事，指前說故。

申二、結

此二種相，應知說名有增上慢。

未二、例無慢

與此相違，當知說名無增上慢。

丑七、著² 寅一、舉黑品² 卯一、總標

復次，住內法者，於二種著，應當了知二種過患。

卯二、別釋² 辰一、二種著

謂諸異生，於二緣識及能依受，不能了知無我性故。

於二緣識及能依受等者：如下釋義可知。

未離欲者，於利養恭敬增上業緣所起諸受，有第一著；已離欲者，於離諸欲緣所起諸受，有第二著。

辰二、二種過患² 巳一、第一過患² 午一、釋² 未一、正顯內法

此著為因，當來生起，說名為生。

未二、兼說外道

又諸外道，由取著故，生諸繫縛；繫縛生故，能生一切惡不善法。

午二、結

當知是名第一過患。

巳二、第二過患² 午一、釋² 未一、由第一著

又由此著增上力故，當於正法毗奈耶沒，及當來世生等眾苦差別而生。

未二、由第二著

於現法中，此增上力為因緣故，不般涅槃。

午二、結

當知是名第二過患。

寅二、例白品

與此相違，應知即是白品差別。

丑八、無我² 寅一、標能究竟

復次，由四因緣，於法無我能到究竟。

寅二、列四因緣

謂一切法皆無我者，除識自性、識諸因緣、識諸助伴，其餘所有不可得故；又識自性是無常故；又此因緣是無常故；又此助伴是無常故。

丑九、聖道² 寅一、總標

復次，由八聖支道法故，及此果故，顯發正法及毗奈耶。

寅二、別釋² 卯一、道支² 辰一、標最勝

由五種相，當知八聖支道法最勝無罪。

辰二、釋五相⁵ 巳一、現見

謂於現法煩惱有無善分別故，名為現見。

巳二、無熾然

能令煩惱得離繫故，名無熾然。

巳三、應時

若行、若住、若坐、若臥一切時中，皆可修習，易修習故，名為應時。

巳四、引導

導涅槃故，名為引導。

巳五、唯此見

不共一切諸外道故，名唯此見。

卯二、道果² 辰一、標名內證

遠離信他、欣樂行相、周遍尋思、隨聞所起、見審察忍，唯自證故，名內所證。

辰二、指釋五相

此道果法亦有五相。

此道果法亦有五相者：此中五相，謂即前說遠離信他、欣樂行相，是為初相。遠離周遍尋思，是第二相。遠離隨聞所起、見審察忍，是後三相。如下說言：由五種相，當知涅槃是內證法。謂離信故，乃至離見審察忍故。

（陵本九十二卷十七頁⁶⁹⁶⁹）此應準知。

當知已如攝異門分別其相。

已如攝異門分別其相者：攝異門分說：越渡惑者，謂於自所證。越渡疑者，謂於他所證。非緣於他者，謂於此法內自所證，非但隨他聽聞等故。非餘所引者，謂於大師所有聖教，不為一切外道異論所引奪故。於諸法中得無所畏者，謂於自所證，若他詰問無悚懼故。（陵本八十三卷十四頁⁶³¹⁷）如是一切，應知分別內所證相。

丑十、二海不同分²

寅一、標列二海

復次，海有二種。一者、水海，二、生死海。

寅二、出不同分⁴ 卯一、標

由三種相，當知水海與生死海而不同分。

卯二、徵

何等為三？

卯三、列

一者、自性不同分故；二者、淪沒不同分故；三者、超渡不同分故。

卯四、釋³ 辰一、自性不同分

此中自性不同分者，謂水大海，用色一分為自性故，有邊有量；生死大海，用一切行為自性故，無邊無量。

辰二、淪沒不同分³ 巳一、標列

此中淪沒不同分者，謂若所有淪沒、若由此淪沒、若如是淪沒，皆不同分。

巳二、隨釋³ 午一、所有淪沒

謂水大海，或傍生趣、或有人趣於中淪沒；生死大海，諸天世間亦常淪沒。

午二、由此淪沒² 未一、水大海² 申一、總標簡

又水大海，唯由身故，於中淪沒；不由語故、不由意故、不由貪故、不由瞋故、不由癡故、不由生等眾苦法故，於中淪沒。

申二、釋宣說

此中宣說諸業、煩惱、彼果三分，如其次第，應知彼相。

如其次第應知彼相者：身語意相，諸業所攝。貪瞋癡相，煩惱所攝。生等眾苦，彼果所攝。如是次第應知。

未二、生死大海

生死大海，亦由身故，乃至亦由生等苦故，於中淪沒。

午三、如是淪沒² 未一、生死大海⁴ 申一、由諸尋思

諸出家者，由妄尋思，由妄觀察，由自所起諸邪分別，發起種種不正尋思，令心擾亂，於生死海恆常淪沒。

申二、由煩惱繫

又餘外道，諸煩惱繫所纏繫故，於生死海恆常淪沒。

申三、由無厭離

諸在家者，恆常無間眾苦逼切，煩惱燒然，而不能厭，故名淪沒。

申四、由諸雜染

其餘依止諸業、煩惱，於諸生處往還無絕，故名淪沒。

未二、水大海

其水大海，雖墮其中，暫時衰損。或傍生趣，由業、煩惱一分勢力，而生其中，暫時淪沒，而非究竟。

已三、總結

當知是名沒不同分。

辰三、超渡不同分² 已一、水大海

此中超渡不同分者，謂水大海，未離欲貪諸異生類尚能越渡，何況其餘。

已二、生死大海² 午一、明建立

生死大海三分建立。未離欲者，由五可愛境界差別故；已離欲者，由意所識可愛諸法境界差別故；諸有學者，由內六處有差別故。

午二、辨超渡³ 未一、未離欲異生

其未離欲諸異生類，於五可愛境界大海未能超渡。

未二、已離欲異生

其已離欲諸異生類，於內各別六處大海未能超渡。

於內各別六處大海未能超渡者：思所成地說：暴流有六。謂眼暴流能見諸色，乃至意暴流能了諸法。佛聖弟子，若已永斷五下分結，名已超渡前五暴流；若復永斷一切上分諸結，名已超渡第六暴流。如彼釋相應知。（陵本十七卷十六頁¹⁵⁰⁵）今說於內各別六處大海，當知即六暴流。由是諸異生類，故說未能超渡。

由彼於此未超渡故，於前二種境界大海亦未超渡。

於前二種境界大海者：前說五可愛境，及意所識可愛諸法，是名二種境界大海。

未三、諸有學者² 申一、出因緣² 酉一、由遍知

其有學者，普於六處遍知為苦，即於所緣修習正道。彼由安住如是住故，於未離欲、已離欲地二種境界，所有心意所緣境相明了現前。

酉二、由觀察

又由猛利觀察作意，於先所見等隨憶念，由此因緣，於彼速疾以慧通達，亦能除遣。

申二、明超渡² 酉一、於三分大海

又彼於其六處大海速能超渡，能超渡故，於前二種境界大海畢竟超渡。

酉二、於四種煩惱

及能超渡能發棄捨所學煩惱、能發尋思亂心煩惱、能發耽著世間利養恭敬煩惱、能發一切惡行煩惱。

及能超渡能發棄捨所學煩惱等者：謂阿羅漢永斷五支，於五處所不能復犯。如思所成地說。（陵本十九卷十七頁¹⁶⁷⁰）今此諸相，隨應配釋應知。

癸三、同等攝² 子一、頌標列

嗚柁南曰：

道師不同分 王國二世間 有為遮身行 堅執三空性

子二、長行釋⁸ 丑一、道不同分² 寅一、標列

略有二種道不同分。一、自性不同分，二、行相不同分。

寅二、隨釋² 卯一、自性不同分² 辰一、出體

若趣苦集行，若趣苦滅行，是名自性不同分。

辰二、釋義

當知初一能趣雜染，第二能趣清淨，是名此中不同分義。

卯二、行相不同分² 辰一、總標差別

即此趣滅行，或有有為共相行轉，或有有為、無為共相行轉，是名行相不同

分。

或有有為共相行轉等者：諸行無常，是名有為共相。諸法無我，是名有為、無為共相。

辰二、料簡相望² 巳一、名不同分

當知此中，若諸有為共相行相，彼望道果名不同分。

巳二、亦名同分

若有為、無為共相行相，彼望道果亦名同分。何以故？道果涅槃常無我故。

丑二、師不同分³ 寅一、總標

復次，於正法內，略有五種師假立句，諸外道師所製論中都不可得。

寅二、別釋³ 卯一、初三句

謂趣諸取行，趣諸取盡行，若一切法遍知、永斷、作苦邊際。

卯二、第四句² 辰一、總標

若於五相受建立處——一相中，不依四相薩迦耶見；用彼為依，能害四種行相

憍慢。

不依四相薩迦耶見等者：前說：四種我見為所依止，能生我慢。一、有分別我見，二、俱生我見，三、緣自依止我見，四、緣他依止我見。（陵本八十六卷五頁⁶⁴⁹⁸）是名四相。薩迦耶見以此為依，能生四種行相憍慢，亦如彼釋應知。今翻彼義，故作是說。

若慢為因，有三過患；離慢為因，有三勝利。

辰二、別釋² 巳一、舉三過患³ 午一、第一過患

當知此中，懷憍慢者，於涅槃界其心退還，由怖畏故，是名第一過患。

午二、第二過患

於諸惡行恆現行中，及於可愛諸雜染事，其心趣入，是名第二過患。

午三、第三過患² 未一、辨² 申一、舉生等病² 酉一、舉由怖畏

於涅槃界深生怖畏增上力故，便能生起當來生等生死重病。

酉二、例由趣入

如由怖畏增上力故，如是亦由於諸惡行及於可愛諸雜染事，其心趣入增上力故，堪能生起當來生等生死重病。

申二、例癰毒箭

如生等病，眼等處癰、貪等毒箭，當知亦爾。

未二、結

是名第三過患。

巳二、翻三勝利

與此相違，當知即是離慢為因三種勝利。

卯三、第五句

若隨緣起增上力故，於現法中後有種子或增、或減，由此為因，當來後有或生不生，以能攝受種子煩惱或有集起、或滅沒故。

寅三、總結

一切世間及出世間所有法教如實建立，唯於內法，有此大師為諸弟子正所宣

說師假立句真實可得，非諸外道。

丑三、王國

復次，於欲界中，諸器世間當知譬如王所王國，有情世間譬如臣民，彼惡天魔譬如君主。

丑四、二世間²

寅一、標列

復次，有二世間。一、有情世間，二、器世間。

寅二、料簡

其器世間，為火災等之所壞滅；有情世間，剎那剎那各各內身任運壞滅。

丑五、有為³

寅一、標列

復次，空有二種。一者、有為，二者、無為。

寅二、別辨

此中有為，空無常、恆、久久安住、不變易法，及我、我所。

空無常恆久久安住不變易法等者：謂有為法，無常、無恆、無久久安住、

無不變易法，亦無我及我所。即由此義，說彼為空。前說：於諸行中，修無常想行有五種。謂由無常性、無恆性、非久住性、不可保性、變壞法性故。（陵本八十六卷一頁⁶⁴⁸⁵）今此諸義如彼別釋，隨應配屬當知。

若諸無為，唯空無有我及我所。

寅三、隨廣² 卯一、標道理

又此空性離諸因緣，法性所攝，法爾道理為所依趣。

卯二、釋遍攝

此或如是、或異、或非，遍一切處，無不同歸法爾道理。

又此空性等者：聲聞地說：由彼諸法本性應爾、自性應爾、法性應爾，即此法爾，說名道理瑜伽方便。或即如是、或異如是、或非如是，一切皆以法爾為依，一切皆歸法爾道理，令心安住、令心曉了。如是名為法爾道理。（陵本二十五卷十頁²¹¹⁰）此說空性，其義亦爾。

丑六、遮身行² 寅一、標

復次，如來不遮能得一切世間邊際，唯遮身行隨往能得世間邊際。

寅二、釋² 卯一、標應知

此中當依勝義道理，應知世間、若得世間邊際方便，及世邊際。

卯二、釋差別³ 辰一、說名世間

謂於方處有世間想，假名施設增上力故，即由世間若智、若想增上力故，說有世間。若想、若智增上力故，於諸世間廣起言說。

辰二、名得世間邊際方便

由或見聞、或覺、或知增上力故，於六觸處，由其五轉起如實智，名得世間邊際方便。

於六觸處由其五轉等者：前說：於五種受分位轉變所起過患如實了知。名如實智。如彼釋義應知。

辰三、名得世間邊際² 巳一、出異名⁴ 午一、名能到世間邊際

未來諸行因永盡故，名為能到世間邊際。

午二、名世間解

於世因果如實知故，名世間解。

午三、名善運轉世間邊際

能正任持最後身故，名善運轉世間邊際。

午四、名超世間愛者

於現法中，一切境界愛永盡故，具恆住故，說名能超世間愛者。

具恆住故者：謂阿羅漢，具足成就六恆住法應知。

巳二、結能得

由如是等所說行相，當知名得世間邊際。

丑七、堅執² 寅一、標非

復次，非善說法毗奈耶中諸出家者，隨有一惡不善尋思未生生時，一向能為梵行障礙，如彼生已堅執不捨。

未生生時者：謂先未生，今時生故。

寅二、釋義² 卯一、於未生生時

此中不行，最為殊勝。

卯二、於生已相續² 辰一、標不應

設有行者，不應堅執，於相續中，不應為作居住依止。

辰二、釋所以

何以故？剎那雜染不能傾動所修梵行，要當相續能傾動故。

丑八、三空性³ 寅一、空住空性² 卯一、略標列

復次，當知略有二種空住。一者、尊勝空住，二者、引彼空住。

卯二、隨別釋² 辰一、尊勝空住³ 巳一、出體

諸阿羅漢觀無我住，如是名為尊勝空住。

巳二、顯義

由阿羅漢法爾尊勝，觀無我住，於諸住中最為尊勝。

巳三、釋名

如是或尊勝所住，或即住尊勝，由此因緣，是故說名尊勝空住。

辰二、引彼空住² 巳一、明漸次

引彼空住者，謂如有一，若行、若住如實了知煩惱有無；知有煩惱，便修斷行，知無煩惱，便生歡喜；生歡喜故，乃至令心證三摩地；由心證得三摩地故，如實觀察諸法無我，晝夜隨學，曾無懈廢。如是名為引彼空住。

巳二、出空性

當知此中，於內煩惱如實了知，有知為有，無知為無，是名空性。

寅二、修習空性³ 卯一、標

復次，正見圓滿已見諦跡諸聖弟子，皆能如實越彼邪空，亦能如實入正不空，以世間道及出世道修習空性。

卯二、徵

其義云何？

卯三、釋² 辰一、釋空性² 巳一、明正觀³ 午一、標義

謂於此處彼非有故，正觀為空。若於此處所餘有故，如實知有。

午二、舉喻² 未一、約時位辨² 申一、空

譬如客舍，於一時間無諸人物，說名為空。

申二、不空

於一時間有諸人物，說名不空。

未二、約分全辨² 申一、空

或即此舍，由無一類，說名為空。謂無材木，或無覆苫，或無門戶，或無關鍵，或隨一分無所有故。

申二、不空

然非此舍即舍體空。

午三、合法² 未一、約三趣辨² 申一、空

如自體所依止身，亦名受趣、亦名想趣、亦名思趣。然此自體所依止身，於一時間，由無一類或受、或想、或復思等，一切煩惱、隨煩惱等，說名為

空。

申二、不空

於一時間，由有一類，說名不空。

未二、約六處辨² 申一、空

或即自體所依止身，於一時間，由無一類或眼、或耳、或鼻、或舌、或身一分、或意一分，說名為空。

申二、不空

然非自體所依止身，即自身體一切皆空。

巳二、辨趣入² 午一、顛倒趣入

當知此中總略義者，若觀諸法所有自性畢竟皆空，是名於空顛倒趣入，亦名違越佛所善說法毗奈耶。

午二、如實趣入

若觀諸法由自相故，一類是有、一類非有，此有非有畢竟遠離。

此有非有畢竟遠離者：謂由觀增上力，觀彼諸法或有非有，而彼諸法實無有非有性，是名畢竟遠離。

又觀有性，於一時間一分遠離，於一時間一分不離，如是名為於彼空性無有顛倒如實趣入。

辰二、釋修習²

巳一、依世間道²

午一、辨²

未一、為住遠離²

申一、標思惟

以世間道修空性者，謂聖弟子住遠離處，先於城邑聚落人想作意思惟，次復思惟阿練若想。

申二、辨空性²

酉一、約二想辨²

戌一、空

彼即觀察於自身中，此想為空，謂人邑等想。

戌二、不空²

亥一、阿練若想

此想不空，謂阿練若想。

亥二、想相應法

又餘不空，謂阿練若想為緣，阿練若想相應諸受思等。

酉二、約一想辨² 戌一、空

或即此想，由一類故，觀之為空，謂無麤重不寂靜住及熾然等。

戌二、不空

由一類故，觀為不空，謂有微細極寂靜住，離熾然等。

謂無麤重不寂靜住等者：城邑聚落人想，名有麤重不寂靜住及熾然等。今住阿練若想，相相違故，說彼為無，觀之為空。

未二、為趣離欲² 申一、明漸次² 酉一、思惟地等

又即於彼能取山林、卉木、禽獸等阿練若差別相想無復思惟，但思惟地，無別相想。又即於彼能取險惡、高下、不平、多諸荊棘、瓦礫等地差別相想無復思惟，但思惟地平坦細滑，猶如掌中，無別相想。

酉二、思惟空等

從此次第，除色想等，漸次思惟空處、識處、無所有處差別相想，後於非想非非想處所有相想作意思惟。

除色想等者：此中等言，等取有對想及別異想。取青等相，名為色想。能取行礙，名有對想。能取男、女、舍、田等假，名別異想。如五識身相應地意地決擇中說應知。（陵本五十三卷十七頁⁴²⁶⁷）

申二、辨空性

於一切處，如前所說歷觀空性，觀諸下地有麤想等，觀諸上地有靜想等。

午二、結

如是名為諸聖弟子，以世間道修習空性。

觀諸下地等者：謂下地中麤、苦、障想，名麤想等。及上地中靜、妙、離想，名靜想等。

當知為趣乃至上極無所有處漸次離欲。

巳二、依出世道² 午一、總修諦行² 未一、標究竟

自斯已後，修聖道行，漸次除去無常行等，能趣非想非非想處畢竟離欲。

未二、辨空性² 申一、空

彼於爾時，自觀身中空無諸想，謂一切漏一向寂靜，永離熾然。

申二、不空

又觀身中有法不空，謂此依止為緣，六處展轉互相任持，乃至壽住為緣，諸清淨法無有壞滅。

午二、料簡空住² 未一、標最勝

當知世尊於昔修習菩薩行位，多修空住，故能速證阿耨多羅三藐三菩提，非如思惟無常、苦住。

未二、結隨轉

是故今者證得上妙菩提住已，由昔串習隨轉力故，多依空住。

寅三、證修空性² 卯一、標列二種

復次，有二種空。一者、應所證空，二者、應所修空。

卯二、釋其障因² 辰一、別辨相² 巳一、於自正所應行而不能行² 午一、出不能行²

未一、標依雜住

若諸苾芻樂依雜住，於此二種不能成辦。應所證空不能證故，應所修空不能修故。

未二、廣其退失² 申一、略標列

因於二種不成辦故，當知退失四種妙樂。謂於一切攝受惡事遽務眾苦，皆悉解脫妙出離樂；解脫貪欲、瞋恚等事，初靜慮中妙遠離樂；尋伺止息妙寂靜樂；二解脫攝無所造作、無恐怖攝妙等覺樂。

當知退失四種妙樂等者：無惱害樂，說名妙樂。菩薩地中亦說有四，一出離樂，二、遠離樂，三、寂靜樂，四、三菩提樂。正信捨家，趣於非家，解脫樊籠居家迫迕種種大苦，名出離樂。斷除諸欲惡不善法，證初靜慮離生喜樂，名遠離樂。第二靜慮已上諸定，尋伺止息，名寂靜樂。一切煩惱畢竟離繫，於所知事如實等覺，此樂名為三菩提樂。（陵本三十五卷二十頁²⁸⁹³）今說四種妙樂，如次配釋應知。

申二、隨難釋² 酉一、釋二解脫² 戌一、標列

二解脫者，一、時愛心解脫，二、不動心解脫。

戌二、隨釋²

亥一、時愛心解脫²

天一、出體

若阿羅漢根性鈍故，於世間定是其退法，未能解脫所有定障，故名時愛心解脫。

天二、釋名²

地一、時

以退法故，時時退失，時時現前，故說名時。

地二、愛

於現法樂喜欲證住，故說名愛。

亥二、不動心解脫²

天一、出無退

不動心解脫者，謂阿羅漢根性利故，是不退法，一切皆以無漏道力而得解脫，於一切種都無退失。

於一切種都無退失者：謂於所證解脫及與現法樂住，皆無退失故。

天二、釋說義

當知此中，決定義是三昧耶義，餘如前說。

當知此中決定義等者：不動心解脫阿羅漢，於所證得現法樂住無退，非如鈍根阿羅漢或退不退，是名決定。此決定義，唯說現法樂住，非謂解脫，由是故說決定義是三昧耶義。由前已說：若諸無學，雖已證得心解脫意，而或失念心縱逸時，便有退失現法樂住。彼雖於此現法樂住或退不退，然無堪能退失解脫。由此義顯，諸阿羅漢煩惱解脫決定無退、無有差別，故此不說，是名為餘。

酉二、無所造作及無恐怖

無所造作、無恐怖者，當知無有異類可得，令阿羅漢心於中染，彼變異故，生愁歎等。

午二、廣所應行³ 未一、辨種類² 申一、應所證空² 酉一、標列

應所證空略有二種。一者、外空，二者、內空。

酉二、隨釋² 戌一、外空

外空者，謂超過一切五種色想，則五妙欲之所引發，於離欲真正能作證。

戌二、內空

內空者，謂於內諸行斷增上慢正能作證。

申二、應所修空

應所修空亦有二種。一、於內外諸境界中，修無我見；二、即於彼修無常見。

未二、出依止² 申一、標

此四種空，當知四行為所依止。

申二、辨⁴ 酉一、外空

外空，以內住心增上緣力，離所生樂滋潤其身為所依止。

酉二、內空

內空，以內外空，於內外法修無我見，及我慢遍知為所依止。

酉三、無我見

無我見，以即於彼修無常見為所依止。

酉四、無常見

無常見，以聞正法、如理作意為所依止。

及我慢遍知者：前說：內空者，謂於內諸行斷增上慢正能作證。由是此說我慢遍知為所依止。原文有誤，故移正之。

未三、明修學² 申一、出漸次³ 酉一、異生位⁴ 戌一、思惟外空

又於此中，若諸苾芻為離欲貪，精勤修學觀察作意增上力故，於欲界繫諸不淨相勉勵思惟。彼於外空未作證故，於其正道未善修故，趣染習故，於外空性心不證入，不愛樂故。

戌二、思惟內空

便於其中，由我慢門，心不流散等隨觀察，以寂靜相思惟內空。

由我慢門者：我慢遍知，名我慢門。由此為門，永斷我慢故。

彼由我慢未永斷故，於其正道未善修故，亦於此中心不證入。

戌三、修無我見

遂於內外一切行中，修無我見。於無我見未善修故，亦於其中心不證入。

戌四、修無常見

乃於內外一切行中，修無常見，令心不動。於諸行中見無常故，一切種動皆無所有，故無常見名不動界。

酉二、有學位

由於是處心無不勝解，故以正慧如實通達，或緣不淨、或緣慈悲、或緣息念所有境界，或緣諸行無常境界，於三摩地極多修習為因緣故，令心調柔，由是漸次於一切處皆能證入；由此因緣，於所證空能證圓滿。

酉三、無學位

因於所證得圓滿故，其心解脫一切能順下上分結；由此因緣，於所修空能修圓滿；因於所修得圓滿故，成就無學正見等法。

申二、略攝位

若於是時，乃至於空未能證入，當知此時是異生位；若時證入，是有學位；

若時修習已得圓滿，是無學位。

已二、於聖教出家正所應行亦不能行²

午一、出所應行³

未一、總標

為令此修得圓滿故，勤修正行，令心證入，以善尋思而正尋思。則於其中，能善知量，離諸雜染而起言說。

未二、別釋³

申一、善知量

於經行處能正經行，於所坐處能正安坐。於如是等一切處所，皆善知量。如是行時清淨為先，於其住時亦得清淨。

申二、離雜染²

酉一、總標觀察

其間能以觀察作意，數數觀察現行煩惱，淨修治心。如是能趣一向成就諸白淨法，一切魔怨所不能奪，及彼一切惡不善法四種雜染。

酉二、別列雜染

謂後有因性故，現法身心遍燒惱故，惡趣因性故，生等眾苦因性故。

申三、起言說²

酉一、標列

言說有二，一者、隨逐音聲勝解言說，二者、隨逐法隨法行言說。

酉二、辨釋

第一言說，是於正法受持、讀誦、請問、徵覈之所發起；第二言說，是於所緣令心安住究竟解脫施設教授之所發起。

未三、料簡²

申一、標應義

若為是義，如來出世，諸弟子眾隨入聖教，應勤修習如是善法。

申二、簡差別²

酉一、斥非

若於彼法毗奈耶中，無一切種所修梵行，當知亦無修梵行者；以於其中無梵行故，稱梵行者皆修邪行；師弟展轉互相觸惱，各自許有尊卑體式。

酉二、顯正

於正法中，二俱可得。

於正法中二俱可得者：謂一切種所修梵行，及修梵行者，於正法中俱可得故。

午二、明不能行² 未一、辨相³ 申一、隨順隨逐音聲勝解言說

若有棄捨大果大利，應所證空、應所修空為極下劣，有大罪過。利養恭敬愛味所漂，多習邪行。

若有棄捨大果大利等者：此中義顯，隨順隨逐音聲勝解言教，為其究竟，不修梵行，故作是說。

當知彼為大梵行災之所觸惱。

申二、耽著利養恭敬

彼由如是耽嗜愛著利養恭敬自逼惱故，於能隨順解脫言教不欲聽聞，雖為宣說，不能屬耳。

申三、彊聞無解不欲修行

或為貪著利養恭敬增上力故，而彊聽聞，無心求解，不欲修行。不為究竟善自調伏，乃至不為證般涅槃。

未二、結斥

由如是事，憎惡大師，行不平等，以於廣大現前恩德不能報故。

辰二、攝略義² 巳一、正顯出家障行因緣

當知此中總略義者，謂善說法毗奈耶中，既出家已，由四因緣，如於自己所應行而不能行，如於大師聖教出家正所應行亦不能行。

由四因緣等者：如下自釋，樂相雜住等義，名四因緣。由初因緣，當知於自己正所應行而不能行。由餘三緣，當知於大師聖教出家正所應行亦不能行。前已別辯，其相應知。

謂樂相雜住故；隨順隨逐音聲勝解言說故；耽著利養恭敬故；由此耽著增上緣力，聽聞正法，不修自利利他行故。

巳二、兼明世尊調伏方便

又佛世尊不欲自顯能善御眾，而攝徒眾，唯深哀愍諸有情故。由是因緣，於行邪行弟子眾中，能無護惜分明示語，寧使弟子由此分明麤利益語，現捨正法及毗奈耶，當獲利益，勿令住此廣興邪行。

瑜伽師地論科句披尋記卷第九十

瑜伽師地論科句披尋記卷第九十

六八五八